





Σ-VI-11





# ALEXANDRI P O L I T I

DE CL. REG. SCHOLARUM PIARUM

ORATIONES XII.

AD ACADEMIAM PISANAM.



L U C Æ, MDCCXLVI.

---

Ex Typographia Philippi Mariæ Benedini.  
CUM APPROBATIONE.



BENEDICTO XIV.<sup>III</sup>  
PONTIFICI MAXIMO.

Alexander Politus de Cl. Reg. Scholarum Piarum  
S. P. D.



Iqua unquam est, BE-  
NEDICTE, PONTI-  
FEX MAXIME, bonarum artium atque  
disciplinarum, quæ plurimùm ad

1 2

rem

rem Christianam contulerit, ea quidem certè in primis est eloquentia. Testes sunt locupletissimi, non Paulus modò, Christianæ eloquentiæ princeps, qui eloquentiâ suâ fulgurare, ac tonare, totumque terrarum orbem concutere visus fuit; sed etiam complures alii, qui verbis ac scriptis suis Religionem Christianam mirificè propagarunt, atque a gentium erroribus asseruerunt, viri oppidò quàm sapientes atque eloquentes, eoque eloquentiores, quò sapientiores, de Græcis quidem Clemens Alexandrinus, Origenes, Athanasius, Gregorii tres, Basilius, Johannes Chrysostomus; de Latinis verò Tertullianus, Lactantius, Ambrosius, Hieronymus, Augustinus, Hilarius, Leo, Gregorius Magnus.

De

v

De his Augustinus disertè testatus est, permultùm sese non ad eloquentiam modò, sed etiam ad sapientiam, ex Ciceronis Hortensio profecisse, eoque ex libro, incredibili animi æstu, ad sapientiam illam immortalem exarsisse, atque ad Deum, qui ipsa sapientia est, assurgere cœpisse. Hieronymus verò, ad eloquentiam comparandam, quàm deditus atque addictus Ciceroni fuerit, immo & quàm totus propemodum in Cicerone habitaverit, vel ægrotus ipse Hieronymus satis patefecit, cum ipse sibi ad summi judicis tribunal vapulare visus est, quòd esset Ciceronianus. Ac fuit illud quidem Hieronymi somnium, ut ipse ingenuè Hieronymus confessus est, cum objectum sibi a Ruffino perjurii cri-

men

men dilueret ( promiserat enim in somnis Hieronymus, profanos sese libros nunquam amplius lecturum ); sed tamen non vanum illud somnium fuit, qualia somnia illa, quibus, ut Hieronymus ait, sæpe nos deludimur; sed admonitio Hieronymo divinitus in somnis facta, ut ne ita sese in Ciceronis lectionem, immergeret, ac veluti ingurgitaret, ut propterea sacrarum litterarum lectionem, quemadmodum Hieronymus tunc adolescens faciebat, negligeret aut fastidiret. Quippe Hieronymum Deus divinorum librorum interpretem, doctrinæque Christianæ magistrum destinaverat. Neque verò a Cicerone ac Poëtis, ceterisque profanis Ethnicorum libris lectitandis unquam postea desistit

stitit Hieronymus, quod ipse palam ostentavit, neque inficiatus est Rufino; sed, quam ex iis libris, ac præsertim ex Cicerone, eloquentiam quæsierat, totam ad sacram Christianorum doctrinam illustrandam atque confirmandam convertit. Qua in re tantum abfuit, ut violati jurisjurandi religione vir sanctissimus unquam tangeretur, ut a Ciceronis etiam eloquentiâ viam, sibi muniendam ad Christianam eloquentiam judicaverit. Quo de viro sic ego statuo, non tam eum præclare, neque tam eloquenter, de rebus nostris, sive ad veritatem illustrandam, sive ad errores refellendos, scripturum fuisse, nisi, Cicerone lectitando, ad tantam illam eloquentiam ab ineunte sese ætate para-

paravisset, & , quam ex Cicerone eloquentiam didicerat, studio atque meditatione corroborasset. Atque hæc ego paucis de eloquentiâ, hinc ut omnes perspiciant, nihil penitus a majestate tuâ, & pontificatus tui maximi sanctitate alienum me facere, si tibi, qui rei Christianæ summâ cum potestate divinitus tibi traditâ præsides, dedicare audeo atque offerre Orationes ex iis nonnullas, quas ego de eloquentiâ ceterisque optimis disciplinis pro munere meo habui ad Academiam Pisânâ: quibus in orationibus meis non planè despero, meum qualecunque Ciceronis atque eloquentiæ studium, tanquam in imagine quadam ac vestigio, apparere. Sunt enim nonnulli, inepti sanè homines & supersti-



perstitiosi, qui, Hieronymi aucto-<sup>ix</sup>  
ritate abusi, quum sint ipsi bona-  
rum omnium artium rudes, studia  
hæc humanitatis atque eloquentiæ,  
tanquam ab homine Christiano aliæ-  
na, audent superbè reprehendere:  
qui Hieronymianum illud somnium  
quò tandem spectaverit, minimè  
omnium percipiunt. Ego verò li-  
benter fateor, adductum me ve-  
hementer exemplo Hieronymi at-  
que Augustini, jam inde a puero  
Ciceroni atque eloquentiæ, quàm  
potui diligentissimè, studuisse; &  
quanvis id, quod volebam, minimè  
perfecerim; tamen rectè me egisse  
arbitror, quòd studia illa qualia-  
cunque eloquentiæ mea ad sacras  
litteras excolendas atque ornandas  
referre voluerim. Neque enim elo-

b

quen-

quentem me unquam professus sum, a qua ego laude, quàm qui maximè, longè absum ; sed studiosum, duntaxat eloquentiæ. Inde autem, quòd sacris litteris tantopere profunt profanæ, Romani ipsi Pontifices, quorum maximè est, sacrosanctam Christi doctrinam sanctam te-ctam conservare, ac tueri, secundùm res divinas, nihil in rebus humanis habuisse antiquius videntur, quàm ut liberalium doctrinarum, atque eloquentiæ studia protegerent, &, quantum possent, promoverent. Unde etiam factum est, ut, quibus Pontificibus Romanis humaniores litteræ atque eloquentia magis floruerunt, eò etiam magis, iisdem Pontificibus, sacrarum litterarum studia, ad Christianæ do-  
ctri-

etrinæ usum atque ornamentum,  
vigerint. Atque hic ego, PATER  
BEATISSIME, ad gloriam Romano-  
rum Pontificum sempiternam, di-  
cam, quod neminem adhuc unum  
fatis animadvertisse, valde miratus  
sum, Latinarum, Græcarumque lit-  
terarum restitutarum gloriam Ro-  
manis in primis Pontificibus debe-  
ri. Hanc plerique omnes gloriam  
aliis vindicant, quorum quidem,  
laudibus tantum abest, ut ego  
quidquam detractum velim, ut  
etiam præclara eorum in litteras  
promerita ultrò atque palam præ-  
dicem. Sed cum ex superiorum,  
temporum memoriâ Pontifices Ro-  
manos repeto, Eugenium IV. Ni-  
colaum V. Pium II. Sixtum IV.  
Leonem X. & ipsos litteratissimos,

& litterarum atque litteratorum hominum summos fautores, quorum sanè temporibus bonæ omnes artes atque eloquentia, quæ septingentos jam annos veluti intermortuæ fuerant, reviviscere, ac recreari cœperunt; non possum non fateri, primas ac principes eorundem ipsorum Pontificum partes in bonis litteris instaurandis atque restituendis extitisse. Tantum eorum Pontificum fuit erga litteras ac bonos libros studium, & tanta erga doctos eruditosque homines liberalitas atque beneficentia. Clarissima horum Pontificum exempla, quum tibi, BENEDICTE, PONTIFEX MAXIME, ita in animo obversentur, ut ea non æmulere modò, sed etiam longo post te intervallo

relin-

relinquas, itaque litteras bonosque libros in oculis feras, ut vel propriam tibi ac selectissimam ex omni doctrinarum atque eruditionis genere Bibliothecam ad usum tuum ac tuorum diligentissime instruxeris, quid ego dubitem ad solium adire Sanctitatis tuæ, & nomini tuo libellum hunc meum, quem, tibi Romæ ab hinc prope annos quinque præsens obtuleram, aliquot nunc orationibus auctum, iterum consecrare? qui, si nullâ aliâ re, certè sese tibi qualicunque eloquentiæ nomine commendat. Quantum enim doctrinâ atque eruditione, plerisque Romanis Pontificibus, qui ante te fuerunt, antecellas, scripta uberrimè tua testantur. Spero equidem, PATER BEATISSIME, qualia-

cunque hæc meæ erga te obser-  
vantia officia non omnino tibi im-  
probatum iri : quæ si tibi probari  
fensero, multò his etiam pro viri-  
bus meis majora brevi me præsti-  
tutum confido. Vale. Pisis a. d.  
xv. Kal. Maji an. M.DCCXLVI.

## ALEXANDER POLITUS

LECTORI SUO

S. P.




*Ides Orationes duodecim meas de iis, quas ego bene multas jam inde ab anno M. DCCXXXIII dixi ad Academiam Pisanam. Sunt hæ veluti de multis eximia ac selecta, quæ ad rem præcipuè Academicam, instaurationemque ejus anniversariam, pertinebant. Neque in iis tamen est, quod tute valde mirere, Panegyricus, quem primus ego Etruscorum, mandante summo & Clarissimo viro, Petro Francisco Riccio, Academia Pisana Præside, Academia Pisana frequentissimâ audiente & plaudente, publico Academia ejusdem nomine, in magno doctissimorum hominum, civiumque Pisanorum cœtu, 10. Kalendarum Octobres, anno M. DCCXLV ex amplissimo & ornatissimo Academia loco habui de laudibus*  
Impe-

*Imperatoris Caesaris Francisci I. Pii, Felicis, Augusti, cum, accepto optatissimo nuncio, ritè eum comitiis Germanicis creatum esse Imperatorem Romanum, non Pisana modò Academia; sed universa etiam civitas Pisana, duce atque auctore, Petro Hieronymo Inghiramiò, Equite nobilissimo atque splendidissimo, urbi Pisana Præsfecto, lattiis omnibus incederet, & publicis votis atque supplicationibus gratias & gratulationes suas testaretur. Verùm hic Panegyricus majoris est operis & alterius loci. Nunc in his Orationibus, quas vides, edendis mos mihi gerendus fuit nostrorum hominum consuetudini, simul & consulendum auditoribus meis, qui magno earum desiderio tenebantur. Harum nonnulla lucem viderant Pisis. Octo etiam postea de his ipsis Orationibus prodierunt Romæ anno M.DCCXLII, quas ibi ego tunc præsens beatissimo Pontifici Romano Benedicto XIV. viro sanctissimo atque doctissimo, consecravi: uno nimirum post anno, quàm Eustathium meum in Dionysium Periegetam Francisco III. Lotharingo, Magno Etruriæ Duci, dedicaveram. Alia illis postea Orationes meæ additæ; eaque seorsum, partim a me, partim ab amatoribus meis, officiosis in me hominibus, divulgata. Singulas quum vidissem aliquo hominum favore exceptas, easque a me auditores frequentes mei,*  
*exem-*



*exemplaribus jam distractis, studiosè expeterent ac requirerent, rem iis gratam ac fortasse perutilem facturum me credidi, si in unum eas simul volumen, ex editione præsertim Pisanâ, referrem, iisdemque Maximi Pontificis auspiciis, cui octo illas primùm obtuleram, in manus hominum emitterem. Nihil hîc mihi ad ostentationem. Prodesse volui juventuti Academia Pisanæ. Satis me qualicumque huic meo Oratoris muneri fecisse putavero, si adolescentes, eloquentiæ variaque eruditionis perstudiosi, fructum ex his orationibus meis aliquem ceperint. Vale, mi Lector, & fave. Pisis a. d. XV. Kalend. Maji, anno M. DCCXLVI.*

ORA-



XIX

# ORATIONUM

## HOC VOLUMINE CONTENTARUM

## ELENCHUS.

### ORATIO PRIMA.

DE Litterarum Græcarum necessitate. pag. 3.

### ORATIO SECUNDA.

De liberalium omnium artium ac doctrinarum ad eloquentiam necessitate. 23.

### ORATIO TERTIA.

De Litteris Humanioribus. 47.

### ORATIO QUARTA.

De universo disciplinarum orbe. 69.

### ORATIO QUINTA.

De laudibus Lotharingicis & Mediceis. 93.

### ORATIO SEXTA.

De optimorum studiorum assiduitate. III.  
ORA-

## ORATIO SEPTIMA.

De lectionis assiduitate.	119.
---------------------------	------

## ORATIO OCTAVA,

De recto ordine studiorum.	151.
----------------------------	------

## ORATIO NONA.

De Humanarum Disciplinarum ad Religionis Christianæ usum opportunitate.	169.
--	------

## ORATIO DECIMA.

De Laudibus Academiæ Pisaniæ.	199.
-------------------------------	------

## ORATIO UNDECIMA.

De Laudibus Urbis Pisaniæ.	219.
----------------------------	------

## ORATIO DUODECIMA.

De nobilitate Litterarum.	245.
---------------------------	------

## ACCEDIT

Alexandri Politi De tribus Martyribus Bo- noniensibus ad Ubaldum Mignonium, Vi- rum Clarissimum, Epistola.	271.
--	------

PETRO . FRANCISCO . RICCIO  
 EQUITI . PRIORI . PATRICIO . ET . SENATORI  
 F L O R E N T I N O  
 VIRO . CLARISSIMO . ATQUE . AMPLISSIMO  
 ET . NOBILITATE . ET . JURISPRUDENTIA  
 ET . CONJUNCTIS . UTRIVSQUE  
 P A L L A D I S  
 ARMATAE . ET . LITTERATAE . STUDIIS  
 S P E C T A T I S S I M O  
 A C A D E M I A E . P I S A N A E  
 ET . ORDINIS . EQUESTRIS . S. STEPHANI  
 P R A E S I D I  
 PATRONO . OPTIMO . LITTERARUM  
 ALEXANDER . POLITUS  
 ORATIONEM . PRIMAM . SUAM  
 DE . LITTERARUM . GRAECARUM  
 N E C E S S I T A T E  
 QUAM . DICTAM . A . SESE  
 A D . A C A D E M I A M . P I S A N A M  
 ANNO . M.DCCXXXIII.  
 EI . POSTEA . IN . EUSTATHIO . SUO  
 IN . HOMERUM  
 ANNO . M.DCCXXXV.  
 DE . SE . BENE . MERENTI . PUBLICE . DEDICABAT  
 NUNC . DENUO . EDITAM  
 PRO . VETERIBUS . ET . RECENTIBUS  
 SUI . ERGA . EUM . OFFICIIS  
 MAXIMISQUE . EJUS . IN . ACADEMIAM . PISANAM  
 ATQUE . IN . LITTERARUM . STUDIA  
 P R O M E R I T I S  
 HONORIS . GRATIQUE . ANIMI . CAUSSA  
 L . M . Q . ITERUM . CONSECRAT .

A



# ALEXANDRI<sup>3</sup> POLITI

DE CL. REG. SCHOLARUM PIARUM



## ORATIO PRIMA.

### *De Litterarum Græcarum necessitate.*



Tinam tantum mihi ingenii, Auditores ornatissimi, tantum esset eloquentiæ, quantum res ipsa postulat, ut in hoc celeberrimo, atque ad dicendum amplissimo loco, hac litteratorum hominum, frequentia, hoc lectissimorum atque honestissimorum adolescentium concursu, verba ego facturus de linguæ Græcæ, atque adeo de litterarum Græcarum præstantiâ atque necessitate, parem argumento orationem invenirem! Nanque ipsa quidem argumenti magnitudo atque varietas, quo in argumento maxima sese ingenia sæpius exercuerunt, ipso statim dicendi initio, me ita perturbat ac propemodum obruit, ut, quid ego potissimum dicam, penitus ignorem, &, quæ aliàs mihi, vel cùm de gravissimis rebus disputarem, nunquam defuit, oratio hîc me mea deficere prorsus videatur.

A 2

Quid

Quid enim linguâ Græcâ ad omnem eruditionem accommodatius, quæ janua quædam est ad omnes disciplinas? Quid Græcis litteris uberius, atque copiosius? quid ad omnem doctrinam magis necessarium? quibus omnes doctrinæ uberrimè continentur. Nolite enim, errare, adolescentes, qui huc Pisas, ad hoc domicilium, ad hanc sedem sapientiæ, studio & ardore quodam animi incredibili, sapientiæ ipsius addiscendæ causâ, quàm frequentissimi convenistis. Nolite, inquam, existimare, cum de linguâ Græcâ agitur, leve quidquam agi, quod ad sapientiam parùm pertineat. Agitur in linguâ Græcæ negotio summa universæ doctrinæ, agitur orbis omnium disciplinarum, ipsa agitur sapientia, cujus summum certè apicem sine Græcæ linguæ cognitione attingere nunquam possitis. Quare, sive vos Poeticæ atque Oratoriæ studia delectant, sive tenet, quæ rerum humanarum sapientia est, Philosophia, sive eruditus pulvis ac reliquæ Mathematicorum disciplinæ invitant, sive Medicorum præcepta alliciunt, sive Jurisprudentia, sive antiquitatis cognitio, sive rerum divinarum scientia, quam Theologiam vocamus, oblectat, quancunque tandem sapientiæ partem sectemini, tum humanæ, tum etiam divinæ, illud apud vos statuite, ad perfectam atque exquisitam harum omnium rerum notitiam, linguam Græcam non perutilem modò esse, verùm etiam pernecessariam. Volo enim, vobis sit penitus persuasum, quod oratione meâ breviter ostendam, neminem quenquam sine Græcis litteris fieri posse perfectum, ac consummatum in doctrinis, hoc est, summe perfecteque doctum atque eruditum. Unde facile intelligatis, quò majori vos studio ad sapientiam nitimini, eò magis vobis esse in Græcas litteras incumbendum.

Ne-



## ORATIO PRIMA.

5

Neque vero, Auditores, Græcæ linguæ ad omnes doctrinas perfectè acquirendas necessitatem opus est altius repetere ex ipsâ ejusdem linguæ præstantiâ, & vi prorsus ejus admirabili ad res quaslibet atque naturas, animique nostri omnes omnino notiones, quæ infinitæ propemodum sunt, omnesque variæ, perfectissimè exprimendas. Quam quidem vim tantam esse volunt, ut sapientissimus Plato maximam partem sapientiæ in vocabulis Græcis interpretandis, eorumque origine indagandâ in Cratylo suo posuerit; eaque ipsa vocabula viri doctissimi proprietate quadam suâ res, quas significant, meliùs repræsentare affirmaverint, quàm si res oculis subjicerentur. Nam si vellemus quidem Græcæ linguæ laudes vel leviter attingere, & quæ de Græcæ linguæ dignitate sunt ab alijs magnifice atque ambitiose jactata, in medium proferre, longiùs sane excurreret oratio mea, quàm coarctatio hæc & angustia temporis patiantur. At enim, quò lingua Græca ceteris alijs linguis excellentior est, atque præstantior, eò etiam magis, quàm aliæ linguæ, est eadem necessaria. Nisi si fortè, quia alia est vocabulorum, quæ significant, alia rerum, quæ significantur, scientia, linguam quoque Latinam ad bonas litteras, atque ad majorum rerum doctrinas parùm necessariam judicemus. Nihil est enim Poëticæ, nihil Oratoriæ, nihil Dialecticæ artis, nihil Physicæ, nihil Geometriæ, Mathematicarumque disciplinarum, nihil Theologiæ, nihil denique reliquarum omnium artium, atque doctrinarum, quod a nostris hominibus non sit Etruscis libris traditum, atque eleganter sermone patrio explicatum. Et tamen quòd hæc ista maximam partem e Latinis sunt fontibus hausta, nemo ferè est, quin fatea-

teatur, eum, qui Latinè nesciat, tametsi Etruscè omnia didicerit, posse quidem doctum esse, bonisque artibus eruditum; perfectum tamen & consummatum in doctrinis esse non posse. Quod si Latina lingua adeo est ad summam doctrinam necessaria, ut sine eâ semidoctorum tantum numero quis habeatur; quid tandem censendum de Græca, quæ ad perfectam Latinæ linguæ cognitionem summopere est necessaria? Non equidem hic ego detractum quidquam velim linguæ Latinæ, cui tantam aliquando verborum copiam sermonisque ubertatem assereram, ut eam Græcæ penè exæquarem. Sed dico id, quod maximâ doctissimorum hominum consensione receptum comprobatumque est, quidquid est hujus linguæ Latinæ, sine Græcis litteris a nemine quoquam sciri posse, certe quidem perfectè atque accuratè. Quod ni ita esset, quid tandem in causâ esse existimarem, quamobrem Quinctilianus puerum a Græco sermone mallet incipere, & doctissimi quique viri unam linguam cum alterâ conjungendam præciperent? Scio, illam etiam causam asserri, quia disciplinæ nostræ a Græcis fluxerunt. Sed hæc etiam causa ostendit, perfectam Latinæ linguæ scientiam a Græcâ prorsus linguâ pendere. Et profecto quid est in Latinis, quod germanè Græcum non sit, aut Græcam certè originem non redolet? Græca sunt Latinæ linguæ vocabula, Græca Latinæ orationis structura, Græca Grammaticæ Latinæ præcepta. Nomina ipsa, quibus tum Grammaticen, tum reliquas fere omnes disciplinas appellamus, sunt Græca: neque ipsas tantum disciplinas; sed & res quaslibet omnium disciplinarum, Græcè nominamus. Poëticam aut Rhetoricam si explicamus, si de Dialecticâ differimus, si Physicen, si Ethic-

cen,

# ORATIO PRIMA.

7

cen, si Politicen docemus; si Medica, si Mathematica, si Theologica tractamus, quacunq; de re, aut arte disputemus, Græcis ubique vocabulis utamur, opus est, quæ trito jam usu longâque consuetudine, pro nostris, hoc est, pro Latinis ducuntur. Jam verò si nosmet ipsi ad scribenda carmina conferimus, tota hæc metrica ratio est Græcorum, neque ad summorum Poëtarum laudem adspirare nobis licet, nisi, summi Latinorum Poëtæ Virgilii exemplo, Poëtas nobis Græcos imitandos, & quantum possumus, exprimendos proposuerimus. Operam si damus eloquentiæ, ad Græcos oratores unicè æmulandos dux nobis & auctor, pater ipse Romanæ eloquentiæ, M. Tullius, qui sese totum ad Græcorum, atque in primis Demosthenis, exemplum conformavit atque effinxit. Quæ de causâ non immeritò visa est Quintiliano discipula Græcæ, facundia Latina. Dialecticæ si studemus, quæ scientia est disserendi, regulas omnes hujus artis, totamque inveniendi & dijudicandi rationem ut perfectè recteque teneamus, opus nobis est Græcis magistris, atque in primis Aristotele. Quæ enim de hac arte subtiliùs disputant Latini, omnia sunt ii a Græcis Aristotelis interpretibus commode atque opportune mutuati. Locus hic admonet, Auditores, ut, quod vulgo discrimen esse statuunt inter hominem, Dialecticæ artis penitus rudem, & eum, qui totam Dialecticam ex regulis ejus artis accurate diligenterque didicerit, id ego discriminis inter homines ponam, peritum alterum linguæ Græcæ, alterum ejusdem planè linguæ ignarum atque imperitum. Homo enim bono sanoque judicio, ingenioque perspicaci præditus, sed Dialecticæ expertus, scit ille quidem multa natu-

naturali acumine mentis suæ: neque ille tamen est perfectè sciens, quia nescit se scire; quia nimirum rationem illam scientiæ ignorat, quæ ex certâ atque evidenti ratiocinatione colligitur. Ita & homo Latine doctus, sed indoctus Græcè, scit ipse etiam multa, quæ de Dialecticâ, ac Philosophiâ, reliquisque omnibus disciplinis, Latinis sunt litteris copiose sciteque consignata; sed tamen scientiâ caret, perfectâ illâ atque exquisitâ, qua sciat se scire: quia nimirum vim minime intelligit eorum verborum, quæ majoribus quibusque doctrinis explicandis assignata sunt a Græcis, religioseque retenta a Latinis. Quid dico verborum? ne sententiarum quidem vim percipit, quæ reconditiores quasdam Græcorum doctrinas continent, neque eas tamen doctrinas satis patefaciunt, cum redduntur Latine. Age verò, reliquæ etiam disciplinæ, ad quas quendam veluti aditum aperire videtur Dialectica, quàm aptè ex Græcis litteris pendent, & cum iis connectuntur! quàm Græca est tota earum doctrina, nec nisi Græcè scientibus nota atque manifesta! Sententia fuit olim Ælii Stilonis de nostro Plauto, Varro- ni valde celebrata, Musas Plautino sermone locuturas fuisse, si Latine loqui vellent. Tanta in Comico illo Latine loquendi concinnitas atque elegantia. Quantò illud melius ac certius, Musas Græco sermone usuras fuisse, si disciplinas docere homines vellet! Nam quod est a doctis viris egregiè animadversum, Plautinum si sermonem Musæ adhiberent, meretricio eæ plebeioque more loquerentur. At si Musæ Græco sermone in liberalibus artibus tradendis usæ fuissent, sermone certe usæ fuissent maxime omnium ad sapientiam apposito atque accommodato. Quid autem

# ORATIO PRIMA.

9

tem dico, Græce Musas locuturas fuisse, si liberalibus artibus, universisque doctrinis erudire homines velent? Non ne enim & locutæ sunt Græcè, & nunc etiam Græcè loquuntur? Sunt enim Musæ, artes ipsæ liberales, ex Memoriâ & Jove, hoc est, intelligentiâ, procreatæ; ideoque novem numero esse dicuntur, quòd novem potissimum artibus liberalibus universa doctrina atque eruditio est comprehensa. Atqui artes omnes liberales loquuntur Græce, itaque loquuntur, ut non nisi Græco sermone tota earum doctrina bene perfectèque explicari possè videatur. Mathematicæ disciplinæ quid loquuntur, aut loqui etiam possunt, nisi Græce? quas scriptis suis mirum quantum illustraverint Euclides, Apollonius Pergæus, Archimedes, Pappus Alexandrinus, Theon Smyrnæus, Theon Alexandrinus, Proclus, Eutocius Ascalonita, Theodosius Tripolita, Serenus Antissensis, Ptolemæus. Philosophia, quæque partes ejus numerantur, Physice, Ethice, Politice, quid loquuntur, nisi Græce? ubi choros veluti ducunt Philosophorum maximi atque sapientissimi, Plato atque Aristoteles. Sed præsertim in Physicâ, in summâ illâ atque incredibili naturæ varietate, quàm longe, & quàm late Græcus semet sermo effert, ac veluti exultat! ubi naturæ auctor mundique opifex Deus sese in primis contemplandum objicit, ubi de naturæ causis, de cælo, de elementis philosophamur, ubi animalium, plantarum, lapidum, metallorum, mundi denique universi historiam, ad singulas rerum omnium causas exponendas, non minùs varie, quàm copiose, summæque cum animi nostri voluptate, conteximus. Horum omnium notitiam quàm necesse sit e Græcis auctoribus petere, exemplo satis

B

suo

suo palam fecit C. Plinius, is, qui non e Latinis modo scriptoribus; sed etiam maxime e Græcis, ex quibus illi ipsi Latini doctrinas suas maximam partem hauserant, naturalem historiam suam adornavit. O Plinianæ illius historiæ admirabilem non minùs, quàm sit naturæ ipsius, varietatem! Quali quantoque nos Latini thesauro caruissemus, si Græcæ Philosophiæ opes nobiscum Plinius in illo libro non communicasset! Quid enim unquam in naturæ thesauris latet, quod de Græcorum thesauris Plinius in Latinorum usum non deprompserit? Ferunt, historiam Animalium Aristotelicam maximo olim in pretio, permagnâque in admiratione fuisse, quam ut Aristoteles, summo vir ingenio summâque diligentia, certius atque exploratius conscriberet, aliquot hominum millibus usus est, qua venatorum, qua aucupum, qua piscatorum, aliorumque omnis generis, per quos de animalis cujusque naturâ certior fieret. Quanto porro admirabilior Historia illa Naturalis Plinii, qua non quinquaginta modo Aristotelis de animalibus volumina in arctum, ut ipse ait, collegit; sed etiam rerum in primis dignarum viginti millia, & totam naturæ universitatem, quantacunque ea est, ex scriptoribus centum, iisque præclaris, atque exquisitis, atque ex duobus ferme voluminum millibus, in suas veluti classes, pulcherri-mo ordine digessit atque disposuit! Et tamen tota illa Naturalis historia sine eruditione Græcâ perfecte intelligi non potest. Adde, quæ de Græcis habet Plinius, non omnia eum feliciter, neque exacte reddidisse: aliqua etiam eum ne intellexisse quidem. Adde loca, eaque non pauca, in quibus a vero penitus aberravit. In his igitur tute etiam simul erres, opor-

## ORATIO PRIMA.

II

oportet, nisi ad veram Græcorum scriptorum sententiam pervidendam lumen tibi Græcæ eruditionis præfulgeat. At in Medicis præceptis, ubi salus nostra ac vita agitur, aliquid offendere quàm grave est, quàm periculosum! Unde etiam facile colligas, quàm sint Græcæ litteræ ad rem medicam necessariæ. Magnus profecto Philosophus Plinius: sed & idem magnus medicus. Qui enim Plinio obtreçant, eos sane ne audiendos quidem putaverim. Bono ille publico natus, non satis habuit opes omnes naturæ de Græcorum scriniis proferre, nisi etiam optimis medicinæ præceptis corporum salubritati vitæque nostræ consulere. At enim, dum medicorum aliquando errata Plinius coarguit, quàm graviter & ipse aliquando decipitur atque errat! Quos quidem ejus errores, nisi ex Græcis scriptoribus, frustra nos emendaturos speremus: præsertim quum idem ipse Plinius disertè testetur, neminem antea Latino sermone ea, quæ ipse affert, morborum remedia perscripsisse. Unde evidenter appareat, illa eum omnia e Græcorum fere scriptis corrasisse. Sic omnia ferè e Græcis, quicumque olim alii, seu ante, seu post Plinium, Latinis litteris rem medicam tradiderunt, Scribonius Largus, Corn. Celsus, Isagoges vetus scriptor qui vulgo dicitur Soranus, Cælius Aurelianus, Q. Serenus, Theodorus Priscianus: ex quibus Corn. Celsus, quanvis, Quinctiliano teste, mediocri vir ingenio fuerit; tamen in legendis Medicis Græcis, maximeque Hippocrate, adeo profecit, ut aut Hippocratis fidus interpretes, aut Hippocrates ipse Latinus esse videatur. Quare ita isti omnes legendi, ut, ad perfectam rerum medicarum intelligentiam, Græcos, atque in primis omnis medicinæ parentem

B 2

Hip-

Hippocratem, identidem consulamus. Nam si nostrorum nonnulli Latinos potissimum medicinæ scriptores sunt postea secuti, ut de sese candide ingenueque proficitur Marcellus Burdigalensis; tamen, quum ii, quos secuti sunt, ex Græcis profecerint, fit, ut perfecta omnis medicinæ cognitio sit ex Græcis tandem repetenda. Quid ego jam dicam de jurisprudentiâ? Non est quidem nostrorum temporum, quod, florentibus Romanis rebus, vel in ipsâ urbe Româ aliquando in usu & consuetudine fuit, ut jurisprudentes Græcè de jure responsitarent. Sed, quando jam omnia fœdissimè barbaries inquinavit, & Romanarum fere consuetudinum oblitterata est memoria, nego, sine Græcarum litterarum scientiâ rectam sæpe haberi posse scientiam legum Romanarum; nego, vobis, perstudiosi juris civilis adolescentes, perspectum plane esse posse, quod vel in Codice Justiniano, vel in Constitutionibus Novellis, vel in venerabili ac sacrosancto Pandectarum volumine, atque adeo in Institutionibus ipsis Juris civilis, paullò interius magisque reconditum continetur. Quod enim in illo sapientiæ prudentiæque Romanæ thesauro inclusum est atque abditum, nobis quidem certe, qui ab illis temporibus, moribusque & ritibus tam longè absumus, apertum nunquam patensque fuisset, nisi illud Græci fusiùs distinctiusque explicassent. Neque enim tunc Romanis ea, quæ vulgò notissima, ac tritissima, erant, opus erat fusiùs exponi aut clarius. Inde ab illâ Romanarum legum ac sententiarum obscuritate tot illæ Græcæ in Florentino Pandectarum codice explanationes legum, inde Institutiones civiles a Theophilo Græcè interpretatæ, inde ab eruditione Græcâ  
tanta



tanta Romanis legibus lux allata. An ne igitur existimabimus, melius illa homines barbaros, & sæpe ridiculos, quàm Græcos, esse interpretatos? At enim barbaræ illæ & ridiculæ interpretationes per se satis declarant, quàm parum sit iis fidendum: quum præsertim barbari illi homines, ubi Græcis verbis Romanæ leges contextuntur, aut certè adsparguntur, suam Græci sermonis ignorationem ingenne, ne dicam impudenter, fateantur. Atqui sine Græcis sæpe ignorantur Latina. Et id sane quàm etiam interdum periculosè! quum sæpius fortunarum, aliquando etiam capitis periculum in non bene perceptis legum verbis agatur. Ex jure autem civili aptum est canonicum, & cum eo connexum: ut proinde jus canonicum non minus, quàm civile, linguæ Græcæ scientiam, ad perfectam Canonum, tum Græcorum, tum etiam Latinorum, intelligentiam, desideret ac requirat. Video nos jam, ceteris breviter percurfis disciplinis, ad reliquarum omnium disciplinarum principem ac magistram, ad Theologiam nimirum, quæ prima est princepsque sapientia, veluti gradatim pervenisse. Hic ego valde vereor, Auditores, ne, dum Græcas litteras ad divinarum rerum scientiam perfectè comparandam summopere necessarias demonstro, sese oratio mea ambitiosius jactare, & plus nimio efferre velle videatur. Ubi enim liberius aut certe libentius, excurrat atque expatietur, quam eo in campo, in quo sum ego tot annos Florentiæ atque alibi, nec sine aliquo fortasse auditorum meorum fructu, exercitatus? Quorsum autem his omnibus, qui sacras litteras profiterentur, lingua Græca non minus, quàm Latina, a sanctissimis sapientissimisque Patri-

tribus commendata fuit, nisi quia Græca non minus quàm Latina, est ad exactam atque exquisitam sacrarum litterarum notitiam necessaria? Fateor quidem libentissime, quod non nisi impudentissime negari potest, multos fuisse, & esse præstantes Theologos, qui, tametsi linguæ Græcæ subsidio destituti; tamen, ob excellentem Theologiæ scientiam, miris singularibusque laudibus celebrantur. Sed, ut illi multò sane doctiores excellentioresque fuissent, si Græca cum Latinis conjunxissent; sic etiam dico, posse quidem unum aliquem sine Græcæ linguæ scientiâ bonum esse Theologum; talem tamen Theologum, qualem nos quærimus, perfectum nimirum omnibusque numeris absolutum, esse eum non posse. Officium perfecti Theologi est, Christianos Patres, qui veritatem nobis divinam veluti per manus tradiderunt, mente suâ comprehendere. An ille mihi Patres comprehenderit, qui majorum gentium Patres Græcos, Gregorios tres, Athanasium, Basilium, Johannes, Chrysostomum & Damascenum, Cyrillum, Epiphanium, ne legere quidem possit, nedum ipse per sese intelligere? Officium perfecti Theologi est, verba ipsa sacrosanctorum Canonum, quibus capita quælibet Religionis Christianæ sunt a Latinis Græcisque Patribus in solemnibus conventibus certò definita atque explicata, discernere atque dijudicare. An ille mihi Græcorum canonum verba dijudicaverit, qui non nisi Latinam, qualiscunque ea est, eorundem verborum interpretationem percipiat? Officium denique perfecti Theologi est, singula Dei verba, quæ in sacrosanctos Canonicosque libros divinitus relata sunt, accuratè investigare, atque ex recepto probatoque Christianorum sen-

fenſu, diligenter exponere. An ille mihi divina Fœderis Novi verba, quæ certè quidem ſunt Græca, accuratè expoſuerit, qui ne intelligere quidem ea poſſit, niſi per interpretem Latinum? Nam ut interpretis hujus Latini editio vulgata maximam apud nos auctoritatem obtineat, eamque ex veteri conſuetudine, atque ex Patrum Tridentinorum decreto, pro authenticâ habere debeamus; tamen nonnulla ſunt ibi ambiguè dicta, nonnulla ſubobſcurè, in quibus ſit nobis omnino ad codices Græcos conſugiendum, ut perfectam atque accuratam ſingulorum Dei verborum intelligentiam ipſi per nos pro viribus aſſequamur. Adde cognitionem ſacræ antiquitatis, totiusque Chriſtianæ hiſtoriæ, quæ perfecto conſummatoque Theologo ad omnem doctrinam atque eruditionem valde eſt neceſſaria. Quàm turpiter docti & eruditi homines ex ignoratione linguæ Græcæ in ſacrâ aliquando hiſtoriâ errarunt! Invitus, fateor, partem hanc attingo orationis meæ, quæ de magnorum hominum, clariffimorumque virorum laudibus nonnihil detrahere poſſe videatur. Sed, quando argumenti huc me neceſſitas impulit, ac ferè nolentem coëgit, date mihi veniam, Auditores, ſi exemplum vobis aſſero, meo quidem iudicio, maximè omnium memorabile. Siquis favet, aut unquam favit Cæſari Baronio, ut favere omnes maximè debent, qui ſacræ hiſtoriæ ſtudio ducuntur, is ſum ego, Auditores. Atque ut omnes intelligant, me Cæſari Baronio tantum laudis dare, quantum alteri cuiquam vel clariffimorum virorum poſt renatas litteras, in ſacrâ certe hiſtoriâ, dandum unquam cenſuerim; dico, ſive operis magnitudinem, ac difficultatem, ſive hominis diligentiam, fidem,

eru-

eruditionem, judicium, attendas, majora esse Baronii in Christianam historiam merita, quam ut a quoquam æquari laudibus possint; neminem alterum æquè ac Baronium, oblivionis atque errorum tenebras, temporum ac rerum post Christum gestarum continuâ serie in conspectu positâ, ex sacræ antiquitatis memoriâ dispulisse; plus uni nos Baronio, quam ceteris simul omnibus, qui ab hinc ducentis & ampliùs annis res nostræ Religionis sacrosque ritus scriptis suis illustrarunt, debere. Satis opinor Baronium a me esse laudatum, itaque laudatum, ut nemo fortasse alter majores ampliorefque laudes Annalium Christianorum parenti, sacræque historiæ conditori, unquam impertiverit. Atque is tamen, vir talis, ac tantus, quod Græcè parum sciebat, in re oppidò gravissimâ, quippe quæ ad Sanctorum in primis virorum cultum ac venerationem intimè pertineret, erraverat quàm gravissimè. Siquidem Xynoridis cujusdam Martyris nomen in Fastis ipse Romanis probaverat, tanquam videlicet ex Johanne Chrysostomo: quum tamen Chrysostomus *Ευνορίδα*, non Martyrem nominet ullam feminam; sed par nobilissimum dicat illustrium ac præclarorum Martyrum, Juventini & Maximini. Itaque ea vox *Ευνορίς* a Græcis, atque etiam ab Hieronymo, cujus maximè auctoritate abutebatur Baronius, ad Græcorum exemplum, accipitur. Correxerit quidem postea Baronius errorem suum. Quod perspicuè apparet ex secundis ejus curis in Fastos Romanos, ex quibus suæ illius Xynoridis memoriam penitus delevit. Sed vos inde clarissimè perspicitis, quàm sint Græcæ litteræ non ad profanas modò; verum etiam ad sacras historias, atque ad omnem tum humanarum

rum, tum etiam divinarum rerum eruditionem necessariæ. Restat, Auditores, ut iis breviter occurrâ, qui ad res omnes Græcorum pernoscendas satis præsidii atque adjumenti collocant in interpretationibus Latinis. Quibus sanè imperitis hominibus ita ego occurrendum censeo, ut non proinde, id quod faciunt nonnulli, elevari quadantenus atque imminui velim Latinorum interpretum fidem atque auctoritatem. Est etiam nonnemo, qui genus hoc interpretum Latinorum in contemptum adducere minimè vereatur: quasi scilicet qui ad Græcos Latinè interpretandos operam suam atque industriam conferunt, homines sint ii tenuiori litteraturâ, qui, quum ex scriptis suis nomen in doctis atque eruditis habere nequeant, ex alienis scriptis interpretandis atque illustrandis nominis sibi celebritatem quærant. Ego contra sic sentio, ut Græcorum interpretandorum munus difficillimum est, ita viros longè doctissimos atque eruditissimos eos fuisse, qui bonos Græcos scriptores bene Latinè sint interpretati, atque illustraverint: qui quum ipsi potuissent boni scriptoris, oratorisque & poëtæ partes omnes explere, majorem tamen publicæ utilitatis, quàm laudis suæ, rationem habendam esse judicarunt. Quippe homines aliis, & non sibi tantum, nati, labores doctrinæque omnes suas eò referendas esse duxerunt, ut hominibus prodesse. Non magis autem sese illi nobis profuturos sperarunt, quàm si veteres illos Græcos, quos, tanquam homines sapientissimos, & de humano genere optimè meritos, tota semper antiquitas coluit atque celebravit, Græcos, inquam, illos, a quibus ad Latinos omnis doctrina, universæque eruditio manavit, nobis

legendos traderent, Latinè a sese interpretatos. Neque enim litteratis hominibus, quibus litteræ ad omnem modestiam moderationemque animi præluxerunt, nominis sui celebritas proposita esse debuit, sed communis liberalissimorum studiorum, studioforumque hominum utilitas. Absit igitur, longissimè absit, Auditores, ut quod docti viri publici boni causâ fecerunt, ut Græcos scriptores, Latinè a se versos, nobiscum communicarent, id nos iniquè in malam partem accipiamus, perinde quasi, quum non possent ipsi a suis, voluerint illi ab alienis scriptis inclarescere. Immo verò illud certò nobis penitusque persuadeamus, non potuisse illos Græcorum scripta tam bene ac laudabiliter interpretari, nisi summâ iudem eruditione, summâque doctrinâ fuissent, gratiasque iis agamus, quòd e fontibus Græcis rivos uberrimos omnium doctrinarum ad Latinos deduxerint. Nam quòd aliqui, quos ne interpretes quidem dici velim, utriusque linguæ parùm periti, illotis, ut ajunt, manibus, ad Græcos fontes aperiendos acceperint, unde lutulentæ ad nos spurcæque aquæ sunt derivatæ; non certè quidem propter horum istorum inscitiam, atque negligentiam, detrahendum est universo generi interpretum Latinorum. Odyssæam Latinè transtulit Livius Andronicus. Euhemerum, qui historiam de diis scripserat, Latinum fecit Ennius. Platonis Protagoram & Timæum, itemque Aratum, & Xenophontis Oeconomica, Demosthenisque & Aeschinidis adversarias orationes M. Tullius Latinè est interpretatus. Quid antiqua exempla commemoro? quando clarissima omnium sunt & testatissima recentiora. Quotusquisque enim est doctissimorum atque eruditissimorum viro-  
rum

# ORATIO PRIMA.

19

rum a trecentis ferè annis , idest , post litteras restitutas , qui non in Græcis Latinè interpretandis operam potissimum suam posuerit , atque inde non sit summam ipsè doctrinæ atque eruditionis laudem consecutus ? Itaque , quantum alii ad Græcæ linguæ præstantiam simul ac necessitatem extollendam Latinis interpretibus detraxerunt , tantum ego iis laudis , ad ejusdem linguæ præstantiam ac necessitatem augendam , impertiam . Nam ut summi illi viri in omni doctrinarum genere fuerint , ut artes liberales , disciplinasque universas , pro summorum Criticorum officio , egregiè calluerint , ut , propter eximiam utriusque linguæ peritiam , maximâ illi facultate ad Græcos scriptores enarrandos atque emendandos excelluerint ; tamen Græcæ linguæ tanta est vis atque dignitas , tanta copia atque varietas , ut nec Tullius , nec quicunque alii summo ingenio viri , quæ dicta sunt a Græcis , omnia Latinis vocibus perfectè semper expresserint , neque verò exprimere aliquando potuerint . Unde , disciplinarum atque artium liberalium percupidi , perstudiosique adolescentes , tandem aliquando intelligatis , melius omnino vos Græca esse percepturos , si Græca ipsi per vos legeritis . Quod quidem satis superque esse arbitror ad id , quod ab initio demonstrandum susceperam , sine Græcarum litterarum adjumento nullo modo fieri posse eum , quem in unoquoque vestrum , optimi Adolescentes , optamus ac quærimus , perfectè doctum , atque omnium omnino disciplinarum summè atque exquisitè scientem . Nec enim sperandum , quæ a Græcis de bonis artibus ac disciplinis sunt gravissimè ac sapientissimè conscripta , ea vos omnia perfectè per Latinos quoscunque interpretes es-

se intellecturos. O Græcæ igitur linguæ præstantiam! O beatam Græcæ linguæ ad omne genus eruditionis atque ad omnes disciplinas perfectè acquirendas necessitatem! Atque unde putatis, bonas litteras, artes omnes liberales, optimas omnes disciplinas tandiu squallore ac situ obsitas, jacuisse, nisi ex neglecto studio litterarum Græcarum? unde bonas litteras erectas ac restitutas revixisse, atque refluoruisse, nisi ex recreatis litteris Græcis, posteaquam nimirum Cosmus ille Medices senior, ejusque nepos Laurentius, afflictas tot jam sæcula Græcas litteras, ac propemodum intermortuas exfuscitarunt atque refecerunt? Quare, quòd in nobilissimo hoc ac florentissimo Gymnasio, præ ceteris aliis Italiæ totius Academiis, bonæ omnes artes tantopere vigeant, atque efflorescant, quòd Pisæ, veluti alteræ Athenæ, propriâ quadam præcipuâque appellatione, doctæ vocitentur, quòd cursus facilis hic vobis, atque expeditus futurus sit, Adolescentes, ad sapientiam atque ad universas doctrinas, debere vos beneficium hoc scitote litteris Græcis, ex quibus magistri vestri uberrimos doctrinarum omnium fructus ad eruditionem vestram retulerunt. Eorum ego vobis clarissima exempla propono, eos vos imitamini, ut, quemadmodum illi, Græcarum litterarum subsidio, summi ac perfecti in circuitu, & quasi orbe disciplinarum evaserunt, ita & vobis Græcas litteras ad summam rerum omnium scientiam pernecessarias existimetis.



GASPARI . CERATO  
PATRICIO . PARMENSI  
COMITI . EQUITI . PRIORI . ET . EQUESTRIS  
ORDINIS . S . STEPHANI  
PRAESULI  
ATHENAEI . PISANI . PROVISORI  
ATQUE . MODERATORI  
VIRO . MAXIMI . EXEMPLI  
ET . DE . ACADEMIA . PISANA  
OMNIBUSQUE . DOCTRINIS . OPTIME . MERITO  
ALEXANDER . POLITUS  
ORATIONEM . SECUNDAM . SUAM  
DE . LIBERALIUM . OMNIUM . ARTIUM  
AC  
DOCTRINARUM . AD . ELOQUENTIAM  
NECESSITATE  
QUAM . DICTAM . A . SESE  
AD . ACADEMIAM . PISANAM  
EI . POSTEA . IN . EUSTATHIO . SUO  
IN . HOMERUM  
ANNO . MDCCXXXV.  
HONORIS . ET . MEMORIAE . CAUSSA  
DEDICABAT  
NUNC . DENUO . PUBLICI . JURIS . FACTAM  
PRO . SUA  
ERGA . EUM . OBSERVANTIA  
SINGULARIQUE . EJUS  
IN . ACADEMICIS . STUDIIS  
PROMOVENDIS . VIGILANTIA  
AD . ACADEMIAE . PISANAE . GLORIAM  
ITERUM . CONSECRAT .



# ALEXANDRI<sup>23</sup> POLITI

DE CL. REG. SCHOLARUM PIARUM



## ORATIO SECUNDA.

*De liberalium omnium artium ac doctrinarum ad eloquentiam necessitate.*



Um multa majores nostri, ad ornanda litterarum studia, eaque in dies augenda, præclarè atque sapienter instituerunt, tum illud, meo quidem judicio, multò omnium præclarissimè atque sapientissimè, quòd eorundem ipsorum studiorum solemni de more instaurandorum initium ab excultâ aliquâ & elaboratâ oratione duci quotannis voluerunt. Nam si tantam quotidie experimur vim esse eloquentiæ, ut, quacunque de re copiosè ornatèque dicamus, auditorum animos, quò volumus, faciliè impellamus, unde volumus, deducamus; qualem tandem ac quantam apud honestos optimorum adolescentium animos vim ejus orationis futuram existimabimus, quæ  
ab

ab homine aliquo diferto, neque prorsus inerudito, ex hoc amplissimo loco, tantâ & tam celebri sapientissimorum virorum audientiâ, de re longè omnium, maximâ atque pulcherrimâ, de omni nimirum doctrinâ atque sapientiâ, paullò diligentius atque accuratius habeatur? Hanc qui causam habendæ hodierno die, orationis sibi huc usque ante oculos posuerunt, summâ viri doctrinâ atque eloquentiâ, magnifica inde atque in primis præclara orationibus suis argumenta de præstantiâ atque utilitate litterarum, deque earundem, fructu atque utilitate, aliaque talia, sunt difertissimè persecuti, quibus vos potissimum, præstantissimi adolescentes, vel desides a languore atque ignaviâ revocarent, vel ardentes jam atque erectos ad studium artium atque doctrinarum acrius cohortarentur. Verùm cum ego, Auditores, ad theatrum hoc amplissimum sapientiæ, virtutumque omnium seminarium oculos paullisper converto, cum sapientiam vestram, Patres amplissimi, summamque rerum omnium doctrinam, attentè mecum reputo, cum præclara ingenia vestra, adolescentes, contemplor, atque intueor, altius quiddam majores illi nostri respexisse mihi videntur, atque animo agitasse, cum in cursu hoc ineundo omnium disciplinarum primas veluti partes, totiusque cursus auspiciâ oratori atque eloquentiæ concesserunt. Infederat nanque in eorum animis species quædam perfectæ summæque eloquentiæ: quam dum cogitarent, atque, ad incendendos honestissimarum, omnium artium amore adolescentes, expressam etiam in aliorum animis vellent, diem hunc celeberrimum, proprium & quasi legitimum ostentandæ eloquentiæ esse debere censuerunt. Nec enim perfecta esse po-

rest

## ORATIO SECUNDA.

25

test eloquentia, nisi rerum maximarum scientiam, doctrinasque universas complectatur. Quod ut studiosis eloquentiæ ac litterarum adolescentibus sit penitus persuasum, illud mihi explicandum, quod est a M. Tullio accuratissimè disputatum, summam perfectamque eloquentiam ex omnibus simul doctrinis, omniumque liberalium artium scientiâ coalescere. Argumentum illud quidem sapientiâ vestrâ perquam dignum, Auditores, multòque etiam difficilius, quàm ut a me, qui nullâ sum planè eloquentiâ, commodè pertractetur. Sed, quando ii, qui auctoritate atque imperio plurimum valent, hanc mihi oratoris personam imposuerunt, finite me, Auditores ornatissimi, si non pro dignitate, pro viribus certè meis, personam hanc sustinere.

Ac primum velim, Auditores, vobis ante animum proponatis imaginem illam summæ perfectæque eloquentiæ, cujus qui compos fuerit, sit is summus perfectusque orator. Hic ego non disputo, utrum tali quisquam existat, aut etiam unquam extiterit eloquentiâ, summâ atque perfectâ: quando in magnâ Romanorum oratorum copiâ Marcus ille Antonius, vir, siquis alius, temporum suorum facilè eloquentissimus, ingenuè apertèque profitebatur, disertos a sese cognitos fuisse nonnullos, eloquentem adhuc neminem. Sed dico, iis omnibus, qui rectis ad eloquentiam studiis contendunt, statuendum esse ante oculos id, quod in eo genere perfectum est atque absolutum, eoque labores conatusque omnes esse dirigendos, atque ad summum illud exeniplum, unde cetera expressâ sunt, universâ esse studia conformanda: quò si minimè perveniant; tamen, quod aiebat Tullius, honestum est, sequentem.

D

pri-



prima, in secundis tertiisque confutere. Is igitur mihi eloquens, qui de omnibus rebus, quæ in hominum disceptationem veniant, pro rei cujusque naturâ, possit copiosè ornatèque dicere; qui rerum omnium, de quibus potest dicere, scientiam comprehenderit; qui, quæcunque aliarum omnium artium sunt, atque disciplinarum, quæque in reliquis omnibus studiis sunt longè latèque dispersa, ac propemodum infinita, unus omnia complexus fuerit, qui ad hanc tantam rerum maximarum scientiam ornatum etiam cultissimæ atque elegantissimæ orationis adjunxerit; cui rerum copia copiam quoque verborum largissimè suppeditet. Is denique mihi eloquens, qui simul & sapiens; atque ea mihi demum eloquentia, copiosè eloquens sapientia. Atque hæc omnia generatim damus oratori. Quod si etiam singula, ex quibus constat atque efflorescit eloquentia, enucleatè distinctèque persequimur, non ne omnia & singula ita in oratorem conveniunt, ut, si quid horum fortè desit, perfectus consummatusque orator nullo modo esse possit? Oratoris in primis est, purè atque eleganter, & quando res nobis est cum hominibus Latinis, Latinè loqui. Minimum id certè est in oratore, quod doctrinâ litterisque puerilibus traditum videtur. Sed hoc istud minimum, quod est Latinè loqui, quàm proprium est Oratoris? quàm Oratori præ reliquo hominum genere necessarium! Ceteris hominibus, qui alias artes atque disciplinas profitentur, licet etiam interdum loqui barbarè. Oratori siquid vel imprudenti exciderit minùs Latinum, nemo ei quisquam violatæ Latinitatis veniam dandam putat. Omnes eum unum irrident, exsibilant atque explodunt, perinde quasi ab arte ipse suâ proflus de-

fece-

## ORATIO SECUNDA.

27

fecerit. Et tamen istud ipsum, quod minimum est in arte oratoriâ, quanti est Oratori! quanti nobis æstimandum! Recognoscendi Grammatici, legendi Oratores, perdiscendi Poëtæ, Medici, Jurisconsulti, Historici, Philosophi, omnes ad unum Latinæ linguæ auctores dies noctesque pervolutandi, exemplaue inde quotidie repetenda, atque revolvenda, ut benè Orator loquatur Latine. Quid? Grammatica ipsa Latina quem sibi a reliquis omnibus disciplinis apparatus non addiscit omnis elegantiae atque doctrinae? Audeo dicere, quod mirum fortasse alicui videbitur; sed tamen est dicendum, artem ipsam Grammaticam perfectam minimè omnium fore, nisi omnium prope modum maximarum rerum scientiam in fines & ipsa suos concludat. Quid est enim vel in majoribus disciplinis tam abstrusum, tam reconditum, tam a vulgari intelligentiâ remotum, quò Grammatica non pervadat, non penetret, non pertineat? Quid in Poëtis tam obscurum, quod illa non illustret? quid in Historicis tam involutum, quod illa non evolvat? quid in Philosophis tam difficile, quod illa non expediat? quid in reliquis omnis generis scriptoribus tam ignotum atque ambiguum, quod illa non explicet atque interpretetur? Quos autem Poëtas, quos ex omni doctrinarum genere scriptores non excutiat Grammaticus, non perlegat, non enarret, non corrigat, non judicet? Hæc verò omnia quî præstare queat bonus ille & peritus Grammaticus, nisi cognitis perceptisque rebus omnibus, quas ex omni disciplinarum genere quomodocunque complexi fuerint, sive etiam obiter attigerint, tum prorsâ, tum vinctâ numeris oratione, optimi illi & præstantissimi

D 2

Lati-

Latinitatis auctores? quî eorundem judicem atque censorem ille agere, qui non sit ipse etiam omni scientiâ excultus, planèque quinquertio, hoc est, in universo doctrinarum orbe, quàm qui maximè, exercitatus? qualem prorsus apud Græcos fuisse accepimus Eratosthenem. Ut jam Grammatica non exiguis quibusdâ, atque angustioribus finibus terminetur; sed fines longè suos ad omnem doctrinam propaget, & per omnes latè disciplinas pervagetur. Magna hæc sunt (quis enim veltrum non fateatur, Auditores?) sine quibus stare jam nequit scientia perfecta linguæ Latinæ. Atque hæc tamen quædam veluti elementa sunt eloquentiæ. Itaque hæc omnia probè teneat, opus est, perfectus orator, ac præterea de his omnibus copiosè dicat, atque ornate: neque tantùm, quod proprium est Grammatici, verba perdiscat, oportet, omnium disciplinarum; sed & res ipsas omnium disciplinarum oratione augeat atque amplificet. Sententia fuit illa nobilis in primis & præclara Aristotelis, initio Rhetoricorum, eloquentiam quasi ex alterâ parte respondere Dialecticæ. Quam quidem sententiam ita exponit Marcus Tullius, ut dicere velit Aristoteles, hanc, rationem dicendi esse latiore; illam, loquendi contractiore. Fuit illa etiam percelebris & pervulgata in eandem sententiam, utriusque artis comparatio, qua princeps ille Stoicorum Zeno ita Rhetoricam cum Dialecticâ contendebat, ut contractæ in pugnum manui Dialecticam, manui explicitæ & dilatatæ sinilem eloquentiam esse diceret. Tanta est, tamque arcta, atque conjuncta artis unius cum alterâ necessitudo. Qualem igitur, & quantum oratorem futurum putamus, qui sit idem Dialecticâ dif-

fici-



## ORATIO SECUNDA.

29

sciplinâ egregiè institutus, qui de propositâ qualibet re possit in utramque partem copiosè simul ac subtiliter disputare, qui cujusque rei naturam explicare possit definiendo, partes dividendo, proprietates judicando atque ratiocinando, qui denique ex ceratinis, aut crocodilinis, spinosisque quibusque quæstionibus sese ipse expediat, aditumque sibi ad omnem veritatem, atque doctrinam muniat atque patefaciat! Magnus ille profectò orator; sed nondum tamen ille, quem adhuc quærimus, & oratione, quantum possumus, effingimus, ille, inquam, perfectus omnibusque eloquentiæ numeris absolutus. Quàm multa enim alia in oratore, ut vera sit ejus & plena, & corroborata, & perfecta eloquentia, requiruntur! Quis enim hominum mentes, in quamcunque partem voluerit, impellat? Orator. Quis ab irâ ad lenitatem, ab odio ad misericordiam revocet? Orator. Quis jura civitatis constituat ac moderetur? Orator. Quis populo leges pro universæ reipublicæ salute ac dignitate aut jubendas aut vetandas persuadeat? Orator. Quis artes omnes liberales, quæque ad vitam humanam aut tuendam aut ornandam pertinent, oratione illustret? Orator. Res quoque olim gestas, quæque veteri memoriâ continentur, quis nitidè ornatèque commemoret, nisi Orator. Orator Physica, Orator Mathematica, Orator medica, Orator civilia, Orator omnia, tum humana, tum etiam divina, omni copiâ & varietate orationis persequitur. Deum ipsum, quo nihil majus, nihil melius, nihil perfectius, non modò verbis exprimere, sed ne animo quidem concipi potest, pro humani ingenii captu atque imbecillitate, quis verbis meliùs adumbret, aut summæ ejus infinitæque majestatis, quæ

omnia

omnia ambit ac continet, expressiorem dicendo imaginem referat, quàm Orator? O igitur mortalem, quendam inter homines Deum Oratorem! o rerum humanarum dominam, o reginam eloquentiam! Et quid porro magis divinum, quàm unum hominem, scire omnia, quæ sciri ab homine possunt, & quæ in aliis aliarum quaruncunque professionum hominibus maximè enitent genera singula doctrinarum, ea sibi unum illum hominem universa vindicare? Nisi si quis fortè tantam illam tamque diffusam, atque, ut ita dicam, luxuriantem eloquentiam circumcidere velit, atque amputare, & Oratorem ex tantâ illâ doctrinæ amplitudine intra forenses duntaxat cancellos concludere, atque coercere. Quæ certè fuisse videtur opinio nonnullorum Græcorum, atque in primis etiam fortasse Carneadis apud Marcum Tullium, excludendum nimirum esse oratorem ab omni elegantia doctrinæ, rerumque majorum scientiâ, ac tantum in iudicia, & conciones detrudendum. Quod ut Græcis illis concederemus, eum nimirum statuendum esse oratorem, qui tantummodò in iudiciis, aut apud populum, copiosè loqui posset; tamen, quod Crassus ille Tullianus præclare animadvertibat, huic isti forensi Oratori quam multa essent tribuenda! perfecta juris civilis ac legum cognitio, exacta atque accurata humanorum morum notitia, æquitatis ac temperantiæ, reliquarumque omnium virtutum exquisita scientia, patriarum olim consuetudinum, totiusque antiquitatis, stabilis fidelisque memoria. Dicendum enim huic oratori de jure civili, de religione in Deum, de pietate adversus parentes, de charitate patriæ, de bello, de pace, de amicitia, de officio, de æquitate. Agendum

## ORATIO SECUNDA.

31

dum est ei de omni virtutum genere, tractandi mores humani, permovendæ in omnes partes hominum voluntates, inculcandæ consuetudines patriæ, veteris memoriæ exempla recolenda. Hæc omnia forensi huic oratori ad munus suum ritè explendum tribuenda: quæ si adsunt, ut debent, omnia, quid tum quæso locorum Philosophiæ, quid elegantioris doctrinæ, quid rerum maximarum ignotum ei oratori, minimèque exploratum fore unquam putabimus? Quid si præterea ad forenses ipsas causas nonnulla etiam ex obscuriori aliquâ disciplinâ, atque ex reconditis interioribusque litteris assumenda? quod est a Crasso illo Tulliano diligentissimè atque accuratissimè pertractatum. Non ne forensi quoque oratori ad summam ejus generis eloquentiam maximarum quarumcunque rerum ac disciplinarum scientia necessaria? Tete appello, Romanæ eloquentiæ pater, Marce Tulli. Tete, inquam, appello, oratorum omnium, qui sunt, qui fuerunt, qui etiam erunt, facilè eloquentissime. Quis enim te magis, aut etiam melius, in forensibus causis exercitatus? Non ne, cum pro Archiâ illo tuo publico in judicio diceres, disertè liberèque confessus es, suppetere tibi non potuisse, quod quotidie in tantâ varietate rerum diceres, nisi animum tuum doctrinâ excoluisses: Ita est, Auditores. Non ex usu tantum forensi; sed & maximè ex doctrinæ atque ex sapientiæ studiis censenda est forensis ipsa oratio: in qua ut orator non omnia semper elegantis doctrinæ ornamenta adhibeat; tamen indefatis apparet, utrum rudis, an bonarum omnium artium peritus, ad dicendum accesserit. Quanquam autem hæc ita sese habent, ut ne forensis quidem orator perfectus consummatusque in suo genere esse possit,

fit, nisi & idem fuerit omnibus optimis disciplinis instructus ac perpolitus; adeò ne tamen eloquentiæ maiestatem atque dignitatem minuendam censebitis, Auditores, ut eam, tamquam regno suo spoliata, in forenses illas angustias, tanquam in aliquod pistrinum, contrudatis? Quid enim ubique rerum, quid artium, quid cogitationum mentis nostræ, non subiectum sit orationi? & quâ propositâ de re non dicat ars ipsa, bene dicendi? Quod si de omnibus omnino rebus possumus dicere; cur non etiam de omnibus benè dicere? hoc est, & scienter, & compositè, & ornatè, & copiosè dicere. Hæc est autem illa vera, illa perfecta, illa omnibus numeris absoluta eloquentia: quæ qui præditus sit, eum nos dicimus nullius expertem esse ornamentis; sed omnium rerum magnarum, omniumque artium ingenuarum scientiam tenere, atque, ut uno omnia verbo complectamur, compotem eum esse sapientiæ. Quis apud Homerum eloquentior Nestore? cuius ex linguâ melle dulcior fluebat oratio. Nemo etiam quisquam apud Homerum Nestore sapientior. Neque frustra rex ille regum Agamemnon optabat, ut Nestoris similes decem haberet. Quod si ei contigisset, minimè dubitabat, quin brevi Troiam esset expugnaturus. Quis eloquentior Platone? quem sic uberem ac copiosum in dicendo fuisse ajunt, ut, si Græcè Juppiter loqueretur, Platonis instar locuturus fuisset. Fuit ille etiam sapientissimus; neque immeritò ipse habitus fuit quasi quidam Deus philosophorum. Quis in dicendo præstantior Aristotele? qui etiam eloquentissimis viris visus est flumen fundere aureum orationis. Certè quidem Aristotele nemo quisquam fuit, qui plura arti Rhetoricæ ornamenta atque adjumenta sub-

subministraret. At enim tantus hic rhetor, fuit etiam summus philosophus, quem propter sapientiam junctam eloquentiæ, Philippus Macedo Alexandro filio doctorem accivit. Quis etiam in eloquendo divinius Theophrasto? qui a divinitate loquendi Theophrastus est appellatus. Fuit & ipse magnus philosophus, ac prope modum divinus, quem philosophiæ, doctrinarumque omnium studia tanto ardore persecutum esse ferunt, ut vel moriens naturam accusaverit, quod cervis & cornicibus vitam diuturnam, hominibus exiguam dedisset: quorum si vita esset longinquior, omnibus perfectis artibus, omni doctrinâ facile erudiretur. Quid plerosque alios, de Græcis potissimum, commemorem, quod eloquentiores, eò etiam ab omnibus iis artibus, quæ sunt libero homine dignæ, atque a sapientiâ instructiores? Quid Periclem illum Atheniensem, tantâ virum eloquentiâ, ut fulgurare, ut tonare, ut permiscere Græciam diceretur? eum maximarum rerum scientiâ imbuerat physicus ille Anaxagoras. Quid Hippiam illum Eleum, virum, quàm qui maximè, eloquentem? quem fama est quinquennali Olympiacorum ludorum celebritate summam illam suam in omni rerum genere eloquentiam cunctæ penè Græciæ audienti, maximâ hominum admiratione, ambitiosius venditasse. Ille Geometriam, Musicam, Grammaticam, Poëticam, Physicam, Ethicam, Politicam, artes omnes omnesque doctrinas perdidicerat. Quid Gorgiam illum Leontinum, quem primum memoriæ proditum est in conventu poposcisse, qua de re quis vellet audire? omnium ille rerum atque artium scientiam fuerat consecutus. Quid Xenophontem, cujus voce Musas quasi locutas crediderunt? permultum ille in So-

craticâ philosophiâ profecerat. Quid patrem illum eloquentiæ Isocratem, cujus æmulatione motum fuisse Aristotelem ferunt, ut rerum cognitionem cum orationis exercitatione conjungeret? Nihil sanè videtur Isocrati de maximarum rerum scientiâ abfuisse, de quo adhuc adolescente extat in Phædro Platonis gravissimum judicium Socratis, viri multò omnium sapientissimi, jam tum in hominis illius mente notam philosophiæ quandam minimè obscuram fuisse. Quid principem illum oratorum atque eloquentiæ Demosthenem, ad quem audiendum, propter summam vim dicendi, concursus ex totâ Græciâ fieri solitos tradiderunt? Platonem Demosthenes frequenter audisse, plurimùm etiam læstitavisse dicitur. Quid? Dies me deficiat, Auditores, si magnos illos Græciæ oratores velim singulos enumerare, qui non tam ab eloquentiâ, quàm a doctrinâ & sapientiâ, ex qua ipsa eorundem eloquentia extitit, percelebrantur, Thrasymachum Chalcædonium, Protagoram Abderitam, Prodicum Chium, Lyfiam, Æschinem, Hyperidem, Demetrium Phalæreum, alios illos bene multos, ac propemodum innumeros principes eloquentiæ, quos ex Isocratis ludo, tanquam ex equo Trojano heroës, prodiisse memorant? Quid si enumerare etiam velim Latinos? Lucium Crassum (mitto enim Marcum illum Catonem Censorium, oratorem, ut priscis illis temporibus, satis bonum, atque eloquentem) Marcum Antonium, Q. Scævola, Q. Catulum, Publ. Sulpicium, C. Cottam, Q. Hortensium, Cajum Licinium Calvum, C. Julium Cæsarem, M. Brutum, ceteros oratores Romanos, litteris ac doctrinâ non minis claros, quàm eloquentiâ, quos in Bruto suo (quid enim & posteriorum tem-

temporum oratores referam?) acerrimo judicio persequitur, ac recenset M. Tullius, ipsumque Marcum Tullium Ciceronem. Quem, Deus bone, oratorem, nomino, cum Ciceronem nomino? cujus nomen non hominis jam nomen est, sed eloquentiæ, ut in uno jam Cicerone, tanquam in perfecto quodam eloquentiæ exemplo, conquiescendum nobis tandem esse videatur. Quis enim in dicendo perfectior Cicerone? quo, tanquam regulâ, progressus in eloquentiâ suos metiantur, opus est, quicumque eloquentiæ studia exercent. At enim Cicerone quis etiam sapientior? quis reconditis interioribusque litteris eruditior? quis in omni optimarum disciplinarum genere versatior? qui sese totum ad sapientiam applicaverat; qui, quum a Q. Scævola jus civile didicisset, principi Academiæ Philoni totum sese in philosophiâ erudiendum tradiderat; qui sub Stoico Diodoto sese in Dialecticâ studiosissimè exercuerat, variisque ejus philosophi liberalissimis artibus atque multis plurimum operæ dederat; qui omnia, quæ ad sapientiam atque ad variam eruditionem pertinerent, quæsiverat, audiverat, legerat, disputaverat; qui, quum celebre jam nomen esset in foro adeptus, Athenas profectus, studium philosophiæ, a primâ adolescentiâ cultum, & semper auctum, auctore ibi, & doctore Antiocho, veteris Academiæ nobili in primis philosopho, renovaverat. Proh, Deus immortalis! tanti ne fuit Ciceroni, eloquentem fieri, ut, eloquentiæ comparandæ causâ, nullum non doctrinarum genus inquireret, nullam non philosophiæ partem summo studio prosequeretur, totamque etiam Asiam eo consilio peragraret, ut doctissimorum virorum præceptionibus eloquentiam suam

corroboraret atque perficeret? Tanti profectò fuit, Auditores. Neque enim, nisi Cicero maximarum rerum & pulcherrimarum copiâ pectus suum onerasset, nisi philosophiam, matrem illam omnium non modò benè factorum, verùm etiam benè dictorum, impensius excoluisset, nisi exquisitoribus iis litteris, ex quibus, tanquam ex fonte, manat perfectâ eloquentia, diligentius studuisset, nunquam (mihi credite, Auditores) ad tantam illam, tamque admirabilem ac divinam eloquentiam pervenisset. Quòd sicui mirabile videtur, scientiam rerum tantam, quantam ad perfectam eloquentiam requirimus, in mentem unius hominis posse unquam cadere; illud verò multò est mirabilius, posse unum aliquem, qui non omnia illa sciat; tamen de illis omnibus, perinde quasi ea omnia apprimè sciat, & ornatissimè & copiosissimè dicere, quod est proprium perfecti oratoris. Et quid tandem aliud esse causæ putatis, quamobrem perfecti oratores tam pauci ex omni hominum memoriâ reperiantur, nisi quia eloquentia, ut bene agebat Tullius, majus est quiddam, quàm homines opinantur, & pluribus ex artibus studiisque collectum. Id autem quum sit multò omnium difficillimum, nimirum unum hominem in hac nostrâ vitâ tam brevi, & occupationibus tam districtâ, scientiæ cogitatione omnia comprehendere, quæ oratione variè copiosèque illustrentur; quid mirandum, si, quum in omni alio disciplinarum genere permulti homines perfecti floruerint; tamen in hoc genere eloquentiæ perpauca, atque adeo paucissimi, perfecti summique homines excelluerint? Quod argumentum, per sese satis amplum atque magnificum, altius multò atque excel-



## ORATIO SECUNDA.

37

excelsius exaggerat Marcus Tullius. Summi enim viri omnique ferè ex parte perfecti, per Deum immortalem, quàm multi in Dialecticâ omnique philosophiâ! quàm multi in Geometriâ, reliquisque Mathematicis disciplinis! quàm multi in re medicâ, in jure civili, in quibusque aliis optimis artibus ac doctrinis! Quotus verò quisque est in tanto disertorum numero, atque in tantâ discentium multitudine, qui eloquentiam omnibus suis partibus ac numeris expleverit, atque absolverit, orator? paucissimi equidem sunt ex omni doctissimorum hominum numero, atque ex omni temporum memoriâ, perfecti oratores, unus fortasse aut alter; &, si per vos licet, Auditores, ego etiam dixerim, perfectum oratorem neminem adhuc unum extitisse. Quid, an non illi eloquentes, an non illi oratores perfecti, qui tamen sunt a me in eloquentissimis totius antiquitatis hominibus adnumerati, Græcæ Latinæque eloquentiæ, ut ii quidem videntur, principes atque auctores? Absit verbo invidia, Auditores. Nemo illorum unus satis eloquens, nemo prorsus perfectus & absolutus orator. Etsi enim viros eos dixi eloquentissimos, eosque vobis, adolescentes, tanquam absolutum quoddam perfectæ eloquentiæ exemplum, ad imitandum proposui, ipsorumque ego eloquentiam summis ad cælum laudibus extuli; tamen apertè cum Quintiliano palamque profiteor, me ita ex vulgi consuetudine esse locutum, ut cùm hominem quendam sapientissimum atque prudentissimum prædicamus: cui tamen multum deest ad sapientiam, multum ad prudentiam. Nam si dicta mihi mea ad fidem atque ad regulam exigenda sunt veritatis; sunt illi quidem, quos,

quos, eloquentiæ causâ, nominabam, tolerabiles ac boni etiam plerique oratores: sed tamen longè iidem absunt ab eloquentiâ. Quid? an non eloquens Demosthenes? an non eloquens M. Tullius? quorum alter Atticam eloquentiam usque eò corroboravit, ut Athenæ nunquam antea visæ fuerint eloquentiores; alter Latinam eloquentiam genuisse etiam in urbe Româ dictus est, nedum corroborasse. Quod bonâ veniâ vestrâ dictum sit, Auditores, ne Demosthenes quidem satis mihi eloquens, neque verò Marcus Tullius. Sint magni illi viri, quantum vultis, ac prorsus admirabiles (quis enim neget) in dicendo: tantum illi studio atque industriâ in eloquentiâ profecerint, quantum nemo adhuc quisquam mortalium: tales denique sese illi ad eloquentiam duces ac magistros præbuerint, quales studiosus quisque eloquentiæ certissimè æmuletur. Esto. Quid tum? an ne idcirco perfectus orator Demosthenes, qui ob dura quædam atque intolerabilia verba valde reprehensus fuit, atque exagitatus ab Æschine, qui neque Ciceroni satisfacit, nec semper aures ejus implet, qui ut unus inter ceteros in omni genere dicendi emineat; tamen secundus videri possit a Cicerone. Quid enim si Tullium, quod mihi semper visum fuit, quadantenus præferam Demostheni? Eloquentior enim quum mihi orator quisque, quò sapientior, esse videatur, atque eloquentiam sapientiâ metiendam putem; sic autem Cicero Platonem in Philosophiâ æmulatus fuerit, ut Platonis ubique sapientiam adæquaverit; cur, quantum divinus ille philosophus Plato videtur sapientiâ Demostheni præstitisse, non ego tantum Ciceronem.

De-

## ORATIO SECUNDA.

39

Demostheni eloquentiâ anteponam? Quid si igitur in comparatione hac Demosthenis ac Ciceronis, gravissimorum quorundam scriptorum judicio me audacter opponam? quid si Tullium præferam? Non ne, quod Tullius eloquentior Demosthene fuerit, oratorumque etiam princeps fuerit judicatus, ideo etiam videri possit veram illam & absolutam eloquentiam, quam nos tandiu, & tam anxie quærimus, obtinuisse? Non ego equidem puto, Auditores, neque ita olim putarunt reprehensores illi Ciceronis, Brutus ac Calvus, & Asinius uterque Pollio, neque, quod maximi momenti est, ipsè de semet ita putavit magnus alioquin æstimator sui, Marcus Tullius: qui quum celeberrimus jam orator evassisset, atque in causis agendis satis esset versatus; tamen Moloni Rhodio, actori optimo causarum, castigandum sese ac retractandum tradere non dubitavit, ut suam illam nimiam redundantiam, quantum posset, coerceret. Videbat enim Tullius, quam longè ipsè distaret a formâ illâ eloquentiæ, quam animo comprehenderat, neque adhuc tamen affectus fuerat. Quod si redundans illa & nimia eloquentia fraudi in primis fuit maximo illi oratorum Ciceroni, ne veram & absolutam eloquentiam consequeretur (nunquam enim satis nimium illud eloquentiæ suæ reprimere potuit, ac coercere) quid illis nunc fiet sequioris corruptiorisque ætatis oratoribus, qui luxuriam quoque, si Deo placet, diffuentis otiosâ quadam loquacitate orationis laudi sibi esse ducunt, atque ornamento, quique nervos omnes industriæ suæ in eo continent, ut vel Cicerone redundantiores atque abundan-

dantiores ipsi esse videantur? Quorum sanè e mentitâ eloquentiâ decepti sæpe adolescentes, sic eos, tanquam deos quosdam eloquentiæ, colunt, ac venerantur, ut jam Ciceronem arroganter superbèque fastidiant, neque Ciceronem sibi displicere, certè non satis placere, fateri erubescant. Videtur enim iis Cicero, præ oratorum istorum suorum copiâ videlicet atque ubertate, nimis pressus, penèque aridus atque jejunus: cui tamen veteres, meliores, ni fallor, dicendi auctores atque magistri, nihil adjici posse censuerunt. Eant phalerati isti, & plusquam Asiatici oratores. Eant, qui verborum phaleras, non succum, neque medullam orationis, studiosè persequuntur. Eant, qui eò jam eloquentiæ scilicet adspirarunt, ut iis Cicero minùs placeat. Mihi contra placet Demosthenes, perplacet Tullius. Sed ita tamen uterque placet, ut neutri sanè illorum summam perfectamque eloquentiam concedendam esse existimem; sed tantam, quantam nemo adhuc unus ex omni hominum genere, atque ex omni vetustatis memoriâ, sibi comparavit. Quid ego autem de memet dicam, qui tam longè, quam qui maximè, non dico, a summâ, sed & a mediocri, atque adeo a tenui, vel etiam qualicunque, absûm eloquentiâ? Non equidem me vel utcunque eloquentem dixerim, quod ut falsum, ita esset hominis arrogantissimi, atque impudentissimi; sed amatorem duntaxat eloquentiæ. Sentio, me vehementer rapi amore pulcherrimæ illius formæ & elegantissimæ, quam imaginem perfectam sui in animo meo impressit vera perfectaque eloquentia. Summæ hujus speciei, quæ mihi semper ab incun-

te

## ORATIO SECUNDA.

45

ce rationis usu obversata est, & ad quam omni virium contentione adnitendum mihi esse duxi, ne compos unquam fierem, in tantâ rerum mearum ac fortunæ varietate, tantâ præsertim ingenii mei imbecillitate, id ipsum, quod ceteris, sed mihi multò omnium vehementissimè, obstitit, rei nempe ipsius incredibilis magnitudo. Est enim res omnium maxima, atque adeò difficillima, vacuum unum, aliquem esse prorsus ab omni vitio orationis, eumque omni oratoris virtutis laude esse plenè cumulatam, quod vera consummataque eloquentia requirit. Jam verò quis non videat, quæ singula sunt permagna, ex iis universis constare veram hanc, quam dicimus, eloquentiam, idque præcipuum, maximèque proprium esse eloquentis, ut, quæ propria sunt atque singularia aliarum omnium doctrinarum, ea sibi adferat universa? quum tamen aliæ omnes doctrinæ, ipsæ per sese existere possint sine eloquentiâ. Potest esse quis grammaticus, dialecticus, philosophus, juris peritus, quin sit eloquens. Rem omnem medicam ut quis calleat, minimè omnium necessaria est eloquentia. Geometra ut unus aliquis sit, ut musicus, ut reliquarum omnium disciplinarum mathematicarum peritus, non opus certè habet eloquentiâ. Potest quis etiam consummatus esse atque perfectus in rerum divinarum cognitione, quam Theologiam vocamus, qui sit idem ab eloquentiâ destitutus. Denique ut sit sapiens, non valde indiget eloquentiæ. Tamen nemo unus potest esse eloquens, nec gravi illi oratoris nomine dignus videri, quin sit idem & bonus grammaticus, & acutus dialecticus, & præstans philosophus, & legum

F

atque

atque juris apprime peritus; quin sit idem in muscâ atque in erudito mathematicorum pulvere egregiè versatus; quin medicorum præcepta, omnemque medendi rationem idem ipse teneat; quin Theologiam, omnemque bonarum artium scientiam, omnem denique ipse sibi sapientiam, acquisiverit: eò quia nimirum ex omni istarum omnium rerum cognitione exsurgat atque efflorescat, oportet, oratio. Quibus omnibus, ut dixi, accedere debent ornamenta quàm plurima oratoriæ elocutionis: ut ornatè nimirum & copiosè, & ad rem quamlibet accommodatè, & cum audientium etiam admiratione, singula exponat. O veram hanc, o perfectam eloquentiam! quam ut pro dignitate quis laudet, ipsam illam, quam laudat, adhibere debet eloquentiam. Sed quid ego plura de eloquentiâ? Hoc ipsum, quòd difficultatem tantam eloquentiæ adipiscendæ exaggero, tantamque vim doctrinæ uno oratoris officio comprehendo, quale demum est, ac quantum, Auditores! Tale est profectò, ac tantum, ut neque ad naturam atque ad dignitatem eloquentiæ demonstrandam quidquam majus atque magnificentius, neque ad honestissimorum adolescentium animos amore omnium doctrinarum, imprimisque eloquentiæ, inflammandos quidquam acrius atque vehementius afferri a me potuisse videatur. Tantum enim abest, adolescentes, ut difficultate hac eloquentiæ, quam summam esse ostendi, studia vestra, vel retardari, vel, quasi desperatione, vel minimum debilitari posse suspicer, certissima ut mihi spes injiciatur, fore, ut, quòd difficilior eloquentia est, atque altior, eò majori ardentiorque incitatione, ad omnes bonas artes, sine quibus ea esse nequit,

quit, contendatis. Quid enim non sperandum de ingeniis vestris, quæ sunt a naturâ præstantissima, atque ad omnem rerum omnium maximarum ac nobilissimarum scientiam adipiscendam unice comparata? præsertim quum tot tantæque studiorum hîc vobis atque doctrinarum commoditates suppetant, quot quantasque studiosus quisque sapientiæ adolescens optare maximè potuisset: quæ tamen veteribus illis, summis atque ardentissimis amatoribus sapientiæ, maximam partem defuerunt. Non enim vobis, ut Pythagoræ, Platonique ac Democrito, propter discendi cupiditatem, longinquæ sunt terræ obeundæ; non Asia vobis tota peragrandæ, ut Tullio; non vobis, tanquam in Phalerico, ad fluctum declamare est necesse, ut Demostheni; non, ad doctorem audiendum, ut Euclidi illi Megarico, vitæ vobis pericula adeunda. Hîc, hîc, adolescentes, theatrum vobis amplissimum patet omnium disciplinarum, hîc in Pisano Lyceo seminarium vobis virtutis atque eruditionis constitutum, hîc sedem ac domicilium vobis suum sapientia ipsa collocavit. Hîc Dialectica, hîc Physica, hîc universa Philosophia, hîc Medicina, hîc Jurisprudentia, hîc Mathematicæ disciplinæ, hîc Theologia, hîc Eloquentia, hîc bonæ omnes artes atque doctrinæ in summo otio, rerumque omnium tranquillitate sese ultro vobis offerunt, amplissimaque etiam vobis præmia, si ea receperitis, pollicentur. Etsi verò, pro sapientiæ ipsius magnitudine atque immensitate, artes hæ omnes liberales in suas veluti classes partitæ sunt ac distributæ; tamen, qui eas hîc artes profitentur, summi & doctissimi viri, collegæ mei humanissimi, ita pro

se quisque profitentur, ut etiam universas singuli complectantur. Unde enim, ne longius abeamus, nisi ex hac ita rerum omnium cognitione, variaque eruditione, ac literaturâ fieri creditis, ut magistri vestri abtusiora quæque atque difficiliora altissimarum doctrinarum tam Latinè vobis edisserant, tamque eloquenter? Unde, inquam, nisi ex eâ, quam dixi, omnis generis eruditione ac doctrinâ, sit adolescentibus, ut hic, quasi in regno, Latinæ Linguae elegantia, Latinaque eloquentia dominantur? Ut mehercule, quod ad linguam Latinam attinet, liceat jam vobis de magistris vestris dicere, quod de C. Julio Cæsare Atticus ille Tullianus, eos, ut Latinè loquantur elegantissimè, multis litteris, iisque reconditis & exquisitis, esse consecutos. Ut hinc etiam de eloquentiâ faciliè appareat, quia magistri vestri sapientiâ omnique rerum scientiâ excellunt, ideo eos florere ac præstare eloquentiâ. Magistros hos vestros, viros amplissimos, eorumque admirandam planè doctrinam, atque eloquentiam, intuemini. Oratorem ego vobis non ex rhetorum officinis, sed ex mediis magistrorum vestrorum scholis, atque ex intimis eorum doctrinis, deprompsi. Eorundem vobis exemplo, bonæ omnes artes doctrinæque addiscendæ, ut ad veram illam perfectamque eloquentiam, quæ ex omnibus simul doctrinis mirum in modum coalescit, quam proximè poteritis, accedatis.



ZENOBIO . RICCIO  
PATRICIO . FLORENTINO  
PETRI . FRANCISCI . RICCHII . SENATORIS  
FRATRI  
ORDINIS . HIEROSOLYMITANI . EQUITI  
C O M M E N D A T A R I O  
SPLENDIDISSIMO  
CAESARI . A . CUBICULO  
ACADEMIAE . PISANAE . A SECRETIS  
V I R O . O M N I . V I R T U T E  
PRAESTANTISSIMO  
ALEXANDER . POLITUS  
ORATIONEM . SUAM . TERTIAM  
A D . A C A D E M I A M . P I S A N A M  
D E . L I T T E R I S . H U M A N I O R I B U S  
O B . E G R E G I A . E J U S  
I N . A C A D E M I A M . P I S A N A M  
A T Q U E . I N . L I T T E R A S  
M E R I T A  
A D . M E M O R I A M . P E R P E T U I . N O M I N I S  
D . D . D .



# ALEXANDRI<sup>47</sup> POLITI

DE CL. REG. SCHOLARUM PIARUM



## ORATIO TERTIA.

### *De Litteris Humanioribus.*



I usquam alibi, quàm Pisis, aut cer-  
tè apud alios, quàm apud vosmet,  
Patres Sapientissimi, ceterique Au-  
ditores ornatissimi, de studiis littera-  
rum atque humanitatis paulò liberius  
atque audaciùs verba hodierno die  
essèm facturus, verendum mihi valde  
esset, ne aut hujusce ipsius diei, quem  
studiis doctrinarum omnium instaurandis solemnem,  
atque legitimum majores nostri statuerunt, rationem  
minùs habere, aut litteris ipsis humanioribus plus  
æquo quidquam concedere, aut de maximarum no-  
bilissimarumque disciplinarum dignitate nonnihil im-  
prudenter detrahere oratio mea videretur. Verùm  
cum dicere me cogito Pisis, in urbe parente atque  
altrice studiorum humanitatis, in gymnasio hoc ce-  
lebertimo totius eruditionis atque doctrinæ, hic præ-  
fertim apud vos homines humanissimos, hoc est, stu-  
dio-

diorum omnium humanitatis peritissimos atque scientissimos, quid reformidem auspice hoc studiorum nostrorum die de litterarum humaniorum laudibus dicere, atque ita dicere, ut nihil neque ad diei hujus celebritatem magnificentius, neque ad loci hujus amplitudinem accommodatius, neque ad humaniorum litterarum atque adeo universæ doctrinæ dignitatem augustius, possim unquam dicere? Artes enim doctrinæque universæ quum ita inter sese partitæ sint atque distributæ, suis ut quæque terminis ac limitibus coerceretur, quid majus atque excellentius, quàm studium unum quoddam reperiri, quod nullis ipsium finibus circumscriptum, cetera omnia doctrinarum genera complectatur atque includat? Hujusmodi autem studium est humanitatis. Quare, quod de summâ eloquentiâ affirmabat Tullius, sic apud vos de hoc studio humanitatis statuite, Auditores, rem nullam esse apud homines, quæ plura doctrinæ adjumenta desideret: ut hinc quilibet vestrum facillè intelligat, me de litteris humanioribus, non quid in iis ego valeam, qui certè in iis minimùm valeo, disputaturum; sed quid, & quantum in omni doctrinâ valere is debeat, qui humanitatis studium proficetur. Dabo namque pro munere meo operam, ut, quàm potero, brevissimè ostendam, litteris hisce humanioribus omnem eruditionem, omnemque rerum omnium maximarum atque doctrinarum scientiam contineri.

Neque verò, cùm litteras dicimus humaniores, velim, Auditores, leve quidquam cogitatis, quod ad puerilem duntaxat institutionem, atque exercitationem pertineat, quod nimirum in Grammaticis

cis quibusdam & Rhetoricis Poëticisque præceptis, qualia ferè magistri quique de trivio adolescentulis tradunt, totum positum sit atque collocatum. An non multò planè majora atque altiora proficitur illa ipsa, quæ a literis docendis litteratura, seu Grammatica appellatur? Nolite autem exultare, studium hoc humanitatis, quod varium est atque multiplex, & in interioribus reconditisque quibusque litteris versatur, ideoque humanitatis dicitur, quia maximè omnium studiorum hominem expolit eruditque atque exornat, studium hoc, inquam, humanitatis, terminis aliquantò fortasse angustioribus, atque brevioribus, quàm Grammaticen ipsam, definiri. Jam verò quàm latè patet Grammatica, quàmque multas per artes & disciplinas pervadit? ars illa quidem primo adspectu satis tenuis atque jejuna; sed quæ re verà, si quis in eam sese artem penitus insinuet, copiis jam omnibus variæ eruditionis circumfluat, omniumque propemodum maximarum rerum scientiam complectatur. Quis enim historicos, quis poëtas enarrat atque interpretatur? Grammaticus. Quis medicos, quis jurisconsultos, quis philosophos exponit atque illustrat? Grammaticus. Quis theologos, quis omnis generis bonarumque omnium artium scriptores edisserit atque explicat? Grammaticus. Quis etiam doctissimorum totius antiquitatis hominum scripta recenset atque judicat, nisi Grammaticus? Nam & Grammaticorum est, idque eximium in primis, & præstantissimum munus, judicium de scriptoribus ferre, & quæ malè atque perperam scripta sunt, revocare ea ad censuram atque corrigere. Unde & ab alienis scriptis

judicandis Critici iidem sunt appellati: quorum etiam fuit, teste sanè locupletissimo Quinctiliano, non-  
 versus modò censoriâ virgulâ notare, & libros, qui falsò inscripti viderentur, familiâ submovere; sed & ipsos scriptores, alios in ordinem redigere, alios de numero eximere. Talia quædam diligentissimè persecutum fuisse opinor Telephum, Grammaticum illum Pergamenum, eo in libro, quo anquisivisse eum tradunt, quot res ac quantas scire Grammaticum oporteret. Atque ille quidem multò fortasse brevius rem totam expedire atque absolvere potuisset, si nempe dixisset, quæ sunt reliquarum omnium bonarum artium atque disciplinarum, accuratam eorum exactamque notitiam Critico, seu grammatico, summopere esse necessariam: nisi si quis forte velit, posse quenquam rectè iis de rebus judicare, quas ignorat. Quòd si probè quisque teneat, opus est, ea, de quibus judicat, cur grammatico huic atque Critico eam rerum scientiam minimè concedamus, quæ quidem certè scriptoribus iis concedi debet, in quos suum ille iudicium exercet? Itaque, ad rectum atque integrum in omni studiorum liberalissimorum genere iudicium, perno-  
 scenda est grammatico totius antiquitatis hitoria. Quid dico hitoria? viam ut ille sibi ad perfectam eruditionem præparet atque muniat, præcæ etiam fabulæ cognoscendæ, terrarum atque locorum situs perdiscendi, ineunda jam inde ab orbe condito exacta temporum ratio, tenenda Dialectica, percipienda Geometria, reliquæque disciplinæ mathematicæ, assumenda musica, investiganda siderum ratio, comprehendenda mater omnium artium philo-  
 so-

sophia, præcepta medicorum comparanda, perspicuum jus Pontificium atque civile, haurienda Theologis rerum divinarum scientia. Quid plura? honestissimæ omnes artes omnesque disciplinæ quàm fieri potest, diligentissimè atque studiosissimè adipiscendæ. Et quid aliud fuisse in causâ arbitramini, cur Grammatici iidemque Critici vocati a Græcis fuerint *πολύτροποι*, quasi multâ variâque scientiâ præditi, ut Alexander ille Cornelius, grammaticus Milesius; iidemque etiam *πολυμαθῆς*, idest, pereruditi, ut Longinus ille criticus, quid, inquam, aliud in causâ fuisse arbitramini, cur Grammatici, præ reliquis ceterarum omnium nobilissimarum professionum hominibus, a variâ ipsi multâque doctrinâ appellarentur, nisi quia Grammaticorum præcipuè fuit, omnem doctrinam, omnemque rerum maximarum eruditionem profiteri? quum tamen ceteris omnibus artium liberalissimarum doctoribus satis superque esset, eâ tantum in arte, atque disciplinâ, quam quisque profiteretur, excellere. Itaque ceteri omnes & nunc & olim ab iis duntaxat artibus celebrati, quas potissimum coluerunt; Grammaticus a multâ eruditione atque doctrinâ. Quid enim, quæso, a Dialectico requiras, nisi ut rectè acutèque concludat, veraque ac falsa dijudicet? Quid a medico, nisi ut totam medendi rationem diligenter cognoscat? Quid ab iurisperito, nisi ut jus civile atque Pontificium penitus perspiciat? Quid denique in singulis aliis optimis artibus atque disciplinis jure postules atque exigas, nisi ut, quod cujusque professionis proprium est atque singulare, intra certos quosdam, suosque fines perfectè quis calleat? Contra verò a Gram-

matico, eodemque critico, quid est in omni doctrinarum genere tam reconditum, tam abstrusum, tamque ad judicandum difficile, quod jure tuo non deposcas? Quid enim in tantâ rerum maximarum atque artium varietate jam inde ab ultimâ antiquitatis memoriâ ignorare ei per te licet, quem ad Poëtas, ad Oratores, ad Philosophos, ad Mathematicos, ad Medicos, ad Jurisconsultos, ad Theologos, ad omnes omnis generis omniumque ætatum ac temporum scriptores intelligendos, non interpretem modo, sed etiam judicem adhibeas? Quale hoc & quantum munus grammatici! quod tale perfectò est ac tantum, ut, quod M. Tullius de domo jurisconsulti verissimè affirmavit, oraculum eam esse totius civitatis, jure, neque minùs verè, videar ego mihi posse de Grammatico dicere, oraculum eum esse totius eruditionis atque doctrinæ. Quid ni? quando, nisi a Grammaticis lumen accederet, pleraque adhuc, quæque meliorum & præstantiorum scriptorum meliora fortassè atque præstantiora erant, in tenebris jacerent. Quis hic mihi in tot ac tantis, tamque immensis Grammaticæ laudibus importuniùs obstrepat, ejusque Grammaticæ dignitatem, atque amplitudinem tantam, quantam utique demonstrare conatus sum, usque eo deprimendam atque abjiciendam putet, ut vocabulorum duntaxat, non autem interpretationem rerum, Grammaticæ concedendam esse contendat? quasi verò reliquarum liberalium artium sit res ipsas, Grammaticæ verò sit, una solaque vocabula explicare atque interpretari. Unde & Grammatici, philologi, tanquam a sermonis & verbo-



borum studio , vocitentur . At enim istud ipsum , quod levius atque tenuius videri possit , quantæ unquam scientiæ ac memoriæ est , quàm idem operosum , quàmque infinitè per hanc rerum omnium universitatem diffusum , omnia omnium artium atque disciplinarum , hoc est , rerum omnium , vocabula exactè ac perfectè intelligere , eaque vocabula , variè quidem , pro varietate ipsarum artium atque disciplinarum ; sed & aptè , atque ad rei cujusque naturam accommodatè , explanare atque exponere ! quod est planè publicum quendam & communem ludum omnibus artibus atque disciplinis aperire , ut de omnibus illæ vocabulis , tum communibus , tum etiam cujusque propriis , erudiantur . O sic etiam Grammaticam magistratram artium atque disciplinarum , e qua nisi bonæ artes atque disciplinæ verborum , antiquorum sæpe atque obscurorum , interpretationem addiscant , vel in rebus eæ majoris momenti cæcutiant ferè , necesse est , atque hallucinentur ! Deus immortalis ! Unde , nisi a Grammaticâ , patefactam atque ostensam habet Jurisprudentia significationem verborum , ex qua jurisconsulti de rerum ipsarum significatione erudirentur , & de jure & æquo iidem responsitarent ? Nam Labeonem quidem Antistium jurisconsultum memorant vetus jus civile vocibus verbisque interpretandis totum enucleasse . Unde , nisi a Grammaticâ , propria artis suæ vocabula Medici cognoverunt ? ea , quibus olim usus Hippocrates , explicarunt Dioscorides ille Phacas , & Erotianus : linguas etiam , quas vocant Hippocratis , Herophilus & Becchius & Galenus exposuerunt . Unde , nisi a Grammaticâ ,  
ora-

oratores atque poetæ sua sibi vocabula didicerunt? ea, quæ oratores & optimi quique scriptores usurpassent, interpretatus est Eudemus; quæ oratores decem Græciæ, Julianus, Philostratus Tyrius, Diodorus & Harpocratio; quæ historici, Parthenius; quæ summi ac celeberrimi Poëtarum, Helladius. Ne dicam de Philoxeno, qui linguas Homeri, de Longino, qui ambiguas voces Homeri, de Epithersæ illo Nicæno, qui Comicoꝝ atque Tragicoꝝ verba, de Evagorâ, qui Thucydidis vocabula difficiliora atque obscuriora illustravit. Unde, nisi a Grammaticâ, patet in philosophiâ verborum usus atque explicatio? Fuit in philosophiâ Plato propemodum divinus: cujus instar Jovem locuturum fuisse dictitarunt, Græcè si locuturus fuisset. Platonis verba Timæus & Boëthius explanarunt: Quid Dialecticam memorem? quid Geometriam? quid reliquas disciplinas Mathematicas, quæ, nisi verborum suorum interpretationem atque Grammaticâ mutuentur, nihil ferè rerum suarum intelligant? Quid denique Theologiam, quæ summa est atque altissima rerum scientia divinarum? Unde etiam, nisi a Grammaticâ, a penu illo omnis eruditionis locupletissimo, suppetit unquam Theologis, hominibus planè divinis, vocum illarum divinarum interpretatio? Vos appello, Patres Christiani, vos, maximi atque sanctissimi Sacerdotes, quorum est de rebus divinis, religionisque jure judicium. Nonne vos, tantâ homines religione atque sapientiâ, cum religio ipsa ageretur, consulere sæpe Grammaticam oportuit, atque ex Grammaticæ ipsius interpretatione, ad certissimam illam testimoniorum atque

atque auctoritatum divinarum regulam, de maximis gravissimisque omnium controversiis decidere? Istud verò quàm mirabile, atque ad Grammaticam commendandam quàm præclarum, ex unius alicujus voculæ explicatione summa aliquando sententiarum divinarum, atque adeo totius religionis, capita aptè pependisse, & nisi Grammatica unius alicujus verbi interpretatio præluxisset, vos religionem interpretari minimè omnium potuisse. Obvia sunt cuique vestrum, Auditores, in sacris historiis exempla, obvia ea vocabula, de quibus, tanquam pro aris & focis, in solemnibus Christianorum conventibus acerrimè inter partes disputatum, obvia ea vocabulorum discrimina, quæ, tanquam notæ quædam veritatis divinæ, sunt a sanctissimis illis doctissimisque Patribus, sapientissimè ac divinitus, excogitata, ut vera de rebus divinis sententia a falsâ discerneretur. Quem enim vestrum, Auditores eruditissimi, fugiant gravissimæ illæ concertationes veterum Theologorum, quibus sacrosanctæ nostræ religionis summa quasi in discrimen vocabatur: quum, maximo ii animorum ardore, inter sese disputarent, ac propemodum digladiarentur de verbis illis, *Ὁμοούσιος*, & *Ὁμολόγιος*. quæ quidem verba, ut minimùm sono, hoc est, unâ tantùm litterâ, inter sese differrent; mirum tamen, quantum inter sese differant significatu! quippe, quum horum verborum altero unigena ille Dei Filius unius ejusdemque naturæ confors cum patre; altero naturâ patri suo similis exprimeretur; itaque qui rectè de Deo, & qui secùs sentirent, his verbis, quasi tessera quibusdam, inter sese distingu-

guerentur. Hæc si vellem omnia in medium afferre, quem tandem oratio mea exitum inveniret? Sunt enim hæc propemodum infinita: quæ si attentè vobiscum ac sedulò reputaveritis, idem vobis accadat, necesse est, quod iis, qui in patentissima camporum æquora, aut in vastissimorum marium immensitates oculorum aciem longissimè intendunt: qui nullum sanè videndi finem reperiunt. Sic enim & in spatiis hisce immensis atque infinitis universi orbis artium atque disciplinarum, rerumque omnium tum humanarum, tum etiam divinarum, quoquò versus mentis vestræ oculos converteritis, nullos jam Grammaticæ constitutos fines comperietis, extra quos illa interpretationem vocabulorum suam una cum rebus ipsis non proferat. Sed quid ego Grammaticæ vocabula duntaxat interpretanda, & non res ipsas, quarum cognitione humana eruditio atque doctrina perficitur, penitus percipiendas concedam? Neque enim una semper atque eadem est unius ejusdemque vocis interpretatio; sed, pro rerum atque artium diversitate, sæpe etiam diversa. An ne igitur, quum vocabulorum interpretandorum munus totum ubique sit Grammaticæ, existimabimus, in tantâ rerum ac sententiarum varietate posse Grammaticam variè eandem vocem, atque ad id, quod agitur, congruenter interpretari, nisi res ipsas, de quibus agitur, optimè cognoscat atque judicet? Res autem ipsas si cognoscit Grammatica, quarum vocabula intelligit atque interpretatur, quid ei unquam desit ad perfectam rerum omnium scientiam, quandoquidem nihil omnino est vocabulorum, quod illa non intel-

telligat atque interpretetur? Proh bone deus! tantum ne scientiæ atque eruditionis ars una habet, ut, quidquid unquam doctrinarum per ceteras omnes liberalissimas artes atque disciplinas dispersum est atque distributum, sciat ipsa cumulatissimè, neque tantum sciat; sed & illis omnibus disciplinis ad totius eruditionis summam præluceat? Atque hinc fit, Auditores, ut Grammatica non in unâ solâque verborum interpretatione consistat; sed rerum ipsarum explicationem muneris sui esse ducat, atque in scriptores omnis generis enarrandos præcipuè incumbat. Hoc autem est, philologum agere, qualem se nominari voluit Attejus, non qui nimirum verbis, aut sermoni duntaxat studeat; sed qui, ut ille olim Eratosthenes, multiplici variâque doctrinâ censeatur. Quis enim scriptores aut poëtas enarraret, qui non simul & reconditiora quæque atque interiora earum rerum, quæ ab iis scriptoribus aut poëtis pertractantur, diligenter examinet atque excutiat? Quis Aristotelem interpretetur, qui non simul & doceat philosophiam, ut grammaticus ille Philoponus? Quis Hippocratem illustret, qui non simul etiam medicinam, ut Grammaticus ille Nican- der Colophonius? Quis Homerum, principem illum & auctorem omnium doctrinarum, exponat, qui non simul & omnes doctrinas atque elegantias explicet, quæ ab Homero ad ceteros poëtas latissimè manarunt, ut Grammaticus ille Didymus, & omnium ille grammaticorum facillè eruditissimus, Eustathius? O igitur grammaticam, non unam jam artium atque disciplinarum; sed artes doctrinasque universas uno grammaticæ nomine atque officio comprehensas!

H

O

O grammaticum, o litteratum, o eundem & Dialecticum, & Geometram, & Musicum, & Mathematicum, & Philosophum, & Jurisconsultum, & Medicum, & Theologum! O & eundem ab omni maximè doctrinâ instructum! Quis enim jam vestrum non fateatur, quod docto alicui viro verè non minùs, quàm mirabiliter, visum fuit, minore vos negotio Papinianos tres, quàm Aristarchum unum, esse absoluturos? Age porrò, quid si noster hic Aristarchus de metris ac rhythmis præcipiat? quàm necessaria ei Musica! quid si ad historiam scribendam semet conferat? quàm debet idem esse in politicis versatus! Quid si ad mansuetiores sese musas referat, velitque præterea Philosophiam, ad magnorum virorum exemplum! Empedoclis nimirum, Varronisque, & Lucretii, carminibus consignare? quàm variè, & quàm multis in rebus sit ille, oportet, eruditus! neque modò in philosophiâ, astrorumque scientiâ, atque in omnibus artibus liberalissimis; verùm etiam in fabulis! Quo etiam qualique afflatu furoris quasi divini concitari ille debet atque impelli, ut versus non tam marte suo pangere, quàm divinitus fundere videatur! Quid si det operam eloquentiæ, ut unaquaque de re copiosè dicat atque ornatè? quantâ ei sapientiâ atque doctrinâ opus est, sine qua perfecta eloquentia nullo modo esse potest! Quid si illud etiam, quod minimum in doctrinis videtur, diligentissimè curet, ut, quàm potest, elegantissimè, loquatur Latinè? istud ipsum, quod est Latinè, hoc est, politè atque eleganter, loqui, Deus bone, quàm magnum est, quàm singulare, quàm paucorum

rum hominum, eorumque eruditissimorum! Fuit id Marci Tullii, quem C. Julius Cæsar penè principem copię atque inventorem dixit. Fuit ipsius Cæsaris, quem, ut omnium ferè oratorum elegantissimè loqueretur Latinè, multis litteris, & iis quidem reconditis & exquisitis, confectum fuisse, Tullius ipse affirmavit. Fuit etiam, post restitutas ac veluti renatas litteras, summorum virorum, qui tum alibi, tum etiam hinc Pisis, in hac nostra Academia, in id potissimum incubuerunt, ut rerum maximarum scientiam cum sermonis Latini, omnisque doctrinæ elegantiam conjungerent. Quæ igitur ars, libero illa quidem homine digna, quæ unquam disciplina, tam severa esse potest, immo verò tam a musis averfa, atque ab omni humanitate aliena, quæ studiis hisce humanitatis non contineatur? Facessant, qui litteras hasce humaniores levius quiddam esse censent, quàm ut eæ cum altioribus quibusdam majoribusque disciplinis ullo modo conferantur. Non capiunt inepti isti homines, bonarumque omnium litterarum rudes, quid tandem sit studium hoc, quod ipsi culpant atque contemnunt, humanitatis. Neque enim est, quale ipsi sibi cogitatione fingunt, nugatorium quiddam, aut puerile, quod in fabulis duntaxat poëticis, quisquiliisque verborum, oblectandorum animorum causâ, inutiliter occupetur. Quale ferè fuisse studium Tiberii Cæsaris traditur. O quæstiunculas illas Græculorum, quas facete satis atque urbanè irridere solitus erat Stoicus ille Seneca, quot secum remiges Ulysses habuisset, prior scripta ne esset Ilias, an Odyssea! Apage has nugas, apage ineptissimæ

hæc studia diffuentium otio hominum atque ignavissimorum. Non enim hæc humanitatis mehercule studia, ex quibus homo nihilò humanior, hoc est, doctior atque eruditior, evadat. Illa, illa verè mihi studia humanitatis, quæ in universo studiorum liberalissimorum orbe longè lateque patent ac dominantur. Illæ, illæ litteræ planè humanæ, quæ quum artes omnes honestissimas, & majores quasque disciplinas complectantur atque contineant, eam iis elegantiam, eumque ornatum atque nitorem adjiciunt, ut litteræ ipsæ humaniores elegantioresque, & politiores efficiantur. Illæ, illæ litteræ humaniores, quas nisi sibi comites seu ministras unaquæque altissimarum nobilissimarumque disciplinarum assumpserit, deformare ipsa nativam pulchritudinem suam, ac veluti in sermonis sordibus volutari videatur. Quid divinius Theologiâ, quæ sapientia est admirabilis rerum divinarum? Quid augustius atque sanctius Theologiâ, quæ tota in summo sanctissimoque Dei numine contemplando versatur? Quid pulchrius Theologiâ, cui summum atque perfectissimum totius pulchritudinis exemplar majori multò superiorique luce, quàm humani ingenii imbecillitas ferat, spectandum atque considerandum proponitur? Et tamen seculis illis sequioribus, cùm, post Romanæ linguæ non minùs, quàm Romani imperii, a Gothis vastitatem, intermortuæ litteræ erant humaniores, quæ facies erat Theologiæ, quàm tristis, quàm horrida, quàm agrestis! Equidem, cùm Theologorum quorundam, qui bene tunc atque acutè scripsisse putabantur, volumina in manus sumerem, miserebat me tui, pulcherrima atque augustissima disci-



disciplinarum, miserebat me tui, regina disciplinarum Theologia, mei, qui libros illos legerem, pigebat; valdeque etiam indignabar, quòd homines non tam suo, quàm temporum illorum vitio, aliquantò barbariores, illotis te manibus contrectare ausi fuissent. Adeo tute mihi, Theologia, in illis libris squallida, plenaque illuviei atque sordium videbare. Quid præclarius atque honestius Philosophiâ, quæ sapientia est rerum humanarum, optimarumque omnium artium procreatrix? tamen, humanioribus literis unâ cum linguâ Latinâ misere collapsis, quid tetrius tunc Philosophiâ, quid deformius, aut etiam portentosius? quum gymnasia omnia philosophorum non nisi vocibus barbaris atque gothicis personarent, & de nescio quibus verborum monstribus magna quotidie concertatio fieret, &, qui Aristotelis sese interpretes, si Deo placet, appellabant, ne primoribus quidem labris Aristotelicos fontes degustassent; sed cœnosos quosdam rivos, hoc est, translationem ex Arabicâ non Latinam, sed Arabicâ ipsâ multò barbariorem, confectarentur. Quid, ut nihil dicam de medicinâ, nihil de mathematicis, reliquisque honestissimis disciplinis, quid, inquam, nobilius atque elegantius jurisprudentiâ, quæ scientia est juris atque æquitatis? tamen, ante litteras humaniores renatas, quid fœdius illorum temporum jurisprudentiâ, quid contaminatius, quid denique obscurius? quum qui juris semet sacerdotes jactabant, & boni & æqui notitiam profitebantur, pleraque legum suarum minimè omnium intelligerent, pleraque etiam, quæ Græcè nimirum scripta erant, ne legerent quidem, denique Jus Romanum

num non Romanè, sed Gothicè, interpretarentur. Equidem de me fateor, si qua in me est Latinæ linguæ Romanarumque rerum scientia, si qua fortè elegantia sermonis Latini, quæ quàm sit exigua, latis sentio, eam, qualiscunque ea demum est, memet ferè ex quinquaginta Digestorum libris assiduè legendis hausisse, sicque mentem meam politissimâ illâ veterum jurisconsultorum elegantia afuefecisse, Cimmeriæ ut mihi tenebræ offusæ in eorum scriptis esse viderentur, qui, corruptis jam bonis artibus, de jure civili responsitassent. Tanta per Deum immortalem scriptorum illorum erat barbaries. Postea verò, quàm litteræ illæ humaniores, importatâ per Græcos homines Græcasque litteras luce, recreatæ sunt apud nostros homines atque revixerunt, quantâ ego & quàm incredibili earundem omnium disciplinarum, atque artium ingenuarum admiratione obstupefcebam! quantâ inde & quàm mirificâ voluptate afficiebar! quantum ego lætabar, suam Theologiæ, suam Philosophiæ, suam juris civilis prudentiæ, suam reliquis omnibus præstantissimis artibus atque disciplinis dignitatem atque elegantiam restitutam, qualem illæ quidem certè jam inde a principio habuerunt, antequam nimirum bonæ omnes litteræ, linguaque ipsa Latina, a Gothis & Vandalis miserandum in modum depravatæ, ab humanitate suâ in agrestem quandam & immanem barbariem degenerassent! Quis enim tunc, vel si superiora priscae memoriæ documenta altè, & tanquam a capite, repetimus, quis tunc splendor, quæ dignitas erat majorum quarumque graviorumque disciplinarum, cum apud doctissimos quosque

que homines maximè vigeant studia humanitatis, & , quo quisque a doctrina instructior, eò etiam erat ab omni litterarum humaniorum elegantia politior atque ornatior? Nisi si quis fortè nobis opponat magnam videlicet auctoritatem Epicuri, quem narrant litteras hasce elegantiores, hominumque eruditorum proprias, aspernatum fuisse. At enim Epicurus contempsit etiam Dialecticam: at non magnus in doctrinis fuit Epicurus, cujus etiam in Physicis atque Ethicis doctrina tota ferè fuit aliena, quippe in Physicis Democritea, in Ethicis potissimum Aristippea, atque Cyrenaica. Contra verò quos planè constat humaniorum litterarum studiis multò omnium liberalissimis præstitisse, non ne eosdem fatendum est in omni quoque doctrinarum genere maximè omnium veterum excelluisse? Quis enim sapientior Platone, philosopho gravissimo, omniumque principe philosophorum? quis etiam Platone in grammaticâ, in oratoriâ, in poëticâ, in omni elegantiori litteraturâ exercitior? Quis doctior Aristotele, principe & ipso secundum Platonem philosophorum? quis etiam Aristotele ab humanioribus litteris cultior, quem ajunt Iliadem Homericam Alexandro Macedoni emendasse, initiumque atque exemplum Criticæ arti dedisse? Quis non in philosophiâ modò, sed etiam in medicinâ peritior Galeno? quis etiam Galeno in grammaticis & rhetoricis, ceterisque humanitatis studiis versatior? Quis apud Latinos omni doctrinâ excellentior Tullio? quis etiam Tullio melior orator, meliorque grammaticus, qui, ut nec poëta fuit contemnendus, ita & nobilem in primis poëtam Lucretium correxit?

Quid

Quid & alios dicam, summos planè viros, atque ut in omni recto humanitatis studio versatissimos, ita & facile doctissimos totius antiquitatis? Quid etiam clarissima illa atque immortalia religionis nostræ lumina, sapientissimos illos divinitatis interpretes, Clementem Alexandrinum, Origenem, Basilium, Gregorium illum Nazianzenum, Chrysostomum, Lactantium, Hieronymum, Augustinum, qui quum omni humanitate atque eruditione essent perpolitī, ad res quoque divinas omni doctrinarum genere illustrandas plurimum subsidii atque adiuventi contulerunt? An ne verò Julianum Cæsarem, infestissimum illum Christianorum hostem, & transfugam consceleratissimum, humanioribus Græcorum litteris, poetarumque lectione ideo Christianis pueris interdixisse putabimus, ut ne scilicet, quem rudes atque imperiti homines unum solumque fructum ex amœnioribus illis disciplinis percipi opinantur, inaniter Christiani & pueriliter cum Musis delectarentur? Nihil minùs, Auditores. Neque enim ea Julianus Christianis oblectamenta invadebat, quæ mollius eos afficerent, atque demulcerent: sed perspicaci homo ingenio, bonisque artibus satis eruditus, quum studia illa humanitatis in omni maximarum rerum scientiâ versari, & litteris illis humanioribus liberales omnes disciplinas, omnesque doctrinas contineri pervideret; id ereptum Christianis volebat, quo illi suas de Deo sententias confirmarent, atque tuerentur; gentium verò theologiam refellerent. Nimirum sentiebas, reque ipsâ experiebare, Juliane, in hostibus illis tuis, hominibus litteratis atque Christianis, in Gregorio illo Nazianzeno, in Basilio illo Cæsa-

Cæsariensi, in Apollinari illo Laodicensi, quid & quantum Theologia Christianorum, hoc armata litterarum humanarum præsidio, contra theologiam gentium valeret. Quid igitur tandem miremur, si decora illa atque ornamenta veteris doctrinæ, quæ, corruptis bonis litteris, damnum maximum fecerant, iisdem recreatis atque restitutis, nihilò fortasse deteriora, quàm quæ olim fuerant, revixerunt? Revixit Theologia, revixit juris civilis prudentia, revixit medicina, revixit philosophia, revixit dialectica, revixit geometria, omnes denique artes honestissimæ, omnes liberalissimæ disciplinæ dignitatem atque amplitudinem pristinam suam recuperarunt. Ergo, quum beneficium hoc sit litterarum humaniorum, ut bonæ omnes artes atque disciplinæ & olim viguerint, & nunc mirificè resflouerint, &, qui in studiis humanitatis maximè omnium sunt versati, iidem etiam ceteris hominibus omni doctrinâ præstiterint, cur, optimi adolescentes, si amor vos tenet atque studium omnium doctrinarum, litteris hisce humanioribus, quibus doctrinæ omnes continentur, penitus vos dedere dubitetis? cur enim, quum artes omnes liberalissimæ cognatæ inter sese sint, & communi quasi vinculo conjunctæ atque copulatæ, segregandas eas artes arbitremini, itaque ad unam, ad quam casus vos quidam detulerit, tanquam ad saxum, vobis adhærescendum, ut ceteras quoque minimè arripundas censeatis? Videtis, adolescentes, magistros hos vestros, viros doctissimos atque eruditissimos, pro suo quemque munere, ita in artibus atque in disciplinis tradendis versari, ut, si ipsæ artes atque

disciplinæ loqui possent, non melius neque elegantius, neque nitidius, neque majori etiam cum dignitate, quam magistri vestri faciunt, docturæ vos atque erudituræ fuisse videantur. Fructus hic est uberrimus atque copiosissimus studiorum liberalissimorum humanitatis. Itaque & vos, optimi adolescentes, si in dialecticâ, si in geometriâ, reliquisque mathematicis disciplinis, si in philosophiâ, si in medicinâ, si in jure civili atque pontificio, si in theologiâ, si in singulis quique doctrinis perfecti satique elegantes esse volueritis, ad studia hæc humanitatis contendite: hoc est, omni ope & operâ enitimini, atque efficite, ut universus in vobis doctrinarum disciplinarumque orbis perficiatur: quando litteris hisce humanioribus omnes doctrinæ atque disciplinæ uberrimè atque elegantissime comprehenduntur.

PETRO . HIERONYMO . INGHIRAMIO  
 PATRICIO . VOLATERRANO  
 EQUITI . NOBILISSIMO  
 ATQUE . SPLENDIDISSIMO  
 ET . EQUESTRIS . ORDINIS . SUI  
 PRIORI . SACRI . EQUESTRIS . CONSILII  
 DUODECIMVIRO  
 URBIS . PISANAE . PRAEFECTO  
 SUMMA . VIRO . DOCTRINA . ET . PROBITATE  
 ET . PIETATE  
 ET . JUSTITIA . ET LIBERALITATE  
 OMNIQUE . VIRTUTE  
 OMNIBUS . PROBATISSIMO  
 AUCTIONE . SUB . EJUS . ADMINISTRATIONE  
 URBIS . PISANAE  
 GLORIA . ATQUE . FELICITATE  
 ALEXANDER . POLITUS  
 ORATIONEM . SUAM . QUARTAM  
 AD . ACADEMIAM . PISANAM  
 DE . UNIVERSO . DISCIPLINARUM . ORBE  
 OB . MAXIMA . EJUS  
 ATQUE . IMMORTALIA . IN . REM . PISANAM  
 ET . LITTERAS . PROMERITA  
 AD . MEMORIAM . SEMPTERNAM  
 D. D. D.





69

# ALEXANDRI POLITI

DE CL. REG. SCHOLARUM PIARUM



## ORATIO QUARTA.

*De universo disciplinarum orbe.*



Axime vellem, Patres sapientissimi; ceterique auditores ornatissimi, ut, quod, jam inde a suscepto amplissimo hoc humaniorum litterarum docendarum munere, mihi unice proposui, hoc adolescentibus his nostris, qui sese nobis in disciplinam traderunt, esset penitus persuasum, non in uno solummodo doctrinae genere, qualiscunque ea demum est, sibi esse acquiescendum; sed finem atque terminum studiorum suorum constituendum esse universum illum orbem disciplinarum, quem Græci *ἐγκυκλοπαιδείαν* vocarunt. Nam sive eloquentiam specto, perfecta esse nequit eloquentia, nisi rerum maximarum scientiam, doctrinaeque universas complectatur, sive litteras humaniores intueor, omnis rerum omnium atque artium honestissimarum eruditio humanioribus uberrimè litteris comprehenditur; sive gymn-

mnasium hoc domiciliumque sapientiæ nobilissimum. circumspicio, omnes hîc liberalissimæ artes atque disciplinæ apud doctissimos atque eruditissimos homines, apud vos, Patres sapientissimi, in Pisano hoc gymnasio studiosissimè acerrimèque exercentur. Turpe autem nimis & indignum optimis adolescentibus fuerit, eos, quum domos suas reliquerint, atque in hanc sese urbem, eruditionis causâ, contulerint, non, ut eloquentes bonarumque litterarum periti fierent, aliquandiu elaborasse; sed, qui omnia doctrinarum genera percipere facile potuissent, eos mediocri quodam uniusque duntaxat generis doctrinâ contentos, hoc est, paullo eruditiores, quàm venerant, ad suos rediisse. Sed, quoniam brevis est hominis vita, vetus illa in plurimorum animis opinio infedit, humanæ vitæ cursum tam angustum esse, tamque undique coarctatum, ut non nisi brevissimus videri possit, si, non dico, ad omnium, sed vel ad unius etiam artis magnitudinem conferatur. Ego verò, Auditores, qui, ingeniorum nostrorum viribus bene accuratèque perpensis, nihil humile, nihil abjectum, nihil egregiis maximæque spei adolescentibus indignum, mecum unquam meditor; communem hanc de longo artis, brevi vitæ cursu humani generis querelam ex hominum mentibus exturbare, si fieri potest, aggredior, itaque maximum, quo a sapientiæ studiis adolescentes deterrentur, impedimentum remove. Demonstrabo enim, quàm potero, diligentissimè, breviorē longè esse earum omnium artium, quæ sunt libero homine dignæ, quàm humanæ vitæ, cursum. Quod sanè argumentum, tametsi alibi

a me

a me abhinc multis annis non incommodè pertractatum; tamen mihi quidem dignum videtur, quod aliquantò etiam nunc diligentius atque curiosius, anniversario hoc studiorum instaurandorum die, pro loci hujus & muneris mei amplitudine, atque utinam cum aliquo orationis meæ fructu! retractetur.

Verùm, ipso statim orationis limine, quis me vestrum, Auditores, non oppugnet, ac propemodum obruat summâ summi ac celebratissimi viri auctoritate, cui nisi ego primum omnium occurrâ, valde etiam vereri debeam, ut utilem fructuosamque sim ipse operam in hoc tale tantumque argumentum collaturus? Quis enim ab Hippocrate dissentiat, maximo illo totius antiquitatis, & pene dixerim, divino ingenio? cujus tanta tamque admirabilis fuit in explorandâ rerum veritate solertiâ, ut, quò ille non pervenerit, nemini uni sperandum sit, posse sese unquam pervenire. Atque is tamen vir sapientissimus, quum brevissimis acutissimisque sententiis, quas Græcè aphorismos dicimus, quasi medicinæ totius oracula esset simul complexurus, inde sibi exordium capiendum censuit, ut vitam humanam brevitatis, longitudinis artem incusaret. Vitam enim dixit brevem; artem longam. Sed istud de trivio argumentum, quo a tanto nomine quæri solet torpori ignaviæque nostræ patrocinium, neque orationis sese jam explicantis cursum abrumpet, neque a sapientiæ vos studio, optimi adolescentis, retardabit, si paullisper consideretis, quod vos fortasse miremini, sed tamen verissimum est, causam inde meam confirmari, unde penitus infringi evertique potuisset. Nam, cum oculos ad illum

lum medicorum veluti deum, ad Hippocratem convertito, eximiamque ejus in omnibus artibus eruditionem attentius cogito; satis jam video, nullum aliud ex totâ antiquitate opportunius atque ad rem nostram accommodatius exemplum asferri unquam potuisse, quod vobis ad omnem doctrinam proponeretur. Fuit enim, si quis alius, non in arte solum medicâ; sed etiam in toto disciplinarum orbe exercitissimus, eâque verè laude dignissimus, qua nescio an major ulli unquam hominum contigerit, quod & alios fallere, & ab aliis ipse falli nesciverit. Quapropter qui volunt, laboriosi scilicet in otio homines, longius multò esse artium liberalium curriculum, quam ut toto eæ vitæ tempore perdiscantur, & luculento admodum Hippocratis exemplo refutantur, qui eas omnes artes calluit quàm peritissimè, & quænam hominis mens, quodve consilium fuerit, minimè omnium assequuntur. Nisi siquis fortè adeo deliret, ut arbitretur, ideo Hippocrati longam artem; vitam autem dictam esse brevem, quod hac potissimum ratione alios vellet a medicinæ studio avertere, qua ipse medicina maximè omnium eniteret. Sed o prava hominum minimè ingenuorum, qui de ingenuo viro tam iniquè atque adeo protervè senserunt, judicia! quos etiam gravissimè olim reprehendit optimus principis medici interpretes, medicorum & ipse longè clarissimus, Claudius Galenus. Quid enim a rectâ ratione magis alienum, quàm, ad humani generis bonum, commentarios Medicos conscribere, quibus nihil unquam utilius aut esse aut excogitari possit, simulque ab arte universâ, cujus do-

ctri-

Strinā hominum tete salutī atque incolumitati con-  
sulere velle proficere, legentium prorsus animos  
avocare? Aliud omnino voluit parens ille medici-  
næ Hippocrates, aliud in votis, aliud in mente  
habuit, dum artis magnitudinem eò protrahendam  
putavit, ut longissima ea esset, si unius eam ho-  
minis vitā metiremur. Non enim ad otium ignavo-  
rum, inertiumque hominum fovendum, sed ad so-  
lertium navorumque diligentiam excitandam; non  
ad excusandum torporem, sed ad laborem promo-  
vendum; non ad deterrendos abalienandosque ab  
artis medicæ studio animos, sed ad exacuendum  
propositā artis difficultate ingenium, eam retulit de  
brevitate vitæ sententiam: ut nempe, quò vita bre-  
vior esset, ars autem longior, eò impensiori curā  
majorique animi contentione opus sibi esse studiosi  
quique intelligerent, ut brevi artem tempore ad-  
piscerentur. Quanquam autem explicationem hujus-  
cemodi veram illam quidem, sed veluti ad Hip-  
pocratis sensum non satis appositam, neque aptam,  
minùs approbat Galenus; tamen illa ipsa Hippocra-  
tis verba ita interpretatur, ut doceat, breve etiam  
tempus ad artem perdiscendam sufficere, si recta  
studiorum via, constansque labor adhibeatur: non  
posse quidem ab uno eodemque homine, quàm vul-  
tis, diligenti & studioso, artem aliquam & inchoa-  
ri & absolvi, quod ad inventionem spectat; sed,  
posteaquam inventa ea fuit, pluresque docti atque  
industrii viri, multorum annorum decursu, ad eam  
constituendam perficiendamque laboraverunt, nihil  
jam in causā esse, cur breviori temporis spatio  
eam quisque artem non comprehendat; eaque de re

K

per-

perbreves conscribi commentationes oportere, quibus omnia, quæ magni quique viri multo tempore, magnoque labore observarunt, incredibili quodam & temporis & laboris compendio, sub unum veluti ad spectum subjiciantur. Sed cur in unâ tandiu nos arte immoramur? quasi verò non in toto disciplinarum orbe nostra versetur oratio. Age igitur, quantus qualisque est, quàmque hominibus omnibus inditus a naturâ, cognitionis amor, & veritatis! quàm nunquam otiiatur in nobis hæc veri inveniendi cupiditas! quàm rei cujusque novitate pueri capimur, & detinemur! quanto discendi ardore ad liberalium artium studia impellimur adolescentes! quàm magnam vitæ nostræ partem viri, sæpe etiam cum maximo rei familiaris detrimento, litteris rerumque cognitioni impendimus! quo studio, etiam qui a rebus gerendis longè absumus, fenes res gestas legimus & audimus, neque historiis modo, sed etiam fabellis recreamur! quàm denique in omni ætate, ut ab aliis curis vacuus animus secum esse permittatur; tamen nunquam quiescit hoc sciendi omnia desiderium! Solonem ferunt, quem in sapientium hominum numero Græcia habuit, morti jam proximum, assidentibus amicis, & nescio qua de re sermonem inter sese conferentibus, caput, ut potuit, sustulisse, ut re, de qua disputarent, perceptâ, eruditior atque sapientior moreretur. Tanta humanum genus discendi cupiditas tenet; tantaque inde est, rebus tandem cognitis, animi nostri oblectatio. Id enim, quo uno bestiis maximè præstamus, & homines sumus, mentem nimirum nostram, rerum scientia per-

# ORATIO QUARTA.

75

perficit, honestissimâque complet voluptate. An igitur existimabimus, frustra hunc esse in nobis cognoscendi veri ardorem, tamque iniquè atque injuriosè erga hominum genus sese naturam, tanquam novercam quandam, gessisse, ut, quum sane quàm vehementi perpetuoque impetu ad studia nos omnium liberalium doctrinarum impellat atque rapiat; tamen adjumenta nobis denegaverit, quibus earundem ipsarum doctrinarum scientiam assequeremur? An Galenum oleum & operam, quod est in proverbio, perdidisse putabimus, quem nullum non lapidem movisse ajunt, ut in omni doctrinarum genere perfectus evaderet? An Cleanthem Assium, qui noctem hauriendis aquis, diem bonarum artium studiis dedisse traditur, atque inde a labore Hercules alter est appellatus, laboris hujus tanti fructum hunc retulisse arbitrabimur, ut in liberalibus artibus comparandis animum prorsus desponderet? An inane in Euclide Megarico censebimus studium sapientiæ adeo eximium ac singulare, ut, quod Megarensibus capitale erat, ipse Athenas, veste muliebri indutus, venire noctu, ad Socratem audiendum, minimè omnium dubitaret? An, ut sexcentos alios ex totâ antiquitate viros doctissimos omittam, quibus totâ vitâ nihil antiquius fuit, quàm optimarum omnium disciplinarum apparatu pulcherrimo atque elegantissimo instrui, frustra Pythagoram, frustra Democritum, frustra Platonem, quales, Deus bone, viros! dicemus patriam, ubi summo honore florebant, reliquisse, ultimasque terras peragrasse, ut, periculosissimâ per barbaras incultasque nationes peregrinatione nullum non doctrinarum genus a sapientissimis omnium

K 2

popu-

populorum viris discere vellent, scire autem non possent? O miseram humani generis conditionem! o pœnitenda hominum vota, si sapientiæ, quæ perfecta est atque accurata bonarum omnium artium comprehensio, pulchritudinem ardentissimè concupiscant, illam quærant, illam meditentur, ad illam maximo conatu anhelent, neque illam tamen unquam complectantur! Sin & nihil frustra molitur optima parens natura, & nulli penitus deest de reliquis omnibus animantibus, quominus fines adipiscantur suos; quantò majori curâ prospexisse homini reputanda est, ceterorum omnium animantium longè nobilissimo ac principi, quem unum ratione uti voluit, omniumque fecit capacem disciplinarum? ut nempe, quem admodum summam nobis ingeneravit percipiendæ veritatis cupiditatem, ita & nobis largissimè copiosissimèque subministraret, unde optimarum omnium artium scientiam, quanta quidem homini satis esset, obtineremus? At falsâ plerique existimatione decipiuntur: quibus quum instrumenta omnia a naturâ affatim suppetant ad omnem doctrinarum elegantiam; tamen otio suo & ingenio abutuntur; maluntque ingrati naturam reprehendere, quàm suam ipsorum segnitiam emendare. Quæ autem & quanta sit humani ingenii facultas, & quid & quantum, si annititur, in universo illo liberalium omnium artium studio eadem possit, docent ii clarissimè, quos summis laudibus celebrandos duximus, viri veterum, multò sapientissimi: quos omni disciplinarum genere ornatos instructosque maxime fuisse accepimus. His verò dum Democritum accenseo, nolim, cogitetis, Auditores, aliquem de grege philosophum, qui cum  
majo-



majorum gentium philosophis nullo modo sit conferendus; sed tantâ virum eruditione, ut Hippocrati ipsi Coo maximæ admirationi fuerit, &, quum plurimos tum discendi ardore, tum rerum omnium doctrinâ vicerit, nemini uni secundus videatur. Et enim præ sapientiæ studio, quo maximè incendebatur, amplissimas opes humanaque omnia contempsit; peregrinatusque est in Persidem ad Magos & Chaldaeos; in Ægyptum ad Mathematicos; in Æthiopiam atque Indiam ad Gymnosophistas; in omni autem sapientiæ parte adeo profecit, ut quinque certaminum victori non absimilis diceretur, quòd ea quinque doctrinarum genera, quibus universa veterum eruditio definita atque conclusa erat, probè tenuisset. Jam verò si optimas ipsas artes propius intuemur, &, quarum amore tantopere exardemus, proponimus eas ob oculos; mirum est, Auditores, quanta sit earundem artium atque doctrinarum inter sese connexio, quantus earum ordo, quàmque uno eæ societatis inter se vinculo coalescant. Nanque illud ego dicam, quod a Platone assertum in Epinomide, multò faciliorem, atque contractiorem, quàm vulgò suspicantur, reddit cursum omnium disciplinarum, miro quodam inter sese consensu bonas cunctas artes sapientisque viri proprias concordare, & hanc liberalium doctrinarum in unum veluti conspirationem facillimè intellectum iri, si quis vim rationis ejus, unde omnia alia pendent, & ordine quodam cognoscuntur, antea exploraverit. Inde enim & Musæ, quæ vel ipsæ sunt liberales artes, vel artibus certè liberalibus præsent, visæ sunt quibusdam sic appellatæ, quasi

quasi *ὁμῶσαι*, a nexu nimirum & consociatione omnium inter sese disciplinarum: quo etiam ex nexu quasi una visa est esse rerum omnium scientia: cujus tamen, tum propter rerum ipsarum magnam varietatem, tum etiam propter discentium commoditatem atque facilitatem, facta sit in plures artes atque disciplinas partitio. Quod si altiora hæc esse videntur, quàm ut infirmo adhuc adolescentium captui apta sint atque accommodata (quanquam, ubi de toto doctrinarum orbe loquimur, nihil, nisi excelsum, atque a vulgari hominum sensu longè remotissimum, sapiat, necesse est, oratio) tamen illud constat, non tantam, quantam aliqui volunt, inter omnes disciplinas diversitatem inveniri, quæ omnes ad veritatem totæ unam referuntur. Quid enim tandem spectant illæ ipsæ artes, quæ aliis omnibus majoribus artibus famulantur, & benè ornatèque loqui docent, numerisque orationem constringere, ut majori, quàm fieri possit, concinnitate lenocinioque verborum, animi nostri sensa expromamus, nisi veritatem? Quid unquam proficitur benè differendi facultas, quam verbo Græco Dialecticam vocitamus, nisi veritatem? Quid unquam speculantur Mathematicæ illæ disciplinæ, quarum vastissimo quidem gyro & numeri & sonorum vocumque modulatio, & artificiorum, quæ ad varios multiplicisque hominum usus, tum delectationis, tum necessitatis causâ, excogitata sunt, exacta ratio, & cæli & terræ mundique totius dimensio continentur, nisi veritatem? Quid etiam Physice in theatro hoc communi atque amplissimo naturæ, ubi varietas rerum infinita, admirabili ordine distincta, spectaculum fui

fui multò omnium pulcherrimum præbet, contemplatur, nisi veritatem? Eæ quoque disciplinæ, quæ in agendo versantur, quò primum, veluti ad certissimam quandam atque tutissimam actionis cujuscunque regulam, respiciunt, nisi ad veritatem? Veritatem Ethice, ut animum curret; veritatem Medicina, ut corpori salubritatem asserat; veritatem Jurisprudentia, ut æqua civium jura conservet; veritatem Politice, ut publico civitatis bono consulat; veritatem Oeconomice, ut rem privatam atque familiarem bene administret; veritatem bonæ omnes artes, ut sua ritè munera expleant, inquirunt. Fontem denique ipsum veritatis, hoc est, principem primamque, quæ a semet ipsa est, veritatem, summumque rerum omnium principium, & formas ab omni concretione materiæ quàm longissimè alienas, Theologia, quæ rerum est scientia divinarum, intuetur. Ergo quum una solaque veritas in omni doctrinarum studio maximè quæeratur, eamque mens hominis tantâ secum cognatione copulet atque devinciat, ut nihil, nisi verum, percipere penitus possit, nec, nisi in perspicentiâ veri, beatitudinem suam assequatur; quænam illa est vana desidiæque plena, ignavorum atque otio marcescentium hominum expostulatio, quòd tantâ disciplinarum in diversa tendentium magnitudine simul ac varietate ingenium confundatur humanum ac propemodum obruatur? Non ita, sanè censuit summus dicendi magister, Romanæque juventutis optimus institutor Fabius Quintilianus: qui, quum oratorem, quem instituendum sibi sumperat, nullius ornamenti expertem esse oportere ostendisset, primam quoque ætatem pluribus simul

arti-

artibus imbuendam exornandamque esse existimavit. Atque utinam tanti apud nos esset Quinctiliani auctoritas, ut pueri nostri ea veluti temporum subsidia, quæ a Grammaticæ studio supersunt, erudito illi Geometriæ pulveri, aliisque hujusmodi amœnioribus studiis donare docerentur! O longam illam ad discendum ætatem, si non tesseris, non nugis, non otiosis sermonibus, non denique somno, inutiliter conteri, aut potius profundi, sineretur! Est enim maxime docilis, & laboris patientissima, ingenioque fruitur tam facili, atque in omnem partem veloci, nullum ut periculum sit, ne studiorum onere, plusquam opus sit, fatigetur, sed ut potius varietate ipsâ reficiatur, minusque sentiat, quàm si in uno semper labore perseveraret, difficultatis. Quoniam, verò ignavia nostra facit, ut ingenium variis simul litterarum studiis occupatum, distrahi aut obtundi, non perfici aut excoli, videatur; & reverâ humanæ mentis facultas, quantacunque illa sit, finita est, suisque terminis circumscripta, non id ego certè oneris adolescentibus nostris imponam, cui sint ipsi ferendo impares, ut pluribus, & quàm diversissimis disciplinis eodem simul tempore sufficiant. Satis erit, mihi credite, optimi adolescentes, non confuse, aut operâ quadam tumultuaria, studia vestra pertractare; sed eum, quem incepistis, cursum doctrinarum certâ ratione moderari, ut a facilioribus ad difficiliora progressi, unâque quadam & perpetuâ studiorum serie, unam post aliam disciplinam adepti, elegantissimum illum doctrinarum omnium orbem conficiatis. Quemadmodum enim sicui uno simul intuitu universus hic mundus spectandus exhibere-

beretur, obrueretur is planè innumerabili ferè atque incredibili rerum omnium multitudine, neque quanta, quàmque admirabilis sit ac divina naturæ universæ pulchritudo, discerneret; si autem ad singulas partes, ex quibus tota mundi machina concrescit, atque coagmentatur, oculos cogitationemque converteret, ac veluti distribueret, simulque summum illum, quo suis quæque locis aptantur, ordinem distinctè atque particulatim consideraret, ei quàm facillimè totum hoc universitatis corpus, rerumque omnium admiranda consensio patefieret; ita sanè confusus ille atque permixtus veluti adpectus omnium disciplinarum, qui primò occurrere atque obversari tironibus solet, suâ vos magnitudine deterret adhuc in limine constitutos; sed, si diligentia ordo accedit, & quod cognosci simul totum non potest, gradatim ac veluti per partes addiscitur, brevi vos intellecturos planèque experturos polliceor, quàm artium magnitudines rectâ studiorum partitione minuantur. Hic ego quid prædicem, quàm non adeptu sit longa sapientia? quantum ad studiorum omnium metam suppetit vobis temporis? quanta sit ingeniorum vestrorum celeritas, quantumque acumen? quæ omnia si amplificare velim dicendo, & per se magna, verborum exaggeratione majora reddere, mea jam longis, tanquam in immenso quodam campo, excurrat atque exultet oratio. Sed discentium imbecillitati danda hæc est venia, Auditores; ut, quæ in qualicunque illo liberalissimarum artium itinere properantes non parùm remorantur, quàm brevissimè persequamur. Nam, quod ad perfectam atque

exactam rerum omnium cognitionem attinet, ea plerosque cogitatio summam in desperationem adduxit, quod & Plato testatur in Amatoribus, & experientia cujusque nostrum quotidiana perspicue docet, semper aliquid esse, quod, quamdiu vivimus, discamus. Unde dictum illud Solonis, tanto pere veteribus celebratum, senem sese fieri quotidie aliquid addiscentem. Narrant etiam, morientem Theophrastum conquestum graviter de naturâ fuisse, quod cervis & cornicibus vitam diuturnam, sibi exiguam dedisset. Neque ego sanè, Auditores, tantum humano ingenio detulerim, ut censeam, fieri aliquando posse, ut homo unus omnia in qualibet penitus arte comprehendat. Quàm multa enim vel in ipsâ Grammaticâ ( ut hinc facile judicium de majoribus quibusque disciplinis fiat ) non me modò fugiunt, qui tamen nunquam ab amoenioribus illis litteris abhorruerunt; sed etiam viros longè doctissimos, atque in illo studiorum Grammaticorum genere exercitatissimos! Eò ne tamen deprimenda vobis vestra erunt ingenia, adolescentes, ut existimetis, aut pluribus rebus discendis plures esse vitas dedicandas, aut unam duntaxat artem pertractandam semper esse, atque in uno vel leviori studio cum desidiosâ quadam voluptate ita consensendum, ut discentes vita deficiat? ipsa enim unius ejusdemque artis perpetua tractatio semper aliquid gignet, quod investigetis. Sin vos unius soliusque artis delectatio non tehet, & aliæ sunt non, opinor, indignæ, quæ a vobis percipiantur, nequid ego dicam, vos ipsi perspicitis, quis vobis modus sit in toto liberalissimorum studiorum cursu adhibendus, ut non  
usque

# ORATIO QUARTA.

83

usque ad senectutem in re aliqua superstitione detineamini; sed in qualibet liberaliori arte atque disciplinâ non diutius immoremur, quàm sobria cuiusque rei cognitio postulare videatur. Quis enim cum in aliis omnibus rebus, tum maxime in litterarum studiis, modum non requirat, ubi non solum sine ullo doctrinæ detrimento; verum, etiam magnâ aliquando utilitate plurima ignorantur, quorum utique cognitione nihilò melior aut doctior evadas? Quare is mihi verè sapiens, verèque doctus ac litteratus, non qui minuta quæque, immenso quidem studio ac labore, sed tamen multò curiosius, quàm utilius, perscrutetur; sed qui honestissimæ cuiusque rei eâ scientiâ contentus sit, quæ libero homini satis esse videatur; non qui vanè altercando atque pueriliter, in perplexis captiosisque semper quæstionibus occupetur, sed qui breviori, quàm fieri possit, studiorum suorum compendio, ad unam veritatem collineet; non qui, Tiberii Cæsaris more, ætatem suam in fabellis conqui- rendis miserè conterat; sed qui utilissima quæque atque fructuosissima confectetur; non qui novus librorum helluo, in iis omnibus libris lectitandis, ad quos, veluti quosdam scopulos, tempestate delatus, adhæserit, dies noctesque infumat; sed qui optimos, atque in quolibet doctrinarum genere præstantissimos scriptores, vel suo, vel alieno iudicio, seligat, recolat, attentè meditetur. Ille igitur, qui mihi sit in universo disciplinarum orbe veratissimus, non inutili rerum discendarum multitudine mentem obruet; neque in quorumcunque vel ineptorum librorum farraginem sese ingurgitabit; sed exactâ in

L 2

primis

primis solidâque trium principum linguarum, Hebrææ, Græcæ, Latine, notitiâ ad omnem tum divinam, tum humanam eruditionem imbuetur; in parandâ eloquentiâ Demosthenem, atque Isocratem, inter Græcos, Marcum Tullium & Fabium Quinctilianum inter Latinos, duces, atque auctores habebit; in Poëticâ, pro vario carminum genere, illos Poëtarum principes, Homerum & Virgilium; Pindarum & Horatium; Euripidem, Sophoclem & Senecam; Callimachum & tres Amorum Poëtas Latinos; Aristophanem & cum Plauto Terentium leget; in Philosophiâ totum Platonem atque Aristotelem tenebit; in Mathematicis Euclidem, Ptolemæum, Apollonium illum Pergæum, atque Archimedem comprehendet; in jurisprudentiâ tum civilium, tum pontificiarum legum volumina diligentissimè atque accuratissimè discet; in medicinâ Hippocratem & Galenum; itemque ex nostris Cornel. Celsum, & rerum arcanarum acerrimum curiosissimumque investigatorem C. Plinium, assiduè pervolvit; in Theologiâ denique, præter sedulam atque accuratam librorum divinatorum lectionem, impressos penitus geret in animo atque in mente eruditissimos illos Religionis nostræ interpretes, Origenem, Chrysostomum, Hieronymum, Augustinum, & Thomam etiam illum Aquinatem, qui, vel sequioribus temporibus, ordine quodam admirabili, mirâque brevitate, totius sacræ doctrinæ summam, Christianorumque omnium Patrum verissimas sententias complexus est atque illustravit. Quibus omnibus addet Græcæ Romanæque historiæ, ex Herodoto potissimum & Thucydide, Livioque ac Sallustio, atque ex aliis melioribus scrip-

ptori-



ptoribus , ut Diodoro Siculo , & Plutarcho , antiquitatis totius cognitionem . Neque etiam recentiores negliget , qui , post restitutas a barbarie litteras , & ingenii præstantiâ & summâ rerum omnium eruditione , ad priscorum prope laudes accesserunt . Quanquam eò libentius veteres , quàm recentes scriptores adnumeraverim , quòd a veteribus , veluti a fontibus rivi , omnem omnium doctrinarum copiam acceperimus ; gratique animi sit ac maximè ingenui , de iis bene mereri velle , qui primi omnium de humano genere optimè meruerunt . Sed tamen non se capi sinet incautus , aut decipi a magnificis phaleratisque inscriptionibus , quibus plerique ætate nostrâ vani insulsi que scriptores sordidas suas merces , ut fucum ementibus faciant , imperito vulgo ostentant , libros , inquam , tam barbaros atque horridos , tam inconditos atque ridiculos , tamque ineptiarum plenos , ut , posteaquam eos legeris , tam male tete operam in iis collocasse pœniteat . Nam quò quisque scriptor doctior est atque sapientior , eò quoque solet esse modestior , simplicioresque magisque perspicuos libris suis titulos præfigere , ut veterum præsertim exempla testantur . Hæc omnia ille præstabit vir doctus ac sapiens , quem oratione jamdudum efformo : superflua omnia atque inutilia studia resecabit ; numquam otiosum sese esse patietur ; sed mercatores , avidissimum hominum genus , imitabitur , ut , sicut ii , opum parandarum causâ , non itinerum difficultate , neque navigationis periculo impediuntur , quominus domum , uxorem , liberos , relinquant , vitamque mari suam atque prædonibus committant ; ita nullum pro adipiscendâ sapientiâ laborem

borem ipse refugiat aut reformidet . Quantum putatis temporis eum compendium in longissimo illo disciplinarum cursu esse facturum ? quàm cito eum ad sapientiam , perfectamque rerum omnium doctrinam perventurum ? Latissimè ætas nostra patet , Auditores , atque ad omnem rerum omnium maximarum scientiam abunde nobis sufficit : sed eam nos ipsi imprudenter ac stultè contrahimus , dum , quibus in rebus minùs oportebat , studia nostra occupamus , atque , ut uno omnia verbo dicam , cum veteri Poëta , *exigua pars est vitæ , quam nos vivimus* : frustra-que postea dolemus , tempus nobis ad litterarum studia deficere , quum nos ipsi nobis ac tempori defecerimus . An non enim longissimam ad meliora studia Græcorum illorum vitam crederes , quibus etiam vacabat curiosius in fabellas inquirere , & quot Ulysses remiges comitati fuissent , studiosius perscrutari ? O magnos homines in nihil agendo occupatos ! qui tamen perditæ temporis culpam aut in naturæ nostræ infirmitatem , aut in circumstantia undique negotia , derivare consueverunt . Tu verò , adolescens , rectè ætatem partire tuam , nec eo tempore apud Grammatistas importunè detinere , quo gravioribus tibi disciplinis opera impendenda esset ; sed , quò brevioris discendi commoditatem breve adolescentiæ tempus pollicetur , eò tibi magis ad sapientiam properandum esse intellige . Non ego a te quidem certè Didymi labores exigam , quem sanè hominem tam assiduam ac propemodum ferreum in scribendo fuisse ajunt , ut quatuor librorum millia ( mirum dictu ! ) exaraverit . Imbecilliores sunt fortasse vires tuæ , quàm ut dies noctibus , noctes diebus,

# ORATIO QUARTA.

87

bus, sine ullâ vel honestæ remissionis interruptione, in disciplinis addiscendis conjungas. Sed illud tamen exigo, ut diligentiam, qua unâ virtute, ut bene Tullius agebat, reliquæ continentur, vitæ brevitate compenses: exigo, ut nullâ male collocatâ dici parte, quàm longissimam adolescentiam efficias: exigo, ut tecum versari ipse scias, & si societatem amas, studiorum tuorum comites, seu potius duces, viros totius antiquitatis doctissimos nanciscare, qui te rectâ ad sapientiam perducant: exigo denique, ut tempore uti discas, & vivere. Quod si, sedatis perturbationibus animi, diligenter didiceris; tum demum apparebit, quàm in longâ vitâ brevis tibi sit liberalium omnium artium, atque doctrinarum cursus futurus. Nunc verò, si vos, adolescentes, maximè commovent exempla, quibus ad animos quamcumque in partem pertrahendos atque impellendos nullum fortius validiusque argumentum inveniri unquam potest, superiorem omnium temporum jam inde ab ultimâ vetustate memoriam vobiscum ipsi percurrite; & non eos modò, quos ita hæcenus laudavimus, ut multò omni laude majores viderentur; sed & longè plures invenietis, qui, quum ab omnibus artibus liberalibus atque disciplinis instructissimi fuerint, plenissimè inde clarissimèque ostenderunt, ad omnem nos rerum omnium scientiam adspirare posse, eorum si exempla sectemur. Quid enim dicam de Eratosthene, quid de ceteris, quos a quincuplici, hoc est, ab universâ doctrinæ atque eruditionis genere, quo plurimum præstiterunt, translato eleganter a quinque certaminum victoribus vocabulo, quinquætionem appellarunt?

larunt? Nam, quod ad Theophrastum quidem, quem diximus, attinet, illa ipsa ejus, cum moretur, de brevitate vitæ querela, satis demonstrat, omnes eum artes ingenuas perfectè calluisse, quippe qui sese tum, cum, quæ ignorabat, videre cœpisset, extingui quereretur: quanquam nimium illud hominis omnium artium perficiendarum studium faceret, ut, qui in omni doctrinâ erat maximè eruditus, tamen ipse sibi minimùm scire videretur. Sed quemadmodum summis illis & sapientissimis viris pulcherrimum fuit ad omnem eruditionem præire, ita etiam atque etiam videte, adolescentes, ne turpissimum vobis sit, minimè illos subsequi, quorum plerisque eadem, quæ vobis maxima suppetunt, discendi subsidia defuerunt. Nescio quem enim veluti stuporem in aliquorum vultu legere mihi videor, quos ad honestissimam maximè æmulationem excitari oportuerat, ut, quam in aliis amabant atque suspiciebant, doctrinam, assequi ipsi pro viribus conarentur. At enim adolescentium nostrorum ingenia tardiora longè esse videntur, quàm ut cum maximis illis atque perspicacissimis ætatum omnium, totiusque antiquitatis ingeniis comparari ullo modo possint. Verùm, ut summorum illorum hominum, quos in omnibus disciplinis perfectissimos fuisse constat, laudibus nihil detrahendum putem; quam tamen ingenii tarditatem non vincit amor veritatis, vigilantia, assiduitas, labor, atque, ut uno omnia verbo complectamur, diligentia? Modico vir ingenio fuit Ephorus, in quo se calcaribus uti solere, sicuti contra frenis in Theopompo, eloquentissimus ille Græcorum rhetorum orator, Isocrates dictitabat. Quàm boni

boni tamen scriptoris Ephorus partes omnes implevit? Tardissimo ingenio fuit Cleanthes, quem arieti Timon meritò comparavit. Quàm egregius tamen Philosophus Cleanthes evasit, qui Stoicorum principi Zenoni tam sedulò adhæsisse fertur, ut, quæ ab illo audierat, testæ ossibusque inscribere, chartarum inopiâ, soleret, neque indignus, qui tanto philosopho succederet, unus e multis judicaretur? Mediocri etiam fuit ingenio Cornelius Celsus. Quàm multa tamen Celsus de omnibus ferè artibus conscripsit, itaque doctè atque eruditè, ut omnia illa scivisse visus fuerit? Vos appello, recentis etiam memoriæ viri doctissimi, atque eruditissimi, & de Latinis Græcisque litteris restitutis optimè meriti: quorum tamen nonnullos in rebus primùm percipiendis tardiori obtusiorique ingenio fuisse accepimus, diligentiaque suâ fecisse, ut, quæ in doctrinis reconditiora atque abstrusiora erant, in veritatis lucem proferrentur. Absit tamen, quàm longissimè absit, Auditores, ut hanc genti Etruscæ injuriam irrogari imprudenter patiar, ut aut adolescentes nostri summam rerum omnium maximarum scientiam desperare jubeantur, aut Etruscorum certè hominum ingenia tarditatis a quoquam insimulentur. Quæ verò ulla tam exulta humanioribusque omnibus artibus perpolita natio de ingeniorum acumine atque felicitate cum Etruscis hominibus contendat? quum paucos, & qui digito mostrentur, alibi locorum doctissimos viros enumeres; hîc verò in Etruriâ, hîc præsertim Pisis, in hac sede, in hoc musarum domicilio, tanta nunc sit, semperque antea fuerit maximorum ingeniorum ubertas, ut huc Athenæ comigrasse

M

migrasse

migrasse tandem videantur. Agite igitur, adolescentes ornatissimi, pudeat vos a majorum vestrorum gloriâ unquam desistere, atque degenerare; pudeat, quam doctrinæ vobis atque sapientiæ laudem Patres vestri tradiderunt, non adæquare; pudeat Etrusco vos nomine censi, & Etruscorum doctrinæ minime respondere. Quid igitur vos a summâ disciplinarum omnium scientiâ retardat unquam ac remoratur? Patrium nomen vobiscum ipsi perpendite, & cogitate, quàm pacato otio, quantâque tum ceterarum rerum, tum optimorum studiorum commoditate, frui hîc Pisis vobis liceat ad universum hunc doctrinarum orbem brevi percurrendum. Universas has doctrinas spectate, ad has rectis studiis contendite, quarum mirâ atque incredibili suavitate labores in discendo vestri levabuntur. Quod meum fuit, hoc pro viribus exsecutus sum, ut videtis, ut, quibus possem argumentis, ad sapientiæ vos ac litterarum studia excitarem: facilis vobis ac brevis, reliquus erit omnium doctrinarum cursus, si id ipsum vobis persuaderi patiamini.

CAROLO . RINUCCINIO  
 VIRO . SUMMO  
 ET . VIRTUTE . ET . DIGNITATE  
 EXCELLENTISSIMO  
 PATRICIO . FLORENTINO  
 MARCHIONI . BASELICAE  
 EQUITI . ET . EQUESTRIS . ORDINIS . SUI  
 IN . PROVINCIA . VENETA . PRIORI  
 CAESARI . IN . ETRURIA . REGENDA  
 A . CONSILIIS  
 ET . IN . RE . MILITARI . ETRUSCA . A . SECRETIS  
 OPERA . SEMPER . EGREGIE  
 IN . REM . ETRUSCAM . NAVATA  
 MAGNIS . QUONDAM . DUCIBUS . MEDICEIS  
 NUNC . MAXIMO . IMPERATORI  
 FRANCISCO I.  
 OB . FIDEM . ATQUE . INTEGRITATEM  
 ET . PRUDENTIAM PERCARO  
 ET . A . LITTERARUM . STUDIIS . PROTEGENDIS  
 UBIQUE . CELEBRATISSIMO  
 ALEXANDER . POLITUS  
 ORATIONEM . SUAM . QUAM . IPSE  
 AD . ACADEMIAM . PISANAM  
 MAGNA . HOMINUM . FREQUENTIA  
 AC . CELEBRITATE  
 DE . LOTHARINGICIS . ET . MEDICEIS . LAUDIBUS  
 DIXERAT  
 ET . PISIS . EDIDERAT  
 ANNO . MDCCXXVIII.  
 PUBLICI . DENUO . JURIS . FACTAM  
 OPTIME . DE . SE . ET . STUDIIS . SUIS . PROMERITO  
 HONORIS . ET . GRATI . ANIMI . CAUSSA  
 L. M. Q. D. D. D.





# ALEXANDRI<sup>93</sup> POLITI

DE CL. REG. SCHOLARUM PIARUM



## ORATIO QUINTA.

*De laudibus Lotharingicis & Mediceis.*



Uod a Deo Optimo Maximo ego  
semper precatus sum, Patres sa-  
pientissimi, Auditores ornatissimi,  
ut nostra hæc litterarum studia pa-  
cis & otii summâ tranquillitate  
uterentur, & quòd hic Pisis, loco  
ad litteras atque doctrinas pertra-  
ctandas totius Etruriæ maximè op-  
portuno, sapientiæ regnum Medicei quondam prin-  
cipes fundaverant, magis magisque stabiliretur at-  
que propagaretur, ad gloriam Etrusci nominis sem-  
piternam; id tandem, Magno jam Etruriæ Duce,  
Francisco Lotharingo, divinitus nobis obtigisse, tum  
ceteris omnibus, qui Etrusco nomine censentur,  
tum nobis præsertim, ad quos maximâ hujus felici-  
tatis pars pervenit, summopere lætandum. Si qua  
enim aurea unquam tempora fuerunt, qualia Me-  
diceis certè principibus fuisse olim memorantur,  
pro-

profectò tempora hæc sunt in prinnis aurea, cum felicitas, quam litteris omnibusque bonis artibus atque disciplinis in Pisano hoc Lyceo Magni illi Medicei Duces dederunt, aucta summè est atque cumulata Magni Ducis nostri Lotharingi liberalitate. An non vaticinatio illa fuit viri doctissimi atque eruditissimi, qui ante centum & viginti annos, quum eandem hanc provinciam, quæ mihi demandata est, humanitatis atque eruditionis sustineret, & de insignibus Lotharingæ familiæ gentilitiis, quodam veluti numine afflatus, subtilius disputaret, tanquam ex Apollinis tripode, pronunciavit, bene omnino Lotharingæ genti cum Mediceâ gente convenire, hujusque rei indicio esse lilia sex illa aurea, quæ Duces Lotharingi ab Austrasiæ regibus, majoribus suis, insigne olim gentilitium acceperant: quorum quidem liliorum quædam veluti radix in sex illis Mediceorum insignium orbiculis conspiceretur. Fuit illa sanè divinatio. Neque verò illa insignia quidquam portendere, aut præmonstrare potuerunt. Sed est quædam in animis hominum nescio quomodo aliunde impressa præfagitio, qua rem sæpe, multò etiam antequam eveniat, præsentire divinitus videntur. Præfenserant igitur homines jam inde ab eo tempore, quo Christina illa Lotharinga, vice nepotis sui Ferdinandi Medicei adolescentuli, Etruriæ cum imperio præsidebat, fore aliquando ut Ducibus Lotharingis avitum jam regnum, Etruria esset, & quæ beatissima tunc erat, Academiæ huius Pisane & litterarum conditio, per Magnos Duces Lotharingos renasceretur. Quòd si tantâ hac fortuna, tamque admirabili & divinâ, nobis maximè lætandum,

dum, quis, quæso, dies ad lætitiā hanc celebrandā aptior atque accommodatior, quā hodiernus hic dies, quem studiis nostris auspiciandis solemnem atque legitimum majores nostri esse voluerunt? Agite, Auditores, gestit oratio jam mea suā Etruriæ, suā litteris, suā Academiæ Pisane felicitatem gratulari, & Lotharingicas simul, & Mediceas laudes, divinas illas atque immortales, prædicare.

Neque verò est dubitandum, Auditores, quin utræque hæ laudes sint cum litterarum laudibus conjunctæ atque confociatæ. Nam Mediceæ quidem gentis quænam magis propria ac præcipua unquam laus, quā quæ a litteris litterarumque patrocinio, uberrimè atque copiosissimè dimanat? Intermortuæ a septingentis amplius annis erant litteræ, bonæ omnes artes atque disciplinæ in situ & squallore jacebant, omnia barbaries efferaverat, lingua Latina ab elegantia & nitore suo penitus degeneraverat, summā in ignoratione Græcarum litterarum Latini homines versabantur, humanitas ferè ipsa poliorque litteratura in oblivionem & desuetudinem venerat, elegantioribus quibusque & melioribus studiis nox apud Latinos sempiterna offusa esse videbatur. Quid plura? Græcia, illa, inquam, Græcia, quæ, tametsi plurimum jamdudum sordium contraxerat, tamen qualemcunque veteris eruditionis splendorem, ac veluti scintillam, conservabat, Græcia, inquam, ipsa (dictu valde miserandum!) barbara evaserat, &, quæ sedes olim ac caput humanitatis, arx jam facta erat atque propugnaculum barbariei, Græcæque ipsæ litteræ exules atque ex-

tor-

torres e patrio solo profugerant. Hic status erat, hæc facies miserabilis litteraturæ, cum Cosmus Medicus ille senior, qui publico civium suorum decreto suæ pater patriæ est appellatus, accitis undique doctis viris, litterisque Latinis atque Græcis in clientelam receptis, enixus est, atque effecit, ut non Latium modò, sed etiam Græcia universa, in Etruriam commigraret: unde Cosmus, Latinis Græcisque copiis egregiè instructus, bellum barbariei intulit, eamque ex maximâ Europæ parte penitus profligavit. Quæ verò Europæ regio paullo excultior atque humanior, quò, reportatâ tandem a Cosmo pulcherrimâ clarissimâque omnium victoriâ, tropæisque de barbarie perillustribus constitutis, non hujus victoriæ fructu: uberrimus pervaserit? Testis est Italia, ad quam e fonte illo Mediceo omnis doctrinarum omnium elegantia copiosissimè profluxit. Testis est Gallia, quæ non doctissimis modò atque elegantissimis viris e Cosmi domo in reconditis quibusque atque interioribus litteris exornata est atque exculta; sed etiam scriptis venerandæ antiquitatis codicibus Græcis locupletata. Testis est Germania, ad quam omnis inde diffusa est doctrina atque eruditio. Testis est Brittannia, quæ honestissimis hisce atque optimis humanitatis studiis ita inde, tamque ubertim, est irrigata, ut, quum Græca jam tum litteratura magno in pretio atque honore haberi cœpta esset, Plato postea, atque Aristoteles, non nisi Græcè, in Oxoniensi Academiâ atque Cantabrigensi prælegerentur. Testes denique omnes Academiae, atque omnia gymnasia, quæ stribligine antea sermonis utebantur, postea,

re-

# ORATIO QUINTA.

97

renatis per Cosmum Medicem litteris, ornatè & purè, hoc est, Latinè, nèque Latinè modò, sed etiam Græcè, loqui didicerunt. Sed hæc initia, veluti fuerunt renascentium atque repullulantium litterarum. Illa, illa litterarum restitutarum incrementa, cùm, quæ Cosmus ille Medices auspiciò inchoaverat, nepos ejus Laurentius perfecit atque absolvit. Quæ autem promeritis his Laurentii in optimas disciplinas par unquam possit oratio inveniri? aut quid huc tandem, Auditores, afferri, quod dignum ejus ingenio, aut artium liberalissimarum, quas ille protexit, atque fovit, præstantiâ atque amplitudine videatur? quem etiam Laurentium avo suo Cosmo in eo longè præferendum esse ajunt, quòd ille aliorum, hic causâ etiam sui, quippe litterarum optimarumque artium studiosissimus, lectissimam sibi atque locupletissimam bibliothecam comparaverit. Quid enim per Deum immortalem in universo disciplinarum orbe fuit, quod Laurentius non omnibus numeris absolvendum atque exornandum curaverit? quid in arte Oratoriâ, quid in Poëticâ, quod Laurentius non ad summum fastigium evexerit? quid in Philosophiâ, quod Laurentius non ad altissimum excellentis doctrinæ gradum perduxerit? quid in Græcâ ac Romanâ antiquitate, quod Laurentius e tenebris in lucem non evocaverit? Ille Latinas Græcasque Musas non hospites modò, sed etiam contubernales, sibi esse voluit; ille doctissimos atque eruditissimos ætatis suæ homines in familiaritatem suam recepit; ille, quibus res domestica angustior omnes ad summam doctrinam aditus intercludebat, facilem liberalitate suâ aditum

N

ad

ad interiora quæque atque recondita summarum doctrinarum patefecit; ille honorem litteris ac litteratis hominibus maximum detulit; ille, ut Græcos sibi undique libros, maximèque in Græciâ, redimeret, nulli unquam operæ, nullique sumptui pepercit; atque adèd, quemadmodum Barbari Græcos imperio, sic ille Græciam bonis scriptoribus bonisque libris spoliavit. Quid? maxima hæc Laurentii in litteras merita atque beneficia non ne hic nobis, in hac ipsâ aula, intra hos ipsos parietes, ante oculos obversantur? Adeste huc, huc, inquam, adeste, non animis modò, sed etiam oculis, Auditores. Nam quòd Pisana hæc litterarum studia sedem hîc fixam atque stabilem habeant, quòd hîc in his ædibus, suo veluti in folio, sese sapientia magnificè regièque ostendet, quòd hæc undique gymnasia sapientissimorum doctissimorumque virorum, hoc est, sapientiæ ipsius, vocibus frequenter & assiduè personent, debemus nos Laurentio, qui sacras hæc ædes a fundamentis excitavit atque extruxit, sapientiæque Pisanae, ac doctrinis omnibus dedicavit. Hoc verò tantum est, tamque prolixum ac singulare, Laurentii in litteras beneficium, ut, etiamsi, quæ plurima ac summa Laurentius, in litteras beneficia contulit, minimè ipse omnium contulisset, unum ac solum ad laudes hominis in omnem æternitatem celebrandas sufficeret. Quandiu nanque nomen erit litterarum, nomen Academiæ Pisanae, nomen Sapientiæ Pisanae, nomen urbis Pisanae, tandiu Laurentii Medicis nomen apud posteros prædicabitur. Hîc ego quid dicam de Petro & Johanne, Laurentii filiis? quorum

# ORATIO QUINTA.

99

rum alterum ferunt tum in ceterâ omni litteraturâ, tum in Græcis litteris, adeò profecisse, ejus ut doctrinam, Græcique sermonis facilitatem atque elegantiam Græci ipsi, qui frequentes Florentiam ventitabant, valde mirarentur; alter verò, Pontifex Maximus creatus, Leoque Decimus appellatus, tam impensè litteras coluit, tamque benignè atque liberaliter litteratos homines est complexus, ut, qui pater orbis terrarum legitimo suoque apud Christianos titulo vocabatur, pater etiam litterarum nuncuparetur, & quod ad litteras humaniores attinet, aurea Augusti tempora Romæ restituisse putaretur. O tempora illa Leonis Decimi verè aurea, cùm summo homines ingenio amplissimis præmiis ad persequenda bonarum artium studia invitabantur, cùm iis, qui veteres scriptores perditos e tenebris eruisent, magna merces persolvebatur, cùm doctrina atque eruditio in gradu dignitatis eminentiori collocabatur, cùm Pontificis illius maximi atque doctissimi amores atque deliciae studia quæque humanitatis habebantur, cùm denique litteræ Græcæ atque Latinæ Leonis Decimi liberalitate altæ atque sustentatæ, incrementa multò omnium maxima accepisse videbantur. Quis hîc vestrum, Auditores, sibi facîle persuadeat, post Leonem illum Decimum, auctâ jam summis opibus atque honoribus litteraturâ, ad talem hanc & tantam Medicorum hominum erga litteras beneficentiam quidquam unquam adjici atque adjungi potuisse? Et tamen, Cosmo illo Magno, ad Etruriæ postea principatum evecto, tanta facta est meritorum Medicæ gentis erga litteras bonasque disciplinas accessio, ut clarissima illa atque splendidissima superioris me-

N 2

mo-

moriæ exempla, veluti lumen stellarum luce solis, Cosmi Magni, reliquorumque Magnorum generosæ illius stirpis Ducum studiis & liberalitate obscurata quodammodo fuerint atque offusa. Qua enim Cosmus sapientiâ erat, incredibili ac propemodum divina, quum in parvo mediocrique imperio magnam Augusti fortunam studiosè æmuleretur, industriam omnem suam in eo etiam posuit, ut Augustum ipsum in liberalibus artibus protegendis atque ornandis non æquaret modò, sed etiam superaret. Deus immortalis! Poteest ne quidquam majus, atque etiam admirabilius dici, quàm Cosmum Medicem, Ducem illum Etruriæ, imperii magnitudine, & armorum potentiâ, tantò minorem Augusto, multò Augusto majorem beneficiorum erga litteras magnitudine extitisse? Augustus, maximus ille terrarum orbis imperator, omniumque gentium Romani orbis dominus, pecunias non adeo multas in litteratos homines non adeò multos impendit: neque hæc quantacunque ejus in litteras optimasque artes liberalitas valde diuturna fuit; sed vitæ ejus terminis circumscripta est atque definita. Cosmus, Dux Magnus Etruriæ, multò ille quidem minor dominator, Etruriæ suæ totius thesauros in litteras fovendas atque amplificandas profudit: neque hanc liberalitatem suam passus ipse est secum extingui, aut ad paucos duntaxat homines pertinere; sed eam ad plurimos longissimè latissimèque propagavit, atque ad omnem posteritatem. Quis enim Academiam hanc Pisanam, lucem Etruriæ, arcem omnium doctrinarum, domicilium ac sedem sapientiæ, labentem ferè hominum negligentia atque inclinatham, repa-

ra-



ravit atque instauravit, nisi Cosmus? quis eam ja-  
centem atque afflictam excitavit, nisi Cosmus? quis,  
studiorum bonarum artium jam pretiis imminutis,  
nudam antea atque inopem, certis atque annuis  
beatioris feliciorisque Etruriæ proventibus locuple-  
tavit atque auxit, nisi Cosmus? quis liberales omnes  
disciplinas, quæ hîc Pisis a summis & celeberrimis  
viris docerentur, egregiè perpetuèque dotatas re-  
liquit, nisi Cosmus? quis denique, nisi Cosmus,  
hanc ipsam Academiam, summæ summæ doctrinæ  
atque eruditioni præmiis tributis, nec nisi summis  
totoque orbe claris hominibus in Academicorum col-  
legium cooptatis, eò honoris atque dignitatis ex-  
tulit, ut nulli cuiquam celeberrimarum toto ter-  
rarum orbe Academiarum secunda, plurimarum certè  
esse tunc princeps videretur? Quibus ego te laudibus  
efferam, Cosme, cujus solerti curâ atque provi-  
dentiæ bonæ omnes artes atque disciplinæ, earun-  
demque artium præclarissima quæque ac nobilissima  
studia, non ad Etruriæ modò atque Italiæ; verùm  
etiam Europæ totiusque terrarum orbis, utilitatem,  
recreata sunt atque reffloruerunt? Benefactum hoc  
tuum, divinum est atque immortale, neque unius  
hominis ingenio atque eloquentiâ satis pro digni-  
tate celebrandum. Mitto, Cosme, ceteras virtutes  
tuas, mitto belli pacisque artes eximias, mitto  
sapientiam illam tuam singularem, qua quum Etru-  
riæ tuisque populis summam felicitatem pepereris,  
verissimum re ipsâ comprobasti, quod philosopho-  
rum sapientissimus divinè ac sapientissimè protulit,  
beatas tum demum fore Respublicas, in quibus aut  
philosophi regnarent, aut reges philosopharentur.

Opti-

Optimam hanc Cosmus atque pulcherrimam hæreditatem posteris suis Magnis Ducibus Etruriæ Mediceis reliquit: qui omnes quum pro suis quisque viribus, eam auxerint atque amplificaverint, optimorumque Ducum partes universas bene præclareque expleverint; tamen eorum quisque eò melior atque laudabilior censeretur & potest, & debet, quò proprius atque perfectius Cosmum illum Magnum imitatus est, &, tanquam absolutum regnandi exemplar, tum in ceteris aliis rebus, tum maximè in litterarum, Pisanique hujus Athenæi patrocinio, retulit in semetipso atque expressit. Quò majori nobis nunc gaudio exultandum sit, quòd regnum hoc Etruriæ a Magno illo Cosmo bonis auspiciis, ac virtute fundatum, tandem veluti per manus ad Franciscum III. Lotharingæ Ducem, devenerit. Sentio, me paullatim, Auditores, in eam orationis meæ partem esse delapsum, quæ est de laudibus Lotharingicis: cujus quidem orationis in tanta rerum copiâ nihil difficilius sit, quàm modum & certam quandam rationem tenere. Nec verò mihi nunc propositum est laudationem panegyricam facere. Nam si artifex ille, & pater eloquentiæ Isocrates, cujus domus officina quædam fuit dicendi, decem, aut etiam, si Deo placet, quindecim annos fertur panegyricam orationem suam de Atheniensis urbis laudibus elaborasse, quî ego me sperem, mediocri hominem ingenio, ac tenui, seu nullâ potius eloquentiâ, intra perbreve hoc tempus, orationisque hujus meæ angustias, divinas tuas, Magne Dux Franciscæ, majorumque tuorum laudes satis commemoraturum? Conabor tamen, quantum poterò,

tero, partem aliquam earum laudum attingere atque delibare. Quamquam, cum maximis modo laudibus Mediceos homines, ac Magnos Duces afficiebam, multò potiori jure heroës quodammodo Lotharingos collaudare ipse mihi videbar: qui a bonarum litterarum patrocínio, atque a ceteris omnibus pacis artibus præclarissimis, eò mihi magis celebrandi esse videntur, quòd militari etiam fortitudine præstiterunt, & pericula plurima atque gravissima, quæ in rem Christianam ab hostibus inhumanissimis imminebant, armis atque victoriis a Christiano longè orbe propulsarunt. Jam verò, constituto Magno Etruriæ Duce Francisco III. Lotharingo, quantà & quàm incredibili voluptate gens Etrusca perfusa est, cum planè liquidoque perspexit, Magnos sibi nunquam optimosque Duces futuros, qui rem Etruscam Etruscique nominis majestatem servarent atque augerent. Quod quumtute, Francisce, Etruriæ jam tuæ plenè cumulatèque præstiteris, quo te unquam nomine appellem? Tu salutis nostræ auctor, tu Etruscæ dignitatis assertor, tu pristinæ nostræ felicitatis restitutor, tu pater nobis patriæ. Tua enim jam Lotharingia, Francisce, nostra hæc Etruria. Hæc tibi domus paterna, hoc tibi avitum regnum, hæc tibi patria, Etruria: quæ a te servata, patrem quoque te suum, amoris atque honoris, gratique animi causâ, agnoscit, confitetur, cunctisque omnium suffragiis appellat. O nos beatos, quibus datus es divinitus pater, & talis pater, qualem neque meliorem, neque nostrum amantio rem, optare nunquam potuissimus! O beatam felicemque Etruriam, quæ

quæ in extremum pene discrimen salutis adducta, sic inde, te auctore atque auspice, evasit, ut nunquam antea beator atque felicior fuisse videatur! O diem illum fortunatum, & melioribus planè lapillis nobis consignandum, quo, miro ordinum omnium Etruriæ consensu, maximoque populorum plausu, Senatu Florentino verba præeunte, atque in ea verba jurante, sanctissimo jurejurando tibi nos devinximus, tibi nos nostraque omnia libentes volentesque tradidimus, tuosque nos fore, perpetuèque tibi, tanquam optimo & clementissimo patri, subjectos atque obediētes polliciti sumus! Illud enim mehercule initium ac fundamentum totius nostræ felicitatis. Quoniam verò maxima pars felicitatis est securitas, sine qua beata civium vita nullo modo esse potest, quæ & quanta est, Auditores, nostra hæc felicitas, quorum summa atque firmissima est per Magnum Ducem nostrum Franciscum Lotharingum securitas? Quis enim Francisco aut ad bella profliganda, ac repellenda fortior, aut ad pacem & tranquillitatem tuendam sapientior? Minervam, quæ dea est sapientiæ fabulati sunt Poëtæ, humaniorum simul litterarum disciplinis ac bellicis rebus præsidere: ut hac nimirum ratione significarent, utramque illam & militiæ & sapientiæ laudem sociatam inter sese plerunque esse atque conjunctam. Quotus enim quisque est ab omni hominum memoriâ summorum ducum, atque imperatorum, qui non etiam sapientiæ atque litterarum liberalissima studia excoluerit, atque in utrâque illâ & sapientiæ & fortitudinis laude non quàm maximè excelluerit? Testem cito Alexandrum illum Magnum,

te-

stem C. Julium Cæsarem, testem Carolum illum Magnum, testes Duces Lotharingos, viros fortissimos atque sapientissimos, qui militiæ & litterarum studia superioribus semper temporibus acerrimè consecrati, utrâque illâ simul laude summo opere floruerunt. Sed, quoniam ita naturâ comparatum est, ut quæ unâ in familiâ in varios diversosque subinde homines summa atque præclara dispersa fuerant, in unum aliquando divinitus congregentur, atque conveniant; quis, quæ Ducibus singulis Lotharingis præcipua antea atque eximia fuerunt, belli ac pacis ornamenta, non simul omnia in unum tandem Franciscum collecta esse fateatur? quem Imperator Cæsar Carolus, qua est sapientiâ, singulari ac pene divinâ, unum omnium dignissimum judicavit, cui filiam suam natu maximam, eandemque regnorum suorum hæredem, Tereciam Austriacam, eximia pulchritudine ac sanctimoniâ feminam, omnique virtute ornatissimam, in matrimonium collocaret. Bellicæ illæ artes sunt, quæ in summo imperatore requiruntur, scientia rei militaris, virtus, auctoritas. Quis autem Francisco rei militaris scientior, qui parvâ manu innumerabiles hostium copias aut vicit, aut repressit, aut retardavit? Quis virtute Francisco præstantior, qui in summis atque gravissimis periculis exemplum sese fortitudinis bellicæ militibus ad imitandum proposuit, summâque innocentia, fide atque temperantiâ bella administravit? Quis propter magnam heroicæ cujusdam atque excellentis virtutis opinionem, auctoritate Francisco illustrior, quem sic reveriti sunt milites ac coluerunt, nulli ut alteri cuiquam imperatori obedien-

O

dien-

dientiores sese atque obsequentiores vel in maximis discriminibus præstiterint? Jam verò quum pacis artes variæ ac plurimæ sint, eæque omnes præclarissimæ simul atque difficillimæ, quibus populorum quietè inter sese, & cum finitimis agentium tranquillitas ferè atque felicitas continetur, quis ab iis omnibus artibus non summis ad cælum laudibus Franciscum extollat? Experta est nuper maximo suo bono & experitur Etruria, quantâ is curâ atque providentiâ populis suis consulat, quàm legitimè atque æquabiliter justitiam administret, quàm rectè atque sapienter clementiâ justitiam temperet, quâ & quantâ æquitate summi juris rigorem mitiget, qua & quantâ prudentiâ omnes res civiles moderetur, quàm amantem denique sese suorum & publici boni studiosum exhibeat. Hæc omnia, procul a nobis agente Magno Duce nostro Francisco III. Lotaringho, reique Christianæ causâ difficillimum & gravissimum bellum cum barbaris impiisque hostibus in ultimis Pannoniæ finibus gerente, hæc, inquam, omnia, quæ dixi, beata felixque Etruria sentit interea atque experitur per viros prudentissimos atque sapientissimos, quibus ille vice sui rem Etruscam regendam commisit. Qua ipsâ in re quis divinam verèque singularem Magni Ducis nostri sapientiam non admiretur, qui ipse per sese discreverit, summæque rei Etruscæ viros tales præfecerit, qui de publicis privatisque rebus deliberaturi, fidem semper ac probitatem in consilium adhibeant? aut quis paullo prudentior atque perspicacior animi consiliiue ejus magnitudinem non inde facillè metiatur atque suspiciat, quòd viros vitæ  
intē-

integritate atque sanctimonia, virtutisque atque ingenii excellentiâ magnos per sese atque illustres, ad rempublicam nomine suo administrandam admo-  
verit? Quod si ille absens longèque remotus vim beneficentiæ suæ talem ac tantam latè in Etruriam diffundit, quid fore unquam censeamus, si ipse per sese Etruriam invisat, ipse semet Etruriæ spectan-  
dum ac fruendum præbeat, concurrentem ad sese Etruriam, sibi que omni lætitiæ gestu plaudentem, ipse amanter complectatur? Atque hæc porro vo-  
torum Etruriæ summa est; idque unum ac solum superest ad perfectam atque absolutam Etruriæ felicitatem. Liceat verò jam mihi, Magne Dux Etru-  
riæ, Francisce, quando non licet præsentem, ab-  
sentem te alloqui, tuæque tibi Etruriæ Sensa & communia nostrum omnium vota publicè exponere. Scio maxima tibi imperia esse olim divinitus desti-  
nata, nec potentiam ac majestatem tuam angustis Etruriæ finibus inclusum iri; sed ad alias quoque maximas gentes eam sese esse longè latèque ex-  
plicaturam. Manent te regna, manent te imperia amplissima atque opulentissima, &, qui Magnus nunc Dux, Magnus olim Rex nominabere. Hæc omnia scio, ut multa sæpe soleo in hac rerum hu-  
manarum vicissitudine atque varietate in posterum providere. Veruntamen, Magne Dux, tua tibi se Etruria, quæ te patrem ac dominum jure jam suo, ac certo habet, unicè ac præcipuè commendat. Jam verò, te Magno Duce, novo hoc suo atque eximio splendore Etruria mirum in modum lætatur, jamque omnino, Francisce, ac certissimè sperat, te dominum ac regem suum omnem desiderii sui

expectationem adventu tuo brevi esse expleturum, ut tuo ipsa sub imperio in suam pristinam potentiam ac magnitudinem restituatur. Ac videor jam mihi universam Etruriam, sedibus suis veluti relictis, obviam tibi prodeuntem; jamque te triumphali pompâ, inter populorum plausus atque acclamationes, in nobilissimam hanc atque clarissimam, quondam etiam totius Etruriæ potentissimam urbem, Pisas, jamque in Musæum hoc Etruriæ, in hanc nostram Academiam, atque in hoc ipsum magnum sapientiæ atque eloquentiæ gymnasium, ingredientem videre; itaque jucundissimâ hac dulcissimâque cogitatione abripitur atque exultat animus meus, vix ut mihi temperem, quin tibi, quasi præsentî, orationem de laudibus tuis, qualem me certè habiturum esse confido, habeam nunc ex hoc ipso summæ auctoritatis loco panegyricam. Nunc verò in communi hac Pifarum, totiusque Etruriæ expectatione, quid Pisis, quid litterarum studiis, quid nobis, qui studia hæc litterarum profitemur, hodieque a nomine tuo, veluti tutelaris cujusdam numinis, bonis ominibus ac votis auspicamur, quid tandem matri huic studiorum, florentissimæ huic totoque terrarum orbe celebratissimæ Academiæ, de patrociniis ac liberalitate tuâ non sperandum? quando aurea illa litterarum ac doctrinarum tempora, illa, inquam, tempora, quæ hîc Pisis sub Christinâ Lotharingâ heroinâ, florentibus maximè propter præmiorum ubertatem atque opulentiam litteris, fuerunt; Magno jam te Etruriæ Duce, Franciscæ Lotharinge, auctâ atque amplificatâ studiorum nostrorum dignitate, multò etiam beatiora atque feliciora redierunt.



FRANCISCO . GUICCIARDINIO  
COMITI . PATRICIO . FLORENTINO  
VIRO . CLARISSIMO  
ET . NOBILISSIMO  
ET . DE . OPTIMIS . LITTERARUM . STUDIIS  
PRAECLARE . MERITO  
QUOD . MAJORUM . SUORUM . VESTIGIA  
S E C U T U S  
NOBILITATEM . SUAM . IN . VIRTUTE  
ATQUE . IN . LITTERARUM  
ET . ERUDITIONIS . GLORIA . POSUERIT  
SINGULARIQUE . SEMPER . BENEVOLENTIA  
DOCTOS . VIROS . COMPLEXUS . FUERIT  
ALEXANDER . POLITUS .  
O R A T I O N E M . S U A M .  
AD . ACADEMIAM . PISANAM  
DE . OPTIMORUM . STUDIORUM . ASSIDUITATE  
A D . G L O R I A M  
GENTIS . GUICCIARDINIÆ  
SEMPITERNAM  
D. D. D.



# ALEXANDRI<sup>III</sup> POLITI.

DE CL. REG. SCHOLARUM PIARUM



## ORATIO SEXTA.

### *De optimorum studiorum assiduitate.*



Uanquam, quæ in tantâ tractandorum argumentorum copiâ multò utiliora, & ad diei hujus celebritatem, atque ad litteras promovendas opportuniora, visa mihi semper sunt, ea, quàm potui, diligentissimè, sum ego quotannis in his litterarum studiis auspican-  
dis oratione meâ persecutus; tamen fateor, tali ac tanto conatu meo id, quod mihi jam inde ab initio suscepti muneris proposueram, me nondum explevisse. Proposueram mihi, Auditores, summum in doctrinâ virum informare, & quam doctrinæ atque eloquentiæ formam omni ex parte perfectam atque absolutam animo meo conceperam, spectandam adolescentibus exhibere, cujus ipsi pulchritudine ad omne doctrinarum genus allicerentur. Neque verò inde aliud expectari posse videbatur, quàm  
quod

quod unusquisque sibi vestrum certissimè pollicitus fuerat, summo ingenio adolescentes, sapientiæque amore mirificè succensos, altissimum doctrinæ atque sapientiæ gradum esse affecturos: cùm ecce vobis, stulta quædam ac falsa, quam plerique sibi adolescentes importunè induerunt, summæ doctrinæ ac scientiæ suæ persuasio, de medio eos doctrinarum cursu, perniciosissimo sanè ac maximo errore, revocavit. Neque enim ulla alia bonis litteris atque doctrinis tam detestabilis pestis est, quàm putare, ad summam te ante doctrinam pervenisse, quàm perverneris. Tetrerrimam hanc ingeniorum pestem ut ab adolescentium nostrorum animis longissimè depellam, muneris mei esse duxi, hodiernò die, in hac tantâ doctissimorum hominum frequentiâ, breviter demonstrare, quò quisque doctior est, atque eruditior, eò majori studio in omnem ei doctrinam atque eruditionem esse incumbendum. Quod in me est, conabor equidem nihil dicere, quod non dignum loci hujus amplitudine, atque adolescentium nostrorum studiis esse videatur.

Ac profectò agitur hîc, Auditores, de summâ totius eruditionis atque doctrinæ. Ceteri veluti gradus sunt, quibus ad summam rerum omnium scientiam adscendimus: hic apex, hoc culmen, hoc fastigium est, non certè quidem spectare, quid & quantum quisque in doctrinis profecerit; sed quid & quantum sit sibi adhuc ad summam perfectamque doctrinam proficiendum. Unde verò existimetis, viros, mortalium omnium judicio, & totius antiquitatis mirificâ consensione, longè sapientissimos, tantos in doctrinis progressus facere potuisse, ut nihil  
non

# ORATIO SEXTA.

113

non scire viderentur, nisi ex eo quia sibi ii certò persuaserant, sese minimum ac nihil ferè scire? Inde enim maximè movebantur, ut multarum, magnarumque rerum scientiam, quam sibi deesse perspiciebant, multò laboriosius atque diligentius perquirerent. Unde enim Chrysippus, non ipse modò totam vitam suam in bonarum artium, ac præsertim in Dialecticæ studia accuratissimè impendit; sed, quum de liberis educandis optima præcepta conscriberet, nullum etiam vel infantilis ætatis tempus vacuum a litterarum curâ esse permisit, nisi ex eo quia abjiciendæ rerum ignorantia totum vivendi spatium minimè satis esse judicavit. Unde illa etiam non Hippocratis modò & Theophrasti; sed etiam totius generis humani de brevitæ humanæ vitæ querela, nisi ex eo quòd multa adhuc mortales, cum vita eos deficit, ignorant? Unde illa quoque Aristotelis, summi & sapientissimi viri, in veteres philosophos accusatio, qui philosophiam suis ingeniis perfectam credidissent, quos quidem philosophos Aristoteles aut stultissimos aut gloriosissimos fuisse ait, nisi ex eo quia multò illi plura de philosophiâ nesciverant, quàm didicissent? Quanquam nihilò iis, hac certè in parte, seu prudentior, seu modestior, censerì ipse debet Aristoteles, qui, quòd paucis annis magnam philosophiæ accessionem factam videret, brevi eam tempore planè absolutam fore existimaverit. Quasi verò, posteaquam multa perspecta, atque cognita fuerunt, non multò etiam plura cognoscenda adhuc superessent. Id, quod res ipsa, jam inde ab Aristotelis, & superioribus etiam Aristotele temporibus, abunde testata est, hodieque te-

P

statum,

statutur, &c, quod ego certissimus vobis vates futurum prædico, quoadusque philosophiæ ac litterarum studia vigeant, in seculorum omnium posteritatem testabitur: optimum nimirum & doctissimum quemque philosophum plurima adhuc ignorare, multaque & magna, quæ ipse prorsus nesciat, per totam quotidie vitam addiscere. Quis enim ante Aristotelem perfectior in doctrinâ Democrito, quem ita in philosophiâ versatum fuisse ajunt, ut & Physica, & Ethica & Mathematica, & disciplinarum humanitatis orbem, artesque universas tenuerit? Et tamen Aristoteles negat, ullum prorsus superioris memoriæ philosophum philosophiam numeris suis absolvisse. Quis paullò ante Aristotelis tempora, atque ipsis etiam Aristotelis temporibus, Platone, philosopho planè divino, rerum omnium scientior, qui disciplinis omnibus Atheniensium mirè eruditus, in Italiam ad Pythagoricos, in Ægyptum ad Sacerdotes, sapientiæ addiscendæ causâ, navigavit? Quis ipso Aristotele? quis, post Aristotelem, Theophrasto? quis ceteris, qui in scholam Peripateticam successerunt, viris doctissimis atque sapientissimis, certè quidem in iis, quæ ad sapientiam pertinerent, versatior atque eruditior? Quid Peripateticos dico? quum principes ceterarum omnium sectarum philosophi, quum astrologi atque mathematici, quum medici atque jurisconsulti, quum ii etiam, qui res sese divinas interpretari profitentur, Theologi, nervos omnes ingenii, longissimo temporum spatio, in eo unicè contenderint, ut reconditiora quæque atque abstrusiora in medium exponerent, atque explicarent, summis his & perfectissimis viris quis omni doctrinâ

nâ rerumque maximarum notiâ exultior? Qui tamen omnes, tantum abfuit, ut vigilis ac laboribus suis summam atque perfectam omnium rerum, tum divinarum, tum humanarum, caussarumque, quibus hæ res continentur, scientiam, quam ipsam volunt esse sapientiam, assequerentur, ut ne ipse quidem sapientiæ ac scientiæ princeps Aristoteles rem non magni admodum momenti, sed curiosioris subtiliorisque inquisitionis, Euripi illius Chalcidici naturam ullo unquam studio explorare atque expiscari potuerit. Neque verò est negandum, Auditores, quod res ipsa palam loquitur, multa viros illos sapientissimos præclare excogitasse atque detexisse, quæ occulta antea, atque in quibusdam veluti ignorantiae tenebris abdita fuissent. Sed ut multa illi investigaverint, eruerint, cognoverint, quàm multa etiam eos fugerunt! quàm multa etiam in cælo & in terris, & in omnibus liberalissimis artibus atque disciplinis iis penitus latuerunt, quæ alii post alios assiduo studio ac labore potuerunt tandem deprehendere! Satis vos hinc intelligitis, Auditores, in hac tantâ obscuritate atque ignoratione rerum, quantum docto cuique viro ad summam rerum omnium scientiam enitendum sit, præsertim si ipse est a doctrinâ atque eruditione instructior. Nam quò quisque doctior est atque sapientior, eò etiam plura atque majora agnoscit sese ac videt nescire. O magnos illos & sapientes viros, quibus magna quædam scientia, atque adeo pars prima sapientiæ visa est, scire, sese minimè omnium esse eruditos! O Socratem! o viros illos sapientissimos, qui hoc unum sese scire, apertissimè professi sunt, se nihil scire!

An verò, quum optimæ omnes artes honestissimæque disciplinæ ita inter sese connexæ sint atque confociatæ, ut, qui unam habet, alias sibi ad veram solidamque sapientiam adjungat, necesse sit; quò quisque unâ aliquâ disciplinâ eruditior atque exercitior fuerit, non idem ipse planè videat atque intelligat, eò etiam plura atque majora ad perfectam & consummatam ejus disciplinæ cognitionem ex ceteris omnibus disciplinis adjumenta sibi scientiæ esse penitus comparanda? Applicat sese quis ad Theologiam, quæ ex altissimis divinisque omnino principiis summa est scientia rerum divinarum? quàm magnam, & quàm infinitam, & quàm multarum ac magnarum rerum scientiam postulat Theologia, cujus quidem est summum atque acerrimum in res omnes atque disciplinas humanas judicium exercere! Theologiæ enim est, ea omnia, quæ, seu voce, seu scripto, divinitus nobis tradita sunt, atque ex afflatu divino veluti per manus ad nos transmissa, rectè intelligere atque explicare. Theologiæ, vim illam summæ auctoritatis, quæ in Senatu Christiano, Senatufque Christiani principe, Pontifice Maximo, divinitus residet, perfectè tenere. Theologiæ, rectum atque legitimum Christianorum Patrum atque magistrorum usum percipere. Theologiæ, rationem ipsam humanam atque philosophiam sibi in subsidium adsciscere. Theologiæ denique, historiam rerum gestarum, tum ab orbe condito, ortuque generis humani, tum maximè a Christo nato usque ad nostra hæc tempora, perspectam atque cognitam habere. Hæc omnia sunt Theologiæ. Studet quis Philosophiæ? quàm operosa res est, quantique studii ac laboris,



boris, & quot res ac quantas complectitur Philosophia, quæ non res modò humanas, sed etiam divinas, quantum quidem per humanam imbecillitatem licet, suas per causas contemplatur! Unde enim, nisi ex studii hujus magnitudine atque difficultate, Aristoteles, vir talis ac tantus, Platonem, talem virum ac tantum, viginti integros annos in Philosophiâ audivit? Operam dat quis Medicinæ? Non tam quidem laboriosa, neque tam operosa Medicina, quàm Philosophia; sed tamen quanti & ipsa, & quàm operosi laboris! quum optimus quisque medicus, idem sit & philosophus, quod ostendit Galenus, nec benè callere possit medicinam, nisi qui & Arithmeticen, & Geometricen, & Astrologiam cognoverit. Jus quis civile confectatur? quanta porro cognitio illa juris civilis, & quàm diffusa, quæ est cognitio ipsius æquitatis! quum vel unus XII. Tabularum libellus, de gravissimâ Craisi apud M. Tullium sententiâ, bibliothecas omnium philosophorum & auctoritatis pondere, & utilitatis ubertate superare videatur. Quàm multa enim e Philosophiâ, quàm multa ex historiâ gentiumque omnium consuetudine, quàm multa ex Ethice ac Politice, itemque Oeconomice, ceterisque omnibus disciplinis, oportet, is hauriat, qui boni & æqui notitiam profectus! Quid reliquas disciplinas artesque liberalissimas commemorem? quas quò quis interius inspexerit, eò alia plura ac majora scitu sibi esse necessaria fateatur. Quid commemorem Dialecticam, cujus certè est rationem per omnes artes atque disciplinas ad veritatem dirigere, eamque in differendo, verisque ac falsis dijudicandis moderari? Quò enim non pertinet

tinet Dialectica, cujus quidem est quacumque de  
 re in utramque partem disputare? adeo ut Diale-  
 cticæ prorsus sit quæcunque recta esse videtur &  
 Theologiæ, & Philosophiæ, & Medicinæ, & Ju-  
 risprudentiæ ratiocinatio: Quid dicam de Mathe-  
 maticis disciplinis? quid de Geometriâ? quid de  
 Arithmeticâ? quid de Astrologiâ? Quid enim Geo-  
 metriâ atque Arithmeticâ non ad Philosophiam mo-  
 dō; sed etiam ad Astrologiam intelligendam magis  
 necessarium, quibus quasi alis, quod agebat Plato,  
 evolare mens hominis e terris ad cælum videtur?  
 Age verò, quale & quantum est studium illud Astro-  
 logiæ, quàm multis difficultatibus, & quàm magnis,  
 intricatum, quàm multa illud & quàm magna ab  
 aliis disciplinis subsidia, præsertim a Physice, at-  
 que Optice, mutuatur! Quid hoc asseram τὰ με-  
 τὰ φυσικά, quorum tanta est cum astronomicis illis  
 conjunctio, atque consociatio, ut viri longè sapien-  
 tissimi ex vario eoque constantissimo orbium cæle-  
 stium motu numerum atque naturam intelligentia-  
 rum, certo quodam firmoque argumento, colle-  
 gerint. Percurrite hic, Auditores, universum il-  
 lum disciplinarum artiumque liberalissimarum orbem,  
 oppidō amplissimum, multòque pulcherrimum, in  
 quo discendi quisque studiosus sese ad doctrinam &  
 eruditionem exerceat. Semper enim una doctrina  
 aliam desiderabit, aliaque ex aliâ efficietur. Ipsa  
 illa, quæ minora atque tenuiora in eruditionis ne-  
 gotio esse videntur, quantum, Deus bone, ha-  
 bent laboris atque difficultatis, & quid & quantum  
 scientiæ sibi atque eruditionis deposcunt, ut quis  
 in iis cum aliquâ ingenii ac doctrinæ laude verfe-  
 tur!

tur! Quid enim planius ac facilius historia? Quid historiâ laboriosius atque difficilius? quæ & Geographiæ & Chronologiæ & Astrologiæ scientiam exquisitiorrem atque excellentiorem requirit. Quid dulcius atque jucundius Poësi? Quid Poësi operosius atque eruditius? quæ, fictis ad delectationem fabulis, aptatisque ad aures mulcendas carminibus, primâ quædam visa est naturæ ac morum philosophia. Nam & quàm magnâ rerum cognitione ac scientiâ Poëtas excellere necesse sit, inde etiam intelligi potest, quòd *ἀείδειν*, quasi valde intelligere, apposito ad rem exprimendam vocabulo, idem omnino Græcis valeat, ac canere, id, quod est proprium Poëtarum. Quid tenuius atque jejuniûs Grammaticâ? Quid etiam Grammaticâ majus atque uberius? quæ ceterarum omnium præstantissimarum artium atque disciplinarum scientiam suo sibi jure vindicat, & per omne scriptorum genus, per historicos, per poëtas, per oratores, per philosophos, atque adeo theologos, latissimè longissimèque pervagatur. Nam si Grammatici est, non poëtas modò, sed etiam reliquos omnes scriptores, intelligere atque enarrare, cujus unquam generis eruditionis experts esse possit Grammaticus, qui nec sine musicæ metrorum, ac rhythmorum rationem explanet, nec sine siderum scientiâ poëtas intelligat, nec sine philosophiâ Lucretij interpretetur, nec sine exactâ maximarum quarumque rerum cognitione de scriptoribus judicet, nec sine summo judicio & multarum rerum peritiâ genuinos veterum libros, a falsis atque adulterinis discernat. Multa hic sanè pervideat, oportet, Auditores, quæ perspicere nullo modo potest, qui non  
ita

ita sit in rebus grammaticis exercitatus. Nec enim cuiusque est, Patavinitatem in Livio deprehendere; sed Asinii Pollionis, hoc est, hominis multò doctioris atque eruditioris, qui mentis quidem suæ acie eò penetret, quò nequeunt alii minùs eruditi minùsque perspicaces; sed & idem ipse, quò plura scit atque comprehendit, eò etiam plura atque majora, semet sentiat ignorare. An verò, quum, veteri eoque optimo instituto, jam inde a teneris lectionem nobis a summis Poetis, ab Homero & Virgilio, summi ac sapientissimi magistri exordendam esse præceperint, putatis ne, simul ac principes illos Poëtas legere primùm quis incipit, divitias Græcæ Latinæque sapientiæ universas sese ei in sinum veluti sponte effundere, &, quæ ex intimis Philosophiæ fontibus uterque Poëta uberrimè atque copiosissimè hausit, sese ei in conspectum dare? Minimè prorsus, Auditores. Immo verò cùm quis primùm Homerum ac Virgilium legit, miram ille quidem ex fabulis voluptatem percipit, animoque etiam ad heroici carminis altitudinem atque sublimitatem assurgit, spiritumque item ex rerum magnitudine virilem ducit, & optimis quibusque imbuitur; sed interiores illas atque reconditiores sapientiæ opes, quæ sub externo fabularum ac verborum cortice delitescunt, minimè omnium contemplatur. Has relegendo paullatim intelligit, ita ut, quò doctior sit atque eruditior, eò majores amplioresque in utroque Poëtâ sapientiæ atque doctrinæ divitias, quas antea non viderat, ratione atque intelligentiâ comprehendat. Quod & in arte oratoriâ, & in qualibet liberalissimâ disciplinâ ita fere usuvenit, ut, quò quis in eâ est eruditior,

tior, plura sibi adhuc, quàm ceteri, qui non eò eruditionis pervenerunt, addiscenda esse perspiciat. Atque hîc Marcum Tullium, quem aliàs sœpius, nunc etiam appello, summum & oratorem & philosophum: in quem unum virum cunctas suas. beatas copias sapientia atque eloquentia effudisse simul videntur, qui, quamvis non eas omnes artes, atque disciplinas, quibus egregiè instructus in forum processit, semper in dicendo adhibuerit; tamen ubique, vel in minimis quibusque rebus, veluti in quadam umbrâ & imagine sui, semet ipse indicat, qualis vir & quantus extiterit, quàmque in omni litteraturâ, in Geometriâ, in Astrologiâ, in reliquis Mathematicis, in Dialecticâ, Physicâ, Jurisprudentiâ, Ethicâ, in ceteris omnibus disciplinis, atque in omni Philosophiâ, excelluerit. Quis enim Tullio in historicorum poëtarumque lectione versatior? in regionum locorumque descriptione accuratior? in argumentando acutior? in naturæ causis pervestigandis perspicacior? in civili vitâ prudentior? in bonis suadendis utilior? in omni philosophiæ parte sapientior? in omnibus quacunque de re disputationibus copiosior? Tullium igitur cùm appello, testem appello locupletissimum atque gravissimum: qui, quum ab ineunte ætate ad omnem sese eruditionem paravisset, animumque suum omni doctrinâ, omnibusque sapientiæ studiis excoluisset, doctusque in forum, non docendus venisset, artemque dicendi ad summum fastigium evexisset, omnesque Græcorum virtutes, vim Demosthenis, suavitatem Isocratis, subtilitatem Lyfiæ, copiam Platonis, Aristotelis acumen, complexus in semet unus mirificè fuisset;

set; tamen, quòd multum sese. & longè adhuc à perfecti sapientià atque eloquentià abesse animadverteret, aliorum sese disciplinæ totâ Asiâ atque Græciâ de novo erudiendum, ac veluti recoquendum, tantus & philosophus & orator, tradere non dubitavit. Quod si ita est, ut certè est, si qui multò plus sciunt, quàm ceteri omnes, ii etiam multò plus, quàm ceteri omnes, se nescire intelligunt, quis non fateatur, Auditores, quod dictu admirabile quidem videtur; sed tamen verissimum est, quòd quis magis in doctrinis profecit, eò sibi esse magis in doctrinas incumbendum? Accedit, Auditores, quòd quòd quis doctior est bonisque litteris excultior, eò etiam ab illo plura multòque majora meritò requiruntur. Magnam enim verò personam sustinet is, qui doctrinam atque eruditionem profitetur. Est enim veluti commune quoddam oraculum non civitatis modò suæ; sed etiam totius terrarum orbis, quòd studiosi ubique eruditionis curiosique etiam homines de rebus gravissimis atque maximis, omniumque difficillimis, quæ doctrinarum & humanitatis studiis maximè continentur, addiscendi causâ, consulant. Quid homini huic ignorare jam licet, quem reliqui de vulgo homines, ut de Longino illo rhetore ferunt, veluti vivam quandam bibliothecam, & museum, ut ita dicam, ambulatorium, respectent, quem præ sapientiâ atque eruditione singulari planèque eximiâ, suspiciant atque admirentur, qui de interioribus & reconditis quibusque doctrinis interrogatus, debeat cuique hominum satisfacere? Quàm diligenter, quàm accuratè, quàm longo perpetuoque studio huic homini providendum est, Auditores,

# ORATIO SEXTA.

123

res, suæ ut existimationi consulat, ut nequid turpiter ignoret, quod ad tuendum doctrinæ atque eruditionis munus conducere quodammodo ac pertinere videatur. Ferunt, olim Themistoclem, quod in epulis lyram recusasset, indoctiorem habitum fuisse. Dicitur etiam Socrates, quod tribus suæ suffragia numerare ex receptâ consuetudine nescivisset, ridiculum sese in concione præbuisse. Ergo, si summis illis & sapientissimis viris, tamen dedecori fuit, eruditionis genere ornatissimis, tametsi omni alio aliquid nescire, quod extra sapientiæ studia positum iis videretur, nec doctrinâ satis exculti iidem habiti sunt; quantò turpius atque ignominiosius fuerit homini, qui doctrinæ atque eruditionis munus susceperit, in eo, quod professionis suæ est, rudem sese atque imperitum confiteri? qualem rhetorem illum memorat Fabius, qui, quid esset *σχῆμα* & *νόημα*, interrogatus, nescire sese respondit. Non est quidem turpe, Auditores, hominem de trivio, ea, quæ oratoriæ sunt artis, penitus ignorare. At ea nescire rhetorem, quid turpius? Non turpe est, rhetorem causarum naturalium præceptorumque bene vivendi ignarum sese atque imperitum dicere. At ignarum sese atque imperitum philosophum dicere, quid turpius? Non turpe est, philosophum de arcanis iis divinitatis, quæ supra universum ordinem naturæ, atque adeo ultra certos ac constitutos intelligentiæ nostræ fines longissimè altissimèque posita sunt atque collocata, nolle quomocunque disserere & disputare. At de arcanis divinitatis sive ad defendendum, sive ad explicandum, disputare nolle theologum, quid turpius? Non turpe denique est,

Q 2

alie-

alienum a sapientiæ studiis hominem in plurimarum & maximarum rerum ignoratione versari. At in hac maximarum rerum ignoratione versari studiosum hominem sapientiæ, quid turpius? Ergo, quum multò turpissimum sit, hominem, qui omne doctrinarum genus profitetur, genus aliquod doctrinarum minime tenere, quis non videat, quò quis doctior est, atque in orbe disciplinarum omnium versatior, eò magis magisque laborandum ei esse, ut, quam eruditionis atque scientiæ partem habet, in dies augeat atque perficiat? nimirum ut ad sermonis elegantiam majorem semper rerum scientiam adjungat, ut Latinorum Græcorumque scriptorum notitiam multò semper exactiorem adipiscatur, ut historiæ non civilis modò ad usum Politices; sed etiam sacræ ad usum Theologiæ, cognitionem multò sibi accuratorem comparet, ut historiam quoque suæ gentis suorumque temporum ad variam multiplicemque eruditionem multò curiosius atque exquisitiùs teneat, ut & Poëtices, & Rhetorices, & Dialecticæ, & Cosmographiæ, & Chronologiæ studia diligentius in dies persequatur, ut multò sese, quàm antea, laboriosius in Geometriâ, & Astrologiâ, reliquisque Mathematicis disciplinis exerceat, ut operam multò frequentiore, atque assiduiore det juri civili, det rebus medicis, det Philosophiæ, det Theologiæ, ut semper de novo ad litterarum studia aggressus esse videatur. Neque verò doctrina vobis despondenda est, optimi adolescentes, eâ ipsâ re, quæ vos maximè ad summam doctrinam acuere atque excitare debet, eò quia nimirum, quò quis plus in doctrinæ atque eruditionis studiis proficit, eò etiam plus



plus laboris atque diligentiae huic homini adhibendum est, ut doctior in dies atque eruditior evadat: perinde quasi nullam unquam ratione fieri possit, ut ad summam atque absolutam rerum omnium maximarum scientiam idem ipse aliquando perveniat. Quid? Putatis ne, boni adolescentes, laboribus his vestris, vestraeque hac incredibili industria fieri unquam posse, quod ingenii humani imbecillitas in tantâ hac vitae nostrae ac rerum caligine minime omnium patitur, ut, quae nemini cuiquam vel sapientissimorum ac doctissimorum virorum post hominum memoriam obtrigit, summa perfectissimaque rerum omnium eruditio, haec vobis tandem contingat, cui nihil unquam adjici possit? Sed, etsi ita gignitur discendo eruditio, ut semper aliquid addiscendum super sit, num ideo nobis animus in comparandâ doctrinâ abjiciendus, & non potius difficultati ipsi insurgendum, illudque pugnandum, & eritendum, ut, si non summam omnique ex parte perfectam, certè, quàm possumus, maximam rerum omnium scientiam acquiramus? Quid nobis, Auditores, studiisque nostris factum fuisset, si, qui doctrinarum nobis facem prætulerunt, ita animati fuissent, ut, quia de perfectissimâ omnium rerum scientiâ desperandum cuique hominum erat, non multò, quàm antea, accuratius atque diligentius ad artes liberalissimas ornandas atque perficiendas laborandum sibi existimassent? Neque enim eae artes tam perfectae, quàm nunc sunt, ad nos pervenissent, neque tam multa, eaque tam praeclara, quae superiori memoriâ in quodam veluti profundo delituerant, in tantam hanc litterarum & doctrinarum lucem pro-

prodiissent, nisi, qui eas artes acquisiverant, majori semper in eas studio incubuissent. Ergo quum maximis illis & doctissimis viris ipsa summæ doctrinæ absolvendæ difficultas incitamentum diligentiae & laboris fuerit, intelligite tandem, adolescentes, quod me hæcenus demonstrasse opinor, quò quisque vestrum magis magisque in dies in doctrinâ atque eruditione proficit, eò majus atque acrius sibi esse in litteris atque doctrinis studium collocandum.

FRANCISCO . INCONTRIO  
ARCHIEPISCOPO . FLORENTINO  
VIRTUTE . PIETATE . GENERIS . NOBILITATE  
SACRA . ERUDITIONE  
BONARUMQUE . LITTERARUM . STUDIIS  
CLARISSIMO  
ET . DE . SCHOLIS . PIIS . OPTIME . MERITO  
ALEXANDER . POLITUS  
ORATIONEM . SUAM  
AD . ACADEMIAM . PISANAM  
DE . LECTIONIS . ASSIDUITATE  
OB . INSIGNIA . EJUS  
IN . ORDINEM . SCHOLARUM . PIARUM  
BENEFICIA  
MEMORIAE . ET . HONORIS . CAUSSA  
D. D. D.



# ALEXANDRI<sup>129</sup> POLITI

DE CL. REG. SCHOLARUM PIARUM



ORATIO SEPTIMA.

*De lectionis assiduitate.*



Æpe ego miratus sum, Patres sapientissimi, Auditores ornatissimi, quid causæ sit, quare, quum plerique omnes adolescentes, eloquentiæ atque artium liberalissimarum, mirifico studio incensi, totos sese comparandæ hîc sapientiæ tradiderint, atque ut universas perfectè doctrinas adipiscantur, in his scholis, atque in hac florentissimæ Academiæ celebritate assiduè versentur; tamen eorum pauci, immo verò & paucissimi, summi perfectique oratores, atque in omni genere & varietate disciplinarum excellentissimi evadant. Equidem mihi cogitanti, atque in hujus rei causam curiosius inquirenti, quum plures sese causæ offerrent; tamen, quæ mihi penitus satisfaceret, nulla adhuc causâ occurrebat, non socordia adolescentium nostrorum, qui & ingenio sunt ad omnem rerum  
R scien-

scientiam paratissimo, & operam dant præceptoribus suis diligentem atque quotidianam, non incommoditas locorum atque temporum, quæ loca ac tempora hîc Pisis, aëre saluberrimo, in placidissimâ quiete, rerumque omnium tranquillitate, atque in maximâ egregiorum exemplorum copiâ, hortari nos vehementer ad litterarum studia videntur, non incuria denique, neque negligentia præceptorum, qui stipendiis amplissimis atque honestissimis affecti, itaque a curâ rerum domesticarum liberati & soluti, discipulis sese suis unice impendunt, ut, quales ipsi sunt, tales eos quoque, hoc est, omni doctrinâ & virtute ornatissimos, efficiant. Sed quum oculos atque cogitationem ad adolescentes illos paucissimos convertissem, qui summi in doctrinis essent atque perfecti, idque inter eos & mediocriter eruditos discriminis interesse animadvertissem, quod alteri parum commercii habent cum libris, satisque habent magistros attentè suos audisse; &, quæ ab illis audierunt, secum ipsi recoluisse, memoriæque mandasse; alteri verò bonos libros dies noctesque pervolunt, in libris habitant, in libros sese abduunt, atque ingurgitant, libris denique non impalescunt modò, sed etiam immoriuntur; facîle intellexi, unam hanc esse atque certissimam viam ad eloquentiam, & scientiam rerum perfectè comparandam, assiduam atque accuratam multorum eorumque bonorum librorum lectionem; atque in studiis hisce nostris instaurandis mei esse muneris atque instituti, regiam hanc viam adolescentibus commonstrare, qua ipsi non qualemcunque, aut unius soliusque disciplinæ, sed summam, sed perfectam, sed omnium ferè discipli-  
na-

# ORATIO SEPTIMA.

131

narum reconditam atque exquisitam scientiam assequantur.

Nam quòd Annæus Seneca, philosophus in primis gravis & severus, tum in epistolis suis, tum etiam alibi scriptorum suorum, multitudinem nimiam librorum improbare videatur, id eò sanè pertinet, ut bibliothecas illas accuset, atque condemnet, quæ non in rectum usum studiorum, sed in speciosam quandam pompam, atque, ut ipse ait, in vanum & inane spectaculum, hoc est, ornamentum duntaxat, atque ostentationis causâ, compararentur; eosque etiam reprehendat, quorum sanè varia atque inconstans lectio per omnia voluminum genera nullo certo definitoque discrimine discurreret ac vagaretur; quique ad mores dirigendos atque informandos multos sibi libros necessarios arbitrarentur. Et tamen gravissimus ille morum auctor & magister, cui id in primis atque adeo unicè propositum erat, ut hominum mores sanctissimâ disciplinâ conformaret, atque instrueret, librorum amatoribus veniam sese planè daturum fuisse profitetur, si ex nimio optimorum studiorum amore, atque ex inexplebili quadam liberalissimarum disciplinarum cupiditate ardens hoc bibliothecarum studium proficisceretur. Perinde quasi diceret Seneca, ut ad animum ritè sanctèque componendum magna vis librorum parùm conferat, ideoque culpâ vacare minimè ii omnium videantur, qui non studiorum honestissimorum causâ, sed in vanam quandam speciem ostentationis atque elegantix, innumerabilibus ferè atque pulcherrimis omnis generis libris bibliothecas suas adornant; tamen, si, quæ doctissimorum atque eloquentissimorum

R 2

ho-

hominum propria est, exquisita illa atque perfecta rerum omnium scientia atque eruditio quaeritur, tunc sanè multis opus esse & bonis libris ad summam illam doctrinam atque eloquentiam adipiscendam: quare etiam in homine bono ac moderato acrius illud ac vehementius bibliothecæ instruendæ studium esse faciliè tolerandum, eò quia nimirum sine multâ multorum bonorumque librorum lectione vacuum eum esse oportet atque inopem a scientiâ rerum, atque adeo a copiâ ubertateque orationis. Hanc esse Annæi illius Senecæ sententiam, quis vestrum, Auditores, non inde etiam faciliè perspiciat, quòd ipse Seneca ad Lucilium illum suum complura sese legere, & in aliena etiam castra, aliorum nempe ex aliis diversisque lectis philosophorum, semet sæpius, tamquam exploratorem, transire, liberius ac palam gloriatur? qui, nisi plurima legerasset, maximamque sibi ex sapientissimorum hominum scriptis rerum cognitionem acquisivisset, profectò nec, qualis habitus fuit, eruditionis suis temporibus princeps habitus fuisset, nec tantâ orationis copiâ, quantam veteres in eo magistri mirati sunt, ac prædicarunt, omne genus studiorum atque scriptionis pertractasset. An verò censetis, Auditores, doctis & eloquentibus viris in tantâ rerum atque disciplinarum varietate suppetere unquam posse, quod unaquaque de re, de qua interrogentur, ad auditores suos & eruditissimè & copiosissimè respondeant, nisi animos antea suis quotidianâ bonorum librorum lectione excolant, atque inde summâ omnium præclarissimarum rerum, totiusque antiquitatis cognitione refer-



referciant, atque perficiant? Disputandum enim iis sæpe est de moribus, de rebus publicis, de cælo, de elementis; de totâ philosophiâ, de omni genere disciplinarum. Interpretandum est jus civile, illustranda superior memoria, de rebus denique omnibus, tum humanis, tum etiam divinis, disserendum. Quàm multa hæc, quàm magna, quàmque infinita, quæ nisi omnia penitus cognoscantur, falsò sibi iidein summæ rerum scientiæ, summæque eloquentiæ laudem vindicaverint! Illa verò contra quàm pauca, quàmque modica, atque exigua, quæ vel usu, tractandoque explorarunt, vel auditione acceperunt! Nisi siquis fortè existimet, quæ scientiâ atque memoriâ comprehendendi unquam possunt, eos adhuc adolescentes a præceptoribus suis omnia audisse, memoriâque tenuisse, aut ipsos per sese postea pertractasse, usuque didicisse. Quòd si Peripateticus ille Phormio, qui nunquam hostem neque castra vidisset, tamen ausus est coram Annibale, summo imperatore, de imperatoris officio, & de omni re militari sermonem bene longum ac copiosum habere; si Aratus, qui astrologiæ minimè omnium operam dedisset, tamen cælum ac stellas versibus ornatissimis atque optimis descripsit; si Nicander Colophonius, qui agros nunquam coluisset, tamen de re rusticâ carmen perquam præclarum atque elegans contexuit, quæ in exemplum proposita sunt a M. Tullio; si Cornel. Celsus, qui ea, quæ scripsit, non certè quidem omnia, tractatione & usu cognovisset, tamen tam multa tamque diversa de omnibus ferè artibus, & de re etiam militari ac rusticâ, medicâque conscripsit; si Hip-  
pias

pias ille Eleus, si Giorgias, si Plato, si Aristoteles, si M. Censorius Cato, si Romanorum ille doctissimus Varro, si M. Tullius, qui omnes ea, de quibus sciverunt, magnâ ex parte non ab usu, neque a disciplinâ perdidicissent, neque verò perdiscere unquam potuissent; tamen plurima illa & sciverunt ipsi, & alios docuerunt, quæ quidem exempla collegit Fabius Quinctilianus: si sexcenti denique alii, summi & doctissimi viri, qui neque a magistris, neque a magistra rerum experientia eruditi de pluribus rebus fuissent, tamen maximarum rerum atque plurimarum perfectam cumulatamque scientiam habuerunt; unde eos putabimus, viros tales ac tantos, summam illam doctrinam atque eruditionem, qua ceteros longè mortales antecelluerunt, nisi ex libris cujuscumque generis, omniumque artium atque disciplinarum, studiosè quotidieque lectitandis, hausisse? Inde autem ab amore doctrinæ, & eloquentiæ in doctis illis atque eloquentibus viris amor ille ardens librorum, studiumque illud incredibile bibliothecarum. Quo enim, Deus bone! ac quanto amore librorum Cicero tenebatur, qui semet haud posse dixit vivere, nisi in litteris viveret; nihilque sibi libris gratius esse posse; pascique sese bibliothecâ, & si Attici, amici sui, libros nancisceretur, semet Crassum divitiis superaturum, atque omnium vicos & prata contempturum esse affirmavit? Quis autem in omni litterarum genere versatior, aut quis eloquentior Cicerone? Quibus ac quantis in deliciis habebat libros M. Cato, quem tam avidè libros legisse ferunt, ut libros non tam legere, quàm heluari videretur, in ipsâque etiam curiâ, interea dum

Se-

Senatus cogeretur, libros legere minimè erubesceret? a quo etiam Catone ceteri, qui simili, atque ille, hoc est, inexhaustà legendi aviditate afficerentur, helluones librorum festivè sunt appellati. Quis autem M. Catone juris civilis, rerumque rusticarum, atque historiarum etiam peritior? Quale & quantum librorum perlegendorum studium C. Plinii Secundi, cujus in oculis habitare propemodum libri videbantur? quem avunculum suum C. Plinius Cæcilius narrat tam parcum temporis, tamque cupidum lectionis fuisse, ut ne cœna quidem a lectione vocaret; quumque aliquando unus quidam de amicis lectorem nonnulla perperam pronunciantem interpellasset, doluerit sanè Secundus, sese illà interpellatione decem ampliùs versus perdidisse. Quis autem Plinio illo Secundo scientior atque eruditior? Quàm studiosus, quàmque amans librorum M. Varro, cui quidem Varroni Julius Cæsar Latinarum Græcarumque bibliothecarum dirigendarum atque comparandarum curam commiserat? Quis autem unquam Romanorum doctior Varrone? Qua etiam & quàm vehementi cupiditate librorum Aristoteles incendebatur, quem ajunt libros oppido quàm pauculos Speusippi philosophi talentis Atticis tribus redemisse, primumque libros collegisse, & exemplo suo Ægyptiis regibus ad bibliothecam construendam præluxisse? Quis autem Aristotele in omni philosophiâ, atque in omni rerum præclarissimarum scientiâ illustrior? Neque verò ab aliò unquam studio, nisi litterarum promovendarum atque propagandarum, illæ olim instructæ a regibus aliisque principibus viris bibliothecæ, omni que librorum genere impensius atque

que sumptuosius locupletata: ut copiosissima illa Alexandrina, cui Ptolemæus Philadelphus Demetrium Phalereum, virum longè doctissimum atque eruditissimum, præfecit, illa, inquam, Alexandrina, ceterarum omnium bibliothecarum celebratissima, multoque magnificentissima, in qua septingenta voluminum millia, ut Attalica, seu Pergamena, in qua ducenta librorum millia, ut Byzantina, in qua centum, & viginti librorum millia, ut Sereni Sammonici bibliotheca, in qua duo & sexaginta librorum millia, ut Romanæ illæ publicæ bibliothecæ multis librorum millibus refertissimæ, undetriginta. O Græcas illas, o Ægyptias, o Latinas bibliothecas! O illos omnium rerum, omniumque artium atque disciplinarum, totiusque superioris memoriæ thesauros pretiosissimos! Atque utinam, Auditores, bibliothecæ illæ ad nostra usque tempora perstitissent, easque nunc nobis invisere, earumque forulos, & pluteos, & cuneos totos perscrutari atque excutere liceret! Quàm illud non jucundum modo, sed etiam fructuosum, optimis illis atque præstantissimis codicibus oculos nostros pascere, ingeniumque atque animum exsaturare! Quantæ illud delectationis atque voluptatis, dedicatas ibi magnorum hominum atque philosophorum imagines conspicerere, atque in iis Heraclitum oculis multo assiduoque fletu oclusis contueri, labris in immoderatos effusosque risus disfluentibus Democritum, distentâ beneque curatâ cute Epicurum, latioribus humeris Platonem, brachio veluti ad disputandum exerto Aristotelem, alios totius antiquitatis sapientissimos viros, quo eorum quisque gestu, quoque oris habitu, & corporis fuerit, per otium

otium contemplari! Quali nos & quanto gaudio in bibliothecis Græcis exsiliremus, si, quæ amissa frustra nunc deploramus, præclarissima summorum ingeniorum monumenta, in oculos fortè nostros, atque in manus incurrerent, libri tot Aristotelis atque Democriti, aliorumque nobilium philosophorum, volumina tot Didymi, atque Aristarchi, aliorumque insignium Grammaticorum, Tragoediæ tot Sophoclis, tot Euripidis, tot aliorum clarissimorum Poëtarum, carmina, tot orationes summorum Græciæ oratorum, tot denique libri historicorum, aliorumque omnis generis præstantissimorum scriptorum, quorum planè reliquias ex quodam veluti naufragio bibliotheca nobis Photiana servavit! Quali etiam quantâque lætitiâ in bibliothecis Latinis gestiremus nos atque exultaremus, si, quorum jacturâ damnum multo maximum Latinæ litteræ fecerunt, sese illa statim circumspèctantibus nobis offerrent, Medea illa Ovidiana, Consolatio illa Ciceronis, ille Ciceronis Hortensius, tot alii Ciceronis libri, tot libri deperditi T. Livii, tot libri Crispi Sallustii, tot etiam Trogi Pompeii, tot etiam libri Oratorum atque Rhetorum, tot libri Historicorum, Poëtarum, Grammaticorum denique Latinorum, quorum aut paucula duntaxat fragmenta, aut nuda etiam ac sola nomina supersunt. Sed, quoniam præclara illa veteris doctrinæ atque eloquentiæ monumenta, incendiorum atque temporum, sive etiam barbariei injuriâ, maximâ ex parte perierunt, cur nos tale illud ac tantum damnum litterarum non, ut possumus, refarcimus? cur ex tanto hoc librorum naufragio tabulas, quas possumus, non arripimus? Ne-

S

que

que enim mehercule parum quid superest reliquiarum; sed de veteribus illis bibliothecis, seu potiùs veterum illarum bibliothecarum veluti residuis, multa certè adhuc reliqua sunt, Auditores, eaque, nisi ego vehementer fallor, in omni rerum præclarissimarum, studiorumque liberalissimorum genere multò jam omnium optima, atque elegantissima: quibus dies noctesque versandis ad omnem doctrinarum elegantiam, atque ad summam perfectamque eloquentiam pervenire facillè possumus: præsertim quum, patrum nostrorum, nostræque etiam memoriâ, viri summo ingenio, tam sedulo tamque diligenter ad artes perficiendas litterasque restituendas incubuerint, ut, dum vetustæ illæ bibliothecæ aliis aliisque indies doctrinarum copiis suppleantur, incredibilis facta sit bonorum utiliumque librorum accessio, &, qui trecentis ante annis a librorum penuriâ, nunc, divino quodam munere, atque hoc mirabili typographiæ compendio, ab immensâ jam librorum multitudine laborare videamur. Quid igitur dubitamus, Auditores, nos quoque, Catonis illius exemplo, heluones librorum nominari? Quid, inquam, dubitamus, in bibliothecas nos abdere, in libris versari, libris nos involvere, in libris tempus consumere, &, quod de codice Iliadis Homericæ Alexander ille Magnus facere consueverat, libros capiti ad somnum captandum supponere? Quid ire nos post veterum illorum vestigia, hominum doctissimorum atque eloquentissimorum, qui bibliothecas in urbe, bibliothecas ruri, bibliothecas in balneis, tanquam instrumentum atque suppellectilem domus in primis necessariam, habuerunt, ut, ubi maximè omnium otiosi

esse

esse videbantur, ibi minimè omnium esse iis otiosis  
liceret? Quid nobis parare quàm possumus maximam  
& festivissimam ad omne studiorum genus copiam  
librorum, & insignem illum atque percelebrem Gram-  
maticum, Epaphroditum Chæronensem pro viribus  
æmulari, quem ferunt Romæ libros subinde emen-  
tem, optimorum quidem & selectorum librorum tri-  
ginta ferè sibi millia comparasse? Quid nos ita facere  
dubitamus, itaque in optimis & selectissimis libris sa-  
pientiam nobis atque eloquentiam emere, quæ ex fre-  
quenti assiduâque librorum bonorum lectione efflorescit  
ac redundat? Quòd si res nobis domi arctior multò  
est atque angustior, quàm ut quidquam pecunia-  
rum, aut etiam alimentorum nostrorum in libros  
vel maximè nobis necessarios emendos impenda-  
mus, quid ego hîc dicam, Auditores humanissi-  
mi? Equidem illud dicam, quod verissimè dicen-  
dum est, optandum valde esse, ut bene & lautè  
& liberaliter cum litterarum studiis agatur, quæ  
nisi adjumento hoc & multorum & bonorum li-  
brorum sustententur atque recreentur, languescant  
penitus, necesse est, certè quidem perfectæ omni-  
busque numeris absoluta nullo modo esse possint;  
utque Deus tandem aliquis hîc Pîsis, in Museo  
hoc Etruriæ, in hoc celeberrimo omnium discipli-  
narum atque artium liberalissimarum emporio, biblio-  
thecam exsuscitet, quæ, quidquid nos in omni do-  
ctrinarum atque elegantis litteraturæ genere desi-  
derare unquam possumus, copiosissimè nobis atque  
uberrimè suppeditet. Fingite animis, Auditores,  
bibliothecam hanc Pîsis, qualem ac quantam alibi  
locorum apud celebriores quasque totâ reliquâ Eu-

ropâ Academias usurpare ipsis oculis licet; fingite, inquam, animis talem ac tantam, pro Academiæ nostræ dignitate, bibliothecam hanc Pisis: in qua & doctorum hominum imagines, qui satis disertè atque copiosè in libris illis loquantur, vobis ante oculos obversentur, & libris, quibus velitis, ad omnem scientiam atque eruditionem utamini. Quid inde, & quantum non adjumenti modò, sed etiam incitamenti ad eloquentiæ studia atque omnium doctrinarum? Te, Quincte Maxime, te, Publi Scipio, vos, vos præterea, summi atque clarissimi Romanæ civitatis viri, appello, quos solitos ita dicere accepimus, cum majorum imagines intuerentur, animum inde sibi ad virtutem quàm vehementissimè inflammari atque accendi. Non ne animos hominum multo etiam vehementiùs ad sapientiam, atque eloquentiam incendi, dicturi facilè fueratis, si eas, quas homines longè sapientissimi atque eloquentissimi imagines sui perfectè in libris expressas reliquerunt, contemplarentur? Illæ enim imagines sunt vultus, hæ ingenii atque animorum, mutæ sunt illæ imagines, hæ eloquentes; illæ ad oculos oblectandos, hæ ad animos mentesque pascendas atque erudiendas comparatæ. Atque ut de me ingenuè fatear, Auditores, quod quisque vestrum, multò, quàm ego, meliùs atque veriùs de sese habet dicere; ut de me, inquam, fatear, homine quidem parùm ingenioso, parùmque erudito; sed tamen librorum utcunque studioso atque amante, quàm ego vehementer ad eloquentiam incendor, cum Demosthenem ac Ciceronem lego! quàm ego acri atque incredibili amore ad sapientiam inflammor,



mor, cùm in manus Platonem atque Aristotelem fumo! quàm ego subito, & quàm divino furoris atque Musarum veluti instinctu corripior, cùm Poëtas, atque in primis Homerum atque Virgilium lectito! quàm ego ardenti & quàm incitato rerum divinarum studio afficior, cùm sacros atque divinos libros pervolvo! quàm ego denique studiosè & quàm cupidè rapi eò me sentio, quò sedula me atque attenta bonorum librorum lectio nec opinantem adducit! Te hîc etiam, divine Plato, appello. Tua quum sint multa sapienter dicta, atque præclarè, tum illud dictum est multò omnium sapientissimè, atque præclarissimè, tantam esse pulchritudinem sapientiæ, ut, si ea oculis cerneretur, ardentes amores sui excitaret. Non ne autem oculis ipsi nostris sapientiam in libris tuis cernimus? non ne in libris aliorum summorum hominum atque philosophorum, qui tam graphicè nobis tamque eleganter coloribus sapientiam suis depinxerunt, ut minimè omnium miremur, si, cùm libros illos lectitamus, amores sui sapientia in nobis ardentes excitet? Quid si præterea, Auditores, ad scribendum nos conferimus? quando stylus, optimus ac præstantissimus magister est dicendi, neque valde probari ii videntur, qui ita sese libris abdiderunt, nihil ut ex his in lucem atque ad communem fructum & utilitatem proferant. Age porrò, quale & quantum istud est scribere, & quàm multos ac penè infinitos libros requirit, si tamen scribimus ad æternitatem! Ferunt, olim reges Ægypti Ptolemæos Alexandriæ ad bibliothecam illam, quæ multitudine & bonitate librorum ceterarum toto orbe  
bi-

bibliothecarum mater habita est ac magistra, Museum perillustre adjunxisse, in quo docti & literati viri, in summâ rerum omnium copiâ, libris & Musis operarentur. Nempe quia reges illi prudentissimi, atque perspicacissimi probè, ut puto, intelligebant, doctis iis & pereruditis viris, qui ad bonos libros conscribendos serio sese verèque applicarent, non quietem modò curarumque vacuitatem; sed etiam librorum, quos legerent, quosque consulerent, & ex quibus rerum atque orationis thesauros expromerent, vim maximam præsto esse oportere. O rudes illos atque imperitos, qui, quum ipsi nihil scripserint dignum memoriâ posteritatis, tamen levioris rem momenti esse opinantur, scribere ad æternitatem! Quid est enim, per Deum immortalem, scribere ad æternitatem, nisi, quæ utilissima sunt, quæ pulcherrima, quæ scitu maximè digna, summâ cum elegantia atque eruditione literis consignare? Quod sine multâ ac diligenti plurimorum atque optimorum librorum lectione quâ unquam fiat? Scripserunt multi ad æternitatem, homines doctissimi, atque eruditissimi, tum veteres, tum recentiores? Scripsit ad æternitatem M. Tullius, scripsit Seneca, scripsit Quintilianus. Scripserunt etiam de nostris hominibus Origenes, Hieronymus, Chrysostomus, Augustinus. Plerique alii Christiani Patres de rebus sacris atque divinis ad æternitatem scripserunt. Quotus autem quisque eorum est, qui non etiam plurima in omni doctrinarum atque elegantiarum genere ex vetustioribus iisque præclarissimis rerum atque eloquentiæ magistris legendo cognoverit, &, quod omnino faciendum

dum Seneca monuit, non etiam lectionem atque  
scriptionem alternaverit? Si quis unquam veterum  
fuit, qui ad æternitatem scripserit, fuit hic certè  
C. Plinius, is, qui libros Naturalis Historiæ, opus  
summæ variæque eruditionis, a nemine quoquam  
antea Romanorum tentatum, nedum perfectum, ipse  
mirabiliter conscripsit atque perfecit. Quis autem  
Plinio non in scribendo modò, sed etiam, ut paullo  
ante diximus, in legendo frequentior ac diligen-  
tior? qui nihil unquam legerit, quod non excer-  
pserit, atque adnotaverit, qui libros etiam malos  
aliquà ex parte prodesse posse dictitaverit, qui tan-  
tum diligentiae atque laboris in litterarum studia  
impenderit, ut vel homines studiosissimi atque di-  
ligentissimi præ illo maximè desidiosus & inertes vi-  
deri potuerint, qui denique ad libros illos Natu-  
ralis Historiæ conficiendos duo ferè voluminum mil-  
lia pervolverit, atque ex centenis scriptoribus re-  
rum præclarissimarum observationeque dignissimarum  
viginti millia collegerit. Tanti constitit Plinio sua  
illa Naturalis Historia. Cogitate hîc, Auditores,  
quot & quanta deinde quotidie incrementa rerum  
atque doctrinarum cognitio hominum acceperit,  
quanto deinde plura sunt a recentioribus & acutè  
excogitata, & feliciter reperta, quæ veteres pror-  
sus ignoraverunt, quot & quàm immensi terrarum  
mariumque tractus navigationibus detecti, quid &  
quantum novi in cœlo atque in astris observatum,  
quot & quanta in re medicâ, in re nauticâ, in  
omni philosophiâ, admirabiliter animadversa, quæ  
priscorum omnino hominum diligentiam fugerunt,  
quid denique & quantum veræ in Deum religio-  
nis,

nis, antiquâ superstitione sublatâ, quæ omnium pro-  
pemodum gentium animos miserè occupaverat, at-  
que opprefferat, sit hominibus, ad salutem ipsorum  
sempiternam, divinitus traditum atque demonstra-  
tum. Hæc omnia, aliaque hujus generis plura, le-  
ctitando iis planè cognoscenda, qui scribunt ad  
æternitatem, ut nempe primum omnium rei cujus-  
que notitiam ex uberrimis veterum scriptorum fon-  
tibus diligenter hauriant, deinde ad recentiores,  
qui acceptam a veteribus rerum omnium scientiam  
cumulatiùs multisque partibus auxerunt, recurrant,  
&, cum benè accuratèque perpexerint, quomodo  
& quibus veluti gradibus rerum cognitio, a rudi-  
bus initiis profecta, sese in clarissimam lucem ex-  
plicaverit, tum demum omni eruditione atque do-  
ctrinâ referti, doctrinam illam atque eruditionem  
suam, quam ex aliorum libris legendis sibi com-  
paraverant, ipsi libris suis conscribendis, ad repu-  
blicæ bonum, amplificationemque litterarum, in  
alios diffundant. Atque hoc demum est, Audito-  
res, scribere ad æternitatem. Quid si etiam ad  
veteres illos, summos omnium doctrinarum atque  
elegantiarum auctores & magistros imitandos nosmet  
convertimus, atque applicamus? quod sanè optimum  
censendum est genus scribendi, si nempe qui ma-  
ximè omnium veterum in quolibet genere excellue-  
runt, nobis ad scribendum de quacunque re præ-  
luceant, hoc est, ad eorum exemplum, & quan-  
dam veluti emulationem scripta quoque nostra con-  
formemus. Age verò, quid ad bene rectèque imi-  
tandum magis necessarium bonâ & assiduâ multo-  
rum librorum lectione, non modò, ut, qui optime  
omnium,

omnium, atque præclarissimè scripserint, ipsi per nos dispiciamus; sed etiam ut optima quæque atque præclarissima & rerum & dicendi exempla ex melioribus quibusque scriptoribus in usum nostrum seligamus. Quare etiam Horatius in Arte exemplaria nobis Græca nocturnâ diurnâque manu versanda esse præcipit, ut Græcos illos eruditionis ac doctrinæ principes atque auctores, a quibus omnis ad Latinos doctrinarum elegancia manavit, quam possumus diligentissimè, imitemur. Jam verò quis unquam Latinorum, seu oratorum, seu philosophorum, seu poetarum, non sese totum ad Græcos imitandos contulit? non Græcorum virtutes accuratissimè expressit? non Græcos studiosissimè est æmulatus, & quò Græcorum similior fuit, non eò etiam melior, non eò sapientior, non eò eloquentior est habitus? Quis enim de oratoribus Latinis sapientior atque elegantior Cicerone? Atqui Cicero sese totum ad oratorum & philosophorum Græcorum exemplar effinxit, tum ceterorum omnium, tum in primis Demosthenis, a quo Cicero, Quintilianus gravissimi rhetoris judicio, magnâ ex parte factus est, quantus ille unquam fuit, idest, summus & eloquentissimus orator. Quis etiam de poetis Latinis præstantior atque diviniior Virgilio? Atqui in Virgilio eximia quæque sunt ac selecta non Græcorum modò; verum etiam Latinorum Poetarum; sed tamen in primis Græcorum: de quibus quidem Græcis Theocritum in Bucolicis, Hesiodum in Georgicis, Homerum totum in Æneidem Virgilius nobis retulit atque repræsentavit. Quid? in unâ solâque Æneide quum Virgilius utrumque illud Homeri Poë-

ma,

T

ma,

ma, *Odyſſeam* atque *Iliadem*, admirabili prorfus ſingularique artificio delineaverit atque expreſſerit, non ne multò etiam artiſcioſius atque admirabiliùs utriuſque poematis exordium, quo *Homerus* non tam præmiorem legem ſervaviſſe, quàm conſtituiſſe, viſus eſt *Fabio Quinétiliano*, initio *Æneidis* ſuæ conjunxit ſimul *Virgilius* atque adumbravit? Quod quum ego alibi ad *Homerum* primus omnium obſervaverim, dignum id ipſum judicavi, quod huc etiam vobis, ſtudioſiſſimi rectæ imitationis adoleſcentes, veluti prætantiſſimum quoddam ac ſingulare ingenioſiſſimæ imitationis exemplum, in medium afferem. Quis etiam de Latinis? Sed quid ego, poſt *Ciceronem* atque *Virgilium*, alterum *Romanæ eloquentiæ* patrem, alterum *Romanæ Poëſis* principem, alia quoque exempla eorum conſectèr, qui optimè atque elegantiffimè ſcripſerunt, eo quia optima quæque atque elegantiffima, qua oratorum, qua poëtarum, ſunt imitati? quum & *Ciceroni* vetuſtiſſimi quoque oratores, vel rudes atque impoliti, plurimum adjumenti atque utilitatis attulerint, & *Virgilius* ex fœcibus *Ennii* poëtæ planè minimè omnium culti atque ornati, ſeſe aurum collegiſſe affirmaverit. Videtis hinc atque perſpicitis, Auditores, ſummis illis viris, ſummi ut eſſent & oratores & poëtæ, ſtudioſam multorum librorum lectionem plurimum profuiſſe, non quòd omnia omnium ii ſemper æmulati fuerint (neque enim omnia omnium ſemper ſunt multò optima atque elegantiffima); ſed quòd, tametſi unum ſibi maxime imitandum propoſuerint, tamen non cum unum ac ſolum ſibi imitandum cenſuerint; quumque aliorum omnia legerint, ta-

men

# ORATIO SEPTIMA.

147

men optima quæque duntaxat atque selectissima in usus suos assumpserint. Ergo, si neque Marcus Tullius sine imitatione summus orator esse potuit, neque Virgilius summus poëta, perfecta autem imitatio multiplici potissimum lectione nritur; si egregiâ rerum omnium eruditione, summâque eloquentiâ sint ii, oportet, instructi, qui scribunt ad æternitatem, egregia autem rerum omnium eruditio, summaque eloquentia, veluti ex fonte quodam, ex quotidianâ atque assiduâ bonorum multorumque librorum lectione latissimè dimanant; si denique tantum scimus, quantum memoriz mandamus, oblivioni autem atque incitiâ attenta, & accurata lectio in primis medetur, quæ est summa orationis hujus meæ, cur non tandem aliquando fateamur, Auditores, quod ego tandû oratione demonstro, unumquenque litterarum studiosum in doctrinis atque eloquentiâ tantum certò profecturum, quantum in bonis multisque omnis generis libris legendis profecerit? O hanc præclaram, adolescentes, o hanc regiam & directam, & apertam viam doctrinarum, atque eloquentiæ! O vos de litterarum studiis, de patria, de vobis ipsis optimè meritos, si viam hanc institeritis, si nempe, posteaquam præceptores hos vestros, viros doctissimos atque sapientissimos quàm diligentissimè audivistis, iisque ducibus & magistris ad reconditas quasque & exquisitas doctrinas percipiendas usi fuistis, nihilque omnino prætermisistis, quominus eorundem præceptorum vestrorum doctrinam atque eloquentiam imitando ipsimet in vobis effingeretis, tum demum, ad scientiam atque eloquentiam au-

gendam, totos vos bonis cujuscunque generis libris legendis penitus dedatis, itaque discipuli quodammodo efficiamini veterum illorum doctissimorumque scriptorum, a quibus planè ad præceptores ipsos vestros omnis doctrina atque eloquentia profuit. Amate igitur libros, si verè sapientiam atque eloquentiam amatis, optimi adolescentes. Non vos a libris otium, aut somnus, aut voluptates, aut festi ludorum dies, aut denique amicorum consuetudines atque familiaritates abstrahant. Libri studia vestra atque ingenium alant. Libri vos oblectent atque ornent. Libri vobiscum pernoctent, vobiscum peregrinentur, vobiscum rusticentur. Illud denique vobis fit penitus persuasum, summam vos rerum omnium præclarissimarum scientiam, summamque eloquentiam adepturos esse, si, quò doctissimi quique viri, ipsique præceptores vestri, eò & vos bonis multisque libris assiduè accuratèque lectitandis contendatis, ac tandem adspiretis, ut, propter magnam antiquitatis totius, omniumque rerum haustam e libris eruditionem, bibliothecæ quædam animatæ esse videamini.



JULIANO  
DE . COMITIBUS . SABBATINIS  
EPISCOPO . MUTINENSI  
VIRO . MAGNO  
ET . A . PROBITATE . PRUDENTIA . DOCTRINA  
CHRISTIANAQUE . ELOQUENTIA  
CELEBRATISSIMO  
V E T E R I . A M I C O  
ET . SUO . QUONDAM  
IN . ORDINE . SCHOLARUM . PIARUM  
COLLEGAE  
ATQUE . INDE  
PER . GRADUS . CLARISSIMAE . VIRTUTIS  
AD . PONTIFICATUM . EVECTO  
ALEXANDER . POLITUS  
ORATIONEM . SUAM  
A D . A C A D E M I A M . P I S A N A M  
DE . RECTO . ORDINE . STUDIORUM  
O B S E R V A N T I A E  
VETERISQUE . AMICITIAE . CAUSSA  
L . M . Q . D . D . D .



# ALEXANDRI<sup>151</sup> POLITI

DE CL. REG. SCHOLARUM PIARUM



ORATIO OCTAVA.

*De recto ordine studiorum.*



Emini, me, Patres Auditoresque ornatissimi, recurrente quotannis solemnis hujus statique diei celebritate, quam maxime potui, omni argumentorum atque exemplorum ex veteri recentique memoriâ petitorum genere, studiosos litterarum adolescentes ad litterarum studia, ex hoc amplissimo ad dicendum loco cohortatum fuisse, in ipsasque etiam causas diligenter inquisivisse, cur, quum omnes omnino adolescentes, sapientiæ & doctrinæ causâ, plerique etiam cum magno rei familiaris detrimento, huc sese in Athenas has Pisanas studiosissimè ac frequentissimè conferant, neque iis erudiendis doctissimorum præceptorum cura unquam atque diligentia deesse videatur; tamen perpauci summam omnium rerum doctrinam, atque sapientiam adipiscantur. Quis enim vestrum, ado-

adolescentes, oratione meâ inflammatus, & privatis magistrorum vestrorum hortationibus impulsus, non sese a desidiâ ad industriam avocavit? non præ amore sapientiæ voluptatis illecebras repudiavit? non semet totum bonis artibus atque disciplinis tradidit? non quotidianam atque egregiam præceptoribus suis operam navavit? non dies noctesque totas, ceteris longè curis sepositis, in bonis & Græcis & Latinis scriptoribus lætandis contrivit? Ergo, quum perfectæ jam atque exquisitæ sapientiæ obstare nihil videretur, quominus compotes ejus & participes fierent, quæ & quanta memet spes ceperat, certò jam fore, ut, qui bonarum artium rudiores venerant huc adolescentes, summi tandem & philosophi & jurisconsulti & theologi, in omni denique liberalissimâ arte atque scientiâ perfecti, ad patrias suas reverterentur? Sed, quum in tanto hoc labore, nihilo, quàm antea melius in adolescentibus quibusdam res studiorum procedant, unde tandem credamus, labem hanc studiorum proficisci, nisi ex perversâ atque inordinatâ studiorum eorundem ratione? quum, si benè studia instituuntur, minimo laboris impendio facillè possint adolescentes ad summam doctrinam pervenire. Quare studiis me litterarum vestris valde consulturum censeo, adolescentes, si de recto nunc studiorum ordine verba nonnulla fecerim, & qua potissimum ratione doctrinarum omnium cursum, quem ab his veluti carceribus hodierno die incipitis, ad calcem usque rectâ continetis, demonstraverim.

Neque verò de recto studiorum ordine opus est, Auditores, rem altius ab ipsâ rerum naturâ re-

# ORATIO OCTAVA.

153

repetere , in qua nihil mehercule utilius , nihil pulchrius , nihil ordine magis necessarium neque esse , neque excogitari potest , non modò ut tanta hæc , tamque diffusa ac patens universitas rerum secum ipsa cohæreat atque concordet ; sed etiam ut per partes clarè ac distinctè cognoscatur . Universæ artes atque disciplinæ quum ad summam perfectamque doctrinam in uno eodemque simul homine penitus requirantur , quis omnes eas liberalissimas artes , primo certè adspèctu , maximè aliquando inter sese diversas , & suo quamque genere disjunctas , nisi rectum studiorum ordinem tenuerit , assequatur ? Disputatum acerrimè olim a doctissimis & sapientissimis viris accepimus , utrum pluribus simul artibus & disciplinis , ad perfectam omnibusque numeris absolutam eruditionem , opera eodem tempore danda sit , an verò ita tempora studiaque litterarum dispertienda , ut in bonis artibus addiscendis una aliam ars subsequatur atque excipiat . Sunt enim , qui multarum simul optimarum disciplinarum studio aut distrahi , aut certè confundi , humanum ingenium , non perfici aut excoli arbitrentur . Sed , quum vita hominis brevissimo temporis spatio coarctetur , ut universo ea disciplinarum orbi percurrendo efficiendoque sufficiat , quid dubitemus primam quoque hominis ætatem pluribus simul disciplinis imbuerè , quando ingenii vis multò in omnem partem agilior est atque velocior ad res vel diversissimas percipiendas ? An verò putetis , Democritum Abderitam , quæ ad eruditionem aliquo modo pertinent , universa perfectè callere potuisse , nisi a teneris sese annis pluribus simul doctrinis cognoscendis assuef-

V

cisset ?

cisset? An Eratoſthenem tantam illam omnium rerum ſcientiam, quantâ vel in paucis unus excelluit, comparaturum fuiſſe, niſi primos quoque pueritiæ atque adoleſcentiæ annos pluribus ſimul honeſtiſſimis artibus excoluiſſet atque exornafſet? an Ariſtoſtem, an Platonem tantam omnium rerum doctrinam, quanta hominum maximis atque ſapientiſſimis contingere unquam poteſt, adepturos fuiſſe; niſi vel ab ipſâ primâ adoleſcentiâ pluribus ſimul artibus ingenuis atque doctrinis eruditi fuiſſent? an ceteros doctiſſimos viros, qui omni ſapientiæ ac literarum laude in primis floruerunt, genere omni eruditionis atque ſcientiæ præſtare ceteris mortalibus potuiſſe, niſi jam inde ab ineunte ætate in optimas quaſque ſimul diſciplinâs diligentiffimè incubuiſſent? Quid enim dicam de Theophrasto, cujus illa, alibi etiam a nobis percelebrata, de brevitate vitæ querela ſatis ſuperque oſtendit, omnibus eum liberalibus artibus, omnibuſque partibus Philoſophiæ, jam inde a puero ſtudiuiſſe? Ergo, ſi illi viri tales ac tanti, tamque multiplici variâque doctrinâ, excolendâ pluribus ſimul diſciplinis adoleſcentiâ, atque adeo pueritiâ, omnium magnarum rerum atque artium ſcientiam ſunt conſecuti; cogitatis ne, temere eos ac confuſè, operâque quadam tumultuariâ, ſtudia ſua pertractaſſe, &c, quòcunque caſus ac voluntas ferret, eò, tanquam ad ſcopulos quosdam, tempeſtate ipſos delatos, adhæſiſſe? Nihil minùs. Immo verò quò illi doctiores ſapientioresque fuerunt, eò etiam meliori certiorique ordine cenſendi ſunt ſtudia omnia ſua ad normam veræ ſolidæque doctrinæ diſpoſuiſſe, itaque ex multis

# ORATIO OCTAVA.

133

multis variisque disciplinis, tanquam ex partibus quibusdam, rectè atque ex ordine distributis, scientiam quandam maximam atque perfectissimam, quæ maximarum quarumque rerum cognitionem comprehenderet atque includeret, quam ipsam vocant sapientiam, concinnasse. Quo si ordine perturbato, sese ii ad philosophiam, atque ad cetera litterarum studia applicuissent, profectò neque Democritus, neque Eratosthenes, a quincuplici, hoc est, ab universo doctrinarum atque eruditionis orbe, translato eleganter a quinque certaminum victoribus vocabulo, quinquertiones nuncupati fuissent, neque Plato quasi quidam Deus philosophorum habitus fuisset, neque princeps sapientiæ atque eloquentiæ Aristoteles, neque dignissimus Theophrastus, qui Aristoteli in scholam Peripateticam succederet. Et quid est, quæso, Auditores, quòd gravis dicendi auctor Quinctilianus, qui primam hominis ætatem multa eodem tempore docendam præcipit; tamen idem ipse Quinctilianus, longâ viginti annorum experientiâ atque usu eruditus, oratorem, quem ad summam perfectamque eloquentiam informandum susceperat, per singulos studiorum quorumque gradus magnâ cum curâ ac diligentia iniecit, nisi quia sine ordine frustra omnis studiorum labor est futurus, atque ex ordinis perturbatione nascatur, oportet, perturbatio totius scientiæ atque doctrinæ? At verò quàm aptus, quàm appositus, atque ad cursum omnium doctrinarum conficiendum quàm accommodatus, ordo ille studiorum, quem futuro oratori necessarium Fabius Quinctilianus tradidit, ut puer & Græcè disceret & Latine, & legendi exerci-

tationem ab Homero & Virgilio exordiretur, & aliarum quoque a Grammaticâ disciplinarum studia ingrederetur, & Geometriâ & Arithmeticâ, & Astrologiâ aliisque Mathematicis disciplinis & Dialecticâ instrueretur, itaque ad oratoris demum inunus bene ritèque explendum omnium prope maximarum rerum scientiam afferret! Quem quidem studiorum ordinem si vos, adolescentes, minimè omnium plerique tenuistis, quid tandem miramur, si maximis laboribus vestris vestri in litteris profectus minimè omnium respondeant? Quid enim refert multa legere, & libris dies noctesque lectitandis impallescere, ac libris propemodum immori, nisi ea, sine quibus boni scriptores aut omnino non intelligi, aut certè non bene intelligi possunt, præcognita atque explorata habueris? quid veteres recentisque historias pervolutare, nisi & populorum & regionum situm a Geographiâ, temporum autem numerandorum rationem a Chronologiâ perdidiceris? quid in Poëtis assiduè versari, nisi & historias & fabulas & astrorum ortus atque occasus reliquosque motus cœlestes cognoveris? quid operam dare medicinæ, nisi Physicem antea perveltigaveris? quid animum atque studium ad jus civile adhibere, nisi ad jus civile & Dialecticam, & totius Romanæ atque adeo Græcæ antiquitatis, priscarumque consuetudinum cognitionem adjeceris? quid in Theologiam, hoc est, rerum divinarum, ex altioribus ac superioribus divinisque prorsus principiis, scientiam, incumbere, nisi reliquas omnes, quæ humanæ sunt, & a Theologiâ verissimè atque sapientissimè judicantur, tibi antea disciplinas compa-  
rave-



raveris? quid denique studia bonarum artium persequi difficiliora, nisi viam tibi, ex recto doctrinæ ordine, a facilibus ad difficiliora intelligenda muniveris? Credite mihi, adolescentes, non nisi optimorum studiorum ordine constat summa doctrina, perfectaque rerum omnium eruditio; neque is verè solidèque sapiens, qui multa confusè atque inordinatè, sed qui ordine didicerit. Nisi siquis fortè Therſitam illum Homericum, hominem doctissimum atque sapientissimum judicet, cui Homerus a multâ rerum cognitione multum etiam verborum tribuisse videtur. Sed tamen, quia illa multa, quæ utunque Therſites sciebat, procul a recto ordine, immo & præposterè, sciebat, quis Therſite apud Homerum stultior atque insipientior? quem temerè loquacem frustra verborum Homerus appellat. Neque verò ego injuriâ adolescentes nonnullos, a bonarum litterarum studiis præposterè perversèque institutis, Therſitæ comparaverim: qui tamen adolescentes, propter varia & diversâ optimarum disciplinarum studia, sibimet ipsi & sapientiâ & eloquentiâ Ulyssæm atque Nestorem longè multumque antecellere videntur. O miseram ac deplorandam adolescentium illorum conditionem; o vanos illos & ineptos Therſitas! qui, tametsi bono ingenio præditi, beneque a naturâ ad doctrinas atque ad bonarum artium studia comparati, studia prorsus sua atque ingenia pessundant, qui spem planè suam & suorum frustrantur, qui non otio modò, sed etiam laboribus suis perversè abutuntur, qui sumptuum ac laborum suorum, totiusque suæ adolescentiæ turpem, immanemque jacturam faciunt, qui, illotis, ut ajunt, pedi-

pedibus, in sacra sapientiæ penetralia ingredi audent, qui, tametsi penitus rudes omnium illarum bonarum artium, sine quibus ad majores altioresque disciplinas nemini cuiquam aditus patet, & Philosophiam & Medicinam, & Jurisprudentiam, ipsam denique, quæ ceterarum omnium disciplinarum domina ac regina est, & vera ac summa sapientia, Theologiam attingunt. At enim rectus doctrinæ ordo in primis postulat, ut Græcè quis sciat. Quis enim Græcæ linguæ prorsus ignarus Platonem atque Aristotelem, principes illos ac duces philosophiæ, reliquosque summos philosophos, benè intelligat, aut vim etiam proprietatemque verborum pernoscat, quibus non satis perspectis, neque ad originem suam reductis, ne ipsæ quidem res Philosophiæ, aut medicinæ, aut juris civilis, aut Christianæ etiam Theologiæ, accuratè exquisitèque percipiantur? Postulat etiam doctrinarum ordo, ut nemo quisquam, nisi in Geometriâ bene eruditus, ad Philosophiam, aut medicinam, aut jurisprudentiam, aut divinorum quoque librorum interpretationem accedat. Quis enim Geometriæ funditus expertus, satis rectè de mundo, rerumque naturâ philosophetur, aut bene etiam capiat, quæ philosophi de re civili, ac militari, quæ medici de re chirurgicâ vulnerumque curandarum, ratione, quæ jurisconsulti de agrorum fundorumque divisione, quæ denique sacræ, instinctuque divino conscriptæ, historiæ de singulari planèque admirabili arcæ Noëmicæ, templique Salomonici structurâ commemorant? Postulat idem ipse doctrinarum ordo, ut majorum omnium artium atque disciplinarum studia a Dialecticâ studiosus quisque discendique

cu-

# ORATIO OCTAVA.

159

cupidus auspicetur. Quis enim sine Dialecticâ de rebus humanis atque divinis rectè tutoque ratiocinetur, quæ planè Dialectica, ut sapientissimè quondam sapientissimus ille Augustinus in libro suo de Ordine, docere docet ac discere? Postulat hic idem doctrinæ ordo, ut ne studiosi optimarum litterarum adolescentes multò, quàm oportet, curiosius omnium rerum scientiam conquirant. Quis enim in rebus minimè omnium utilibus, atque adeo etiam noxiis, percuriosus, ad veram solidioremque doctrinam contendat, & non potius per vanos inutilesque libros, animi, non eruditionis causâ, frustra atque otiosè pervagetur? Postulat denique ordo hic rectus doctrinæ, ut initio quisque a rebus facilioribus ducto, inde ad difficiliora, per quosdam veluti gradus, progrediatur, nec ante conquiescat, quàm ad summam rerum omnium maximarum scientiam perveniat. Quis enim unquam difficiliora assequatur, qui facilia minimè omnium perviderit, aut ad summum sapientiæ fastigium adscendat, qui in primis duntaxat sapientiæ gradibus semper sibi manendum existimaverit? Hæc igitur omnia quum recta studiorum instituendorum ratio necessario postulet ac requirat, quis ille mihi Theologus, qui locupletissimo reliquarum omnium disciplinarum apparatu, veluti instrumento quodam ac suppellectile in primis necessariâ, non sese ad Theologiam præparaverit? Quis ille mihi medicinæ satis peritus, qui nihil sese penitus in Mathematicis, parùm in Physicis exercuerit? Quis ille mihi jurisconsultus, qui leviter Dialecticam, ne primoribus quidem labris Philosophiam moralem gustaverit, nullâque Græcæ Romanæque antiquitatis cognitione ad-

tum

tum tibi ad jus civile patefecerit ? Dicat hîc mihi unus aliquis adolescens , sese uni duntaxat ac soli ex omnibus disciplinis studia omnia sua dedicasse , eamque unam ac solam disciplinam abunde sibi ad omnem vitæ usum sufficere , neque Academiæ huic Pisanz , matri atque altrici uberrimæ omnium doctrinarum , sese unquam nomen dedisse , ut ad omnem hic erudiretur usum liberalium omnium artium atque disciplinarum ; sed ut de majoribus disciplinis certam unam aliquam ac solam , puta Theologiam , aut jurisprudentiam , aut demum medicinam , per omnem vitam profiteretur . Sed tua vehementer te fallit opinio , adolescens , eoque fallit vehementius atque gravius , quò disciplina illa excelsior est atque altior , quam tute tibi pro merito ac dignitate profitendam susceperis . Quis enim in litteris atque doctrinis paullò versatior nesciat , quod a viris doctissimis verissimè atque acerrimè assertum fuit , disciplinas artesque liberalissimas , ex quibus universa perfecta que doctrina coalescit , communi quodam cognitionis atque societatis vinculo inter sese contineri atque cohærere , quòque una aliqua disciplina in altiori gradu atque ordine posita est atque constituta , eò illam plura atque majora doctrinarum adjumenta requirere . Nego igitur , posse te , adolescens , perfectum consummatumque Theologum evadere , nisi ad scientiam rerum divinarum , rerum quoque humanarum doctrinam , & totius sacræ profanæque antiquitatis , Græcæque etiam linguæ cognitionem adjuveris . Nego , posse te jurisconsultum , hoc est , juris & æqui sacerdotem , fieri , qualem te esse oportet , numeris omnibus absolutum , ac veluti commune

mune quoddam civium tuorum oraculum, nisi Dialecticam, omnemque philosophiam, reliquasque optimas artes, duces tibi atque magistras juris dicundi adsciveris. Nego, summum te atque perfectum in medicinâ esse posse, nisi ad rem medicam Geometriam atque Astrologiam ceterasque artes Mathematicas adhibueris. Quid? nego, posse te, adulescens, ad eloquentiam adspirare, aut oratoris grave illud & magnum munus sustinere, nisi cum eloquentiâ doctrinarum omnium elegantiam consociaveris. Nego denique, posse te artem ullam, quæ ad doctrinam atque eruditionem pertineat, perfecte assequi, nisi ceteras omnes, quæ connexæ inter sese sunt, atque aptæ, simul obtinueris. Testes appello interpretes illos divinos Religionis Christianæ, viros doctissimos atque sapientissimos, qui Christianam Theologiam tum scriptis suis mirifice illustrarunt, tum omni argumentorum atque eruditionis genere sive adversus impios transfugas ac desertores, sive adversus philosophos externos, acerrimè defenderunt. Quid elegantioris doctrinæ defuit Origeni, quid Hieronymo, quid Augustino, quominus, qui summi Theologi erant, iidem etiam ab omni humanarum disciplinarum scientiâ celebrarentur? Num quia Origenes ab ineunte ætate totum sese ad litterarum sacrarum studium contulit, non etiam Platonem, non Aristotelem, non priscam illam Græcorum sapientiam universam diligentissimè atque accuratissimè excoluit? Num quia Hieronymus divinos libros summâ curâ ac fide est interpretatus, non etiam in omni eloquentiæ humaniorisque eruditionis studio est, quàm qui maximè, versatus? Num

X

quia

quia Augustinus maximus Theologorum fuit, ceterorumque Theologorum magister, Philosophorum doctrinas neglexit, qui in illis etiam omnibus doctrinis, atque in totius vel profanæ antiquitatis cognitione nemini cuiquam visus est vel eruditissimorum atque doctissimorum virorum concessisse? Testes appello priscos illos jurisconsultos, Philosophiæ æquè atque juris antistites, eosque ab omni eruditione atque disciplinâ instructissimos, quorum tanta fuit in jure responsitando sapientia atque auctoritas, ut de eorundem ipsorum responsis atque scitis meritò affirmaverim, quod de duodecim tabularum libello magnificè quondam atque ambitiosè in Oratore suo M. Tullius, iis mehercule priscorum jurisconsultorum responsis Philosophorum omnium bibliothecas & auctoritatis pondere, & utilitatis ubertate superari. Num quia prisci illi jurisconsulti toti in condendo dicendoque jure occupabantur, non etiam Dialecticæ, omnique Philosophiæ dies noctesque studuerunt? aut non etiam sese accuratâ veteris historiæ notitiâ, bonâque omni litteraturâ exornarunt, atque expoliverunt? Testes appello priscos illos principes atque auctores medicinæ, homines perfectò natos ad salutem generis humani, ideoque a cunctis mortalibus, honoris gratique animi causâ, maximè omnium celebratos. Num quia parens ille optimus Medicinæ Hippocrates præcepta primus dedit medendi, itaque sese in omni re medicâ gessit, ut neque ipse unquam alios, neque alii eum unquam sefellerint, reliqua doctrinarum genera ignoravit, in quibus ille omnibus longè inter ceteros excelluit? Num quia Galenus curam atque operam

in

in medicinam, secundum Hippocratem, diligentissimam ac penè incredibilem contulit, non etiam Mathematicas disciplinas, non Dialecticam, non Philosophiam, non Oratoriam, non denique Grammaticam, studiosissimè atque in primis sedulò pertraxavit? Testes appello veteres illos oratores, qui tantà, quantà fuerunt, eloquentià, admirabili illà, ac divinà, minimè certè extitissent, nisi omnem rerum quarumque maximarum scientiam consecuti fuissent. Num quia Demosthenes nervos omnes ingenii atque industriæ contendit, ut eloquentiæ sibi in totà Græciâ principatum vindicaret, adjumenta summæ perfectæque eloquentiæ adspernatus est, quæ sunt reliquæ omnes disciplinæ? Num quia Cicero ita in eloquentiam incubuit, ut, Fabio Quinctiliano teste, Cicero, jam non hominis, sed eloquentiæ nomen habeatur, non est etiam quàm diligentissimè persecutus studia reliquarum omnium artium atque disciplinarum? O viros illos sapientissimos, atque immortalitate dignissimos, qui quum ex tot tantisque artibus uni præsertim sese liberalissimæ disciplinæ totos dedissent, ceteras quoque omnes liberalissimas artes atque doctrinas ut sibi adjungerent, tantopere laborarunt, sine quarum pulcherrimo ornatissimoque comitatu ne illam quidem unam perfectè atque integrè stare posse existimarunt! Hæc vos exempla intueamini, oportet, optimi adolescentes, atque ad horum exemplorum imitationem vos studiaque vestra conformetis, ut, si fortè, magnorum illorum virorum exemplo, uni vos disciplinæ præ aliis omnibus addixeritis, non ab ejus consortio ceteras alias segregandas; sed cum eà quàm-

maximè conjungendas arbitremini, illudque unum superesse, ut, ne doctrinarum multitudine atque varietate studia aliquando vestra inturbentur, ea quam optimo ordine disponatis atque moderemini. Nam quid ego hic dicam, Auditores, quam multos, ingeniosos alioquin & laboriosos homines, studiorum suorum malè institutorum pœnituerit, qui, dum uni alicui doctrinæ unicè studerent, aliis disciplinis penitus neglectis, aut confusè, nulloque ordine percursis, post magnos atque etiam incredibiles labores exantlatis, in eâ quoque, quam quærebant, doctrinâ, oleum sese & operam perdidisse tandem animadverterunt? quum e contrario alii vel imbecilliori fortasse ingenio homines, quod studia omnium doctrinarum sua ordine pertractarunt, in summos doctissimosque viros evaserint. Qua etiam de causâ, Auditores, videre aliquando est, nonnullos de nostris adolescentibus, optimo illos atque acerrimo ingenio, toto quasi decursu præstantissimæ alicujus disciplinæ, ut, exempli causâ, Theologiæ, aut juris civilis, aut medicinæ spatio, alios exiguum sane ex multis laboribus aut vigiliis doctrinæ fructum; alios verò multò maximum atque uberrimum reportasse. Quid enim in disciplinis quibusque difficiliora quæque atque reconditiora explanat atque exponit, nisi ordo? Quid obscuriora quæque illustrat atque patefacit, nisi ordo? Quid totam, seu Barbaram, seu Græcam, seu Romanam antiquitatem, superiorumque omnium ætatum memoriam, & tempora, & locorum ac terrarum situs sub unum veluti adspectum subjicit, nisi ordo? Quid tandem laborem illum talem ac tantum in tot ac tantis, tamque variis,



variis, honestissimis artibus atque doctrinis levat. atque imminuit, nisi ordo? Ordo facit, ut multas simul præclarissimas artes clarè distinctèque doceamur, ordo, ut tanta illa rerum discendarum varietas nullam discantibus moram, nullumque impedimentum inferat; ordo, ut a primis usque legendi & scribendi elementis ad summam rerum omnium scientiam non longo temporis cursu, neque multo sanè labore progrediamur; ordo, ut, temporibus omnibus in certa quædam spacia divisis atque distributis, scriptores omnes & Græcos & Latinos, jam inde ab antiquissimis, suam quemque ætatis serie gradatim perlegamus; ordo denique, ut, quod ab homine uno in maximâ quaque re, atque in omni doctrinarum genere sciri potest, totum id, quantum per humanas quidem vires licet, cognoscamus. Ordinem hunc studiorum, qui doctissimorum hominum usu atque auctoritate est comprobatus, vobis ego etiam atque etiam commendo, optimi adolescentēs, vobis commendant præceptores vestri, homines omni doctrinâ excultissimi atque ornatissimi, qui, tametsi suam quisque, pro commissio sibi munere, disciplinam profiteantur, tamen reliquas vobis vel pernecessarias vel certè perutiles suo ipsi exemplo demonstrant; commendat nostra hæc Academia, quæ studia omnia atque exercitationes vestras in suas quasque horas optimo ordine dispositas esse voluit, ut ne disciplinæ unius studium obstaret alteri atque officeret. Quem si vos ordinem in studiis his vestris diligenter servaveritis, brevi futurum spero, ut non eam. modò, quam professuri præcipuè estis, disciplinam;

nam; sed ceteras planè omnes, sine quibus ne  
illa quidem perfecta esse potest, consequamini.



FRANCISCO  
DE . COMITIBUS . GUIDIS  
ARCHIEPISCOPO . PISANO  
CORSICAE . ET . SARDINIAE . INSULARUM  
P R I M A T I  
GENERIS . NOBILITATE . LITTERARUM  
P A T R O C I N I O  
CHRISTIANAE . RELIGIONIS . STUDIO  
T O T A . E T R U R I A  
A T Q U E . A L I B I . E T I A M  
SPECTATISSIMO  
ALEXANDER . POLITUS  
ORATIONEM . HANC . SUAM  
A D . A C A D E M I A M . P I S A N A M  
DE . HUMANARUM . LITTERARUM  
AD . CHRISTIANAE . RELIGIONIS . USUM  
OPPORTUNITATE  
MAGNO . ACADEMIAE . PISANAE  
C A N C E L L A R I O  
OB . INSIGNEM . EJUS  
ERGA . SE . BENEVOLENTIAM  
ET . SINGULARIA . IN . LITTERAS . MERITA  
HONORIS . GRATIQUE . ANIMI . CAUSSA  
D. D. D.

ON THE 10th DAY OF

THE MONTH OF

THE YEAR

19

AT

IN

THE

OF

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE



169

# ALEXANDRI POLITI

DE CL. REG. SCHOLARUM PIARUM



## ORATIO NONA.

*De Humanarum Disciplinarum ad Religionis Christianae usum opportunitate.*



Negari nullo modo potest, amplissimi, ornatissimique auditores, quod res ipsa palam loquitur, & publico humani generis testimonio comprobatum est, liberales, quas vocamus, artes atque disciplinas tam magno rebus humanis usui esse ac semper fuisse, ut nullum doctrinâ majus atque excellentius bonum concessum divinitus hominibus esse videatur. Commoda hæc atque utilitates, quæ inde a doctrinâ in vitam humanam uberimè atque copiosissimè proficiscuntur, quum secum expenderent atque reputarent viri doctissimi, & eloquentissimi, quibus ante me id muneris impositum fuit, ut annua hæc atque legitima disciplinarum studia oratione suâ auspicarentur, mirum est, quot & quan-

Y

quantas, quamque egregias ac singulares litteris laudes tribuerint, quantâque eloquentiæ, & præclarissimorum argumentorum copiâ eas identidem laudes amplificaverint. Quorum ego vestigia secutus, nonnulla etiam pro imbecillitate meâ dicere eloquenter atque ingeniosè conatus sum, quæ, tametsi non tam ingeniosè dicta, neque tam eloquenter; tamen non indigna prorsus dici hujus celebritate, locique hujus amplitudine viderentur. Verùm hodierno die, quàm mihi valde lætandum, quòd argumentum dicendi mihi tale oblatum sit, quale nunquam aliàs, humanarum ut disciplinarum præstantiam atque dignitatem, non ex humanarum rerum usu; sed ex rebus unicè divinis, atque ex rerum divinarum præstantiâ & dignitate, dimetiendam vobis atque æstimandam proponerem. Nam si ab illis quidem usibus, quos ad humanam vitam bonæ omnes artes atque disciplinæ maximos plurimosque afferunt, tantopere eæ concelebrantur, quanto eadem magis commendentur, necesse est, a vario ipsarum & multiplici usu ad res divinas? Quod quidem patefacturum me atque illustraturum puto, si ostendero, quod mihi hodie propositum est, humanas litteras atque disciplinas ad rem Christianam & religionem plurimùm conferre. Quòd si ullum unquam argumentum solemnè hoc & percelebri die pertractatum apud vos est, quod Pisanae Academix studiorumque nostrarum splendori responderet, hoc profectò tantum est, ut nullum neque augustius, neque excelcius, neque ad litterarum præstantiam demonstrandam accommodatius, neque tandem divinius, exco-  
gitari unquam possit. Illud mihi unum timendum,  
stu-

studiosissimi bonarum litterarum adolescentes, ne argumenti hujus magnitudini mea demum succumbat oratio, multòque ego minùs dicam, quàm tanti argumenti dignitas atque necessitas postulare videatur.

Ac primùm illud ego dicam, quod hîc sanè minimùm esse videtur, sed tamen minimè omnium negligendum est, sacram religiosamque doctrinam hominum Christianorum, quæ scientia est altissima maxinèque admirabilis rerum divinarum, pulchrius nimirùmque elucere, si humanarum disciplinarum cultus atque ornatus accesserit; indeque factum esse, ut, quò Christiani Theologi a liberalibus optimisque disciplinis excultiores atque instructiores extiterunt, eò etiam majorem Theologiæ Christianæ pulchritudinem ipsi atque splendorem conciliaverint. Quantò enim Christiana Theologia pulchrior, quantòque ad speciem liberalior atque ornatio in Basilio, in Gregorio Nazianzeno, in Johanne Chrysostomo, atque ex Latinis in Cypriano, in Hieronymo, in Augustino, & in plerisque aliis hujus generis atque classis doctissimis & eruditissimis interpretibus divinis, quàm in aliis plerisque omnibus, sequiorum maximè temporum, hominibus, qui, quum esse & videri Christiani Theologi vellent, omni penitus humanarum doctrinarum elegantia destituebantur? Litteris divinis traditum est, eos, quos sibi olim deus ad religiosiorem sanctioremque sacrorum cultum separatim destinaverat atque elegerat, ex Ægypto, ubi miserâ durissimâque servitute opprimebantur, ita, duce atque auctore Deo, exisse, ut etiam Ægyptios auro atque argento, plurimâ veste, lautâque supel-

lectile, & pretiosiori quacunque re spoliaverint. Id ipsum, auditores, sententia est atque animadversio vetus & vera Patrum ingeniosissimorum, & acutissimorum, multo post tempore hominibus Christianis contigisse: quos quum Deus ex tantis illis errorum atque inscitiae tenebris, quibus apud profanas gentes miserè tenebantur, in clarissimam lucem vocasset, divitias ii atque ornamenta humanæ doctrinæ & eruditionis ab illis gentibus abstulerunt, sibi que ad meliorem Christianæ Theologiæ usum ingeniosissimè vindicarunt. Nam, Deus bone! quantam vim auri atque argenti vestiumque pretiosissimarum ex illâ veluti vanæ superstitionis Ægypto ad Theologiam Christianam cohonestandam atque locupletandam absporravit Cyprianus? quantam Lactantius? quantam Victorinus, Optatus, Hilarius, quos Augustinus in libris suis De Doctrinâ Christianâ nominatim appellat? quantam etiam Græci plerique omnes, viri doctissimi, atque in litteris humanioribus versatissimi, qui ex illâ errorum quadam veluti tenebrosâ superstitionisâque Ægypto ita ad Christianam veritatem amplectendam convolarunt, ut opes omnes sapientiæ atque eloquentiæ Græcorum ad usus Christianos solerter & acutè transfulerint. Hic ego non disputo, auditores, quod est in nostris scholis subtilius ac diligentius quæsitum, quàm necessaria sit ad religionem Christianam Christiana Theologia. Quum enim ex oraculo divino editum sit, pestíferas opiniones, veritatique divinæ ac religioni contrarias apud Christianos suboriri oportere, quis non videat, quod nostri homines palam profitentur, non perutilem modò, sed etiam Christianæ religioni pernecessariam esse



esse sacram aliquam doctrinam, quæ falsas illas perniciosasque opiniones coarguat, ipsiusque religionis decreta, quibus nihil firmitus ac solidius esse unquam potest, ratione etiam humanâ ex ipsis divinis principiis stabiliat atque confirmet? Ergo, si ad Christianam religionem sanctam rectam servandam atque tuendam tam necessaria est Theologia, si tanta conjunctio atque necessitudo uni est cum alterâ, ut religio Theologiâ suâ carere nullo modo possit, quis jam vestrum, auditores, non fateatur, quod inde certissimè, & manifestissimè sequitur, religioni ipsi Christianæ prodesse plurimum atque conducere liberalissimas quasque disciplinas, quæ sacræ huic Christianorum doctrinæ tantum decoris atque ornamenti ad pulchritudinem & dignitatem important? Nam de jucunditate quidem atque oblectatione, quam ab humanis litteris Christianæ litteræ mirabilem habent, quid attinet dicere? quando hoc veluti humanæ eruditionis condimento sapientissimi quique ac politissimi christianarum rerum præceptores, atque in primis Clemens ille Alexandrinus, veritates divinas ad hominum gustum parandas sibi atque temperandas censuerunt, quique in iis elegantissimi habiti sunt, atque ab aureâ in primis eloquentiâ commendati, ii quidem certè bonarum artium humanæque litteraturæ elegantiam, tanti fecerunt, ut vel Johannes ille Chrysostomus, ille, inquam, Chrysostomus, qui Christianæ eloquentiæ facilè inter Græcos princeps est judicatus, ad Atticam sermonis elegantiam comparandam, Aristophanem Comicum, lepidum quàm qui maximè, & festivum Poëtam, dies noctesque pervolu-

tave-

taverit. Quid? quòd Latinorum Patrum viris eloquentissimis ad tantam illam tamque admirabilem eloquentiam Christianam viam atque exemplum Ciceroniana eloquentia prævit? Testis est Arnobius, quem Ciceronis potissimum libri ad falsos deos impugnandos vetustatisque auctoritatem labefactandam, atque adeo ad Christianam religionem mirificè comprobendam plurimum adjuverunt. Testis est auditor & discipulus Arnobii, Lactantius, qui ita sese in scribendo ad Ciceronianum exemplum conformavit, atque effinxit, ut in eo quidam Ciceronem nescio quem Christianum legere sibi videantur. Testis est Rhodanus ille Latinæ eloquentiæ (sic enim ab Hieronymo appellatur) Hilarius Pictaviensis, quem & ipsum eloquentiæ Ciceroniæ non minimam operam dedisse, indicio illud est, quod Hieronymus ait, eum libros duodecim Quintiliani stylo & numero imitatum fuisse, libelloque contra Dioscorum medicum, quid in litteris posset, ostendisse. Testis est, qui vel unus multorum loco esse potest, Hieronymus Stridonensis, qui vel in sompis ad summi judicis tribunal vapulare sibi visus fuit, quòd esset Ciceronianus. Testis est Augustinus, qui, quum ex Ciceronis Hortensio eloquentiam quæreret, hausit inde sapientiam, qua Deum, summam illam & immortalem sapientiam, ardentissime concupisceret, totusque ad eum, omnique animi impetu raperebatur. Testis est iterum, & sapius, Hieronymus, quem Ciceronianâ eruditione atque eloquentiâ captum adeo fuisse ferunt, ut & Ciceronis Dialogos multò majori pretio, quàm ceteros aliorum libros, sibi describendos curaret. Quo de viro sic ego alias cen-

censebam, tam præclarè cum tamque eloquenter scribere de rebus nostris non potuisse, nisi, quam ex Cicerone eloquentiam didicerat, assiduâ legendi scribendique exercitatione corroborasset. Sed quid ego hæc minora de humanioribus disciplinis, magnâque earum disciplinarum utilitate diutius persequor, quum ad sacram Christianorum doctrinam liberalioribus disciplinis nihil unquam esse possit, non dicam utilius, sed magis etiam necessarium? An verò quidquam Christiano doctore magis necessarium esse unquam possit, quàm oracula divina, bene perfectèque intelligere, eaque rectè interpretari? hoc est, libros eos divinos atque sacrosanctos, quibus divina veritas ad salutem hominum sempiternam, consignata est, atque tradita, & quibus veluti quibusdam fontibus Christiana ipsa religio uberrimè continetur. Quis autem sacros illos libros rectè explicet atque interpretetur, qui non sit idem interioribus quibusque ac reconditis litteris, omnibusque liberalibus disciplinis, & totius antiquitatis, omniumque gentium cognitione pereruditus? Quis enim mihi sine Geometriâ Salomonici templi structuram, aut sine Arithmeticâ arcæ Noëticæ magnitudinem, pro tot, tamque dispariunt animantium in eâ arcâ inclusorum numero atque multitudine, & pro com meatu in alimentum annum copiam, animo & cogitatione comprehendat? Quis sine astrorum scientiâ ea, quæ de cælo, & stellis atque astris, ac præsertim aliquando de sole, mirifica prorsus ac portentosa divinis illis historiarum monumentis prodita sunt, intelligentiâ assequatur? Quis sine summâ omnigenâque doctrinâ ea percipiat, quæ Moses, scriptorum omnium

omnium primus ac princeps , vir oppidò sapientissimus , omnibusque Ægyptiorum & aliarum gentium disciplinis excultissimus , neque juris modò humani , tum publici , tum etiam privati , consultissimus , sed etiam rei medicæ , sanandorumque morborum scientiâ eruditissimus , de mundi totius , primique hominis fabricatione , summâque Dei in mundanis humanisque rebus administrandis , sanctissimisque legibus condendis providentiâ , & de corporum quoque salubritate ad Reipublicæ salutem curandâ , afflatu instinctuque divino ad posteritatis memoriam litteris mandavit ? Quis sine dialecticâ , quis sine eximiâ naturæ ac morum scientiâ , quis sine admirabili singularique sapientiâ librum Jobi perscrutetur , cujus quidem libri in omni genere doctrinarum tot sunt sententiæ , quot verba ? Liber vero Psalmorum quid ille tandem , nisi abditus quidam & occultus thesaurus totius philosophiæ ? quem quis mihi thesaurum aperiat , nisi qui philosophiæ opibus atque divitiis copiosissimè affluerit ? Quid ego hîc dicam de libris Salomonis , hominis divino sanè oraculo , multò omnium sapientissimi , atque in plantarum , & lapidum , & elementorum , & cujusque generis animantium , terrenorum atque aquatiliûm ; & in utraque sede viventium , totiusque naturæ historiâ longè versatissimi , & de quacunque demum re disputatoris subtilissimi atque acutissimi ? Quis eos mihi , quæso , libros explanet , tum etiam barbaræ , egregiè , atque exquisitè tractaverit ? Quid de vatibus illis divinis ? quid de Esaiâ ? quid de Ezechiele ? quid de Daniele ? quid de ceteris hominibus maximè sapien-

pientibus, atque eruditis? quorum vaticinia, miris illa quidem ambagibus, sed veris, involuta, quis mihi evolvat atque illustret, nisi qui antiquam omnium populorum omniumque temporum historiam diligentissimè exploraverit? Quid etiam de Johanne illo Theologo, deliciis purissimis atque castissimis Christi? quo nemo quisquam altius in cœlum usque penetrasse, atque in divinitatem videtur. Quis altissimam Johannis Theologiam de Verbo divino, de unigenâ illo Dei filio, eodemque uno, solo æternoque Deo, probè animo rectèque concipiat, nisi qui Platoniam philosophiam a veritate Christianâ optimè secreverit atque distinxerit, ne pro veritate, quam Johannes divinitus docet, somnium aliquod Platonicum amplectatur? Quid de Paulo, summo illo Christianæ eloquentiæ atque eruditionis præceptore & magistro? Quis mihi eloquentiam illam & eruditionem Paulli, plane admirabilem atque divinam, intimè penitusque pernoscat, nisi qui interiores litteras atque disciplinas Græcorum plenius uberiusque cognoverit? Quid plura? Quum libri, quos ad erudiendos instituendosque mortales, Deo ipso auctore, hoc est, instinctu afflatuque divino, elucubratos esse constat, omnes omnium rerum, neque divinæ modò, sed etiam humanæ sapientiæ, fontes plenissimè contineant, quum libri hi sacrosancti atque divini, quidquid boni ac præclari in ceteris omnibus latè libris dispersum est ac diffusum, multò simul excellentius atque perfectius complectantur; quum, quæ in his libris Deus syllabatim dictavit, ea etiam, ad uberiores humani generis in quacunque sapientiæ parte doctrinam, vario multipli-

cique sensu donaverit, quum, quæ ex ceteris sparsim libris hauriri possunt, bonæ omnes artes atque disciplinæ, multò eæ certius multoque purius ex hoc uno sacrorum librorum volumine deriventur, atque exprimantur, quum denique tanta sit horum sacrorum librorum præstantia, atque dignitas, ut, quod Græcè nomen commune est librorum, id porro, ad notam quandam auctoritatis atque excellentiæ, proprium ac peculiare horum divinorum librorum habeatur, quis hos libros, tam divinos, tam sanctos, tam refertos copiâ omni doctrinæ atque eruditionis, totos investiget, atque intelligat, nisi qui omnem sibi doctrinæ elegantiam adsciverit, omnemque sibi rerum omnium maximarum, artiumque liberalissimarum scientiam comparaverit? Dicat hîc aliquis, quæ sacris litteris Deus consignata esse voluit, non ea utique omnia scitu cuique esse ad salutem sempiternam necessaria. Quod quis unquam neget, auditores? Sed, quanvis de divinis his libris plurima ignorare Christiano homini liceat, quæ non ita ejus interest scire, paucisque omnino capitibus, quod ad salutem cuiusque sempiternam attinet, Christiana scientia definiatur; tamen quid in sacris libris, ac divinis nescire ei unquam liceat, qui interpretem sese eorum librorum atque explanatorem profiteatur? Talis autem est Theologus Christianus, hoc est, præceptor, & magister religionis Christianæ: cujus profectò est, oracula divina, tum quæ litterarum monumentis commendata divinitus sunt, tum quæ sine scripto, Deo auctore, memoriæ hominum sunt tradita, itaque ad posteritatem veluti per manus trans-

mis-

missa, ad nos tandem pervenerunt, exponere atque interpretari. Qui si quid fortè ignorat, quod ad divinorum librorum intelligentiam atque interpretationem quomodocunque pertineat, næ ille nullo modo possit tantum illud Christiani Theologi, divinique interpretis munus pro dignitate sustinere. Age verò, quid si Christiano Theologo sua est religio non explicanda modò, sed etiam ab oppugnatoribus defendenda, & qui Christianæ religioni errores adversantur, sunt ii refellendi atque profligandi? Quàm multa, & quàm magna, & quàm multarum & magnarum rerum cognitio est huic Theologo necessaria! Quid enim siqui hominum eò unquam impietatis prolabantur, ut, quod fecisse olim Diagoras ille atheos, & Theodorus feruntur, Deum de medio tollere, divinamque providentiam e mundo, rebusque humanis, nec solum singulis, sed etiam universis, auferre conantur? Non ne argumentis ex intimâ philosophiâ petitis tanta hæc, tamque immanis & ferina impietas falsitatis convincenda? Quid si contra alii, quod barbari & Græci tam inde a vetustissimis temporibus fecerunt, multos in mundum deos inducendos, &, quem unius soliusque Dei cultus penitus sustulit, multorum cultum deorum reducendum atque redintegrandum suadent? Non ne ficta hæc & commentitia deorum multitudo ex principiis ipsis philosophiæ, atque ex ipsis Græcorum interioribus litteris atque disciplinis destruenda funditus atque disturbanda? Quid si impii quique perversique philosophi (si philosophi tamen ii vocandi, qui philosophiâ, pulcherrimo dei munere, ad religionem conculcandam at-

que perdendam abutuntur); quid si, inquam, impii consceleratique philosophi, quales & Celsus & Porphyrius & Julianus, alique hujusmodi fuerunt, in religionem Christianam acerbius & contumeliosius invehuntur, &, quæ ejus sunt summa ac sacrosancta in primis capita, omni argutiarum genere infirmare atque abolere; vel, ut rationi humanæ repugnantia ac planè falsa, in dubium revocare nituntur? Non ne horum ipsorum philosophorum in Christum sacramque Christi doctrinam maledicta ex iisdem eorum doctrinis retundenda, &, quæ contra sunt argumenta, ex illis ipsis, ex quibus ducta sunt, locis dissolvenda; Christianæ verò religionis decreta quàm cohærentia inter sese sint, quàmque nihil ea discrepans atque a rectâ ratione alienum, contineant, ex iisdem istis, ex quibus ea oppugnantur, disciplinis Græcorum commonitrandum? Quid enim testimoniorum nostrorum auctoritas, tametsi gravissima atque divina, apud eos unquam valeat, qui omnem iis testimoniis fidem derogandam superbè arbitrantur? aut quis etiam Cyprianum, hominem utique de nostris eloquentissimum atque sanctissimum, non jure olim de imprudentia inconsultâque ratione reprehensum fateatur, quoddam Demetrianum, hominem a religione Christianâ maximè omnium abhorrentem atque alienum, non philosophorum & Poëtarum, quorum ipse unicè auctoritate nitebatur; sed nostris duntaxat, hoc est, sacrorum librorum, testimoniis, eorumque librorum unâ ac sola auctoritate impugnaverit? Vos ego appello, Christianæ religionis vindices acerrimi, vos, assertores fortissimi, qui alienis ar-



armis, non nostris, decertandum vobis cum adversariis sapientissimè censuistis, & quæ vobis maximè perniciofa atque adversa humanæ doctrinæ atque eruditionis arma esse videbantur, ipsa eadem ex hostium manibus extorta atque erepta, ad impietatem confodiendam, Christianamque veritatem vindicandam atque tuendam adhibuistis. Te ego appello, Origenes, omnium Christianorum Patrum non in sacris modò, sed etiam in humanis litteris, eruditissime: cujus variam multiplicemque doctrinam scripta hodieque tua in Celsum satis superque testantur: qui certè qualis & quantus vir, & quàm admirabilis in Dialecticâ fueris, in Rhetoricâ, in Physicâ, in Geometriâ, in Astronomiâ, in omnibus Mathematicis disciplinis, in Ethicâ, in omni Philosophiâ, tum Græcorum, tum etiam Barbarorum, omnique in genere eruditionis, discipulus ille tuus Gregorius Thaumaturgus in laudibus tuis clarissimè & disertissimè demonstravit. Te appello, Apollinaris, te, Cyrille Alexandrine, oppugnator alter Porphyrii, alter Juliani. Te quoque appello, Eusebi Cæsariensis, non Porphyrii modo, sed etiam Hieroclis, hominis in primis impij atque contumeliosi, acerrime atque ingeniosissime oppugnator. Quis enim vobis ab omni politiori literaturâ instructor? Vos etiam appello, qui non unius alijus impij perditique nominatim philosophi; sed omnium ubique gentium errores propriis certisque libris confutandos atque coarguendos fortissimè suscepistis, te, Justine philosophe, te philosophe Hermia, te Athenagora Atheniensis, te, Theophile Antiochene, te, Cyrensis Theodorete; te, quo-

quoque de Latinis , Tertulliane , in Apologetico tuo, te , Arnobi, te , Minuti Felix, te in libris tuis De Civitate Dei, summe atque absolutissime Theologorum , Augustine. Quis enim vobis in studiis humanitatis omniumque doctrinarum, atque in totius antiquitatis cognitione eruditior ? aut quis vobis fortius atque melius Christianam causam, contra gentes ex ipsis gentium doctrinis, atque ex philosophiâ ipsâ Græcorum, defendit atque obtinuit ? O ineptos illos homines malèque supersticiosos, qui optima hæc atque liberalissima studia, vocare in crimen audent, eaque, tanquam vana, aut etiam noxia, certè quidem periculosa, reprehendere atque infectari ! Sunt quoque nonnulli, auditores, insigni homines incitiâ atque temeritate, qui somnio illo capti ac propemodum perterriti vapulantis Hieronymi, quòd ille esset Ciceronianus, studiosis eloquentiæ adolescentibus studium quoque Ciceronis, veluti vanum, Christianoque homine, quàm quod maximè, indignum, vehementer dissuadent. Qui utinam ad exemplum potius Hieronymi, quàm ad Hieronymi somnium, respicere, seseque accommodare atque aptare maluissent ! Quis enim toto ferè vitæ suæ tempore Ciceronem magis in oculis tulit, quàm Hieronymus ? Quis pluris Ciceronem fecit, quàm Hieronymus ? Quis magis Ciceronem dies noctesque manibus versavit, quàm Hieronymus ? Quis non Ciceronem modò, sed etiam Maronem, & Plautum & Terentium & Flaccum, ceterosque præstantissimos auctores & politissimos Latinitatis, magis commendavit atque probavit, quàm Hieronymus ? quem , magnâ hominum admi-

mi-

miratione, videre erat, grandiore jam natu, in Bethlemitico illo gymnasio pueris & Ciceronem suum, & Maronem, & Poëtas Comicos atque Lyricos, humanioris eruditionis causâ, prælegentem atque explanantem. Quid tibi tunc, Hieronyme, consilii fuisse credendum est, ut magister talis, ac tantus Religionis Christianæ, Christianis pueris, quos Christianâ tibi pietate imbuendos atque excolendos acceperas, profanos gentium libros exponeres atque interpretarere, nisi ut ita per litteras humaniores melius eos ac facilius ad Christianam doctrinam præparares atque instrueres? Quo eodem ferè consilio non in humanioribus modò litteris; sed etiam in Græcâ philosophiâ usum Originem fuisse ferunt, ut, quos de discipulis suis excellenti optimoque ingenio esse animadvertebat, eos Geometriâ & Arithmeticâ, aliisque hujusmodi disciplinis eruditos, in Philosophiam, atque in varias philosophorum sectas introduceret; quos verò imbecilliori hebetiorique ingenio, eos plerosque omnes ad humaniorum litterarum studia excitaret atque adduceret, quippe qui solitus esset dicere, plurimum eos facultatis atque adjumenti ex liberalissimis illis atque honestissimis studiis ad libros divinos intelligendos esse relatueros. Facebant igitur, qui ex somnio illo Hieronymi studio illi Ciceronianæ eloquentiæ invidiam quærun, & ad humaniores litteras damandas, in quibus totâ ferè vitâ Hieronymus multis habitavit. Hieronymi ipsius auctoritate abutuntur: qui nec prorsus intelligunt, quorsum tandem illud, sive somnium, sive monitum in somnis divinum, spectaverit. Non enim quidem certè, quod

quod somnians Hieronymus promiserat, sese nunquam neque Ciceronem, neque alios quoscunque profanos libros amplius lecturum, id eò unquam ipse postea vigilans pertinere censuit, ut a Cicerone aliisque hujusmodi elegantioribus Latinioribusque scriptoribus in posterum lectitandis abstineret; sed ut, quam ex Cicerone eloquentiam Latinam, quam ex Comicis Latinis elegantiam, quam ex aliis Latinis Græcisque scriptoribus variam multiplicemque eruditionem subinde acquireret, totam ad Christianæ doctrinæ usum atque ornamentum conferret. Quis mihi igitur audeat humaniorem hanc litteraturam, veluti Christianæ rei perniciosam ac noxiam, aut certè valde admodum periculofam, objicere, quam Christianorum Patrum doctissimi & eruditissimi quique non perutilem modò, sed etiam sibi pernecessariam, ad res divinas tractandas existimarunt? Quis, inquam, Christianis hominibus ponere in crimine audeat politiores humanioresque disciplinas, quas rebus Christianis tantum præsidii, tantumque utilitatis, sive ad defendendum, sive ad impugnandum, asserre ipse accerrimus religionis Christianæ hostis, Julianus Cæsar judicavit, ut, quo erat ingenio acuto atque perspicaci ad Christianismum exturbandum, funditusque evertendum, nihil tam valere putaverit, quàm si liberalissima humaniorum litterarum & disciplinarum studia Christianis hominibus eriperet atque auferret. O cladem illam deplorandam Christianorum studiorum! o illam Christianæ Reipublicæ a Christo nato maximam & luctuosissimam calamitatem! O Juliani in Christianos immanissimam, o teterrimam, o maximè omnium barbar-

barbaram crudelitatem, cum Christianis ille hominibus liberalibus litterarum studiis interdicebat? Quos tu mihi Neronēs, quos Domitianos, quos Decios, quos Diocletianos & Maximianos, quos mihi decem aliosve complures, hostes sāvissimos; impiosque insectatores Christianorum commemoras? quæ mihi crudelitatis in Christianos monstra, quæ feritatis atque immanitatis portenta, quæ superioris memoriæ teterrima sāvitiæ barbariæque exempla ob oculos ponis? quas mihi narras carnificinas, quæ genera pœnarum ac suppliciorum, ingeniosissimè in Christianos excogitata ac constituta, eisque miserrimè atque atrocissimè ubique locorum ac gentium inflicta? cum Christiani, hoc uno soloque Christianitatis nomine, bonis omnibus rebusque suis spoliabantur, exilio mulctabantur, relegabantur, deportabantur, uno aliquo membrorum mutilabantur, ad metalla & bestias damnabantur, vinculis & verberibus, omnique supplicio excruciatī necabantur, ferinis pellibus contecti a canibus dilaniabantur, crucibus affigebantur, igni cremabantur, atque, ubi dies defecisset, ad luminis nocturni usum urebantur. Hæc & alia superiorum Cæsarum in Christianos exempla atrocissima crudelitatis Julianus (quis credat, auditores?) Julianus, ille, inquam, Julianus, qui Christiano sese sanguini parcere velle præ se ferebat, interdicto Christianis bonarum litterarum usu, longissimè superavit. Illi enim sāvitiā in Christianorum corpora adhibuerunt, Julianus in animos Christianorum. Illi vitam Christianis eripuerunt, Julianus Christianis doctrinam atque sapientiam. Illi mori Christianos vo-

A a

luerunt.

luerunt, Julianus rudes Christianos bonarumque litterarum ignaros vivere. Quòd si multò pejus, multòque atrocius atque miserabilius sapientissimis viris visum fuit rudem vitam atque incultam in infantia, summâque omnium bonarum artium ignorantie, pecudum instar, transigere, quàm gloriosam mortem atque illustrem pro veritate & religione occumbere, quis unquam dubitet, quod minimè dubitandum duxit Augustinus, Julianum sævissimis jam & crudelissimis Christianorum hostibus accensere, eique etiam in insectandis persequendisque Christianis primas inter omnes Cæsares immanitatis partes vindicare, qui hominibus Christianis gloriosas illas præclarasque mortes, quas mirâ animi alacritate oppetere antea consueverant, malitiosissimè inviderit, eosque optimarum artium rudes & imperitos, interdictis earum artium studiis, esse jussit? cujus quidem factum illi ipsi summi laudum Juliani fautores, acresque inimici Christianorum, tam ferum, tam barbarum, tam immane, tamque omnis rationis & humanitatis expers judicarunt, ut oblivione illud sempiternâ obruendum existimaverint. Neque verò mihi hîc disputandum, auditores, quod docti ac diligentes Christianarum antiquitatum investigatores curiosius fusiùsque anquirunt, utrum Christianos Julianus humaniores litteras docere, an verò discere vetuerit. Nam Christiani quidem scriptores, plerique omnes affirmant, Julianum Christianos a bonis litteris ediscendis prohibuisse: quum tamen ex ipso eodem Juliano manifestissimum ac perspectissimum sit, quod disertè alicubi Augustinus testatur, edicto cum suo Christianos a liberali-

ralibus artibus humanioribusque disciplinis edocendis arcuisse. Qua de controversia dico ego quàm brevissimè, ridiculè eos & imprudenter facere, qui a primo illo Juliani ferali in Christianos edicto alterum sibi ejus edictum excogitant, de quo neque Ammianus, neque Hieronymus, neque Ambrosius, neque Orosius, neque alter veterum quisquam quidquam sciverit; atque adeò edictum illud unum ac solum Juliani ad Christianos duntaxat magistros, qui politiores Græcorum libros in scholis prælegere, liberalioresque litteras profiteri prohiberentur, nominatim pertinuisse. Sed, quum qui de magistris superstitioni atque impietati Græcorum addicti erant, summis ii ad cælum laudibus deos suos extollerent, atque ad eorum deorum cultum auditores suos omni verborum atque eloquentiæ lenocinio allicere conarentur, quis non intelligeret, quod probè tunc rectèque Christiani, posteaque, ex communi, neque obscuro, Christianorum sensu, Augustinus, intellexerunt, amotis a docendi munere Christianis magistris, eadem simul operâ ab humanioribus litteris ediscendis prohibitos quoque esse adolescentes Christianos, quibus per sacrosancta religionis suæ jura minimè omnium fas erat ad eos unquam ludos accedere, in quibus a superstitionis & impiis magistris superstizioso atque impio deorum cultu imbuerentur? Quæ vero tunc, Deus bone! ab edicto illo Juliani, vetitis atque interdictis humaniorum litterarum, liberaliumque artium studiis, Christianæ passim reipublicæ perturbatio? quum Christiani tunc homines erepta sibi arma esse cernerent, quibus, ut antea, sua defenderent, alie-

na expugnarent : Quid enim tunc reliqui Christianis erat, subsidio jam atque ornamento spoliatis optimarum disciplinarum ? Itaque, re Christianâ ad incitas propemodum redactâ, tum demum Christianorum patientia, quæ invicta sanè usque ad illud tempus perstitit, quæque nullis unquam difficultatibus, nullisque doloribus atque suppliciis, ne ipsâ quidem morte, vinci ac superari posse videbatur ; tum demum, inquam, victa ac superata est patientia Christianorum, cum tandem aliquando Christiani, Juliano Cæsari minimè cedendum rati, pro litteris ac litterarum studiis tuendis atque servandis, tamquam pro aris & focis, pugnare contra Julianum aperto Marte cœperunt ; atque in primis contra eum in aciem processerunt viri fortissimi, atque ab omnibus humanæ sapientiæ variæque eruditionis armis paratissimi, Gregorius Nazianzenus, Basilus, uterque Apollinaris. De quibus Basilus quantum in liberalissimis omnibus doctrinis, atque in eloquentiâ excelluerit, ipse perquam valde miratus est summus & Theologus & orator Gregorius Nazianzenus. Gregorii verò & utriusque Apollinaris maxima atque immortalia in litteras humaniores, atque adèò in Christianam rempublicam, promerita quis fatis pro dignitate commendet ? aut quis etiam verbis quomodocunque complectatur atque exprimat ? qui ut periclitanti Christianæ eruditioni opitulentur, ad libros tandem varii generis, variæque elegantiae conscribendos, atque ad carmina componenda, semet applicaverunt, quæ Christiani quique magistri, ad liberaliorem Christianorum puerorum culturam, in scholis prælegerent, suisque audi-



auditoribus in styli variæque eruditionis exemplum proponerent. Nam quid ego hic dicam de Gregorii Nazianzeni carminibus, in quibus, tanquam in speculo, & ejus vitam, & variam ejus omnique generis doctrinam possis palam intueri? Quid de dialogis Apollinaris junioris, in quibus secutus ille est exemplum Platonis? quibus ille dialogis, ut in dicendo valde erat exercitatus, universam factorum dictorumque admirabilium Christi, reliquamque sacram historiam, & quæ principes Christi sectatores, homines oppido quàm divini planèque admirandi, scriptis suis consignaverant, mirè est executus. Quid de Apollinari illo majori, homine Syro, viro utique doctissimo, & omni genere disciplinarum, totiusque veteris historię cognitione ornatissimo, qui artem quoque Grammaticam in Christianorum usum redegit; tantâ autem faciendorum versuum copiâ ac facilitate fuisse traditur, ut antiquam humani generis Hebræorumque historiam ab orbe condito usque ad Saulis regis tempora, ad Homeri exemplum, versibus heroicis, quatuor & viginti libris, iisque singulis Græcæ literæ nomine inscriptis, complexus fuerit; reliqua verò divinorum librorum argumenta vario carminum genere exposuerit, atque etiam Tragoedias ad imitationem Euripidis, Comœdias ad æmulationem Menandri, carmina Lyrica ad exemplum Pindari, conscripserit, tantâ porro elegantia proprietateque atque ubertate sermonis, ut unus ille Apollinaris ad præfatas illas Græcorum Poëtarum laudes propius accessisset, immo & eas laudes, in quocunque tandem scribendi genere veterum singuli excelluissent, penitus

exæquasse videretur? Atque hic ipse est Apollinaris, qui scripto contra Julianum, Græcosque philosophos De Veritate libro, nullo prorsus testimonio ex divinis voluminibus adhibito, ex ipsâ Græcâ philosophiâ, atque ex ipsis Græcorum litteris ac doctrinis, eorum de diis sententiam acerrimè atque acutissimè confutavit. Quid de aliis dicam, viris sapientissimis, & litterarum & antiquitatis bene peritis, còque ad Christianæ Theologiæ usum peritioribus, quò iisdem versatioribus in universo orbe humanarum disciplinarum? Dies me deficiat, auditores, si eorum plenè laudes persequi, aut nomina etiam commemorare duntaxat velim, qui, Christianorum litteraturâ in summum periculum ac discrimen adductâ, pro eâ cum Juliano, seu singulâri prælio, seu integrâ iustâque acie, tanquam pro sacris, decernendum sibi esse censuerunt. Tanti, auditores, Christianæ reipublicæ fuit, liberalissima atque optima humanarum artium & disciplinarum studia protegere ac tueri. Neque enim, quod Græcis atque barbaris, id Christianis unquam sibi timendum erat, ut nequid damni ipsa eorumdem religio liberalibus Græcorum disciplinis faceret, neve inde arma ad religionem convincendam, aut certè debilitandam, suppeditarentur. Fuerit hic metus Juliani, fuerit Græcorum, fuerit hominum superstitiosorum atque etiam barbarorum, quorum planè religio vana est, abhorrensque a veritate. Christianorum est semperque fuit, liberales quasque disciplinas ultro amplexari ac fovere, easque ad omnes nationes & gentes longè latèque propagare atque anaplicare: a quibus disciplinis tantum abest,

abest, ut Christiana religio quidquam incommodi ac detrimenti accipiat, ut ex iis magis ea magisque confirmetur atque illustretur. Neque enim quidquam, mehercule est, auditores, conjunctius veritati, quam ipsa eadem veritas. Ergo, quum religione Christianâ nihil unquam verius certiusve esse possit, quæ a deo profecta est, fonte uberrimo totius veritatis, quis non planè perspiciat ultroque fateatur, humaniores disciplinas, quæ omnes veritate quàm maximè nituntur, dissentire nullo modo posse a religione Christianâ; sed ei quàm intimè consociatas esse oportere, eique, tanquam ministras quasdam dominæ suæ, subservire ac famulari? Quod & ipsum in causâ fuisse intelligimus, quamobrem summi quique olim Theologi, & sapientissimi atque elegantissimi librorum divinarum interpretes, omne, quod a rerum divinarum meditatione tempus supererat, in litterarum studiis, atque in bonis Græcorum artibus & disciplinis ad summam usque senectutem contriverint: ut veritates nimirum Christianas externis quoque illis humanarum doctrinarum veluti adminiculis apertius stabilirent, ac confirmarent, atque ut ex Græcorum doctrinis Græcorum ipsorum errores fortius atque illustrius refellerent. Quotusquisque autem vestrum est, auditores, cui vel in innumerabili veterum exemplorum copiâ non in mentem præ ceteris veniat Didymi illius Alexandrini, hominis, si quis alius, & rerum divinarum maximè intelligentis, & rerum humanarum scientiâ eruditissimi? quem, tametsi oculis jam inde a puero captum, tamen ferunt & Poëticam, & Arithmeticam, & Geometriam & Astronomiam, & Ari-

Aristotelis syllogismos, & eloquentiam Platonis, audiendo didicisse, quibus ille, veluti veritatis armis, ad convincendum mendacium uteretur. Quòd si in sequiora etiam tempora intuemur, cum omnes bonæ artes liberalissimæque disciplinæ, quæ tantâ quondam celebritate atque gloriâ apud Græcos & Romanos floruerant, in Gothicam quandam rusticitatem atque barbariem a pristina illâ elegantia degenerasse penitus videbantur, quem mihi dabis Thomam Aquinate in omni philosophiæ parte, atque in omni doctrinarum genere, versatorem? qui ut ab orationis elegantia atque ornatu, pro temporum illorum barbarie, longè abfuerit; tamen quid in eo unquam ad summam consummatamque omnium rerum maximarum scientiam desideres? qui vel unus documento esse potest, quid & quantum ad religionem Christianam muniendam atque corroborandam valeat philosophia; quum, quidquid unquam vel philosophi a Christiano penitus nomine alieni, vel per-versi de Christianis hominibus malique opinatores, ad Christianam veritatem corrumpendam vel adulterandam, ingeniosè comminiscuntur, id omne Thomæ unius dialecticâ, petitisque ex Thomæ armentario argumentis, facillè dissolvatur. Quem etiam Thomam quis non miretur ingenio & doctrinâ tantum potuisse, ut, tametsi Græcè ferè nesciebat, tamen Latinis qualibuscunque commentariis adjutus, Aristotelem, philosophum illum quidem maximum, sed & eundem, maximè fortasse omnium philosophorum, veræ & sanctæ in Deum religionis hostem atque inimicum, Christianum, quod ajunt, prope-modum fecerit, certè quidem, præ ceteris aliis philosopho-

lofophis , atque etiam præ Platone , viro omnium philofophorum fapientiffimo , & rebus fæpe noftris concordiffimo , Chriftianæ veritati militare coëgerit . Nec enim jam in Icholis Chriftianis , nifi ex Aritotele , principe & auctore Thomâ illo Aquinate , pleraque religionis noftræ , eaque fuma & graviffima capita , explicantur . Adeo verum eit , quod ego hætenus demonftravi , humanas qualque difciplinæ arma Chriftianæ religioni aptiffima & præfentiffima copiofiffimè fuggere atque fubminiftrare , quibus ipfa jam religio vaniffimam Græcorum omniumque aliarum gentium fuperftitionem atque impietatem debellet , externaque , quam vocant , philofophiâ expugnata ac devictâ , iuftiffimum ex eâ triumphum agat , & præftantiffimos quofque atque celebratiffimos Græcorum philofophos , viroſque totius antiquitatis fapientiffimos , veluti captivos , ante currum ducat . Quæ quum ita fefe habeant , quis non fummis ſibi laudibus efferendos atque ornandos putet , veluti de religione Chriftianâ optimè promeritos , principes quofque Chriftianæ rei publicæ viros , qui , fequioribus jam rudioribusque temporibus , cùm inclinari ferè litteratura , atque ad barbariem deſcendere cœpta eſſet , Chriftianæ fefe religioni commodè ſatis conſulturos atque proſpecturos eſſe duxerunt , ſi veluti munitiffima quædam veritatis Chriftianæ propugnacula , erroribus & inſcitæ Academiæ Chriftianas opponerent atque obijcerent : quibus in Academiis non divinarum modò , ſed etiam humanarum rerum ſcientia , in omni genere doctriinarum artiumque liberaliffimarum , uberimè traderetur . Quis autem primas huius inſtituti

B b

lau-


laudes non ipsis Romanis Pontificibus, summis rei Christianæ moderatoribus ac magistris, impertientas censeat, qui, ut provinciam sibi divinitus demandatam substant religionis tuendæ atque interpretandæ, ita muneris semper sui esse exultarunt, ut seminaria hæc totius & divinæ & humanæ eruditionis atque sapientiæ, Academias Christianas pulcherrimis sanctissimisque legibus munirent, foverent, protegerent, omnibusque honoribus atque ornamentis cumularent atque augerent? Itaque, quantum studii atque operæ Julianus Cæsar, desertor ille & transfuga Christianæ religionis, in eo posuit, ut litteras ac doctrinas, ad religionem Christianam seu infirmendam, seu delendam, Christianis hominibus auferret, tantum industriæ ac diligentiae, Christiani in primis Pontifices Maximi, deinde optimi quique reges Christiani, in id contulerunt, ut ad religionem Christianam qua defendendam, qua confirmandam atque amplificandam, liberalissima quæque doctrinarum studia, atque adeo has ipsas Christianas Academias, omnibus beneficiis ac decretis ornarent, omnibusque amoris singularisque benevolentiae argumentis complecterentur. Quo quidem loci quomodo ego te silentio præteream, & non omni potius laude concelebrem, Franciscæ III. Lotharinge, Magne Dux Etruriæ, idemque Rex Hierosolymorum, sapientissime, iustissime, atque invictissime, pro tot ac tantis, tamque singularibus & eximiis tuis erga Pisanam hanc Academiam meritis? cujus quidem patrocinio divinæque erga litteras beneficentiæ tantum honoris ac dignitatis nostræ huic Academiæ accessit, ut ea plurimarum toto  
Chri-

Christiano orbe Academiarum princeps, nulli certè alteri cuiquam vel celeberrimarum Academiarum, secunda esse videatur. O Academia Pisana! O sedes ac domicilium certum elegantioris doctrinæ! o liberalissimorum studiorum mater sanctissima! o parens educatrixque optima bonarum omnium artium atque disciplinarum! Gratulor ego tibi de dignitate ac felicitate tuâ: gratulor de tuo isto tam excellenti bono: gratulor de hac istâ tuâ tantâ, tamque beatâ copîâ omnium doctrinarum: quæ tanta est profectò, ut, quanvis magnam nuper jacturam feceris, extinctis clarissimis duobus veluti luminibus, altero Mathematicarum disciplinarum, altero philosophiæ; tamen propter maximam ubertatem tuam, tuamque præclarissimam optimorum studiorum institutionem atque disciplinam, nusquam alibi literæ neque fortius neque felicius Christianæ religioni militare posse videantur. Redit nunc tandem oratio mea ad vos, a quibus potissimum cœpta est, optimi adolescentes, bonarumque omnium artium atque disciplinarum studiosissimi. Nam si nihil in rebus humanis præstantius diviniusque est religione, si nihil homini ad salutem atque felicitatem utilius commodiusque est religione, si nihil vobis charius atque antiquius neque est, neque esse debet religione, videte etiam atque etiam, adolescentes, quanti vos litterarum studia facere oporteat, quæ tantopere profunt religioni.





SENATUI . POPULOQUE . PISANO  
 VETERI . ARMORUM  
 AC . LITTERARUM . GLORIA  
 IMPERIO . OLIM  
 IN . EUROPA . ASIA . AFRICA . COMPARATO  
 RE . CHRISTIANA  
 QUOQUOVERSUS . AMPLIFICATA  
 JURIS . CIVILIS  
 OMNIUMQUE . DOCTRINARUM . STUDIO  
 R E S T I T U T O  
 ACADEMIA . UNIVERSAE . SAPIENTIAE  
 FUNDATA  
 LITTERIS . PROPAGATIS  
 PRINCIPI . QUONDAM . POPULORUM  
 E T R U R I A E  
 NUNC . VERO . SUB . AEQUISSIMO  
 F R A N C I S C I I  
 CAES . AUGUSTI . IMPERIO  
 AUCTA . URBIS . PISANAE  
 QUA . MILITARI . QUA . CIVILI . DIGNITATE  
 VETERIS . ILLIUS . GLORIAE  
 STUDIOSSIMO  
 PRO . ANTIQUIS . EJUS  
 IN . ACADEMIAM . PISANAM  
 OMNEMQUE . DOCTRINAM . PROMERITIS  
 ALEXANDER . POLITUS  
 ORATIONEM . HANC . SUAM  
 DE . ACADEMIAE . PISANAE . LAUDIBUS  
 P A N E G Y R I C A M  
 A . SESE . DICTAM . ANNO . MDCCXLIII.  
 . AD . GLORIAM . PISANI . NOMINIS  
 SEMPITERNAM  
 L . M . Q . D . D . D .



# ALEXANDRI<sup>199</sup> POLITI

DE CL. REG. SCHOLARUM PIARUM



O. R A T I O   D E C I M A .

*De Laudibus Academia Pisana.*



Uemadmodum in rebus humanis nihil prorsus nobis laudabilius esse videtur eruditione atque doctrinâ, ita mirari minimè omnium debemus, Viri Excellentissimi, Auditores humanissimi, si, qui verba huc usque vobis ex hoc ornatissimo ad dicendum loco de doctrinâ & eruditione fecerunt, maximis semper laudibus liberales quasque disciplinas, tum singulas, tum universas, celebraverint. Ut quisque enim doctissimorum virorum docendî hîc muneri admoveatur, statim eam, quam ex omnibus unam facultatem est professurus, amplissimis verbis collaudat, itaque collaudat, ut eam ceteris omnibus longè anteponeere velle videatur. Orator verò, qui nullo certo definitoque scientiæ genere restringitur; sed, quidquid unquam sciri potest atque oratione explicari, id omne pro munere suo

suo profitetur, solemnī hoc & legitimo die, quo annuum doctrinarum omnium curriculum ingredimur, universas doctrinas summis ad cælum præconiis efferat, oportet, earumque præstantiam atque utilitatem studiosis litterarum adolescentibus patefaciat. Illud verò mirandum, si, quum plerique omnes optimas disciplinas mirificè extollant; tamen, qui harum omnium disciplinarum matrem ac magistrā, studiorumque nostrorum altricem, Academiam hanc Pisanam, proprio peculiarique argumento, institutāque ad id ipsum oratione, ab hoc loco commendaret, vix adhuc inventus sit unus. Quod tamen inde profectum existimo, quòd tanta sit Academiæ Pisanæ apud omnes gentes claritas atque gloria, nemo ut quisquam ullis eloquentiæ atque orationis luminibus sese eam illustrare posse speraverit. Neque verò tantum mihi arrogo, ut verbis meis aliquid me splendoris Academiæ huic nobilissimæ asferre posse confidam, quod esset hominis maximè insolentis ac superbi; sed quia, quæ in nobis insunt, insignia atque ornamenta doctrinæ, Academiæ omnia Pisanæ accepta referre debemus, ut grati animi qualecunque officium huic nostræ Academiæ persolvam, quod bonum ac faustum fortunatumque sit, decrevi ego, hodierno die, Auditores, Academiæ Pisanæ laudes Panegyricas dicere. Quòd si illud sibi acroama valde admodum placitum Themistocles respondit, quòd esset de virtutibus suis, cur non ego certissimè sperem, Auditores, æquis vos libentibusque auribus orationem meam de Academiæ Pisanæ laudibus esse excepturos, quæ quidem laudes cum laudibus vestris consociatæ in primis sunt, & conjunctæ?

Quæ

Quæ verò laudibus Academiæ Pisanae par unquam possit oratio inveniri? Nam quæ potest unquam esse, aut alicubi etiam excogitari liberalissimarum, quarumque artium, atque disciplinarum Academia, cujus non omnes simul cumprimis laudes in Academiam hanc Pisanam verissimè atque apertissimè conveniant? Laus illa a primo celebratissimæ cujusque & florentissimæ Academiæ est, ut loco sit ad litterarum studia maximè opportuno atque accommodato. Quis autem totâ Etruriâ, quid dico, Etruriâ? totâ ferè Italiâ locus ad hæc litterarum studia persequenda opportunior atque accommodatior Pisis? Video jam ipso statim orationis meæ limine, cùm in Academiæ Pisanae laudes ingredior, urbem se mihi ipsam Pisanam commodum collaudandam dedisse, nec posse me tot illa ac tanta alterius decora atque ornamenta explicare, nisi eâdem simul operâ alterius quoque laudes concelebrem. Non dicam nunc de Pisis, quod aliàs sum ego ex hoc ipso amplissimo loco fusiùs & uberius demonstraturus, eam olim urbem, armis potentissimam, atque Etruriæ facilè principem, maria & insulas regionesque continentes famâ nominis sui longè latèque implevisse, innumerales hostium classes devicisse, Corsicam ac Sardiniam, insulasque Baleares occupasse, Carthaginem cepisse, Panormum Saracenis, aliquot Græco Imperatori insulas ademisse, Neapolim & vicina ibi oppida multa præsidio tenuisse, maximas sæpe classes ædificasse, imperium sibi in Europâ, Asiâ atque Africâ comparasse. Hæc & complura alia omittam de bellis a populo Pisano fortissimè gestis, victoriisque clarissimis reportatis: ex quibus, tanquam in luce

meridianâ, perspectum planè cuique sit, & exploratum, Pisanos olim re bellicâ, & maritimis terretribusque copiis, & expeditionibus, ceteris omnibus Etruriæ populis longissimè præstitisse. Nec etiam commemorabo, Auditores; quæ, post rem Pisanam fractam ac debilitatam, Magni Etruriæ Duces Medicei, ad memoriam pristinæ Pisanorum virtutis sempiternam, instituto hic Pisis nobilissimo & amplissimo equitum fortissimorum ordine, extare in hac urbe non vestigia modò, sed etiam insignia antiquæ Pisanorum fortitudinis bellicæ voluerunt. Illud unum dicam nunc de Pisis, ac palam prædicabo, nullam aliam urbem Etruriæ, æquè ut Pisæ, utriusque simul Minervæ, armatæ pariter atque litteratæ studia, consecratam fuisse, itaque cives Pisanos præ reliquis omnibus Etruriæ populis in rem bellicam incubuisse, ut simul etiam præ reliquâ universâ Etruriâ bonas litteras artesque liberalissimas foverint, auxerint, amplificaverint; atque adeo ab hoc veluti fonte, ab hac ipsâ urbe Pifarum, optimarum quarunque disciplinarum, & juris cumprimis civilis, studia in reliquam latè Italiam, immo verò & Europam, profluxisse. Clarissimis superiorum temporum monumentis proditum est, Pisanos in bello contra Rogerium, regem Siciliæ, initâ cum Lothario secundo Imperatore armorum societate, classeeque sex & quadraginta triremium instructâ, urbem Amalphim adortos, eam urbem primo impetu expugnasse, ac diripiisse, atque ex omni opimâ opulentissimæ & beatissimæ urbis prædâ unum illud ac solum Pandectarum Justinianæarum volumen, quod ibi archetypum jam inde ab antiquissimis temporibus habebatur,

tur, permagnæ mercedis loco, sibi petiisse ac reservasse, illudque perinsigne ad posteros victoriæ illius monumentum Pisas tulisse, ibique, veluti quoddam palladium, e cælo delapsum, in thesauro suo reposuisse, & quàm diligentissimè, veluti rem multò omnium pretiosissimam, custodisse; indeque, e libro illo Pandectarum Pisanarum descriptis jam legibus, duce atque auctore Irnerio, percelebri illo legum Romanarum interprete, jus civile in Bononiensem primùm Academiam permeasse; & hanc primam post Justiniani tempora renati apud nos juris civilis originem ab urbe Pisanarum fuisse. An ne verò unquam putetis, Auditores, tanto libri unius amore homines Pisanos affici potuisse, ut præ illo immensam vim prædæ ac manubiarum, & locupletissimæ urbis divitias contempserint, eoque sese libro, tanquam præmio omnium amplissimo atque uberrimo, pro bello periculosissimo, maximisque in illud bellum impensis, valde remuneratos professi fuerint, nisi incredibili doctrinarum studio exarsissent? Quo de facto Pisanorum quum plura ego, pro rei ipsius magnitudine, velim dicere, ea me statim admiratio, atque is veluti stupor percellit, ut posse me perinde dicere, atque sentio, penitus desperem. Jam tum nimirum Pisani, quo in bonas litteras studio, singulari atque eximio, ferebantur, conceperant animo atque adumbraverant, quod ducentos post annos, anno demum a Christo nato millesimo & trecentesimo, octavoque supra trigesimum, perfecerunt, ut stabilem hic Pisis ac fixam sedem jurisprudentiæ, omnibusque bonis artibus omnique sapientiæ, Academiâ hac celeberrimâ consti-

tutâ, ponerent ac dedicarent. Jam verò quid dicam, quàm largè ac liberaliter cum hac suâ Academiâ civēs Pisani egerint, qui in bello illo Neapolitano in unum ac solum legum civilium volumen maximos labores, totiusque belli difficillimi sumptus profusissimè impenderant? Immunitates ac munera Academicis data commemorem? quum Pisani de publicâ pecuniâ impensas in Academiam hanc suam alendam ac sustentandam quàm liberalissimè fecerint? Doctissimos huc viros frequentes convenisse referam? quum Pisani iis, qui divinas humanasque hîc doctrinas profiterentur ac docerent, amplissima & lautissima stipendia constituerint? Studiosos litterarum, adolescentes permagnâ hîc frequentâ versatos enarrem? quum Pisani omnem iis studiorum liberalissimorum commoditatem munificè tribuerint? Uberriam hîc bonorum librorum copiam fuisse prædicem? quum Pisani libros in urbem suam, vel mercimonii tantum causâ, importatos, vectigalibus prorsus liberaverint? Quæ alia unquam civitas, quis unquam alius Etruriæ populus, vel ipse ille populus, qui gloriæ & dignitatis Pisanorum æmulus in primis esse videbatur, & de Etruriæ principatu cum Pisanis certabat, ad eam aliquando laudem assurrexit, aut assurgere etiam potuit, quæ propria semper laus fuit Pisanorum, ut præ doctrinarum amore pecuniâs, redditusque ærarios negligeret, atque a vectigalibus, quos nervos esse reipublicæ nemo quisquam ignorat, doctrinæ augendæ atque amplificandæ causâ, ullâ ex parte abstinere? Nihil igitur commodorum atque opportunitatum huic Academiæ Pisanz ad doctrinæ & ingeniorum diligentem culturam defuisse un-



unquam demonstrem? quum Pisani optima quæque litterarum studia suis semper commodis & rationibus prætulerint? Nam de cæli quidem Pisani salubritate, ubertate agri, annonæ fertilitate, incredibili rerum omnium ad vitam necessariarum copiâ, quid attinet dicere? quæ tamen omnia mirum, quantum, apud omnes gentes decoris & laudis Academiæ Pisaniæ concilient: quando hæc ipsa ferè tibi, Clemens Sexte, Pontifex Maxime, rerum atque ingeniorum æstimator justissime, summeque litterarum patrone, in causâ potissimum fuerunt, ut Academiam hanc Pisanam, pro doctrinarum omnium, quæ in eâ docerentur, universitate, auctoritate tua munires atque corroborares. Atque hæc tibi propria maximè sunt, urbs nobilissima Pisarum, quæ nemo quisquam abs te abstrahat unquam atque avellat. Abstrahi e sinu gremioque tuo, e sacrario cimeliarchioque tuo transferri Florentiam potuit sacrosanctum illud volumen Pandectarum tuarum. Pandectæ illæ tuæ, urbs præclarissima, abalienari abs te, & quæ veteri proprioque jure Pisaniæ erant, transire in Florentinas potuerunt. Academia hæc tua traduci transmittique aliò nullo modo potuit. Cur, Auditores? quia ea, quibus Academia Pisana efflorescit ac viget, clementia & salubritas aëris, agrorum ubertas, terrarum ac marium opportunitas, beata rerum omnium copia, demigrare hinc aliòque absportari minimè omnium poterunt. Tanta hæc tamque eximia, ac propria Academiæ Pisaniæ felicitas bene vobis cognita ac perspecta erat, summi Florentinorum procures, iidemque principes Etruriæ, viri prudentissimi & sapientissimi, qui, post amissam a Pisaniis liber-

libertatem, jacentem atque afflictam Academiam Pisanam, pro summo vestro erga bonas litteras studio, erigendam vobis atque in pristinam amplitudinem, & gloriam restituendam existimastis. Nec verò tibi, Laurenti Medices, Cosmi illius majoris, avi tui, maxime æmulator, satis fuit litterarum gloriæ atque incremento apud Florentinos tuos consuluisse ac prospexisse, virosque maximè litteratos Florentiæ fovisse, summisque beneficiis ornasse, sed quòd nulla alia Academia commodiori loco, aère salubriori, majori ad altiora quæque doctrinarum studia opportunitate esset, quàm Academia Pisana, ut Etruscarum litterarum linguæque Etruscæ, ex omnibus Etruriæ populis, principatum penes Florentinos esse voluisti, ita universæ sapientiæ, omniumque doctrinarum penes Pisanos. Fructus certè liberalitatis tuæ, tuique amoris litterarum fuit, ut, re Pisanorum publicâ oppressâ a Florentinis, ac prope modum extinctâ, intermortuam pene apud eos sapientiam recreares, atque instaurares, annoque demum a Pisana Academiâ fundatâ centesimo ferè & quinquagesimo, hæc Sapientiæ Pisanae gymnasia, hoc est, veræ sapientiæ domicilium ac sedem, a fundamentis erigeres, eoque perillustres doctrinâ atque eruditione viros ad omnes liberales artes profirendas amplissimis præmiis excitares. Hoc tibi, Cosme Medices, prime Magne Dux Etruriæ, hoc vobis, reliqui ex hac ipsâ Medicum familiâ Magni Duces Etruriæ, exemplum Laurentius Medices prævit, ut alter ex latifundio sanctiori Etruriæ certâ in singulos annos stabilique dote Academiam Pisanam locupletares: alteri hanc eandem Academiam benevolentia

tiâ vestrâ complecteremini, atque ex ærario etiam vestro augetis & promoveretis. His initiis ac fundamentis constitutâ Academiâ Pisânâ, hisque incrementis auctâ & confirmatâ, cogitate, Auditores, quò tandem fastigii atque celsitatis, his præsertim novissimis temporibus, summo jam Academiæ nostræ & beneficentissimo patrono, Francisco III. Lotharingo, Magno Etruriæ Duce, sese illa extulerit. Neque verò Academiam parietes faciunt, aut amoenitates & commoditates locorum; sed doctrinæ, quæ quotidie assidueque excoluntur; sed bonarum litterarum studia, quæ certatim in dies frequentantur; sed docti atque intelligentes viri, qui, tanquam in celebritate quadam nundinarum, nullum, non doctrinarum genus profitentur; sed discendi percupidi adolescentes, qui, ut reconditoris cujusque scientiæ atque eruditionis compotes fiant, omni studio enituntur; sed quotidiana atque accurata omnium honestissimarum disciplinarum, qua per magistros, qua per auditores, exercitatio. Age verò, quàm his quoque laudibus floret atque abundat Academia Pisana! Quid enim in universo orbe disciplinarum? quid in rebus divinis atque humanis? quid in cælo atque astris? quid in terris ac mari? quid in ceteris elementis? quid in herbis ac metallis? quid in immenso illo rerum Physicarum ac Mathematicarum circuitu? quid in toto morum humanorum genere? quid in homine, quem parvum veluti mundum esse dixerunt, cognosci unquam ac percipi potest, cujus scientiam, illamque perfectam atque exquisitam, Academia Pisana non abunde præstet atque profiteatur? aut quid alibi unquam est re-

con-

conditoris rariorisque eruditionis atque doctrinæ, quod non hîc simul sit omnibus obvium atque conspicuum? aut quæ singularia alibi & præclara, quæ non hîc simul omnia mirificè enitescant? Hîc specula ad cælum contemplandum, siderumque scientiam comparandam. Hîc hortus Medicus ad herbarum vires pernoscendas. Hîc Medicum Theatrum, ad corporis humani machinam minutâ partium singularum sectione ad minimas usque particulas explorandam. Hîc instructissima a libris optimis & copiosissima bibliotheca ad animum rerum omnium cognitione explendum atque exsaturandum. Hîc omnia affatim subsidia atque instrumenta omnium ad unam disciplinarum. Verè hîc regnat Justinianus, verè Hyppocrates: verè hîc in vobis, viri excellentissimi, cum Demosthene regnat Tullius, verè Euclides atque Archimedes, verè Plato atque Aristoteles, verè Ptolemæus. Quàm hîc etiam in divinarum litterarum interpretatione triumphat Hieronymus, in sacrâ historiâ Sulpitius, in arcanorum divinorum explicatione Augustinus, in Christianâ eloquentiâ Chrysostomus, in subtiliori veritatum divinarum disquisitione Thomas Aquinas. Parietes mediusfidius horum gymnasiorum loqui & ipsi res doctrinæ atque eruditionis videntur. Adeo hæc undique gymnasia divinæ humanæque sapientiæ assiduus & multiplicibus vocibus personant. Quòd si Marco olim Pisoni apud Marcum Tullium persuasum fuit, iis nos locis, in quibus memoriâ dignos viros multùm esse versatos acceperimus, magis moveri, quàm si quando eorum ipsorum aut facta audiamus, aut scriptum, aliquod legamus, quantum, Deus bone! inde etiam lau-

lau-

laudis Academiæ Pisanæ accrescit a summis illis & sapientissimis viris, quorum memoriâ necesse est ad omnem nos doctrinam commoveri, quum eos meminimus in hac urbe aut natos, aut doctrinæ & eruditionis causâ domicilium habuisse, & huc in hanc istam Academiam ventitasse, & in his porticibus inambulavisse, & in his gymnasiis docuisse, & ad hæc peristyla stetisse, & ex hoc ipso summæ auctoritatis loco, magnâ hominum frequentia, verba de doctrinis fecisse! Hic, exempli causâ, post has ædes a Laurentio Medice ædificatas, Philippum Decium de regulis juris disputasse: hîc, post has scholas a Cosmo Magno restitutas, Matthæum Curtium rem medicam summâ cum laude pertractasse: hîc Cyriacum Strozam Philosophiam Aristotelis, Hieronymum Mercurialem libros Hippocratis esse interpretatos: hîc Bulengerum litteras humaniores, hîc Galilæum Mathematica, professos fuisse: hîc innumerabiles alios doctissimos & eruditissimos viros magnâ se cum ingenii gloriâ, nostrâ etiam memoriâ, in omni genere doctrinarum exercuisse. Sed o illa etiam superiora, o prima illa tempora recentis adhuc Academiæ Pisanæ! O viros illos clarissimos, & memoriâ dignissimos sempiternâ, qui nascentem primi Academiam Pisanam doctrinæ suæ ubertate promoverunt, atque confirmarunt! O Bartolum, interpretum juris civilis facili principem, virum planè & doctissimum & prudentissimum, quem non semel ferunt, si qua juris dubitatio incidebat, Pandectas Pisanas, veluti oraculum, quoddam, consuluisse! O Baldum, discipulum Bartoli, virum & ipsum juris consultissimum, neque juris civilis scientiâ fortasse a Bartolo secundum! O cetera illa

D d

illa magna nomina jurisconsultorum, omnique alio doctrinarum genere excultissimorum virorum, qui Academiæ nomen Pisanæ, ipsis ejus primordiis, dederunt! Summos hos viros cum meminimus tantâ doctrinæ & ingenii famâ in hac urbe versatos, eademque, quæ nos, loca incoluisse, eundemque hunc Pisanum aërem duxisse ac respirasse, atque hîc vestigia, in quibus nos tutò insisteremus, posuisse, quantum ex superiori illâ memoriâ exemplorum nostrâ hæc nobis Academia suppeditat, ut in ejus præconiis, tanquam in immenso quodam & patentissimo ad laudationem campo, nostrâ excurrat ac propemodum exultet oratio? Nam & illis superioribus temporibus laus illa fuit Academiæ Pisanæ, ut Carolus Quartus Imperator, non rebus modò præclarè gestis, sed etiam scriptis suis atque eruditione clarissimus, optimarumque omnium litterarum non summus modo fautor, sed etiam amplificator, qui, pro singulari suâ erga Academiam Pisanam benevolentia, auctoritatis suæ præsidio munitam eam voluit, omnibusque honoribus atque ornamentis auxit, Carolus, inquam, Quartus Zenobium Stratensem, magnum pro illis temporibus & excellentem Poëtam, ingenti concursu hominum literatissimorum, & frequentissimâ totius civitatis Pisanæ celebritate, loco urbis maximè splendido atque conspicuo, suâ ipse manu tantus Imperator insigni laureâ redimiverit. Harum omnium laudum Academiæ Pisanæ venire nobis in mentem faciunt loca quæque urbis Pisanæ, cum ea nos loca intuemur, maximèque frequentamus, quibus in locis magni illi & clari viri, quos tantopere ab ingenio & doctrinâ admiramur, impressa eruditionis nobis suæ vestigia reliquerunt:

runt: quippe quum ea ipsa loca non modò nos virorum illorum memoriâ ad præclarissima eorum, & maxima exempla imitanda vehementer commoveant; sed etiam segetem in iisdem ipsis amplissimam & fecundissimam laudum Academiæ Pisanae nobis ante oculos ponere videantur. Neque tamen prorsus verum, quod tute, Marce Pilo, ajebas, magis nos locis, quàm scriptis magnorum virorum, moveri. Habent enim scripta, quòd nos doceant, & maximarum quarumque rerum scientiâ erudiant; ipsaque per sese magnorum illorum virorum, qui tantâ tamque uberi & fructuosâ doctrinâ libros suos resperferunt, hoc est, Academiæ Pisanae, laudes toto orbe terrarum loquuntur. Loca per se mutant, & vocis nostræ præconio ad laudes Academiæ Pisanae percelebrandas indigent. Quibus etiam laudibus illa accedit, quòd innumeri ex hac Scholâ Pisana, tanquam ex equo olim Trojano, heroës prodierunt. Latissimus hîc mihi laudum se campus aperiret, si persequi vellem oratione, non dico omnes (quis enim omnibus enumerandis sufficeret?) sed vel principes tantummodò doctrinæ atque eruditionis viros, qui Pisanae sapientiæ gloriam in omnes latè terras, ubi studia humanitatis vigerent, quoquo versus propagarunt, summos philosophos, summos jurisconsultos, summos rei medicæ auctores, summos mathematicos, summos litterarum divinarum interpretes, summos theologos, summos oratores: quippe qui tales prorsus, quales præceptores eorum erant, evaserint, summi in omni doctrinâ ac perfecti. Quid si commemoratos etiam vellem, quos ex hac Academia Pisana ad sacras quas-

que majoresque dignitates, atque ad amplissimos quosque pontificatus summa virtus & eruditio evexit? Sunt enim & hi permagno numero, & tales, ut Academiae Pisanae splendor ac dignitas elucere in iis quodammodo videatur. Atque id quidem valde mirandum, Auditores, si usquam alibi contigisset, tot nimirum ac tantos viros, tantâ homines doctrinâ, scriptisque editis tam illustres, ab unâ solâque Academiâ exire potuisse. Sed, cum oculos ad te converto, nobilissima Academicarum Pisana, atque hunc Etruscâ, immo & Italicâ juventutis, florem lectissimum contueor, atque ex nostris historiis & annalibus repeto, non ex Etruriâ modò, sed etiam ex totâ, quàm longè latèque patet, Italiâ, honestissimos ingeniosissimosque adolescentes, sapientiæ comparandæ causâ, huc in Academiam Pisanam omni tempore magno numero confluisse, videoque præterea, quo quantoque studio, quantâque ingeniorum contentione omnes hîc liberalissimæ disciplinæ pertractentur, & quàm crebris assiduisque exercitationibus hoc quotidie Athenæum exardescat, atque etiam confidero, non discipulos modò honestissimâ inter sese studiorum æmulatione contendere; sed ipsos etiam præceptores exemplo suo viam studiorum atque disciplinarum auditoribus suis præire, ipsosque inter sese magistros de doctrinis congregi, & de sapientiæ palmâ disputando acerrimè decertare; hæc, inquam, omnia cum animadverto, mecumque ipse diligenter reputo, Academia Pisana, & quæ nunc fiunt, facta hîc semper fuisse intelligo; desino jam mirari, si, quum conventus hic communis universæ doctrinæ ac sapientiæ celebretur, maxima



xima quoque hîc copia doctissimorum virorum & olim extiterit, & nunc etiam existat. Quid? quòd, stante ac florente Academiâ Pisânâ, nullum in Etruriâ damnum sentire posse litteræ videntur? Equidem id, quod futurum est, nemo quisquam præstare potest, nisi Deus. Sed, quantum ex præteritis rebus conjecturam licet facere de futuris, dico, quandiu Academia Pisana litterarum laudibus efflorescet, tamdiu in Etruriâ, atque adeo in reliquâ universâ Italiâ, optimas litteras artesque liberalissimas, tanquam in regno suo, dominaturas. Tantum elegantioris cujusque doctrinæ & eruditionis ab Academiâ Pisânâ in omnem longè latèque Italian, nedum Etruriam, redundat. Atque his quidem laudibus atque ornamentis eò jam magnitudinis & gloriæ Academia Pisana provecta est, ut, quæ laus olim propria Athenarum fuit, maximo semper honori habitum sit, Pisis aliquando in hac nostrâ Academiâ, studiorum liberalissimorum causâ, fuisse. Quòd si Pisis operam litteris navasse perhonorificum semper fuit, quanto honorificentius, Pisis hîc in Academiâ docuisse? Quem quidem honorem quum vobis, Patres ornatissimi, vestra virtus ac doctrina detulerit, quid jam miremur, si plerosque omnes ex omnibus locis non tam Academiæ hujus nostræ claritudo atque auctoritas, quàm sapientiæ vestræ atque eruditionis fama Pisas perducatur? Narrant vulgò de T. Livio, quosdam ad eum, famâ hominis permotos, ex ultimis Hispaniæ Galliarumque finibus venisse, ejus ut adspectu fruerentur. O exemplum totius antiquitatis maximè memorabile! o rem omnibus seculis inauditam, ut urbem tunc Romam ingressi, aliud extra urbem

urbem quærerent! Hoc verò ipsum, quod de Tito tunc Livio permirum visum fuit, ac penitus novum, quis nunc de vobis non miraretur, viri excellentissimi, nisi nominis ubique vestri amplitudo & claritas in usum propemodum quotidianum venire fecisset, ut, qui ubique gentium veræ solidæque eruditionis studio tenentur, sapientiæ vestræ splendore ac famâ excitati, Pisas ventitent, neque aliud iidem Pisas, percelebri urbe, variisque antiquitatis monumentis satis clarâ, quærant, nisi ut, quorum admiratione e longinquo afficiebantur, vos coram adspiciant, sapientiâ vestrâ præsentem perfruantur, ex ore vestro pendeant, vos alloquantur, in familiaritatem se vestram insinuent. Unde ipsi etiam faciliè intelligatis, in quantâ vos luce totius terrarum orbis versèmini. Fatendum enim verò, mihi sæpe contigisse, ut cum maximorum illorum virorum, qui scriptis suis ac doctrinis Academiam Pisanam superiori memoriâ mirificè illustrarunt, in mentem veniebat, ex illorum eorundem desiderio vehementer laborarem, nec desiderio illi diutius ferendo parem me esse posse existimarem. Adeo me virorum illorum doctrina atque eruditio in eorundem ipsorum libris ceperat. Sed, cum vos, viri excellentissimi, respiciebam, & quàm latè in omnibus terris doctrinæ vestræ fama percrebuisset; tacitus cogitabam, nihil jam esse causæ fatebar, cur summos illos & doctissimos superiorum temporum viros desiderarem, quorum vos sapientiam atque doctrinam non exæquassetis modò, sed etiam longo post vos intervallo reliquissetis. Videre enim in vobis jam mihi videor Aristoteles, Platonēs,

tones, Euclides, Archimedes, Ptolemæos, Hippocrates, Galenos, Papinianos, Hieronymos, Augustinos, Thomas Aquinates, Demosthenes, Tullios. Quidquid summorum & doctissimorum virorum antiquitas illa commemorat, id omne videtur mihi, cum vos attentius, Patres amplissimi, circumspicio, in hanc nostram Academiam commigrasse. Ita sanè est, Auditores. Plura enim ne de laudibus vestris dicam, modestia me vestra prohibet: & satis de laudibus vestris dixisse ego videri possum, si hanc nostram Academiam, unde ornamenta in primis nostra profiscuntur, si non pro dignitate, certè pro viribus meis, atque his præscripti temporis angustiis, laudaverim. Dixi de laudibus. Reliquum est, ut in fine orationis meæ compellem vos breviter atque alloquar, optimi adolescentes, & Academiæ hujus nostræ, hoc est, omnium bonarum artium atque eloquentiæ, studiosissimi. O vos beatos, & iterum ac sæpius beatos, si, quam omnis doctrinæ parentem atque altricem divinitus nacti estis, Academiam hanc Pisanam eâ, qua par est, sedulitate, ac diligentia excolatis! Videte enim, adolescentes, etiam atque etiam in tot ac tantis Pisaniæ Academiæ laudibus videte, ne, quod aliis laudi atque ornamento fuit, Pisis hîc fuisse, & in litterarum hîc studia incubuisse, id vobis probro ac dedecori futurum sit, in Pisanâ hac Academia fuisse, &, quam Franciscus III. Lotharingus, dominus noster clementissimus, pro regiâ suâ erga litteras litteratosque homines liberalitate, opportunitatem vobis studiorum maximam atque amplissimam fecit, minimè omnium arripuisse.



SENATUI . POPULOQUE . PISANO  
PANEGYRICUS  
AB . ALEXANDRO . POLITO  
CONSECRATUS ,

E c



219

# ALEXANDRI POLITI.

DE CL. REG. SCHOLARUM PIARUM



ORATIO UNDECIMA:

*De Laudibus Urbis Pisane.*



Quod in more institutoque majorum positum fuit, ut, qui doctrinarum studiis solemni hoc & legitimo die instaurandis verba ad vos faceret, Viri excellentissimi, Auditores ornatissimi, is præclara & splendida quæque dicendi argumenta confectaretur, quibus & litterarum excellentia atque magnitudo, quasi in quodam sapientiæ theatro, eluceret, & calcar adolescentibus ad hoc doctrinarum curriculum alacriter conficiendum admoveretur; id quum ego, pro munere & viribus meis, huc usque quotannis quàm diligentissimè exsequi conatus sum, undecima jam oratione sentio tandem, quod in summâ rerum dicendarum copiâ nunquam fore credideram, ingenium mihi meum atque eloquentiam penitus defecisse. Etsi enim in laudibus sapientiæ

E c 2

cele-

celebrandis nemini cuiquam deesse potest oratio, eaque est dignitas atque amplitudo sapientiæ, ut, quò majores laudes ejus accumules, eò etiam semper major atque uberior laudum tibi materia suboritur; tamen, in quamcunque me partem vertebam, nihil ferè occurrebat, quod summi & eloquentissimi viri non ingeniosissimè & doctissimè præocupassent, aut ego etiam de litterarum laudibus, pro loci hujus auctoritate, minimè explicassẽ. An verò aliorum ego, aut dicta etiam mea recquerem; cui, quod vos bene scitis, Auditores, jam inde ab initio propositum fuit, non vulgares quascunque & communes sapientiæ laudes persequi; sed, quæ nova magis, & præter consuetudinem argumenta esse videbantur, ea potissimum ad hodiernam celebritatem adhibere? Equidem & illud præclarum satis ac laudabile, post vestigia doctissimorum hominum ire, &, quæ alii de iisdem litterarum studiis sapienter scitèque disseruerunt, paullo attentius retractare. Sed, quando superiore anno oratio mea de laudibus Academiæ Pisanae visa minimè est vobis displicere, cur, quod facturum me tunc recepi, minimè nunc faciam, ut in civitatis Pisanae conspectu apud ipsam Academiam Pisanam Pisanae urbis laudes panegyricas dicam? Profectò id officii jure suo ab Academia Pisana, pro veteribus ac singularibus suis erga hanc Academiam promeritis, populus Pisanus reposcebat, qui & hanc Academiam fundasset, & omnibus jam pridem honoribus atque beneficiis cumulasset. Quò mihi magis lætandum sit, quod nemini alteri, id mihi divinitus obtigisse, ut, tametsi ingenio



nio & auctoritate longè omnium postremus, tamen de Oratoribus primus, quasi publico Academicæ Pisanæ nomine, debitum hoc jamdiu laudationis gratulationisque officium civibus Pisanis redam atque persolvam.

Quanquam quid miremur, Auditores, neminem quenquam de nostris hominibus, doctissimis certè illis, & eloquentissimis viris, existisse, qui ex hoc amplissimo & ornatissimo loco publicas de civitate Pisanâ laudes habuerit, quum ad res Pisanorum exornandas nemo unquam unus sufficere, se posse existimaverit? Neque verò ego, qui nullâ sum planè eloquentiâ, arrogantiam tantâ ac temeritate fuissèm, ut panegyricæ hujus orationis tantum mihi onus imponerem, nisi, quod Aristides votum laudandæ urbis Romæ, simile ego votum celebrandarum Pifarum, propter maxima hujus urbis in Academiam nostram beneficia, suscepissem. Quæ enim tanta ingenii atque eloquentiæ ubertas, ut universa possit civitatis Pisanæ ornamenta, non dicam amplificare dicendo, sed vel numerando recensere? Caput illud omnis laudationis, Pisas principatum quondam totius Etruriæ gessisse. Nam de antiquitate quidem quænam urbs Etruriæ cum Pisis contendat? quas multò ante tempora Trojana, immo & ante Etruscorum adventum, conditas, certi quidam, neque ignobiles scriptores tradiderunt. Quod ut alii in dubium revocaverint, tamen noli tu inde putare, urbem Pisas reliquis urbibus Etruscis minimè esse vetustiore; sed eâ esse urbem antiquitate, ut, quod urbium vetustissimis atque celebratissimis contigit, ejus origo in obscuro jaceat.

Anne

Anne verò Pisanæ inde urbis antiquitati tute maximè detrahendum putes, quòd in vetustos duodecim Etruriæ populos minimè omnium relati sunt Pisani? Sed enim perspicuè inde ostenditur, quod alii valde affirmant, Pisas multò ante fuisse, quàm ulla civitates Etruriæ, neque in Etruscorum, sed in Ligurum quondam censum, Pisas contributas: siquidem ferunt Pisas a Liguribus, aut certè in Liguriâ, ædificatas. Quòd si antiquitas Pifarum, cum Dionysio illo Halicarnassensi arcessenda a Pelasgis & Aboriginibus videtur, qui eam urbem ante Etruscos habuerint, aut, si ex communiori constantiorique veterum famâ, origo placet Pifarum clarius atque illustrior a Pisis illis Peloponnesiacis, unde & eadem Alpheæ ab Alpheo, amne Peloponnesiaco, Poëtis nostris cognominatæ, quàm nobilem atque celebrem jam inde a primordiis oportet hanc urbem evasisse? præsertim si eam Peloponnesii, sive temporibus Trojanis, quod quidam senserunt, sive, quod alii multò sanè probabilius, longè ante tempora Trojana, condiderint. Hac urbs antiquitate, hac nominis gloriâ & celebritate, nemo jam quisquam mirabitur, si posteaquam in Etrusci nominis societatem venit, Etruriæ totius primas obtinuerit, &, quod gentis universæ commune erat, proprium sibi nomen Etruscum fecerit. Nam, si Etrusci ante Romanum imperium plurimum mari potuerunt, si imperium maris tenuerunt, si mari Etrusco nomen dederunt, si Etrusci nominis famâ terras & maria repleverunt, quod veteribus abundè historiis est testatum, hoc ferè totum fuit Pisanorum, quorum nominis glo-

gloria in reliquam latè Etruriam est derivata. Itaque navales laudes pleræque omnes, quemadmodum antea a Pisani in Ligures, cum ii Liguribus accensebantur, profectæ erant; ita ex planè postea a Pisani ad Etruscos redundarunt, cum in Etruscum Pisani nomen transierunt. Magna quidem apud me, & in primis gravis auctoritas tua, Isocrates, tum alibi scriptionum tuarum, tum maximè in Panegyrico illo tuo de laudibus Athenarum. Quid enim, Deus bone! illo Panegyrico pulchrius atque elegantius? quid eloquentius simul ac sapientius? quid admirabilius ac divinius? quem panegyricum ajunt Isocratem, virum disertissimum, totos annos decem elaborasse. Multa cum ibi præclare Isocrates, tum illud præclarissimè, quòd Græciæ totius principatum ideo Atheniensibus deberi demonstrat, quia nulla alia urbs Græcorum terrestribus præliis tantum, quantum Athenæ navalibus, excelluit. Quis autem hinc non continuò clareque intelligat, urbem etiam Pisarum vetustissimis illis temporibus principem facile fuisse reliquarum urbium Etruriæ, quòd nulla alia urbs Etruriæ terrestri tantum bello, quantum Pisæ maritimo, valuerit? Qua de urbe Pisarum certa sunt & explorata testimonia, eam antiquitus urbem magnum sibi nomen a rei navalis copiâ, & præliis navalibus peperisse, quippe quæ virtute bellicâ urbibus longè Etruscis antecelluerit. Jam verò posterioribus etiam temporibus, post fortunam Etruscam everfam, vigente maximè & florente re Romanâ, quanta unquam apud Romanos, victores illos gentium humanarum, præ omnibus populis Etruriæ,

no-

nominis Pisani exultatio, cum Senatus Romanus  
 gratias Pisanis pro agro, quod Latina colonia de-  
 duceretur, agendas, triumvirosque ad eam rem  
 creando decrevit? Ita Pisæ, colonia facta est La-  
 tina, ita tamen, ut municipii etiam jure uteretur;  
 eademque sub Cæsare Augusto, Cajo, & Lucio  
 Cæsaribus, Augusti filiis, optimis hujus coloniae &  
 summis patronis, Colonia Obsequens Julia Pisana  
 nuncupata. Hæc Pisanorum sub Imperio Romano  
 fortuna. Quo postea Imperio labente atque incli-  
 nato, omni re Italarum miserè perditâ ac pertur-  
 batâ, tanquam si nomini Etrusco tenebræ & cali-  
 go offusa esset, ita secuta sunt tempora multò  
 obscuriora: donec tandem primis Etruscorum eri-  
 gentibus sese in libertatem, atque in melioris for-  
 tunæ spem, Pisanis pristina felicitas affulgere visa  
 est atque adspirare. Ingredior, Auditores, cam-  
 pum multò patentissimum ac propemodum immen-  
 sum laudum Pisanarum: quo in campo exultare  
 quidem possit oratio; sed finem minimè omnium  
 possit invenire. Ac sæpe ego quum soleam res  
 populorum Etruriæ mihi ante oculos ponere, eos-  
 que inter sese populos diligenter conferre, adeò  
 mihi Pisani reliquis omnibus populis Etruriæ omni  
 virtutis & sapientiæ laude præstitisse videntur, Etru-  
 riæ ut totius principatum, quem ii olim ante Ro-  
 manum Imperium habuerant, Imperio jam Germa-  
 norum per Othonem Magnum fundato, & rerum  
 gestarum magnitudine, & præclarissimorum institu-  
 torum splendore, sibi eos rursus vindicare meritò  
 potuisse certissimè exultem. Nam si de populis tunc  
 Etruscis judicium ex rebus gestis ferri debet, cu-  
 jusnam

jusnam populi Etruriæ res fortiùs ac præclariùs gestæ , quàm Pisanorum ? qui rem navalem Etruscam jacentem jamdiu & collapsam primi omnium restituerunt , qui primi ac soli Etruscorum bella navalia susceperunt , qui pro salute & dignitate Etruriæ in maxima se discrimina conjecerunt , qui jugum ab Etruriâ acerbissimum servitutis barbaricæ repulerunt , qui ex Etruriâ primi pro religione Christianâ contra immanissimos ac teterrimos hostes steterunt , qui plures provincias , quàm omnes reliqui populi Etruriæ , confecerunt , qui ex Etruriâ uni ac soli imperium suum in Europâ , Asiâ atque Africâ dilatarunt , qui Etruscum nomen quoquo-versus intulerunt . Quid enim dicam , Pisanos iis temporibus , cùm barbari vicinas insulas tenerent , & Etruriæ oram infestam haberent , Etruscum mare tutum atque immune a prædonibus reddidisse ? Quid Pisanos , imperio Etrusci maris denuo potitos , Musæctum , regem Saracenum , e Sardinia possessione deturbasse , eamque imperio suo insulam adferuisse ? Quid Pisanos Carthaginem in Africâ cum ipso rege cepisse , multasque & magnas Saracenis in Calabria atque alibi , clades intulisse , Panormumque iis in Sicilia ademisse ? Quæ præclara Pisani facinora in hostes Christiani nominis acerbissimos atque infestissimos ediderunt , interea dum populi Etruriæ , malum ! alii aliis , ipsisque etiam Pisanis , in sacras illas piasque expeditiones profectis , iniquissimè insidiabantur . Sed apud Pisanos , viros planè magnanimos , & fortes , Christiana magis causâ valuit , quàm injuriæ illæ Etruscorum . Itaque hæ minimè facere potuerunt , quin Pisani ,

F f

rebus

rebus ferè suis neglectis, omni animorum viriumque contentione, ad rem Christianam ubique terrarum magis magisque augendam atque promovendam adniterentur. Testis Asia, & bellum illud Hierosolymitanum, quod bellum communi omnium gentium Latini nominis Christianarum consilio susceptum, communibusque viribus administratum, Pisanorum in primis opera confectum est atque absolutum. Quæ enim unquam Christianorum fortitudo ac virtus ad tantum illud bellum, & locorum varietate, & multitudine hostium, tam longè latèque dispersum, suffecisset, nisi Pisani ad illud bellum socios sese laborum & periculorum adjunxissent? Clausum erat Christianis militibus mare, nullus iis portus tutus, insidiæ iis ubique paratæ, compectus interclusi. Quæ omnia impedimenta virtus Pisana felicissimè superavit. Hic ego nihil equidem prorsus laudibus detraxerim heroum illorum Christianorum, procerumque Gallicorum, quorum etiam mirabilia & pulcherrima facta, ut nostrorum plerique & Poëtarum, & Oratorum & vorsâ & prorsâ oratione ornare conati sint atque efferre, tamen nemo unquam unus pro dignitate celebravit: qui quidem heroës Christiani (non enim homines utcumque appellaverim, in quibus majus quiddam fuisse videtur, quàm humanum) periculosissimum illud & difficillimum bellum fortissimè gesserunt, & nominis sui gloriam nobis immortalem reliquerunt. Sed dico, Pisanos, Daiberto auctore, urbis Pisanæ antistite, viro sanctissimo, & religionis Christianæ propagandæ studiosissimo, ingenti classe navium centum & viginti instructâ, mare militibus nostris ad

ad oram usque Syriæ patefecisse, duces se ac principes maritimi itineris exercitui Christiano præbuisse, impedimenta, quæ hominibus Latinis ab Imperatore Constantinopolitano multa & magna inferbantur, penitus removisse, Leucadem & Cephaleniam, aliasque insulas expugnasse, Laodiceam aliasque urbes in Syriâ munitissimas cepisse, itaque Pisanos captæ urbis Hierosolymæ duces atque auctores cum primis fuisse, totiusque belli ipsos victoriam Christianis attulisse. Pro quibus etiam promeritis id honoris, præ omni natione Christianorum, civitati Pisanæ datum, ut, qui Pisanum antistes erat Daibertus, idem ipse sacris ac religioni in urbe Hierosolymâ cum potestate præficeretur. O maximam hanc laudem, o multò omnium præclarissimam atque pulcherrimam Pisanorum, sacri belli Hierosolymitani, belli illius celebratissimi ac decantatissimi, primas tulisse, & loca sancta ac religiosa Palæstinæ ab impietate & sordibus Saracenorum expiavisse, & Christo Deo reddidisse, & quam terram Christus pedibus suis calcavit, & sanguine suo consecravit, cultui ac religioni Christianæ restituisse, ipsamque urbem Hierosolymam magnâ ex parte collapsam refecisse, murisque & operibus communivisse! Quis spectare jam possit Pisas, quin totum simul orbem terrarum, certè quidem partes ejus tres maximas, una contempletur, in quibus Pisæ olim dominatæ? Vel quis universum jam orbem terrarum longè latèque circumspiciat, quin vel in disjunctissimis terris impressa fortitudinis ac pietatis Pisanæ simul etiam vestigia intueatur? Verùm non his laudum bellica-

rum terminis virtus Pisana circumscripta est, aut definita. Nam & aliquot post annis Pisani insulas Baleares navibus trecentis aggressi sunt, eas ut insulas a barbarorum manibus eriperent, & Christianos, qui, ad triginta hominum millia, diuturnâ ibi captivitate ac vinculis miserrimè detinebantur, in libertatem vindicarent. Nemo hîc quisquam vestrum roget me, Auditores, quid & quantum malorum in expeditione illâ Balearicâ totos sex & viginti menses Pisani sustinuerint, quid & quantum ii periculorum adiverint, quàm multa & quàm magna ii certamina subiverint, quot & quantos ii labores exantlaverint. Quis enim enumeraverit omnia? Potius me quis roget, quid unquam fuerit, aut excogitari etiam potuerit malorum atque periculorum, quod Pisani non pertulerint, non susceperint, non superaverint. Dicam ne, Pisanorum exercitum commeatus tunc difficultate laborasse, quum milites plerosque fames extinxerit? nulla tunc Pisanos pericula detrectasse, quum vulnera ibi sæpe & clades acceperint? tempestate tunc Pisanos adversâ jactatos, quum aliquot etiam eorum naves naufragium fecerint? Pisanos, tot malis ac tantis fractos & debilitatos, tandem aliquando concidisse, quum maxime tunc constiterit, virtutem Pisanam labore & constantiâ, quò contendisset, pervenire potuisse? Victæ enim sunt a Pisanis insulæ Baleares, cæsa quinquaginta hostium millia, captivi Christiani e vinculis soluti, victoria omnium clarissima reportata. Quid verò inde & quantum prædæ ac manubiarum? quum eò barbari vim immensam divitiarum, & quid-



& quidquid unquam rerum pretiosissimarum prædando e regionibus circumcirca Christianis abstulerant, conceisissent? Quibus ex manubiis Pisani id, quod multo omnium pretiosissimum, maximèque æstimabile erat, Deo consecrarunt. Testatur templum Pifarum maximum, testantur valvæ ejus ex ære, opere cælato, admirabili atque pulcherrimo, testatur sacra ejus & locupletissima supellex, testantur cetera & plurima dona, Deo Pisis dedicata; hæc, inquam, omnia testantur, quò Pifani tantæ illius victoriæ fructum retulerint, nimirum ad religionem. Religio Pifanos ad bellum illud Balearicum impulerat. Religio Pifanorum animos erexerat, & confirmaverat. Religio robur Pifanis & fortitudinem addiderat. Dederunt igitur Pifani religioni, quod religionis ductu atque instinctu fecerant, ut insulis Balearibus, & tantâ illâ, & tam opimâ inde prædâ, potirentur. Nec enim amor divitiarum, Auditores, nec prædæ, aut dominationis cupiditas ad bella unquam Pifanos rapuit, aut inflammavit. Fuit hoc proprium, fuit Pifanorum, religionem Christianam, quam a Petro, summo illo & principe, secundum Christum, ejus religionis antistite, primum didicerant, studiosissimè colere, hanc unice quærere, hanc sibi normam, hanc regulam, hanc actionum quarumque suarum præscriptionem proponere. Vetus & constans apud Pifanos fama est, Petrum ad Pifana littora appulsum, eo loco, cui nunc ad Gradus nomen est, primam in Italiâ ex marmore aram erexisse: quam etiam nunc aram, beatissimi Clementis sanguine guttatim respersam, in veneratione habent atque

osten-

ostendunt Pisani. Ab eo tempore religionem Christianam ferunt summopere apud Pisanos, vel in maximis ac violentissimis procellis, firmam ac stabilem, & nullo unquam errore contaminatam, viguisse, & hac religione nihil unquam sanctius & antiquius Pisanos habuisse. Inde ex avito illo religionis Christianæ studio, postea etiam quàm civitates Etruriæ frenum Romani imperii excutere, suique juris esse cœperunt, hac veluti tesserâ difcreti & sejuncti sunt Pisani ab aliis populis Etruriæ, quòd alii res vicinorum invadere; Pisani rem Christianam quoquoersus amplificare studuerunt. Alii ad rem navalem, mercaturæ tantùm & negotiationis faciendæ causâ; Pisani, religionis potissimùm dilatandæ causâ, sese applicaverunt. Aliorum populorum Etruriæ primus impetus, primaque aggressio in finitimos, hoc est, in Christianos, fuit; Pisanorum in Saracenos. Ego verò vobis irascor, & vehementer quidem irascor, populi Etruriæ, qui in omnem occasionem opum augendarum, potentiæque amplificandæ intenti, bella cum Pisanis ferere, eorumque de Christianæ religionis adversariis victorias, vel in medio earum cursu, retardare, aut etiam omnino impedire, nunquam destitistis. Quis enim nescit, populos Pisis cùm primis finitimos, tametsi ceteris suis laudibus valde admodum præstantes, tamen interea, dum Pisani, religionis Christianæ causâ, domo, contra Musæctum Sardiniae regem, abessent, in territorium Pisanum hostili manu irruisse, magnamque ejus territorii partem occupasse; coæctosque etiam esse aliquando Pisanos Florentinorum fidei urbem suam adversus eos populos

pulos tuendam conservandamque commendare, interea dum ipsi, salvis rebus suis, in expeditionem illam Balearicam proficiscerentur? Ita Pisani, ut Christianæ causæ ac religioni servirent, sua minùs curare, hoc est, ea, quæ sibi charissima erant, ipsamque patriam, qua nihil prorsus homini dulcius est atque charius, rei Christianorum publicæ longè posthabere minimè dubitarunt. O Pisani! o verè omni laude & immortalitate dignissimi! quis vestrum hoc factum verbis satis suis extollat? Quod factum tale profectò est ac tantum, ut animo quis fortasse possit illud cogitare; oratione certè persequi & explicare nequaquam possit. Tale hoc & tantum, & tam divinum, ac propemodum incredibile in religionem Christianam studium Pisanorum bono tuo expertus es, Aymerice, rex Hierosolymitanæ, vir fortissime, qui, quum undique bello a Saracenis premerere, qui urbem quoque jam Alexandriam occupavissent, confugiendum tibi esse ad Pisanos, eorumque tibi opem implorandam esse, existimasti. Quis enim tunc Pisanis aut a copiis navalibus instructior? aut Reipublicæ Christianæ tutandæ servandæque studiosior? aut ad pericula Christianorum hominum propulsanda alacrior? aut ad belli discrimina subeunda promptior? aut ad auxilium tibi ferendum paratior? qui, triremibus missis quadraginta, victoriam tibi pulcherrimam atque gloriosissimam de hostibus tuis compararunt. Pro quo benefacto Pisanorum gratiæ abs te, Aymerice, Senatui Populoque Pisano perhonorificâ legatione, verbisque quàm amplissimis & ornatissimis actæ. Atque hinc cognoscite, Auditores, Pisanos eâ inter  
Etru-

Etruscos potentia fuisse, ut magni quoque reges ad eorum opem confugere consueverint, eo autem religionis studio, eaque animi magnitudine ac temperantia, ut ex bellis contra Saracenos gravissimis & difficillimis salutem ipsi duntaxat & securitatem Christianae reipublicae quaesiverint. Non enim quaestu aut pecuniis felicitatem ac magnitudinem suam metiti sunt Pisani; sed rempublicam Christianam conservare; sed pro salute & dignitate Christianam sese periculis objectare; sed religioni Christianae militare; sed nominis sui honestissimam ubique, & clarissimam famam colligere, has veras & tutissimas esse divitias, hoc officii sui munus, hoc Pisanum esse, duxerunt. Quo quidem religionis studio, rege quondam Carthaginis capto, ille demum Pisanis verus & justus triumphus visus fuit, ut eum regem captivum Christiane erudendum curarent, Romamque ad Pontificem Christianis mysteriis initiandum adducerent, indeque eum Pisis apparatu regio exciperent, ac tandem sumptibus ipsi suis in regnum reducerent. Quem ex bello illo Carthaginensi Pisani laborum suorum fructum maximum atque amplissimum perceperunt. Hoc ipso religionis Christianae studio quis jam Pisanos non fateatur victorias omnes de Saracenis suas in religionis ejusdem propagationem atque incrementum & fructus uberrimos & lectissimos victoriarum in sacra quaque aedificia, & religiosiora pietatis Christianae monumenta, atque in templi maximi & sanctissimi structuram atque ornatum, uberrime contulisse? Quis enim ignoret, Pisanos studio illo religionis, similiter atque Helenam quondam Augustam,

stam, matrem illam Constantini Imperatoris, nar-  
rant terra Hierosolymitanâ facellum Romæ, Hie-  
rosolymitanum inde appellatum, constravisse, Pi-  
sanos, inquam, æmulatione illâ religionis, vel uf-  
que ex Hierosolymis terram Pisas advexisse, in-  
de ut in patriâ suâ campum religiosum ac sanctum  
construerent, quem Ubaldu Lanfrancus, Pontifex  
Pisanus, publicè dedicavit? eodemque religionis stu-  
dio Pisanos ex prædâ ac manubiis victoriæ illius Pa-  
normitanæ templum maximum & religiosissimum,  
ædesque proximas pontificales, exædificare Pisis cœ-  
pisse, & Johanni Comneno, Imperatori Græco-  
rum, quòd iter is Hierosolymitanum intercludere  
atque impedire conatus esset, eam multam irro-  
gasse, ut templum illud & ædificium Pisanum im-  
pensâ sua absolveret? Quis verò tanti hujus tem-  
pli non admiratione summâ moveatur, & religio-  
nem in eo simul ac magnificentiam Pisanam non  
vehementer suspiciat? quod augustissimum templum,  
quigentorum & quadraginta passuum ambitu, co-  
lumnis marmoreis subnixum duabus & septuaginta,  
operis majestate simul ac splendore, admirationem  
eam sui excitat, ut miraculum illud Etruriæ jure  
nos appellare posse videamur. Quis ibi etiam sa-  
cræ turris marmoreæ atque pulcherrimæ adspectu  
non obstupefeat, ac simul etiam artificio non to-  
tus contremiscat? quæ turris inclinando extrinsecus  
ac propendendo, præsentem jam præcipitemque rui-  
nam minitatur: quum tamen, si eam intus adspi-  
cis, sese eadem ad perpendicularum rectam sistat ti-  
bi statim ac repræsentet. Studium hoc religionis  
tota loquitur urbs Pifarum, loquuntur publica &

G g

priva-

privata donaria, loquuntur sancta quæque, & pia instituta civitatis, ipse etiam loquitur, qui in honorem Rainerii, viri sanctissimi, & patroni præsentissimi Pisarum, quarto quoque anno, summâ omnium lætitiâ, maximoque populorum exterorum concursu, dies festus peragitur celeberrimus, & cum primis solemnissimus, cum, lucernis & funalibus numero propemodum innumerabili confertis, & in varias concinnasque figuras pulcherrimè dispositis, iisque noctu totâ urbe accensis, totæ ardent Pisæ, & nox diem propemodum exhibet, &, quacunque per urbem vagare, tot illæ simul lucēs vivam quandam solis purissimi atque splendidissimi imaginem referunt. Jam verò ex hoc ipso religionis studio quàm Pontificibus Romanis dediti, & obsequentes! quàm Pontificum Romanorum observantes & studiosi! quàm officiosi in Pontifices Romanos & hospitales Pisani! Testem ex annalium monumentis te cito, Gelasi Secunde, Pontifex maxime, cito etiam te, Calixte Secunde, quorum alteri profugo, dum Henrici Quinti Imperatoris iram declinares; alteri hæc transeunti, dum Romam e Galliis proficiscerere, tutum ac liberale hospitium Pisæ præbuerunt. Nec tibi, Innocenti Secunde, in tanto illo Romano tumultu gravissimè ab adversariis periclitanti præsto alii fuerunt, qui te fugientem exciperent, & in urbem suam paratis triremibus ducerent, nisi Pisani, qui & causâ tuâ bellum maximum & periculosissimum contra Rogerium, Siciliæ regem, suscipere minimè omnium dubitarunt. Quid? quòd Pisani, tametsi, propter initam cum Florentinis societatem, interdictione eadem sacrorum, qua Florenti-

ni,

ni, a Gregorio Undecimo, Pontifice Maximo, puniti, tamen eum Pontificem, Romam e Galliâ contendentem, venerati, secundum Deum, omni officiorum genere, maximè sunt, &, missis etiam triremibus, adjuverunt? Tanta Pisanorum fuit adversus Pontificem Romanum reverentia atque observantia. Et quisquam mirabitur, Pontifices Romanos labenti reipublicæ Christianæ, & afflictis rebus suis, præsidium aliquando & firmamentum a Pisanis quæsisse, & Pisas, paratissimum ac præsens perfugium habuisse, quò & ipsi in summo rerum discrimine semet tutò reciperent, & commune gentis Christianæ concilium convocarent? Quo etiam perfugio nullum sibi melius atque paratius ceteri quoque antistites Christiani in rebus Christianæ reipublicæ desperatissimis esse judicarunt. O illam Pisanorum in annalibus Christianis memoriam sempiternam! o memoriam illam amplissimis monumentis consecratam, cum ab Innocentio Secundo, Pontifice Maximo, ex omni gente Christianâ Concilium Pisas coactum est, ibique, de Patrum sanctissimorum sententiâ, res Christianæ, quæ vacillare quodammodo ac claudicare videbantur, confirmatæ sunt & constabilitæ! O illud etiam ad memoriam urbis Pisanæ maximè insigne, cum in deplorando illo, maximèque diuturno Christianæ reipublicæ discidio, toto orbe Christiano in partes duas diviso, atque inter sese acerrimè concurrente, ad discordias Christianorum sedandas, pacemque interpartes conciliandam, nullum præsentius atque efficacius remedium visum fuit, quàm utriusque partis homines Pisas in unum simul concilium fre-

quentissimos congregari ! Sinite hoc loco , Auditores , Oratorum more , omittere me ac præterire labem illam nominis Pisani , quam Pisani , ut Friderico Secundo Imperatori , Gregorii Noni , Pontificis Maximi , hosti acerrimo & crudelissimo , gratificarentur , imprudentes contraxerant , quæ quidem labes tanta certè fuit , ut perpetuâ potiùs oblivione obruenda , quàm ullâ ex parte memoranda esse videatur . Sed decepti sunt Pisani a Friderico . Sed rei potiùs ignoratione , quàm ullâ in Ordinem sacrosanctum malevolentia , Henricum , quem , corrupto nomine , Hencium vulgò vocitarunt , filium nothum Friderici , qui triremibus viginti instructissimis a Friderico advenerat , ducem & auctorem sceleris , secuti sunt . Sed culpa illa fuit erroris humani , quo eodem postea errore Manfredo , alteri filio notho Friderici , adhæserunt . Sed quidquid illud fuit facinorum , inconsideratæque temeritatis , & multitudine & magnitudine benefactorum Pisani largissimè compensarunt . Nam eximia quidem pietas vestra in Pontificem Romanum , Pisani , quum semper antea plurimis & certissimis argumentis declarata fuerit , tum etiam postea maxime enituit , cùm , Pisis in Florentinorum potestatem redactis , conciliabulo ibi contra Julium Secundum , Pontificem Romanum , temere atque impudenter constituto , vos , vos , inquam , cives Pisani , qui amissam libertatem magno fortique animo ferebatis , tale & tantum nefas contra Pontificem Romanum ferre nullo modo potuistis ; sed , armis arreptis , impetuque facto , seditiosos factionesque homines , qui eò , tanquam ad concilium , con-



convenerant, ex urbe veitrâ profugere, atque in  
rein malam abire, coëgitis. Tantum apud Pisanos  
studium valuit religionis: de qua bene merendo  
Pisani, promeriti jampridem fuerant, ut quas  
insulas ditioni ipsi suæ subjecerant, earum insularum  
primatum, Sardiniae nimirum & Corsicae, Pontifices  
Romani in Pisanum Pontificem conferrent.  
Age verò, quanta fortitudo Pisanorum bellica! quorum  
vel in otio semper fuit jam inde a pueritiâ ad bellum,  
atque ad pugnandum etiam cominus in acie, exercere sese  
atque erudire. Quid enim, per Deum immortalem,  
quid aliud tandem sibi voluit umbratile illud & domesticum  
bellum, sapientissimè olim apud Pisanos institutum,  
& etiam nunc magnifico subinde apparatu a Pisanis celebratum;  
cùm, divisâ in partes factionesque duas civitate,  
pars altera bellum alteri de ponte indicit, jamque  
utraque acies infestis signis medio in ponte inter sese  
concurrit, & pedites utrimque cataphraëti collato  
pede praeliantur; jamque in eodem vestigio stant  
confertissimi, itaque manus conserunt, & clavarum  
ictibus validissimis verberant sese ac contundunt?  
Alii alios loco pellunt; capiunt & capiuntur;  
alii fessis alii succedunt; jamque eò propemodum  
ventum est, ut, adversariis repulsis, pontem uni  
occupent, cùm ecce tibi, subsidiariis cohortibus  
in primam extemplo aciem emissis, pugna subito  
restitutâ, instantibus hi adversariis cedere, &  
victoriam, quam in manibus habebant, amittere,  
& maxima simul fieri utriusque exercitus concursio,  
donec alii alios penitus vincant, aut dubiam  
certè utrique victoriam relinquunt, tantâ virium  
con-

contentione, tanto ardore animorum, tantoque partium studio, popularis ut illa concertatio non simulacrum jam belli, sed civile & crudele bellum, & verum iustumque prælium referre omnino videatur. Quid igitur aliud sibi ludrico illo bello atque umbratili veteres Pisani, homines sapientissimi ac fortissimi, voluerunt, nisi ut ita juventutem Pisanam ad usum belli, & ad vera iustaque certamina præpararent atque instruerent? ut in illo nimirum veluti militiæ tirocinio Pisani assuescerent, sive pro variâ belli fortunâ vincerent, sive vincerentur, semper se milites bonos, & viros fortes, hoc est, Pisanos, præbere. Hac indole virtutis bellicæ præ omnibus Etruriæ populis Pisani fuerunt, homines unice facti ad gloriam Etrusci nominis quoquoque dilatandam: ut divino prorsus consilio mihi semper visi sint Magni Etruriæ Duces Pisis, præ reliquâ Etruriâ, tanquam loco maximè commodo, atque ad memoriam antiquæ Etruscorum gloriæ & fortitudinis in primis opportuno, nobilissimum equitum fortissimorum & splendidissimorum ordinem instituisse, ejusque ibi sedem stabilem collocasse. Nec tamen Pisani, summi illi Orientis & Occidentis victores, bella unquam ulla cum populis Christianis gesserunt, nisi coacti & lacerati, nisi ut res suas, nisi ut sociorum suorum, & Pontificum cumprimis Romanorum, jura defenderent, nisi denique ut illatas sibi injurias ulciscerentur. Hæ unæ ac solæ Pisanis bellorum contra Christianos suscipiendorum causæ. Bella Pisani magna & periculosa cum Genuensibus gesserunt, cum Florentinis, cum Lucensibus, cum Rogerio, Siciliæ rege,

rege, cum Jacobo Arragoniæ, cum Imperatore Græcorum. Sed quàm iusta illa bella, & quam necessaria! quibus semper in bellis fidem sibi ante omnia præstandam tenendamque esse censuerunt. Nanque & fœdera religiosè servare, & amicitias fideliter colere, Pisanorum fuit. Nam de potentiâ tunc & viribus Pisanorum quid attinet dicere? quum in bello Ligustico familiæ centum Pisanæ rostratas totidem naves sumptu suo ædificaverint, omnique apparatu ad pugnam navalem instruxerint. Quid de amplitudine & munimentis urbis Pifarum? quum Pisæ decem ferè præcelsarum atque editarum turrium millia, ad præsidium & munitionem urbis, numeraverint. Quid de terrestrium navaliumque copiarum multitudine? quum classes Pisanæ amplius quadraginta bellatorum fortissimorum millia navibus trecentis in expeditionem eduxerint. Quid de multitudine & magnitudine victoriarum? quum Pisani urbes potentissimas & munitissimas, insulasque & regna sub jus potestatemque suam subjunxerint. At gloriæ tamen bellicæ alii etiam tecum consortes aliquando fuerunt: gloria sapientiæ ac litterarum, inter omnes urbes Etruriæ tota tua est ac fuit, urbs clarissimâ & celebratissima Pifarum. Tuum, præ reliquis urbibus Etruscis, fuit, simul cum imperio sapientiæ quoque, ac doctrinarum studia propagare atque augere. Tuum, ex opimâ urbis Amalphitanæ prædâ manubias tibi unas, Pandectas Juris Romanorum civilis, petere ac reservare. Tuum, a vectigalibus tibi tuis parcere, ut litteras artesque honestissimas foveres, atque amplificares. Tuum denique opus, tuæque sapientiæ, fuit, Academia hæc  
Pi-

Pisana : qua certè Academiâ ad laudum tuarum cumulum nihil unquam afferri potest majus atque uberius . Quid enim , Deus bone ! ad Pisani nominis gloriam majus , atque ad Pisas collaudandas uberius , quàm ex totâ non Etruriâ modò & Italiâ , sed etiam Europâ , summos quosque & doctissimos viros huc Pisas frequentes confluere , Pisas , amores & delicias suas ducere , Pisas , non domicilium modò , sed etiam oblectamentum & solatium vitæ , habere . Sunt & alia complura , fateor , quæ peregrinos quosque & externos homines huc Pisas vehementissimè allectent atque invitent , cœlum , quo nihil salubrius atque mollius , mare , quo nihil amicius atque hospitalius , plaga , qua nihil pulchrius atque amœnius , ager , quo nihil uberius ac fertilius , ipsa etiam urbs , qua nihil nobilius ac celebrius . His omnibus quis non videat fontes laudum uberrimos contineri ? Sed hæc , quæ ceteros vulgò homines mirificè permovent , minimùm certè valent apud eos , qui uno sapientiæ ac doctrinæ studio afficiuntur . His unum illicium , unæ illecebræ , unum incitamentum , emporium hoc clarissimum omnium honestissimarum artium atque facultatum , instructissima hæc eloquentiæ & sapientiæ officina , nobilissima hæc Academia Pisana : ubi & cœlum ac sidera ex altâ speculâ contemplantur , & herbarum naturam ac vires ex hortis lectissimis ac pretiosissimis pernoscant , & reconditiora quæque atque abstrusiora omnium doctrinarum ex summis & eruditissimis magistris perdiscant . Itaque hæc mihi visa est Pifarum laudandarum summa , ut jam omnes uno planè ore consentiant ac fateantur , Pisas omni laudis

# ORATIO UNDECIMA.

241

laudis genere , & rerum quondam gestarum gloriâ ,  
 & nominis celebritate , & urbis splendore , & pro-  
 ventu uberi agrorum , & aëris salubritate , & , quod  
 maximum est , atque omnis laudationis caput , stu-  
 diis etiam nunc sapientiæ , toti reliquæ Etruriæ lon-  
 gè antecellere . Neque verò putetis , Auditores ,  
 temporibus illis barbarioribus , ante hanc Acade-  
 miam fundatam , studia doctrinæ & litterarum ,  
 tanquam in situ & squallore sepulta atque neglecta ,  
 apud Pisanos jacuisse . Quis enim neget , superiori-  
 bus etiam temporibus , si usquam alibi , certè qui-  
 dem Pisis , publica bonarum litterarum , legumque  
 in primis civilium , studia maximè viguisse ? quum  
 hinc Pisis Lotharius Primus Imperator viros doctis-  
 simos & sapientissimos arcessiverit , quorum ipse ope-  
 ra Romæ in legibus condendis uteretur , & hinc Pi-  
 sis religiosiores etiam viri , antequam iis juris ci-  
 vilis professione in scholis interdiceretur , egregiam  
 jurisprudentiæ addiscendæ operam navaverint , &  
 hinc Pisis perinsigni viri scientiâ atque litteraturâ ,  
 in rebus divinis & humanis , in medicinâ , in juris-  
 prudentiâ , & in omni politiori doctrinâ atque hu-  
 manitate , summopere floruerint ; nec verò Pisani ,  
 rebus præclare ac sapienter & fortiter gestis , præ-  
 stare adeo potuisse tunc videantur , nisi ingenio bo-  
 nisque artibus & disciplinis præstitissent . Quæ quum  
 tot sint ac tantæ laudes Pifarum , quid ego jam  
 dubitem , Auditores , Græcos Poëtas & Oratores  
 imitari , & , quod illi magnificè non minùs , quàm  
 verè , Athenis elogium tribuerunt , pari id ratione  
 ad urbem Pifarum transferre atque accommodare ,  
 ut , quèmadmodum illi Athenas , Museum Græciæ ,

H h

colu-

columnen & firmamentum Græciæ, Græciam Græciæ, dixerunt; sic ego, quàm maximâ possum & vocis & animi contentione, Pisas, Museum Etruriæ, Pisas, columnen & firmamentum Etruriæ, Pisas, Etruriam Etruriæ, splendidâ æque ac verâ laudatione, appellem? Maçti animo, viri Pifani, estote. Bene vobiscum divinitus actum, quòd, sub æquissimo jam Francisci III. Lotharingi, Magni Etruriæ Ducis, Domini nostri clementissimi, imperio, tantum & splendoris & dignitatis urbi vestræ accesserit, ut ad antiquam illam majorum vestrorum & fortitudinis & sapientiæ gloriam adspirare tandem possitis. Maçti etiam ingenio & doctrinâ, adolescentes honestissimi, estote, qui, sapientiæ comparandæ causâ, huc Pisas, in hanc Academiam Pisanam, in hoc universæ sapientiæ ac doctrinæ domicilium, ex totâ Etruriâ, atque etiam ferè Italiâ, convenistis. Efficite, quod vos maximè decet, & quod jure suo a vobis Academia Pisana postulat, adolescentes, ut hinc doctrinâ per vos in reliquam Etruriam, atque adeo Italiam, totamque Europam, longè latèque propagatâ, nomen Pisanum, non gentis jam Etruscæ nomen, sed sapientiæ & doctrinæ Etruscæ argumentum, esse videatur.

CAJETANO . ANTINORIO  
 EQUITI . PATRICIO . FLORENTINO  
 CAESARI . ET . CAESAREO .  
 ETRURIAE . REGIMINI  
 A . SECRETIS  
 VIRO . CLARISSIMO  
 ET . NOBILISSIMO  
 ET . GRAECARUM . ET . ROMANARUM  
 ATQUE . ETRUSCARUM  
 ANTIQUITATUM  
 OMNISQUE . ERUDITIONIS  
 STUDIOSSIMO  
 DOCTO . IPSI  
 ET . DOCTORUM . IN . PRIMIS . VIRORUM  
 AMANTISSIMO  
 DE . LITTERIS . ET . DE . ACADEMIA  
 PRAESERTIM . PISANA  
 ET . COLLECTIS . UNDIQUE . INGENTI  
 SUMPTU  
 ATQUE . IN . MUSEO . SUO  
 ADSERVATIS . RARISSIMIS  
 ET . PRETIOSISSIMIS . CIMELIIS  
 DE . TOTA . ANTIQUITATE  
 OPTIME . MERITO  
 ALEXANDER . POLITUS  
 ORATIONEM . HANC . SUAM  
 AD . ACADEMIAM . PISANAM  
 DE . NOBILITATE . LITTERARUM  
 MEMORIAE  
 ET . HONORIS . CAUSSA  
 L. M. Q. D. D. D.





245

# ALEXANDRI

## POLITI

DE CL. REG. SCHOLARUM PIARUM



ORATIO DUODECIMA.

*De nobilitate Litterarum.*



Æpe ego ad aures vestras pervenisse puto, Viri excellentissimi, Auditores ornatissimi, querelas nonnullorum gravissimas de conditione misera litterarum, quod malè cum litteris ageretur, nec sua doctrinæ atque eruditioni præmia deferrentur. Quæ quidem querelæ ut justam satis causam aliquando habuisse videantur, quod præclara quæque optimarum artium studia ita contempta atque neglecta veluti in tenebris & squallore jacerent; tamen nobis & Academiæ nostræ maxime nunc gratulandum, quod Franciscus Primus Imperator, Pius, Felix, Augustus, Dominus & Patronus noster præsentissimus atque beneficentissimus, nullum jam his querelis locum reliquerit; sed augustâ suâ ac propemodum divina liberalitate afflictas & abjectas litteras crexerit atque recreaverit. Sic enim.

Aca-

Academia nostra omnibus ingeniorum doctrinarumque laudibus, ut nunquam antea, florebit ad memoriam tantæ liberalitatis sempiternam. Quanquam, ut verum fatear, Auditores, tanta est dignitas atque amplitudo doctrinæ, ut in eâ doctorum hominum quisque, nullo alio sibi quæsito præmio, meritò conquiescere posse videatur. Ipsa enim sibi præmium doctrina. Ego, quum hoc solemnî & legitimo Studiorum nostrorum instaurandorum die, ad inflammandos litterarum studio adolescentes, nobilissima quæque dicendi argumenta mihi semper perfequenda esse duxerim, rem nobilitate vestrà dignissimam, neque vobis auditu injucundam, facturum me judicavi, si ex plurimis ac maximis litterarum laudibus nobilitatem præcipuè seligerem, quam hodiernâ vobis oratione ante oculos ponerem atque celebrarem. Quod si apud vos, Auditores nobilissimi, pro dignitate & nobilitate litterarum præstitero, faciliè me impetraturum confido, ut nemo jam unus doctorum litteratorumque virorum conditionem litterarum miseram conqueratur.

Quid enim litteris nobilius atque illustrius? quarum est cetera quæque nobilitare. Hic non dico, quod alii plerique omnes vulgò jactitarunt, siquem alium, virum certè nobilem maximè litteras decere, nec cuiquam alteri turpius esse, quàm viro patricio & nobili, non dico jus, quod Q. Mutius disertè affirmabat; sed ea omnia, quæ libero & eleganti homine digna sunt, ignorare. Nec etiam dico, quod in scius decretisque vestris, Jurisconsulti, positum est, excellentem cujuspiam doctrinam nobilitati generis longè esse anteponendam, aliamque planè

planè esse nobilitatem generis a nobilitate doctrinæ. Quæ quanquam ab aliis verissimè & subtilissimè disputantur, ea tamen non dico, ne, quod ab orationis meæ argumento quàm maximè abhorret, committere inter sese velle videar & litterarum & generis nobilitatem. Illud unum dico, & palam atque audacter prædico, nobilitatem quam nos vocamus, unde alii præ aliis nobiles illustresque appellantur, qualiscumque ea demum & quantacumque sit, totam a litterarum gloriâ proficisci: quæ nobilitas nullamquam in rebus humanis fuisset, nisi litterarum lumen accessisset. Atque utinam liceret mihi, quod Geographi solent, per totum vos terrarum orbem longè latèque circumducere, aut, quod solent Chronographi, superiorem omnem memoriam, jam inde ab ultima antiquitate, oratione complecti atque percurrere! Sic enim & vobis in promptu esset, Auditores, & loca quæque inspicere, ubi litteræ & altæ & educatæ increverunt, & tempora ultima recordari, quæ tempora litteræ ab oblivione & silentio vindicarunt; itaque, quanta omni tempore & ubicunque locorum gloria atque nobilitas litterarum fuerit, clarissimè intueri. Quotus autem vestrum, quisque est, qui nesciat, quemadmodum hominibus, ita & suam locis nobilitatem inesse, aliasque urbium nobilitate aliis cedere, alias etiam cum aliis de nobilitate decertare? Hinc plerosque omnes scimus laudem sibi ac decus nobilitatis a nobilitate patriæ quæsisse, &, quod valde quis miretur, ambitionis hujus suæ duces atque auctores nonnullos de jurisconsultis habuisse, qui in libris suis de nobilitate ad hominis cujusque nobilitatem claritatem ali-

aliquando & nobilitatem patriæ satis superque esse censuerunt. Fertur etiam Ulpianus nobilis ille Jurisconsultus, valde admodum gloriatus de Patriâ suâ Tyro, urbe nobilissima atque antiquissimâ Phœnices: quum tamen Alexandrum Severum Augustum puderet, se genere Syrum vocari, qui se a majoribus Romanum dictitaret. Verum qui doctrinâ ac sapientiâ ceteris longè mortalibus antecellit, is, ego nolim, sese venditet atque efferat eo genere laudis, quod sit ei cum vulgo hominum commune. Non enim, ut ceteris, sic etiam viro docto, ac sapienti, patria honori ferè atque ornamento est; sed ipse patriæ. Celebratissima urbs Ciliciæ, ac veluti Ciliciæ oculus, Tarsus fuit. Nihilo tamen inde a patriâ Tarsensis Paullus celebratior. Immo verò ipsa Tarsus multò inde clarior atque nobilior, quod Paulum, scriptorem sapientissimum ac verè divinum, protulerit. Clarissima urbs Joniæ, Ephesus: neque inde tamen clariores, qui Ephesii patria fuerunt, Heraclitus ille Philosophus & Soranus Medicus. Urbs notissima & celeberrima, Halicarnassus. Sed non quia Halicarnassensis patriâ, ideo notior atque illustrior pater ille historiæ Herodotus, aut historiæ Romanæ scriptor nitidissimus atque elegantissimus, Dionysius. Syriæ urbs maxima, maximoque ea in urbibus nomine, Antiochia. Neque ideo tamen magis laudati, aut Libanius, qui viam Chrysofomo ad eloquentiam prævit, aut aureâ ille eloquentiâ, Chrysofomus, aut sectator Chrysofomi studiosissimus, Theodoretus, aut Aphthonius ille Sophista, aut de scriptoribus etiam divinis Lucas, is, qui res Christianorum primus historiæ mandavit, non hi, inquam, magis

gis laudati, quòd ab urbe Antiochiâ prodierunt. Amplissima urbs & ornatissima, Alexandria, urbs olim urbium secundùm Romam maxima, quæ ad notam quandam magnitudinis atque excellentiæ Polis Græcis appellata est, quemadmodum Roma, Urbs Romanis. An ideo nobiliores, quòd Alexandrini, Didymus ille Grammaticus, optimus & laboriosissimus, alterque postea Didymus, interpret librorum divinorum diligentissimus, & Ammonius, præceptor Origenis, & ipse Origenes, longè ille princeps totius & sacræ, & profanæ eruditionis, & Athanasius & Cyrillus, cui a patriâ cognomen Alexandrino, & Appianus, & Herodianus, & Achilles Tatius, &, si ita placet, Claudianus etiam Poëta, & Pappus ille Mathematicus, & Grammaticus ille Philoponus, & alii quàm plurimi viri doctissimi, atque ab omni rerum præclarissimarum scientiâ instructissimi? An hi igitur nobiliores, quòd patriâ Alexandrini? Minimè verò. Immo doctrinâ hi suâ nobilitatem illam patriæ mirum in modum auxerunt. Nobilissima urbs Africæ, itemque maxima, Carthago, quæ de magnitudine & nobilitate cum urbe Alexandria facile contenderit. An ne verò inde nobiliores atque illustriores, & Terentius, Poëta, elegantissimus maximèque Latinus, & lumen illud Africanæ eruditionis, Tertullianus & Cyprianus, & Marius Victorinus, quòd ii patriâ Carthagenenses? Nequaquam, Auditores. Constantinopolis, nova Roma, sede eò translata Imperii Romani, majestate atque magnificentia suâ visa est ceteras omnium terrarum urbes vel potentissimas atque maximas longissime superasse, urbs sanè & naturâ & situ, &

descriptione ædificiorum pulcherrima, quam eò quidam laudando extulerunt, ut orbem terrarum orbis, eam urbem appellarent. Tulit ea urbs viros in primis doctos atque eruditos. Tulit Julianum, hominem unice factum ad studia bonarum litterarum, nisi ingenii lumen atque doctrinam impietate obscurasset. Tulit Photium, qui Bibliothecam scripsit. Tulit, præter alios multos, interpretem Homeri maximum atque locupletissimum, & a variâ doctrinâ instructissimum, Pontificem postea Thessalonicensem, Eustathium. An his tantâ viris præstantiâ ac nobilitate doctrinæ Constantinopolim patriam quidquam ad gloriam atque ad nominis celebritatem contulisse existimabimus? Nihil meherculè: nihil certe magis, quàm ceteris civibus suis vel summo loco natis, quorum extincta penitus memoria est oblivione sempiternâ posteritatis. At contra percrebuit doctissimorum illorum fama, eaque in omnem deinceps æternitatem manebit: itaque, vel miserâ atque jacente urbis Constantinopolitanæ fortunâ, laudes semper ejus urbis magis magisque celebrabuntur, quòd viris doctrinâ claris atque insignibus incunabula, sive etiam domicilium præbuerit. Nam & urbi Constantinopoli singulari ornamento ac decori fuerunt viri plerique alii doctissimi, qui, tametsi aliam patriam fortiti, tamen in eâ urbe ingenii & doctrinæ laude summopere floruerunt: qualis Themistius, magnus & Philosophus & Orator, cui, propter vim admirabilem eloquentiæ cognomentum fuit Suadæ; itemque Michaël Psellus, summus ille Philosophorum, atque in omni rerum optimarum scientiâ versatissimus. Dies me deficiat, Auditores, si velim,  
non

non dicam exornare dicendo, sed vel numerando percurrere insignes quasque urbes, & in primis nobiles atque illustres, quas viri docti & litterati vel ortu, vel domicilio ibi suo cohonestarunt. Quid enim referam Apameam, patriam Posidonij, Ama-seam Strabonis, Pelusium Ptolemæi, Spartam Chilonis, Megalopolim Polybii, Chæroneam Plutarchi, Mediolanum Salvii Juliani, Miletum Thaletis & Anaximandri, Mitylenen Pittaci, & Alcæi, Cyrenen- Callimachi & Eratosthenis, Damascum Nicolai & Johannis, qui inde Damasceni appellati? Quid urbes clarissimas Mesopotamiæ, Edessam & Nisibin, quarum altera Ephræmum Edessenum, altera Jacobum Nisibenum, vel in lucem edidit, vel in civitatem recepit? Quid Cæsaream Cappadociæ, alteramque Cæsaream, urbem opulentissimam Palæstinæ, quarum alteram Pausanias, scriptor Græciæ perquam curiosus atque accuratus, alteram Eusebius ille Cæsarensis, & Procopius historicus, nobilitarunt? Quid Syracusas, urbem quondam potentissimam Siciliæ, atque ex quatuor urbibus maximis conflata, cujus tamen ornamentum eximium ac maximum, Philemon & Epicharmus, & Theocritus, & Mathematicus ille admirabilis, Archimedes? Quid Sinopen, urbem inclytam Paphlagoniæ, regiam illam quondam Mithridatis, quæ tamen multò magis nominata propter Diogenem Cynicum Sinopensem? Quid Pergamum, regum Attalicorum sedem celebratissimam, & copiosissimis selectisque Bibliothecis ornatissimam, cujus tamen urbis nihil omnino gloriosius atque ad omnem memoriam commendatius Galeno, medicinæ secundum Hippocratem principe, alteroque illo me-

dico præstantissimo, Oribasio? Quid Sardes, urbem Lydiæ vetustate antiquissimam, regiam quondam Croeli, cujus tamen nihil ad nos illustrius Polyæno & Eunapio, & Pontifice illo Sardenfi, Melitone? Quid Corinthum, lumen illud Græciæ, quod tamen nihil clarius lucidiusque habuit sapiente Periandro? Quid Thebas, urbem Bœotiæ clarissimam, omnique laude cumulatissimam, quam ferunt Cadmum condidisse, cum, qui litteras e Phœnice in Græciam primus intulerat? Multa, & mira, Auditores, de Thebis passim Bœotiis concelebrantur: cujus etiam muros dictus est Amphion lyræ sono excitasse. Quæ & urbs visa est deos protulisse. Summos ea certè imperatores, Epaminondam & Pelopidam protulit. Satis hæc magnificè atque ambitiosè de Bœotiis Thebis decantata: adeo ut Scriptores quidam minimè obscuri, nec continendi, ne Athenis quidem Thebas Bœotias celebritate nominis atque gloriæ cessasse judicaverint. Quæ tamen omnia ad nobilitatem Thebarum multò minora videbuntur, si ad Pandarum comparantur. Adeo visus est Pindarus ingenio & carminibus suis præ omnibus illis ornamentis atque insignibus urbem Thebanam decorasse. Nec immeritò magnus ille Alexander, quum deleri Thebas de Sociorum sententiâ placuisset, reverentiam adversus Pindarum adhibendam censuit, ut ejus domum, unam de totâ urbe, sartam tectam conservaret. Quid hîc dicam de Athenis? Athenas cum dico, Auditores, putate, dicere me, quod Thucydides, Græciam totius Græciæ, urbem me dicere eâ dignitate atque auctoritate, ut vel solo Athenarum nomine dignitas atque auctoritas universæ Græciæ niti olim vide-



videretur. Qua de urbe fama erat, deos inter se ipsos certasse. Quæ etiam urbs fruges mortalibus prima ostendisse ferebatur. Pleni omnium libri, pleneque omnium voces laudibus Athenarum: quæ quum plurimæ ab urbis vetustate, & potentiâ, & rerum gestarum magnitudine atque gloriâ in vulgus prædicentur; tamen quis neget, nullis aliis magis ornamentis, quàm doctrinarum Studiis liberalissimis, & viris doctis atque sapientibus, Athenas nobilitatas? Non probo te, Sophista Eunapi, cujus sententia fuit, iis, qui nati essent Athenis, nobilitatem illam & gloriam patriæ ad doctrinæ & eloquentiæ splendorem multum contulisse. Contra se res habet, Auditores. Nam, quod seu Menodotus, seu Galenus, verissimè gravissimèque affirmabat, compertum re ipsâ & exploratum est, non ex patriâ doctos viros, sed ex doctis & sapientibus viris patrias percelebres ac perillustres evasisse. Quod egregiè Galenus comprobabat ipso exemplo Athenarum. Unde enim tandem existimemus, tantum, & tam celebre nomen Athenarum per omnes latè terras pervasisse, easque omnino terras replevisse, nisi a summis & sapientissimis viris, qui, quum omni doctrinæ atque eruditionis gloriâ Athenis maximè floruisent, gloriam, quam ipsi ex semetipsis acquisiverant, cum urbe Athenarum communicarunt? Nanque inde profectò laudes illæ præcipuæ atque amplissimæ Athenarum, quod omnium doctrinarum magistræ atque inventrices Athenæ, quod summa dicendi vis & inventa & perfecta sit Athenis, quod nobilissimum orbis terrarum gymnasium, Athenæ, quod litteræ & civilis disciplina  
suum

suum veluti templum habuerint Athenis, quòd non fruges modò, sed etiam humanitatem & doctrinam & jura & leges in omnes terras distribuerint Athenæ. O veram hanc nobilitatem! o gloriam immensam Athenarum! quam nimirum nobilitatem atque gloriam urbi Athenarum summi homines ac summi ingenii præditi compararunt: homines, inquam, quorum vel unum ac solum nomen ad omnem abunde laudem ac prædicationem suffecerit. Et de Poëtis quidem Tragicis, pater ille Tragœdiæ Æschylus, firen illa Attica, Sophocles, &, qui maximè Tragicus, atque in sententiis summus habitus est, Euripides; de Comicis, princeps ille veteris Comœdiæ, Aristophanes, ut & novæ Menander; de Philosophis, maximus ille Philosophorum, idemque, Apollinis testimonio, mortalium omnium sapientissimus, Socrates, & Plato ille divinus, & Speusippus & Epicurus, &, qui Philosophorum magis, quàm historicorum, classi accensendus videtur, Xenophon ille Socraticus; de Scriptoribus historicorum, Thucydides, & Dexippus Herennius; de Oratoribus, pater ille eloquentiæ, Isocrates, & Oratorum longè princeps Demosthenes, & Demosthenis adversarius acerrimus atque eloquentissimus, Æschines; de nostris tandem, hoc est, de Christianis hominibus, Dionysius ille Areopagita, & Philosophus ille Athenagoras, & Clemens, qui, tametsi vulgò audiat Alexandrinus, quòd versatus est docuitque Alexandriæ, ubi & Origenem discipulum habuit; tamen natus est Athenis, unde & alicubi cognomen ei Atheniensi. His talibus ac tantis in doctrinâ viris, quis jam non videat ac fatea-

teatur, tantum gloriæ ac dignitatis urbi Atheniensi  
 accessisse, ea ut una urbs totius Græciæ decora  
 atque ornamenta complexa esse videatur? Quare  
 etiam veteres Poëtæ Athenas inter omnes Græ-  
 ciæ urbes propriâ singularique appellatione inclytas  
 vocitarunt, non tam ab ejus civitatis potentiâ, at-  
 que a rebus præclarè & fortiter gestis, quàm a  
 claritate & splendore litterarum. Quid? quòd  
 egregia illa & præclara Atheniensium facta, ut sa-  
 tis ampla & magnifica fuerint; tamen multò ea  
 majora, quàm fuerint, magno Scriptores ingenio  
 repræsentarunt? Quid? quòd Atheniensium virtus  
 tanta habita est, quantum ingenio & eloquentiâ  
 valebant, qui eam verbis extulerunt? Quid? quòd  
 minima etiam Atheniensium facta miro hominum  
 eloquentissimorum artificio pro maximis per terrarum  
 orbem divulgata? Quid? quòd maxima etiam maxi-  
 mèque gloriosa Atheniensium facta in oblivionem  
 jam pridem perpetuam venissent, nisi ea scriptis  
 suis summi ac litteratissimi viri memoriæ hominum  
 consecrassent? Quæsierat olim Plutarchus, rebus ne  
 bellicis, an studiis sapientiæ celebriores Athenienses  
 atque illustriores extitissent: ubi multa ille sapienter  
 atque eruditè! Et verè ille quidem affirmaverat, si  
 nulli res gesserint, nullum prorsus historiæ Scripto-  
 rem futurum. Sed & illud peræquè verum, si mul-  
 ti res multas, easque præclarissimas gesserint, &  
 tamen defuerint, qui res eas, seu scribendâ histo-  
 riâ, seu carminibus pangendis, litteris consignent,  
 omnem earum rerum præclarissimarum memoriam  
 quàm brevi perituram. Quid? Romanorum res ge-  
 stæ magnitudine atque gloriâ præclarissimis quibus-  
 que

que omnium aliarum gentium atque populorum factis plurimum præstiterunt: quippe quum res Romanorum non certis quibusdam locis, sed orbis terræ regionibus, definitæ essent atque circumscriptæ, & tam latè quoquoversus Romani arma circumtulissent, Romana ut historia non unius populi, sed generis humani historia videri posset. Et tamen tot illæ res ac tantæ, quas Romani gesserunt, donec imperio orbis terrarum potirentur, nullum vestigium sui reliquissent, nisi summi eas. Scriptores & Græci & Latini ad memoriam posteritatis propagassent. Quis enim nescit, quantum nominis atque splendoris, jam inde a temporibus vetustissimis, rei Romanæ attulerint antiqui illi seu historiarum, seu annalium Scriptores, ut nihil nunc dicam de Græcis, Fabius Pictor, M. Porcius Cato, L. Coelius Antipater, Q. Valerius Antias, L. Cornelius Sisenna, alique benè multi, qui nisi extitissent, tota res Romana vetustior, urbisque Romæ primordia in tenebris jacuissent. At verò, Deus bone! quantum nobilitatis & gloriæ rei illi Romanæ carminibus suis Nevius & Ennius Poëtæ adjunxerunt! quorum alter bellum Punicum primum, & luculentè quidem, cecinit; alter annales Romanos epico carmine conscripsit: qui & in Scipione, Poëmate suo, Scipionem illum Africanum superiorem; aliosque fortissimos & clarissimos viros ita laudavit, ut illis eorum laudibus populum maximè Romanum decoraverit. Postea verò, quàm, auctâ & confirmatâ Imperii Romani dignitate atque potentiâ, Latina ingenia polire se ac limare ad omnem Græcorum elegantiam, atque subtilitatem cœperunt, & Roma, domus illa virtut-

virtutis, imperii & dignitatis Græciam, principem illam & sapientiæ & eloquentiæ, quam armis superaverat, superare quoque voluit litterarum studiis & doctrinæ, quantum inde splendoris & gloriæ a litteris, & disciplinarum optimarum studiis rebus gestis Romanorum accrevit? Audeo dicere, Auditores, Romanos, victores illos orbis terrarum, non tantum armis, quantum sapientiâ & eloquentiâ, valuisse; quin etiam quod multò dictu mirabilius est atque grandius, magnitudinem Romanam, illam tantam, quanta, post hominum memoriam, nullius cujusquam populi fuit, minimam ac ferè nullam, visam fuisse præ magnitudine sapientiæ & eloquentiæ Romanorum; atque adeo Imperii Romani majestatem & gloriam nunquam majorem atque illustriorem in oculos nationum, atque in orbis terrarum admirationem incurrisse, quam cum eloquentiæ studia, & summa quæque ac præclara ingenia omnibus excellentis doctrinæ laudibus in urbe Româ viguerunt. Neminem vestrum fugit, Auditores, quod vulgò notissimum ac celebratissimum est, exemplum historiæ Romanæ maximè omnium memorabile, quod ut viri eloquentissimi summis in cælum laudibus extulerint, atque ego etiam ex hoc ipso loco semel atque iterum tertioque expendam atque commendaverim, sanè non indiligenter; tamen multò illud majus atque gloriosius est, quam ut unus aliquis verbis, aut etiam fortasse cogitatione, & animo, complectatur, de homine nimirum illo Gaditano, quem narrant T. Livii nomine ac gloriâ excitatum, ab ultimo orbe terrarum ad eum visendum venisse, eoque viso, inde statim

abiisse. Mirum tibi videtur, Hieronyme, quem Roma ad contemplationem sui minimè omnium traxisset, hunc eò famam unius hominis perduxisse. Videtur enim tibi magnum ea ætas omnibusque seculis inauditum miraculum habuisse, ut, qui tantam urbem ingressus esset, aliud ab eâ urbe quæreretur. At enim ea est gloria, Hieronyme, eaque nobilitas eruditionis ac litterarum, multò ea meherculè major atque admirabilior, quàm omnes res gestæ & maxima quæque ac gloriosissima facta Romanorum. Itaque hominem illum Gaditanum Romam, non ipsa urbs princeps orbis terrarum, tot trophæis ornata, tot triumphis ditata, tot victoriis spoliisque omnium gentium locupletata, cujus etiam urbis Senatus tot e regibus, quot e Senatoribus, constare videretur, non ipsa, inquam, Roma Romanam, longè a patriâ, eum hominem attraxit atque allexit; sed unus ille ac solus Livius, qui historiam populi principis terrarum jam inde ab urbe conditâ lacteâ prorsus eloquentiâ mirâque ingenii ubertate per annos ampliùs septingentos usque ad tempora sua perduxisset. Cogitabat enim, nihil esse in urbe Româ, atque adeò in toto Imperio Romano, quod cum T. Livii nomine atque gloriâ adæquaretur. Quòd si Livius Patavinus rebus Romanis tanto decori atque honori fuit, ut homo Gaditanus nullum omninò urbis principis atque pulcherrimæ ornamentum cum Livio conferri posse existimaverit, quid porrò censendum de aliis summis & præstantissimis viris, qui eloquentiæ & eruditionis gloriâ Livio longè antecelluerunt, aut certè nihilo, quàm ille, inferiores fuerunt, quantum eos nominis atque nobili-

bilitatis credendum est rebus Romanis, populi-  
Romani majestati adjecisse? Non est meum, hoc  
præsertim loci, Auditores, de magnis atque excel-  
lentibus veteris memoriæ ingeniis judicare. Attamen  
scio, acerrimo olim viros judicio, rerumque ista-  
rum, quæ ad studia humanitatis pertinent, intelli-  
gentissimos, Livio illi Patavino in historiâ Romanâ  
Sallustium longè anteposuisse: quem etiam Sallustium  
Thucydidi audacter opposuerunt, ita ut, qua virtu-  
te Thucydides potissimum valet, nimirum brevitä-  
te, hac eum a Sallustio victum, superbè nonnulli  
jactitent. Scio etiam, sexcentos alios, eximiâ vi-  
ros sapientiâ atque doctrinâ, nomen Romanum in-  
genii sui & eruditionis lumine mirificè illustrasse, ita-  
que illustrasse, ut Roma, lux illa orbis terrarum,  
litterarum magis & eloquentiæ, quàm rerum gesta-  
rum splendore, genus humanum ad magnam admi-  
rationem sui traduxerit. Quis enim non maximè mi-  
ratus aut Romanorum omnium doctissimum atque  
eruditissimum M. Terentium Varronem, quem tam  
multa legisse ajunt, mirum ut fuerit, aliquid ei un-  
quam temporis ad scribendum vacasse, & tam  
multa scripsisse, ut tam multa vix alter quisquam  
legerit; aut subtilem illum de naturâ disputatorem,  
magisque Philosophum, quàm Poëtam, Lucretium,  
quem tanti fecisse M. Tullius dicitur, ut ejus li-  
bros emendaverit; aut magistrum præstantissimum  
atque copiosissimum morum & disciplinæ, Senecam  
Cordubensem; aut præceptorem illum prudentissimum  
atque uberrimum civilis doctrinæ, Cornelium Ta-  
citum, patriâ Romanum; aut C. Plinium Vero-  
nensem, virum temporum suorum facilè doctissimum,

qui naturæ totius historiam opere admirabili ac vario accuratissimè ac diligentissimè descripsit; aut etiam C. Julium Cæsarem, victorem illum non exterarum modò gentium, sed etiam ipsius Imperii Romani, clarissimum atque celebratissimum, qui tamen multò celebratior ac clarius ab eloquentiâ & eruditione, quam a victoriis, fuerit, multòque magis ingenio, quam rebus suis maximis, nomen Romanum condecoraverit? Quid in singulis moror, Auditores, excellenti viris ingenio atque eloquentiâ, qui commentando & scribendo plus nobilitatis & gloriæ nomini Romano, quam duces & imperatores fortissimi Romanorum agendo, pepere-  
runt? quando omnium iustar esse possunt, qui duo inter omnes mortales omni ingenii & eruditionis atque doctrinæ laude maximè excelluerunt, M. Tullius & Virgilius. Quem enim mihi inter omnes Græcos & Latinos Poëtas parem dederis Virgilio? qui omnem Poëticæ gloriam, qua Græci maximè propter Homerum & Hesiodum & Theocritum, aliosque optimos Poëtarum, circumfluebant, videtur mihi unus ad Romanos derivasse. Vel quem mihi de omnibus & Græcis & Latinis Oratoribus parem protuleris Marco Tullio, qui Demosthenis ita eloquentiam expressit, ut Platonis simul sapientiam perfectè adæquaverit? Verè tu olim, Cai Cæsar, de Marco Tullio, eum, quòd Latinè loquendi copiam in urbe Româ invenisset atque illustrasset, bene de nomine ac dignitate populi Romani meritum fuisse. Quam planè splendidam atque magnificam Marci Tullii laudem cur non æquo nos jure cum Virgilio, Poëtâ maximè divino, commu-  
nice-



nicemus? ut utrumque illum, & Oratorem & Poëtam, de populi Romani nomine & dignitate optimè promeritos prædicemus, eo quia, quo uno Romani a victis Græcis vincebantur, id Tullius & Virgilius, in suo quisque scribendi genere, aut Græcis eripuerunt, aut certè Romanis cum Græcis communicarunt; itaque plus illi dignitatis populo Romano, quàm omnes summi imperatores, propter victorias de hostibus reportatas, attulerunt. O immortalem hanc gloriam, o dignitatem, o nobilitatem litterarum! O ceteros illos Oratores Romanos! O delicias illas Poëtarum Romanorum! O Lycea, o Academias, o tot summos philosophos Romanorum! O leges illas Romanas, quæ sapientiâ atque auctoritate visæ sunt omnia scita, ac decreta philosophorum longissimè superasse! O jurisconsultos illos Romanos, summâ viros sapientiâ & eloquentiâ! O Q. Mutium Scævola! o Antistium La-beonem! o Attejum Capitonem! o Masuriū Sabinum! o Æmiliū Paulum Papinianum, tutissimum illud & certissimum asyllum juris Romani! o etiam de Medicis Cornelium Celsum, magnâ virum doctrinâ, adeo ut Hippocratem eum Romanum vocaverint! O Roma, Roma, tandem illa Christiana, quantò tete major atque nobilior, Roma, a gloriâ atque nobilitate ingeniorum Christianorum! quantò plus tibi laudis, atque ornamenti a Gregorio illo Magno, atque ab Ambrosio, Pontifice Mediolanensi, utroque cive tuo, priori etiam Pontifice! quàm te, Roma Christiana, scriptis suis & Clemens Pontifex, & Minutius Felix orator, & Boëthius illustrarunt! Apage eos, qui illustrium clarorum-

rorumque virorum nobilitatem nobilitate duntaxat  
 & gloriâ patriæ metiuntur. Nam, ne Româ qui-  
 dem patriâ, ideo docti & sapientes viri a patriâ no-  
 biliore. Neque tu mihi objicias Themistoclem, sum-  
 mum Græciæ virum ac facili principem: quem fe-  
 runt Seriphio cuidam, quum ille dixisset, non eum  
 suâ, sed patriæ gloriâ, splendorem esse assecutum,  
 in jurgio respondisse: nec hercule ego, si Seriphius  
 essem; nec tu, si Atheniensis, clarus unquam ac  
 nobilis fuisses. Quasi verò ignobilitas patriæ homi-  
 ni quidquam officeret atque obstarat ad nobilitatem  
 claritatemque nominis consequendam. Atque ita sa-  
 nè esto, si ita vis, Themistocles. Ignobilis planè sit,  
 per me licet, atque obscurus, qui patriâ est Se-  
 riphio, insulâ exiguâ admodum atque ingnobili: sed,  
 nisi accesserint ornamenta virtutis aut doctrinæ. Nam  
 ne Athenis quidem, hoc est, in urbe nobilissima, na-  
 tus, in clarum unquam ac nobilem virum, Themis-  
 tocles, evasisses, nisi virtute ceteris præstitisses.  
 Quòd si ornamenta illa adfuerint, quid tandem,  
 quocunque quis loco natus sit, defuerit ei ad glo-  
 riam atque nobilitatem? Testor ego summâ olim  
 viros sapientiâ, atque a doctrinâ celebratissimos,  
 qui quum vel humili atque obscuro loco nati essent,  
 vel parva atque ignobilia oppida incoluissent; ta-  
 men, quod aliis dedecori ac probro ducebatur, igno-  
 bilitas nimirum & obscuritas patriæ, id ipsum illis  
 in nobilitatem celebritatemque nominis redundavit,  
 quòd patrias nimirum suas, suosque lares atque in-  
 cunabula nomine illi suo illustravissent. Scythia fuit  
 Anacharsis. At quanto Scythiæ decori atque or-  
 namento, cum Scythico illo suo tegmine, Ana-  
 char-

charsis ! quem si Scythia philosophum minimè genuisset , sapientiæ ea nunquam nomine commendata a veteribus fuisset . Eleates fuit Zeno . At quantum Eleæ , Lucanorum oppido , nobilitatis & gloriæ ingenii sui subtilitate Zeno ille Eleates comparavit ! Stagirita Aristoteles fuit , oppido tenui & obscuro Macedoniæ . At quid Stagiris propter Aristotelem celebratius ? Aristotelem , inquam , maximum illum , secundum Platonem , Philosophorum : qui non Stagira modò patriam nominis sui claritate exornaverit ; sed etiam Athenarum gloriam ingenii sui ac doctrinæ splendore , non minùs , quàm Plato ipse Atheniensis , auxerit atque amplificaverit . Thrax fuit Democritus . Thrax Protagoras , uterque Abderis patriâ unde & ipsis appellatio Abderitis . At quantum Thraciæ splendoris & gloriæ Democritus , Philosophus ille sapientissimus , & auditor ejus Protagoras , impertiverunt ! de quibus Democritus tam elato excelsoque animo fuisse dicitur , ut ne venerit quidem Athenas , ut ne gloriam , quam ipse daret loco , in quo versaretur , a celeberrimâ illâ urbe aucupari idem velle videretur . Eresius Theophrastus fuit , Sappho quoque Eresia , oppido quidem in insula Lesbo satis fortasse claro ab ubertate & fertilitate agrorum , at ò quantò eodem clariori atque notiori propter Theophrastum illum divinum , & illam a carminum suavitate decimam veluti Musarum , Sapphonem Poëtriam ! Quis Samum , tametsi clarissimam olim illam & nobilissimam , tamen quis nunc Samum nominaret , nisi , ut nihil loquar de Samio Aristarcho , natus in eâ fuisset Pythagoras ille Samius , a quo nomen ipsum Philosophiæ ? Quis nunc  
Teon ,

Teon, urbem Ioniæ, nisi in ore vulgi, frequenti-  
 que hominum sermone vigeret Anacreon Tejus?  
 Quis Prienen, urbem & ipsam Ioniæ, nisi eam ur-  
 bem, patriam suam, claram & illustrem ad memo-  
 riam posteritatis reddidisset sapiens ille Bias Prienen-  
 sis? Quis Nyssam, urbem Cappadociæ, nisi famæ  
 etiam nunc celebritate floreret Gregorius Nyssen-  
 us? Quis Phalerum, pagum quondam Atticæ, nisi in lu-  
 cem ibi editus fuisset Demetrius Phalereus? Quis  
 Ceon, insulam Ægæi, nisi maxime celebrem ac me-  
 morabilem eam fecisset inventor ille artis memo-  
 riæ Simonides Cejus? Quis Coon, nisi eam insulam  
 ortu ac domicilio suo præ ceteris plerisque insulis  
 nobilitasset parens ille medicinæ Hippocrates Cous?  
 Quid de plerisque aliis urbibus, atque adeo locis,  
 aliquantò nunc obscurioribus atque ignobilioribus,  
 quæ tamen, doctrinæ doctissimorumque hominum  
 beneficio, clarissimum atque amplissimum apud po-  
 steros nomen obtinuerunt? Quem enim nunc ve-  
 strum, Auditores, Stridonis nomen prætereat, op-  
 pidi jampridem everfi, planèque nunc ignoti, nisi  
 nominis ei famam ac celebritatem Hieronymus Stri-  
 donensis dedisset? Quem fugiat Tagaste, municipium  
 quondam Numidiæ, nunc penitus obscurum, nisi pa-  
 ter ille Theologorum, Augustinus Tagastensis ortu  
 illud suo illuistrasset? Quis jam Daldiam ignoret,  
 quam vulgò notam atque percelebrem fecit Arte-  
 midorus Daldianus? Quis jam nesciat Nazianzum,  
 oppidulum illud Cappadociæ, quo tamen nullum  
 omnino oppidum clarius atque celebrius, propter  
 Gregorium Nazianzenum? aut quis tandem Aferam,  
 oppidum tenue & miserrimum Bœotiæ, cujus ta-  
 men

men tandiu nomen memorabitur, quandiu nomen & carmina Hesiodi Aſcræi? Quis jam finis exemplorum? quando poſt hominum memoriam ea ſemper fuit gloria ſapientiæ ac litterarum, ut, qui in iis excellerent, quæ loca obſcura atque ignobilia erant, ea ii loca ingenii & doctriinæ ſuæ lumine illuſtrarent; quæ urbes maximæ ac nobiliſſimæ, iis illi urbibus magnam claritatis atque nobilitatis acceſſionem adjungerent; ipſi verò non aliunde, quàm a ſemetipſis atque a doctriinâ ſuâ, claritatem nominis atque nobilitatem acciperent ac mutuarentur. Quæ quum ita ſe habeant, quis jam miretur, Auditores, celeberrimas quondam & nobiliſſimas urbes totius Græciæ tantâ inter ſe contentione, tanquam de principatu & imperio, de Homero decertaſſe, quænam eum ſibi civem ſuum vindicaret; neque urbes modò Græciæ, ſed etiam totas nationes, de Homeri patriâ inter ſe acerrimè pugnaſſe? Nam & Ægyptii Homerum, tanquam ſuum, ſibi a Græcis repetebant. Tantum inde ſibi ornamenti & laudis & nobilitatis ab ingenio illo divino, fonteque totius Græcæ ſapientiæ omniumque doctriinarum copioſiſſimo atque uberrimo, accedere exiſtimabant. Quid? Ipſi illi, qui dignitate & potentiâ atque auctoritate dii veluti quidam inter mortales habentur, ſummi imperatores ac reges, quorum etiam eſt pro maximâ ſuâ poteſtate natalibus homines reſtituere, hoc eſt, de plebe adſciſcere ad nobilitatem, non ne ipſi illi, qui nobilitate ceteros donant, a litteris & doctriinâ nobilitantur? Neque id modò, ſi litteras ipſi excolant; ſed etiam ſi doctorum litteratorumque hominum conſuetudine

ac familiaritate utantur, &, quos eximiâ præstare vident doctrinâ, singulari eos atque extraordinario honore afficiant. Appello te, Sigismunde Imperator, summâ vir prudentiâ atque perspicaciâ, quem ad principes viros Germanorum, quum ab iis aliquando reprehenderere, quòd doctos homines, humili loco natos, coleres, ac foveres, id responsi dedisse ferunt: Ego verò illos observo, quos natura longè inter alios excellere voluit. Ac verè tu quidem, & præclarè, Sigismunde. Nam quæ ab Imperatore ordinis & conditionis præ reliquo vulgo nobilitas in viros quosdam principes atque eximios proficiscitur, quam plerique vestrum, Jurisconsulti, veram ac genuinam ducunt & præclaram nobilitatem, ea certè, neque vos mihi, Jurisconsulti, negabitis, tota posita est in more atque instituto humano: quæ quidem nobilitas & dari potest & auferri. Verum quæ ab excellentiâ eruditionis atque doctrinæ in summos atque egregios viros profluit, ea meherculè nobilitas non fortunæ est, sed naturæ: quippe quum naturâ comparatum sit, ut sapientia ceteris rebus humanis, iisque fluxis atque fragilibus, longè antecellat. Hinc pretium, hinc dignitas, hinc amplitudo & nobilitas litterarum. Hinc iis, qui in altissimo rerum humanarum apice constituti erant, multò sæpe minor regni & imperii majestas visa fuit, quàm præstantia litterarum. Hinc qui, propter rerum gestarum gloriam, summamque potentiam, aliis erant admirationi, ipsis maximæ admirationi homines in primis docti & litterati fuerunt. Quid? quòd ne reges quidem maximique imperatores, rebus maximis gestis, in tantâ illâ fortunæ

tunæ gloriâ , atque in illo tanto victoriarum ac triumphorum splendore , ne propter regnum quidem , quo nihil in rebus humanis sanctius atque augustius habetur , satis sese præ reliquo hominum genere claros ac nobiles crediderunt , nisi ad cetera illa dignitatis regiæ atque imperii ornamenta , lunien quoque doctrinarum ac litterarum adjungerent ? Ambitiosissimè Magnus ille Alexander ad Aristotelem : Ego verò , inquit , optimarum rerum scientiâ malim , quam opibus & potentiâ , ceteris præcellere . Et præclarè quidem ille Magnus , qui magnitudinem in eo potissimum suam collocabat , ut doctrinâ & scientiâ magis , quàm imperio , ceteros anteiret . Quid de nostris C. Julius Cæsar ? cui non satis fuit , tot & tam barbaras gentes , & tam latè dispersas , domuisse , & , quod multò majus atque gloriosius fuit , Pompejum illum magnum memorabili prælio vicisse , & totam rempublicam Romanam unum tenuisse , nisi ipse semet litteraturæ quoque laude nobilitaret , rerumque suarum commentarios tam eleganter & ingeniosè conscriberet , ut omnibus , qui vellent historiam scribere , palmam præripuerit . Hinc igitur a nobilitate illâ & quadam veluti divinitate litterarum tot illi honores , & tanti , omni tempore habiti iis , qui maximè in litteris excellerent , honores illi quidem certè tam magni , ut majores maximis regibus atque imperatoribus nunquam deferrentur . Quid enim in litteras honorificentius , quàm tantum honoris tributum esse Virgilio , quantum memoriæ in Dialogo de Oratoribus traditum fuit , ut populus Romanus , auditis in theatro versibus Virgili , universus surgeret , & præsentem spectantem-

que Virgilium sic, quasi Augustum, veneraretur? Quid de præmiis litterarum? Quid enim majus, magisque in omnem posteritatem celebrandum, quàm quod in historias Cimbricas relatum est, Cimbro tantum litteras ac Poësin fecisse, ut paucos quosdam versus, quos Hiarnus quidam Poëta in Frotonis, regis sui, tumulum composuisset, ipso Cimbrico regno remunerarentur? O Pisæ, o Pisæ, o urbs, princeps quondam Etruriæ, quanta, o Pisæ, præ reliquis Etruriæ urbibus nobilitas tua! Dixi ego, minus certe, quàm debui, atque etiam volui: at dixi tamen, quantum potui, laudes tuas. Magnæ laudes tuæ, Pisæ, quas tua tibi virtus, rerumque gestarum magnitudo, adsciverunt, tot bella gessisse, tot provincias confecisse, tot barbaras gentes devicisse, tot terras disjunctissimas Europâ, Asiâ, Africâ, victoriis illustrasse, tot de hostibus nominis Christiani triumphos egisse, tot ubique tropæa erexisse, tot & tam opimis victarum gentium spoliis temetipsam locupletasse. Attamen laus tua maxima, urbs clarissima Pisarum, splendor est ac gloria litterarum, quarum beneficio ceteræ laudes tuæ supra reliquam longè Etruriam in communi nunc orbis terrarum luce versantur. Quæ quidem laudes nisi a litteris & eloquentiâ eluxissent, universæ jam pridem in oblivione hominum sempiternâ, o Pisæ, delituissent. Hæc vera nobilitas est, cives Pisani, quæ vestra etiam est ac fuit, nobilitas litterarum. Quod si maxima hæc est, atque excellentissima, splendidissimaque omnium nobilitas, videte, cives Pisani, quantum civitas vestra litteris debeat, quantumque a litteris ceteris Etruriæ civitatibus nobilitatis gloriâ antecel-



recellat. Videte hîc etiam, optimi adolescentes (ad vos enim, quorum causa suscepta est, mea jam convertetur oratio) videte, inquam, adolescentes, veræ solidæque nobilitatis, hoc est, sapientiæ & eloquentiæ, omniumque doctrinarum, studiosissimi, quanta sit dignitas atque gloria litterarum, quæ hanc tantam tamque gloriolam nobilitatem principibus etiam urbibus, ipsis quoque regibus atque imperatoribus, largiuntur, ipsæ a nemine quoquam mortalium mutuuntur. Id enim mihi unum reliquum est, adolescentes, ut, qui generis nobilitate præstatis, ad id vos excitem, quod præcipuum est ac singulare ornamentum nobilitatis; qui verò ingenio & doctrinâ consequi potestis nobilitatem, ad studia vos litterarum cohorter, quæ est una via veri honoris, veræque nobilitatis.





ALEXANDRI POLITI<sup>271</sup>  
AD UBALDUM MIGNONIUM,  
VIRUM CLARISSIMUM,  
DE TRIBUS MARTYRIBUS BONONIENSIBUS,  
EPISTOLA.

Ubaldo Mignonio, Viro Clarissimo atque doctissimo,  
collegæ suo, Alexander Politus  
S. P. D.



Ccepi litteras tuas aliquantò ferius,  
amicorum optime atque doctissime.  
Rogas me sententiam de tribus  
Martyribus Bononiensibus, Hermete,  
Aggæo, & Cajo, de quibus  
in Sacris Fastis die quarto Januarii.  
Nihil ego tibi, pro summis  
tuis in me promeritis, negare  
possum, Mignoni: quando is amor tuus erga me  
est, eaque tua in me beneficia, ut omnia tibi  
mea

mea debeam. Nam & tibi, fautori meo, debita mea in Martyrologium Romanum lucubratio. Faciam igitur, quod jubes, ut, quod in Commentarios meos ad Martyrologium Romanum jamdudum retuleram, inde id tibi exscribam; eoque libentiùs, quòd nonnullos videam, viros scilicet doctissimos, qui se Fastis Romanis quàm maximè studere profitentur, tamen tres illos Martyres Bononienses ab urbe Italiæ Bononiâ longè aliò amandare, quos ego Martyres certò existimo, de Martyrologi quidem Romani sententiâ, urbi Italiæ Bononiæ esse adscribendos. Ita de his Martyribus Martyrologium Romanum pridie Nonas Januarii: *Bononiæ Sanctorum, Hermetis, Aggæi & Caii Martyrum, qui sub Maximiano Imperatore passi sunt.*

Martyrologium Hieronymianum Epternacense Bollandi: *In Oriente, civitate Bononiâ, Hermetis, Aggæi, Caii, Aëdii Episcopi.* Lucense Florentinii: *In Oriente, Bononiâ civitate, Ermetis, Aggæi & Gagi.* Corbejense Acherii: *In Oriente, Bononiâ civitate, Hermetis, Aggæi, Caii, Petri, Marci, Sereni, Senni, Anastasiæ.* Sic & alia Martyrologia Hieronymiana, ut Richenoviense Sollerii: *In Oriente, Bononia civitate, Hermetis & Gagi.* Et auctarium Bedæ apud Henschenium, ex codicibus, Atrebatensi, Tornacensi, Lætiensi: *In Oriente, Bononiâ civitate, Hermetis, Aggæi, Gagi.* Martyrologium Reginæ Sveciæ apud Sollerium: *In Oriente, civitate Bononiâ, Ermetis, cum aliis duobus.* Gallicanum Martenii: *In Oriente Bononiâ, Ermentis, Aggæi & Gagi.* Quid sibi in his Martyrologiis vult, *in Oriente, civitate Bononiâ?* Equidem

dem sic censeo, in Martyrologio vetustissimo Hieronymiano luxata fuisse olim verba; quumque scribendum esset, *In Oriente, Adui Episcopi. In civitate Bononiâ, Hermetis, Aggæi, Caii*. Sive, ut alibi: *In Oriente, Petri, Marci, Sereni, Senni, Anastasiæ. In Bononiâ civitate, Hermetis, Aggæi, Caii*; transpositis omnino verbis, locisque confusis, urbem Bononiam positam esse in Oriente, &, qui Martyres Bononienses erant, in Orientem eos contributos. Hinc excitata est nonnullorum diligentia, ut urbem Bononiam in Oriente perquirerent, ac tandem sibi in Illyrico Orientali reperisse viderentur. Duplex urbs Pannoniæ, Bononia, altera superioris, altera inferioris. Altera memorata Ptolemæo in Pannoniâ superiori, altera recensita ab Antonino itinere per ripam Pannoniæ a Tauruno in Gallias: quam alteram dicit Ammianus a *Sirmio milliario nono disparatam & decimo*. Qua de etiam Ammianus Lib. 31. c. 11, *Ipse (Gratianus) cum expeditiore militum manu, permeato Danubio, delatus Bononiam, Sirmium introiit*. Hic videtur Constantinus rescriptum ad Italicum dedisse, L. 1. C. De *Privilegiis domus Augustæ*. Hujus autem Bononiæ mentio in Notitiâ Imperii Occidentalis, *sub dispositione Ducis Provinciæ Pannoniæ Secundæ Ripariensis, sive Savie*. Provinciæ in eâ Notitiâ sex Illyrici Occidentalis, *sub dispositione Præfecti Prætorio Italiæ, Pannoniæ Secundæ, Savie, Dalmatarum, Pannoniæ Primæ, Norici Mediterranei, Norici Ripensis*. Unde manifestò apparet, Bononiarum illarum neutram ad Illyricum Orientale pertinuisse. Sed & alia fuit Bononia urbs.

M m

Illy-

Illyrici Orientalis. Memorata hæc Antonino itinere per ripam a Viminacio Nicomediam: cujus etiam meminit Procopius lib. 4. De Ædificiis, c. 6. Atque hæc in Notitiâ Imperii Orientalis, urbs Daciæ Ripensis. Malè eadem a viro docto confusa cum Bononiâ Pannoniæ Secundæ. Quid provinciarum, post factam divisionem Illyrici in Orientale & Occidentale, Illyrici Orientalis finibus includeretur, patet ex Notitiâ Imperii Orientalis: *Sub dispositione virorum illustrium Præfectorum Prætorio per Illyricum Diœceses infra scriptæ: Macedonia, Dacia. Provincia Macedonia vi. Achaja, Macedonia, Creta, Thessalia, Epirus vetus, Epirus nova, & pars Macedonia Salutaris. Provinciæ Daciæ v. Dacia Mediterranea, Dacia Ripensis, Mæsia Prima, Dardania, Prævalitana, & pars Macedonia Salutaris.* Hæc omnes Provinciæ Illyrici Orientalis, sub administratione Præfecti Prætorio Illyrici: quarum provinciarum una, Dacia Ripensis sub Duce. Itaque sub dispositione Ducis Daciæ Ripensis, in eâ Notitiâ, *Cuneus Equitum Dalmatarum Forensium Bononiæ.* Verùm quo tempore sub Maximiano Imperatore Martyres illi Bononienses martyrium passi fuerunt, nulla illa erat Illyrici in Orientale & Occidentale divisio. Unum antea & sub uno aliquando Duce Illyricum fuisse, ostendunt illa Valeriani Augusti de Claudio, duce tum Illyrici, ad Ablavium Murænam Præfectum Prætorio: *Dux factus est, & dux totius Illyrici. Habet in potestatem Thracios, Mæses, Dalmatas, Pannonios, Dacos exercitus.* Quin &, Imperio postea Romano, Diocletianæis temporibus, in partes diviso, tamen Illyri-

lyricum indivisum mansit, idque discretum a partibus Orientis. Aurelius Victor de quadripartitâ Imperii tunc distributione: *Et quoniam bellorum moles, de qua supra memoravimus, acrius urgebat, quasi partito Imperio, cuncta quæ trans Alpes Gallia sunt, Constantio commissa; Africa, Italiaque Herculo; Illyricique ora ad usque Ponti fretum, Galerio; cetera Valerius retentavit.* Et, posteaquam Valerius Diocletianus, & Maximianus Herculus sese Imperio abdicarunt, de bipartitâ tunc Imperii Romani divisione Eutropius: *His igitur abeuntibus ab administratione Reipublicæ, Constantius & Galerius Augusti creati sunt: divisusque inter eos ita Romanus orbis, ut Galliam, Italiam, Africam Constantius; Illyricum, Asiam, Orientem, Galerius obtineret.* Et Orosius: *Galerius & Constantius Augusti, primi Romanum Imperium in duas partes determinaverunt. Galerius Maximianus Illyricum, Asiam & Orientem; Constantius Africam, Hispaniam & Gallias obtinuit.* Nec videtur sanè Constantinus, posteaquam universum Imperium ad eum unum ac solum redierat, divisisse bifariam Illyricum, quippe qui, præfecturis divisus, Præfectisque Prætorio quatuor per orbem Romanum constitutis, uni de his Præfectis, quem alium esse jussit a Præfecto Prætorio Italiæ, non Macedoniam modò, & Thessaliam, & Cretam, aliasque Illyrici Orientalis provincias; sed etiam, quæ sunt Occidentalis Illyrici, Pannonias, τῆς ἄχρι τῆς Βαλερίας Παίωνας, Pannonios usque ad Valeriam, attribuerit. Sed, tripartito inter Constantini filios Imperio, quum Constanti, natu filiorum minimo, Italia & Africa at-

que Illyricum, Dalmatia & Thracia, Macedoniaque & Achaja obvenissent, ex partitione illâ Imperii factum, ut, qui Præfectus erat Prætorio Italiæ, ei non Africa modò, sed etiam totum, quantumcunque erat, Illyricum subiceretur; sicque e tribus tantum præfecturis, contraquam Constantinus decreverat, Imperium Romanum constaret. Hinc enim & illud Ammiani Lib. 26. c. 5. ubi de Valentiniano & Valente simul Augustis: *Et Orientem quidem regebat potestate Præfetti Sallustius; Italiam verò cum Africâ & Illyrico Mamertinus; & Gallias provincias Germanianus.* Totum Illyricum Mamertinum administrasse, ex eo manifestum, quòd Probus, qui eandem postea præfecturam iisdem sub Imperatoribus & Gratiano gessit, jurisdictione per Illyricum universumungebatur. Itaque compulsi ab eo Epirotæ, ut, ad ceterorum provincialium exemplum, legationem & ipsi ad Valentinianum mitterent, Ammiano teste Lib. 30. c. 5. Disertè Constitutio Gratiani, Valentiniani & Theodosii Imperatorum ad Probum Præf. Prætorio: *Igitur sinceritas tua id ipsum per omnem Italiam, tum etiam per Urbicarias, Africanasque regiones, ac per omne Illyricum, prælatâ oraculi hujus auctoritate, firmabit.* Lege unicâ Cod. Theodos. *Si per obreptionem fuerint impetrata.* Nec dum enim, Valentiniano juniore imperante, cujus illa est Constitutio, bipartitum Illyricum fuerat. Quod non ante factum, quàm Imperium totum Romanum inter Arcadium & Honorium divideretur. Nam tum demum, mutatis, pro arbitratu, utriusque Imperii ab Oriente, & Occidente finibus, variari quoque oportuit terminos præfecturarum,

ita-



itaque Illyricum, quod indivisum eò usque, atque in unius ejusdemque Imperatoris ditione unum permanerat, in partes duas distribui, quarum altera ad Imperium Orientale, altera ad Occidentale, altera ad Præfectum Prætorio Illyrici, altera ad Præfectum Prætorio Italiæ, pertineret.

Quæ de Illyrici illis temporibus divisione ideo a nobis disputata, ut, qua ratione, qui martyrium passi Bononiæ, urbe Illyrici Orientalis, ii in Oriente martyrium passi dici possent, explicaremus. Verum quis unquam Orientis nomine, sic ἀπλῶς & generatim prolato, Illyricum Orientale intellexerit? Nemo planè unus: quando in diœcesium, vel Provinciarum Romanarum distributione, discretum semper est Illyricum ab Oriente, & alia fuit præfectura Illyrici, alia Orientis. Existimandum potius, quod dixi, luxata esse; ut alibi, sic etiam hoc loci, vetustissimi Martyrologii Hieronymiani verba, suosque tres Bononiæ, urbi Italiciæ, Martyres, Hermetem, Aggæum, Cajum, esse constanter conservandos; ceteros verò Martyres, qui ad tres illos adjecti in antiquis codicibus reperiuntur, inde esse in Orientem, unde transpositi librariorum negligentia erant, certissimè remittendos. Nec enim, nisi tres, de tot illorum numero, Martyres Bononienfes. Martyrologium Hieronymianum Martenii ex codice antiquissimo Autissiodorensi: *Bononiâ, Hermetis, Aggæi, Gagi*. Martyrologium Gellonense Acherii: *Bononiâ, Hermites, Aggei, Gagi*. Martyrologium Labbeanum Sollierii: *Bononiæ, Hermetis, Aggei, Gaj*. Nulla hîc mentio Orientis: ut neque in Martyrologio Morbacensi Martenii, ubi unius fuit Hermetis

metis Bononiæ commemoratio; neque in Augustano Sollerii, ubi in urbe Bononiâ commemoratio Hermetis & Caii. Nam Aggæus in codice eodem Augustano, luxatis item verbis, recensetur inter Martyres Africæ. Optimè igitur, atque ex veterum exemplarium fide, Ufuardus: *Item apud civitatem Bononiensem Sanctorum Martyrum, Hermetis, Aggæi & Caii*. Nec erat sanè, cur Sollerius ille doctissimus malæ fidei Ufuardum incusaret, quasi is scilicet Hieronymianum hîc Martyrologium nec integrè, nec fidè repræsentasset, omissis verbis illis, *in Oriente*. Quæ quidem verba, de Martyribus certè Bononiensibus, minimè omnium videntur in castigatissimo Hieronymiano exemplari, quo Ufuardus usus est, extitisse. Quæ verba neque habent antiquissima alia Martyrologia. Neque verò contra vetera omnia monumenta, quod aliqui caussantur, ad Martyres hos Bononienses apposuit Baronius tyrannum Maximianum. Nam neque id de suo apposuit Baronius, quod ante habuit Martyrologium Romanum, quàm quid ei Martyrologio a Baronio adderetur; neque contra vetera omnia monumenta appositum id fuerat, quod tabularum Ecclesiæ Bononiensis auctoritate in primis nitebatur. De tabulis Ecclesiæ Bononiensis testis locupletissimus Baronius. Martyrologium Romanum, Gregorii XIII. iussu editum Romæ anno 1583. *Bononiæ Sanctorum, Hermetis, Aggæi, & Caii Martyrum, qui sub Maximiano Imperatore passi sunt*. Testatur porrò Baronius, ei nominatim Martyrologii Romani editioni, quæ facta est Romæ anno 1584. aliquid a se emendationis, vel etiam additionis, accessisse. Sed, quocunque tandem

dem auctore, facta ea fuerit ad Martyrologium Romanum additio, certè quidem fatendum est, bene eam ex Ecclesiæ Bononiensis traditione, atque etiam ex historiæ fide, factam fuisse. Quippe constat, Maximianum Herculium persecutionem in Christianos per Italiam exercuisse, cui Italia cum Africâ in Imperii partem cesserat. Lactantius de Mortibus Persecutorum, ubi de persecutione motâ a Diocletiano: *Et quidem senex Maximianus libens paruit per Italiam, homo non adeo clemens*. Persecutionem autem illam quum Diocletianus Nicomediæ vii. Kalend. Martias excitaverit anno 303. & uterque ille Imperator, Diocletianus & Maximianus, anno demum 305. Kalendis Maji, ille Nicomediæ, hic Mediolani, Imperium deposuerint, facilè hinc collegerimus, Sanctos hos Martyres Bononienses, qui sub Maximiano Imperatore pridie Nonas Januarii passi sunt, alterutro de his annis, aut 304. aut 305. martyrium Bononiæ subiisse.

Hæc habui, quæ ad te ego, Vir Magne, de tribus Martyribus Bononiensibus rescriberem. Hujus ferè generis sunt omnia, quæ in Martyrologium Romanum elaboravi: in quibus nihil mihi magis cordi fuit, quàm & veritati, & Martyrologii Romani auctoritati pro virili consulere. Hæc interea, qualiacunque sint, velim tecum ipse, pro judicio & doctrinâ tuâ, diligenter expendas, &, si tanti videbuntur, referas etiam ad Maximum, beatissimumque Pontificem, Benedictum XIV. summâ virum sapientiâ & doctrinâ: cui si probabuntur, nihil erit, quòd me laboris mei pœniteat. Spero equidem, pergratum Pontifici, perque jucundum


dum fore , quòd tres illos Martyres , quos viri doctissimi patriæ ejus eripuerunt , causâ jam deploratâ , ego & primus & solus Bononiæ certò restituerim.

Vale , amicorum optime , & doctissime.

Pifis , Kalendis Aprilis , anno M.DCC.XLVI.







7-25-1911



